

МУШФИҚ КОЗИМИЙ

Қўрқинчли

Техрон

РОМАН

I ва II китоб
Қайта нашри

ТОШКЕНТ

Гафур Гулом номдаги Адабиёт ва санъат нашриёти
1990

И (Форс.)
К 58

Биринчи китоб таржимони академик
шоир *Ғафур Ғилом*.

Иккинчи китоб таржимони *Сотиболди Йўлдошев*

Козимий, Мушфиқ.

Қўрқинчи Техрон: Роман. I ва II китоб/ [Форс тилидан Ғ. Ғилом ва С. Йўлдошевники тарж.].—Т.: Адабиёт ва санъат нашр., 1990.— 544 б.

«Қўрқинчи Техрон» икки китобдан иборат бўлиб, уларнинг ҳар бири мустақил сюжетга эга бўлган алоҳида романлардир. Бош қаҳрамон Фаррухнинг сарташвиш ҳаёти ва Маҳинга бўлган соф муҳаббати икки романи бир-бирига узвий боғлаб турувчи умумий сюжет чизигини ташкил этади. Жавод ва Жалолатнинг муҳаббатлари эса Фарруҳ билан Маҳиннинг рўёбга чиқмаган гўзал орзуларини гўё ниҳоясига етказгандек бўлади.

Муаллиф ёшларнинг пок муҳаббатларини тасвирлаш орқали асримиз бошида мустабид шоҳ салтанатидаги Эрон ҳаётини ҳаққоний акс эттиришга ҳаранат қилади.

Казем, Мушфиқ. Страшный Тегеран: Роман: В 2 книгах.

И (Форс.)

К $\frac{4703020000}{M 352(04)-90}$ Доп 90

ISBN 5-635-00980-8

БИРИНЧИ КИТОВ



*Форс тилидан
Ғафур ҒУЛОМ таржимаси*

ЧАЛАМАЙДОН ҚАҲВАХОНАСИ

1330 (1916) йил шаъбон-ул муаззам ойининг 17-си, душанба куни кечга яқин дунёда қадимий маданият макони ва улуғ шоирларнинг ватани бўлмиш Эрон мамлакатининг пойтахти — Теҳрон шаҳри бўм-бўш ва осойишта эди. Кучли шамол эсмоқда, кўчаларни чанг-тўзон қоплагани учун қатнов сийраклашган. Муҳтожлик уйдан чиқишга мажбур қилган, аҳён-аҳёнда учрайдиган йўловчиларгина чанг-тўзонга қарамасдан шаҳарнинг турли тарафларига қараб кетар эдилар.

Теҳрон анча катта шаҳар бўлса ҳам фақат шимолий қисмидагина извош ва кўнкалар бор; шаҳарнинг фақир хонадонлари яшайдиган жанубий қисмидаги кўчалар эса жуда тор, эгри-бугри, ўйдим-чуқур.

Бу томонда, яъни шаҳарнинг жануб тарафида Парижнинг Кур де Миракль кварталига жуда ҳам ўхшаб кетадиган Чаламайдон деб номланган бир маҳалла бор. Париждагидай, бу ерда ҳам кўп вақтлардан буён маданиятдан бутунлай четда қолганларгина эмас, балки инсоний қиёфасини тамоман йўқотган кишилар яшар эдилар. Пучак пул ва арзимаган нарса учун, масалан, ашур ойидаги диний маросимда қайси бир тўданинг туғ ва алами олдинда бориши кераклиги ҳақида баҳслашиб, бир-бировлари билан қийичоқ бўлишга тайёр турган, қариндош-уруғларини ўлдирадиган ва тўнайди-ган кишилар шу томонда яшайдилар. Ҳатто шу кунларда ҳам бўнақанги одамларни ўша ерда, айниқса «Бобо Наврўз Али» чорраҳасига яқин жойларда кўплаб учратиш мумкин.

Бу ернинг аҳолиси сиёсатдан узоқдир. Техроннинг шимол тарафида ҳар қандай ҳодиса юз берса ҳам, ҳатто бутун оламни қизиқтирадиган ҳодиса, масалан министрлар совети ўзгарса ҳам бу ернинг аҳолиси ундан хабарсиз қолаверади.

Авахтадан қочишга муваффақ бўлган ўғри ёки жиноятчини полиция ахтариб, кўпинча шу ерлардан топарди. Бу маҳалланинг турли ерларида бирталай ҳар хил қаҳвахоналар бор. Қаҳвахоналарнинг ҳар бири жиноятчиларнинг бошпанаси эди.

Ҳикоямиз бошланган куни мазкур қаҳвахоналарнинг бирида бир туркум одамлар йиғилиб суҳбатлашмоқда эдилар. Тамаки, тарёк ва самоварнинг тутуни қаҳвахонани бутунлай қоплаб олганидан деярли чала қоронғи эди. Қаҳвахона деразасининг атиги биргина кўзида чанг босган бир ойна бўлиб, қолган уч кўзига қоғоз ёпиштирилган эди. Шу ойна солинган ягона кўздан кўчада кўтарилаётган чанг-тўзон кўриниб турарди. Ичкарида ҳаво шу қадар бузилган эдики, одатланмаган киши кириб қолгудай бўлса, кўнгли ағдарилган бўларди.

Қаҳвахонадагилар турли-туман кишилардан иборат бўлиб, диққат билан қараган одам бу ерда энг пастки табақа ва касб-кордаги вакилларни топиши мумкин эди. Уларнинг кўпчилиги ҳар ер-ҳар ерда давра қуриб, чой ичмоқда, ё наяки қилмоқда ёки суҳбатлашмоқда эди. Фақат бир-кишигина бир бурчакка қисилиб хаёлга чўмган ҳолда папирос чекар, гапга аралашмас эди. Бу йнгирма беш ёшларга кирган, буғдой рангли, чақноқ қўй-кўзли йигит эди. У жилмайган чоғида юпқа лаблари остидан икки қатор оппоқ тишлари кўриниб кетарди, лекин бу табассум унинг ҳазин қиёфасига унча ярашмагандай туюларди. Унинг энгил-боши тўзиган ва исқирт бўлиб, қаттиқ муҳтожликка тушиб қолганидан дарак берарди.

У хаёл дарёсига гарқ бўлиб ўтирар экан, атрофидаги нарсаларни пайқамаетганга ўхшар, фақат аҳён-аҳёнда тевааракка кўз ташлаш учун бошини кўтарарди-ю, яна хаёлга толарди.

Сўнги папиросини олиб чекмоқчи бўлганида унга бир киши яқинлашди. Бу қаҳвахона эгаси эди. Бу киши гавдаси беўхшов, бошига катта намат кулоҳ кийган, кўзлари шокосадай, хамак бурун, бадбашара, одам ту-

шида кўрса қўрқадиган чол эди. У қўлини йиғитнинг елкасига қўйиб:

— Ҳа, Жавод, нега бугун жуда хафа кўринасан?— деди.

Жавод бошини хаёлдан аранг кўтариб:

— Ҳеч гап йўқ, амакижон. Бўлмагур хаёллар миямни қотириб турган эди. Сизни кўришим билан ёмон хаёлларим тарқаб кетди,— деб жавоб берди.

— Йўқ, Жавод, жуда ҳам унчалик бўлмаса керак,— деди чол,— бир неча кундан бери хафа кўринасан. Нима, менга ростини айтгинг келмаяптими? Юрагингдаги дардингни менга очиб айтмаслигинг яхши эмас.

— Йўқ, амакижон, айтишга арзийдиган ҳеч гап йўқ. Бир оз тобим қочиб турибди.

— Бу гапларинг ҳаммаси ёлғон. Мени яқиллатмоқчи бўласан. Қани айт-чи, нега бир неча кундан буён ишга бормаё юрибсан?

Жавод қайғули овоз билан деди:

— Тўғриси айтсам, амаки, бир неча кундан бери уста билан орамиз бузилиб юрибди. Бундан кейин у билан ишлашга тобим йўқ.

Чол кулди:

— Ҳамма гап шуми? Эй иним, хоҳласанг устани шу ерга чақиртираман. Текинга бир-икки стакан чой берман-у, сизларни яраштириб қўяман.

Жавод шошиб-пишиб:

— Йўқ, йўқ, қўйинг, асло ундай қилманг,— деди.

Чол Жаводнинг кейинги сўзларини эшитмагандай бўлиб:

— Хафалигингнинг сабаби шуми ҳали?— деди.

— Ҳа, амакижон,— деди Жавод,— ўзингиз яхши биласизки, устандан оладиган тўрт-беш қирон¹ пулга кеч-қурунлари ишдан қайтишимда нон олиб, онам, опам ва опамнинг икки боласини боқардим. Уста билан аразлашиб қолганимга уч кун бўлди. Шундан буён уйга икки қўлимни бурнимга тикиб боряпман. Мени қайғуга солган нарса ана шу. Қанча қидирсам ҳам, ҳалигача бирорта иш тополганим йўқ. Бундан кейин ҳам иш топа оламанми, топа олмайманми, билмайман.

Бу чолнинг исми Бобо Ҳасан бўлиб, ташқи қиёфасидан яхши, раҳм-шафқатли кишига ўхшамаса ҳам, асл-

¹ Қирон — тахминан бир танга.

да жуда раҳмдил, кўнгилчан ва меҳрибон бир киши эди. Жаводнинг гаплари унга ниҳоятда таъсир қилди. Бечора Жаводнинг аҳволига қаттиқ ачинган. Бобо Ҳасан беихтиёр унинг қўлини ушлаб:

— Уғлим, сабр қил, хафа бўлма,— деди ва чўнтагидан иккита кумуш танга чиқариб, Жаводнинг қўлига берди.— Ҳозирча шу пулга бир оз нон олиб, уйингга олиб бор. Худо хоҳласа, тез фурсатда сенбоп бирор иш ҳам топиб берарман.

Жаводнинг катта кўзлари жиқ ёшга тўлди:

— Раҳмат, амакижон. Сизнинг бу одамгарчилик ва меҳрибонлигингиз эвазига нима десам экан? Бу марҳаматингиз билан мени хижолат қилиб қўйдингиз.

Бобо Ҳасан ўз ҳаяжонини сохта кулги билан яширишга уриниб деди:

— Уғлим, ҳозир бу гапларнинг ўрни эмас, худо хоҳласа, яқинда сенга яхши бир иш топиб берарман, ана ўшанда...

Чол шундай дегач, устига самовар, стаканлар, чай ва қандлар қўйилган супача олдига бориб, дастёрига аллақандай йўл-йўриқ кўрсата бошлади.

Жавод ёлғиз қолди. Ҳозир ёнига оз-моз пул тушган бўлса-да, лекин ҳали ҳам қайғули хаёллари уни тарк этмаган эди.

Муҳтарам ўқувчилар ҳикоямиздаги воқеалардан батафсилроқ хабардор бўлсинлар деган мақсадда шу ерда Жаводнинг мухтасар таржиман ҳолини баён қилиш учун ўзимда мажбурият ҳис этаман.

Тахминан бундан олти йил бурун, Техроннинг Саалалаж деган маҳалласида, сиртдан қараганда бирор хунармандники бўлиши мўлжал қилинган бир уйда уч эркак, икки хотин ва икки боладан иборат бир оила яшар эди. Эркаклардан биринчиси оила бошлиғи — қирқ беш ёшда, чиройли, йирик гавдали, жуссаси келишган бир одам эди. Иккинчиси ўттиз ёшларда, учинчиси эса йигирма ёшларда эди. Хотинлардан бири қирқ, иккинчиси йигирма уч ёшларда, болаларнинг бири ҳали уч ёшга тўлмаган, сўнггиси эса эмизикли эди.

Бу оиланинг тирикчилиги анча дуруст эди. Оила бошлиғининг исми Уста Али, хунари кавушдўзлик бўлиб, Техроннинг танилган дўзандалардан ҳисобланарди. Ўттиз ёшлардаги йигит Жаводнинг поччаси, Уста Алининг кўёви бўлиб, исми Ризо эди. Болалар бўлса, Уста

Алининг набиралари, Жаводнинг жияилари, яъни оласининг болалари эди.

Бу оила Уста Алининг дўконидан келадиган даромад ва Ризонинг кундалик топадиган пули билан ўзига тинч ва хушвақт кун кечирар эди. Жавод у пайтларда отасининг хушбарини ўрганаётган бўлиб, ҳали отасидай уста бўлиб етишмаган эди.

Бу пайтларда Техронда ичтерлама касали қутурмоқда эди. Бу касаллик ҳар кун ҳали у-ҳали бу бахтсизнинг гирибонига ёпишиб, ўлим чуқурига юмалатарди, бизнинг Уста Али ҳам шу касалга йўлиқди. Табибларнинг дори-дармонлари ҳеч қандай фойда бермади, беш кун ётиб ўлди ва бу ўлим оилани зўр мусибатга дучор қилди. Гўё бу қайғу камлик қилгандек, оилада яна бошқа бир бахтсизлик юз берди. Уста ўлгандан уч кун кейин касаллик Ризонинг ҳам ёқасига ёпишди. Хотинлар ва Жаводнинг бу фалокатлардан қанчалик қайғу ва изтироб чекканларини ҳар ким ҳам тасаввур қила олади. Фалак буларнинг қайғу ва аламларини камайтириш ўрнига, яна бир қат ошириб тушди. Яъни, етти кундан сўнг бечора Ризо ҳам оламдан ўтди.

Қутулмаган бахтсизликлар натижасида бу оиланинг қандай аҳволга тушиб қолганини тасвир қилиш мумкин эмас. Жаводнинг оладиган иш ҳақи бу оиланинг тебратувига етарли бўлмаганидан, ҳар кун уй-рўзгор асбобларини секин-секин сота бошладилар. Бора-бора асбоблари ҳам тугади. Қашшоқликнинг шафқатсиз панжаларида эзилган бу оила, ҳар ким-ҳар кимдан қарз олмоққа мажбур бўлди. Оқибат, икки йилдан кейин Сангалаж маҳалласидаги ҳовли ҳам қарзни тўлаш учун сотилди. Келиб, шу ифлос маҳалладан икки хонали тор бир уйни ижарага олиб, кўчиб келдилар. Жавод бўлса кавушдўзлигини ташлаб, бир бинокор устанинг ёнида иш бошлади ва ҳар кун оладиган беш қирон иш ҳақи билан бу оиланинг тирикчилигини бир амаллаб тебратар эди. Шу аҳволда уч йил ўтди. Бу бахтсиз оила учун шунчалик узун бир муддатда ҳеч қандай нажот йўли очилмади. Бундан ташқари, арзимаган бир нарса устида уста Жавод билан нари-берига бориб, уни сўкди, ҳақорат қилди. Жавод бундай ҳақоратга чидаёлмай, устадан ажралди ва бир умр унинг олдига бормасликка ўз-ўзига сўз берди.

Муҳтарам ўқувчиларимиз энди бечора Жаводнинг

қаҳвахонадаги аҳволни ва нима учун бунчалик қайғули ўйларга толиб кетганининг сабабини тушунган бўлсалар керак.

Нон олишга пули бор бўлганига қарамай, Жавод қайғули хаёлларидан халос бўла олмас, гўё қотиб қолган одамлардай, кўзларини ерга тикиб ўтирар эди. Бирданга елкасига бир қўл текканини сезиб, бошини кўтарди. Қаршисида қўшни бозорчадаги боққолнинг шогирди, ўн тўрт ёшлик таниш бир болани кўрди.

— Бозорчада сизни бир киши кутиб турибди. Мени чақириб келишга буюрди,— деди бола.

Жавод ўрнидан туриб, бола билан бирга қаҳвахонадан чиқди-да, нотаниш бир йигитга дуч келди.

II б о б

МУҲТОЖ БУЛСАНГ, ҲАР ИШГА КҮНАСАН

Нотаниш йигит рангпар юзли, қўнғир жингала сочли, қора кўзли, ингичка ва қирра бурунли эди. Унинг эғнида сардорий деб аталадиган қора камзул, бошида «кулоҳи низомий» деб аталувчи қора намат кулоҳ бор эди. Бу йигитга диққат билан қараган одам уни бу маҳаллалик бўлмаганлигини ва бу ерга аниқ бир тилак билан келганлигини англади; унинг биринчи қарашдаёқ кўзга ташланадиган оппоқ пахтадай қўллари ва ўзини улуғвор тутиши унинг аслзодалар хонадонига мансуб эканидан дарак берарди. Кўзлари бу йигитга тутиши биланоқ, Жавод ундан:

— Ого, менда бирор ишингиз борми?— деб сўради.

— Ҳа, шундай,— деди нотаниш йигит ва яширинча ишора қилиб, бу ерда сўзлашиш мумкин эмаслигини англатди.

— Бу ерда тилагингизни очиқ айтишни истамасангиз, юринг, бизни кига борамиз, ҳовлим шу яқин ўртада, нариси билан икки юз қадамча келади. Марҳамат қилинг, ўша ерда гаплашамиз,— деди Жавод.

— Бу ерда, албатта, сўзлаша олмаймиз. Лекин сенни кига ҳам бора олмаймиз, сен менинг орқамдан эргашиб келавер,— деди нотаниш йигит ва Жаводни орқасидан борйшга имо қилди.

Ҳар икқовлари иккита тор ва қисқа кўчалардан

Ўтиб, илгари таъзия жойи бўлганлиги кўриниб турган кенг бир майдончага етдилар.

Бу маҳал шамол бир оз тўхтаган бўлиб, ёмғир майдалаб ёғар эди. Кеч кириб қолганлигидан кишиларнинг қатновлари ҳам анча сийраклашган. Бу икков майдоннинг бир тарафига бориб, бир тош супага ўтирдилар.

Нотаниш йигит бир оз жимликдан кейин бошини кўтарди-да, Жаводнинг қўлларини қўлига олиб, кўзига диққат билан тикилди. Бир оз ўтгач, гўё ишонч ҳосил қилгандай:

— Янглишмасам, исминг Жавод бўлса керак-а?— деди.

Жавод гамгин товуш билан:

— Тўғри, оғо, исмим, айтганингиздай, Жавод,— деб жавоб берди.

— Ундай бўлса, сенга тўла ишонсам бўлар экан,— деди нотаниш йигит.

Жавод бу хилдаги гапларга унча одатланмаганидан паришонлик билан:

— Бунисини билолмадим. Агар ишонган бўлсангиз, истагингизни айтинг. Ишонмасангиз, яна ихтиёр ўзингизда— деди.

— Йўқ, йўқ! Мен биринчи кўргандаёқ сендан хотиржам бўлдим. Энди, агар тинглашни истасанг, бир оз жиддийроқ сўзлашамиз.

— Марҳамат, ихтиёр сизда,— деди Жавод.

Нотаниш йигит, ҳеч ким йўқми, деган мулоҳазада теварагига диққат билан аланглаб олгач, бошини қўли орасига олиб, чуқур ўйга ботди. Бир неча дақиқа жимжитлик чўкди. Бу орада Жавод ҳам бир сўз демасдан, ўзининг эски хаёллари билан банд бўлди. Йигит бошини кўтарган чоғида пешанасини майда тер қоплаган эди, у Жаводдан сўрай бошлади:

— Бунчалик мушкул аҳволдан бир йўла қутулиш учун мўмайгина пул ишлаб олишни истайсанми?

Жавод оғир хўрсиниб:

— Оҳ, оғо, бу менинг айни муддаойим-ку,— деди.

Нотаниш йигит гапини давом эттирди:

— Мен сенинг ўтмиш турмушингдан ҳам, ҳозирги аҳволингдан ҳам яхши хабардорман. Қандай қилиб шундай бахтсизликка йўлиққанингни, етимлигингни ҳам биламан. Кеча қаҳвахона олдидан ўтар эканман,

сени кўриб, ўтиришингдан қанчалик фалокат ва бахтсизликка йўлиққан бир одам эканлигингни англадим... Киришмоқчи бўлган ишимга сени муносиб одам деб санаганим учун қидирдим, ўтмиш ҳаётингни бўлса, кишилардан суриштириб билдим.

Жавод дарров нотаниш йигитнинг сўзини кесиб деди:

— Ого, ундай бўлса, тирикчиликда қанчалик қийналиб қолганимни ва пул топмасам, бу оғир аҳволдан чиқа олмаслигимни билган бўлсангиз керак.

— Ҳа, албатта. Демак, мен киришмоқчи бўлган ишга қўмаклашувга тайёрсан ва шу йўл билан пул топини истайсан, шундайми?

— Шундай, ого, мен ҳар қандай буйруғингизни бажаришга тайёрман.

Йигит бу сўзлардан сўнг ҳамёнини чиқарди-да, ундан тўрт дона уч туманлик¹ қоғоз ақча олиб, Жаводга узатди.

— Ҳозирча мана шу пулни олиб тур. Иш давомида яна пул бериб тураман. Фақат шуни эсингдан чиқармаки, меңинг сенга буюрадиган юмушим бошқа ишларга ўхшамайди, шунинг учун ҳар парсага тайёр бўлиб турасан. Мен нимани айтсам, шунга қараб иш тутасан.

Жавод ҳеч нима ўйламасданоқ:

— Жоним билан тайёрман,— деб жавоб берди.

Нотаниш йигит, бошқа одамларнинг кузатувидан ҳадиксираб, бир неча муддат теваракка диққат билан кўз югуртирди ва хотиржам бўлгандан сўнг, секингина сўзлай бошлади:

— Мен одам ўғирлаш ёки битта-яримтасини вақтинча яшириш каби ишларнинг уддасидан чиқа оладиган эпчил ва ботир йигитнинг ёрдамига муҳтожман, иншоолло, балки сенинг ёрдаминг билан истагимга ета оларман. Лекин, бу иш ҳақида батафсил гапириб бериш учун бу ер ноқулай ҳамда вақтим ҳам етарли эмас. Ҳозирги асосий масала, менга ёрдам беришга рози бўласанми, йўқми, ана шуни билишим керак.

Қашшоқликдан қаттиқ қийналган Жавод ғамгин товуш билан деди:

— Ого, бу оғир, сиқик турмуш мени шунчалик қийнаганки, ҳатто бирорта жиноий иш қилишдан ҳам той-

¹ Туман — икки сўмга тенг.

майдиган даражага етганман. Сизнинг тўғри одам эканингиз юзингиздан ҳам билиниб турибди. Шунинг учун сизга ёрдам бериш керак, балки бу иш савоб ҳам бўлар.

— Балли, Жавод! Сен менинг фикримни тўғри англадинг, ёмон ният билан бундай ишга киришмасдим. Шунингдек, бу ишни довураклигимни намойиш этиш учун ҳам қилаётганим йўқ. Бу — қалбимнинг амри...

— Ого, тушунтириб ўтиришнинг ҳожати ҳам йўқ. Мен аввалданоқ аҳволингизни англадим, ошиқсиз ва бебахтсиз! — деб хитоб қилди Жавод.

Йигит бир оз жим қолгандан сўнг, сўрай бошлади:

— Ҳа, Жавод, янглишганинг йўқ... Хўш, менга ёрдамлашувга тайёрмисан?

— Ого! Тайёрман, дейиш ҳам гапми, сизнинг истагингизга етишингиз йўлида жонимни ҳам аямайман.

— Ундай бўлса, тур, онанга бориб мен бир кишига хизматга кирдим, хўжайиним сафарга тайёрланяпти, мени ҳам ўзи билан бирга олиб кетаётир, дегин.

— Ого, чиндан сафарга чиқамизми? — деди Жавод.

— Сафарга чиқишимиз ҳам мумкин. Балки эрта тонгда жўнармиз. Фақат бу сафаримиз бир-икки кундан нарига бормас. Лекин, менинг ёнимда кеча-кундуз бирга бўлишнинг лозим бўлгани учун сафарга кетаётирман, деганинг яхшироқ.

— Жуда яхши, ого! Шундай бўладиган бўлса, ҳар ой оилам учун пул юбориб туриш лозим бўлиб қолади-ку?

Йигит:

— У тарафи менинг ишим, сен ҳозирча уйингга бор. Эрта билан соат олтида менинг олдимга кел! — деди ва оғзини Жаводнинг қулоғига яқинлаштириб, уйининг қаерда эканини айтди.

— Тушундингми? — деб сўради.

Жавод тушунганлигини боши билан тасдиқлади.

Қош қораймоқда эди. Жавод ўрнидан турди-да, нотаниш йигит билан хайрлашиб, жўнади. Йигит ҳам шаҳарнинг шимол томонига қараб кетди... У, бу ирқит маҳалладан чиққандан кейин, яна тахминан ўнларча майда, иккита катта кўчани ўтиб, бозор бошига келди. Қамбар номли қаҳвачининг дўкони ёнига келиб, битта извош чақирди-да, извошга тушди. Файтон шаҳарнинг шимол томонига қараб кетди. У Носирия, Лолазор ва Саъдий хиёбонларидан ўтиб, Дарвозайи давлат ёнида тўхтади. Йигит извошдан тушиб, рўнарадаги кўчага

кирди. Кўк рангга бўялган катта эшикка етиб, эшикни қоқди. Сал ўтмай эшик очилиб, нотаниш йигит ичкарига кирди. Эшик қайтадан ёпилди.

III боб

НОТАНИШ ЙИГИТ КИМ?

Бу воқеадан ўн йил бурун, кўкламнинг хушҳаволи кунларидан бир куни, туш чоғида Теҳроннинг шимоли-ғарбий томонидаги киши кўнглини мафтун қиладиган баланд сарв дарахтлари билан ўралган ва сўлим қизларнинг юзлари янглиғ ранго-ранг гўзал чечаклар билан безалган бир қаср олдида бир қиз, бир ўғил — икки бола ўйнамоқда эдилар.

Қизча сариқ сочли, кўк кўзли, қирра бурун, юпқа лабли ва оқ юзли бўлиб, ўйинга ниҳоятда берилиб кетган эди.

Ўғил бола қўнғир сочи, қора кўзлари, қирра бурни ва рангсизроқ қоши билан мазкур қизалоққа ўхшаш кетарди. Қувноқлик барқ уриб турган чехрасидан ақл ва зийракликнинг нишонлари кўриниб турар эди.

Шу пайтда, қаср айвонида икки хотин болаларнинг ўйинларини томоша қилишиб, гаплашиб ўтиришарди. Уларнинг биринчиси, яъни ёши улугвор кўрингани ўрта бўйли ва рангпар юзли бўлиб, қиёфасидан у қадар фаҳм-фаросатли кўринмас ва ҳар нарсага лаққа тушиши яққол сезилиб турарди.

Иккинчиси, баланд бўйли, буғдой рангли, шахло кўзли эди. Унинг қиёфасидан турмушни яхши биладиган ва ақлли бир хотин экалиги кўриниб турар эди.

Иккинчи хоним биринчисига қараб гапирарди:

— Ф... хоним, болалар бир-бировларини қандай севишларини кўряпсизми?

Биринчи хоним жавоб берди:

— Ростдан ҳам шундай, мен ҳам шуни ўйлаб турибман, ўглингиз билан менинг қизим бир-бировларини жуда ҳам яқин кўрадилар. Ўглингиз бу ерга келиб кетгунича қизим Маҳин ундан бир нафас ҳам айрилгиси келмайди.

Иккинчи хоним:

— Оҳ, қани энди худо насиб этса-ю, шунчалик севги, бир кун келиб, сизнинг қизингиз билан менинг ўғлим-

нинг хушбахтлигига сабаб бўлса, қандай яхши бўлар эди-я!— деди.

Ф... хоним сал калондимоғлик билан жавоб берди:
— Худо нимани хоҳласа, шу бўлади-да...

Иккинчи хоним айтган сўзига пушаймон бўлгандай, шошиқ жавоб берди:

— Хоним, бекорга безовта бўлманг. Менинг ўғлим ҳеч маҳал кўнглингизни ранжитмайди, у ҳам, мен ҳам ҳеч вақт сиздан шундай илтимосни қилмаймиз.

Ф... хоним деди:

— Йўқ, хоним! Мен шу орзунинг рўёбга чиқишини истардим. Лекин эримни нима қилай, у ниҳоятда шуҳратпараст одам. Вақти келиб, бу ишга у рози бўлмай қоладими, деб қўрқаман.

Иккинчи хоним синиқ бир овоз билан жавоб берди:

— Алҳамдулилло, ҳозирча бизнинг бошимизга бундай хаёл келгани йўқ. Аҳволимиз шу кўйича кетаверса, бундай хаёлга тушувимиз асло мумкин бўлмайди.

Бу гаплар Ф... хонимга жуда таъсир қилиб кетгани учун, бирданига:

— Бу масаланинг унча аҳамияти йўқ. Худо хоҳласа, вақти соати етганда ҳамма иш ўз жойига қарор топиб кетади,— деб жавоб берди. Кейин сўзнинг оҳангини ўзгартириб, меҳрибон овоз билан гапира бошлади:— Уларга қаранг, бир-бирларига шу қадар берилиб ўйнаётibdиларки, уларни бу ўйиндан ажратишга ҳеч нарсанинг ҳам кучи етмайди.

Иккинчи хоним суҳбатдоши сўзларига эътибор бермаганлиги башарасидан маълум бўлгани ҳолда:

— Тўғри!— деб ғайри шуурий равишда жавоб берди.

Ф... деб номланган хоним билан иккинчи хоним бир-бировлари билан қариндошлар. Иккинчи хоним Ф... хонимнинг акасига хотин. Демак Ф... хоним иккинчи хонимга қайинсингил бўлади.

Ф... хонимнинг эри бу кун мартабаси улуғ одамлар табақасидан саналса ҳам, ёшлик чоғларида ҳеч нимаси йўқ эди. Фақат бир қатор тубан ва виждонсизлар каби, у ҳам қонунсиз йўллар билан анчагина давлатни қўлга киргизган эди. Ҳозирда эса, йилига ўн беш-йигирма минг туман даромади бор эди. Бу хилдаги одамлар, ҳар қандай йўл билан бўлса ҳам, минг турли қийналишлар билан бўлса ҳам шундай бир мансабга етганидан сўнг ўтмиш кунларини бирданига ўнутиб юборадилар. Ўзла-

рини илгаридан шундай давлатли деб ҳисоблай бошлайдилар. Ҳатто турмушнинг имкон бермагани жиҳатидан давлат орттиролмаган камбағал ака-укалари билан бирга юришдан, ўтириб-туришдан ҳазар қиладилар ва уларни эсдан чиқара бошлайдилар. Улар бошқа иш билан машғул бўладилар. Энг охири, бундайлар учун бу кунги Эронда оддий бир иш деб ҳисобланган катта поралар тиқштириш йўли билан бўлса ҳам, мамлакатнинг юқори мансабларидан бирини эгаллаб, яъни «фалон» вазирликда катта ўғрилardan бўлиб олиш, бошлиқлардан саналиш жуда ҳам аҳамиятли бир масала ҳисобланади.

Унинг хотини Ф... хоним, «буюк» эри каби хасис ва суқ бўлмаса ҳам, эронлик хотиндан бошқа бир нима эмас эди. Яъни, яшамоқ ва ижтимоий масалалардан бир нечасини билмоқ у ёқда турсин, ҳатто ўз уйининг теварагидан бошқани билмас ва эри билан ҳам-касб ва ҳамсуҳбат бўлган бир тўда ўғрилardan бошқа кишини одам санамаслик ва тубан кўришлик даражасигача бориб етар эди. Ҳозирги ҳолда эскиликдан қолган биттагина эсдалиги бўлса, у ҳам шу эдики, акасининг уйида яшаб турган ва ҳали ўн икки ёшда бўлган вақтида уларнинг уйига бир неча хотинлар келиб, мевалар еб, шарбат ичганларидан кейин, уни қўйиб кетишган ва уч кундан сўнг уйдаги хизматкордан бири:

— Хоним, сизга совчи келди, сизни эрга берадилар,— деган эди.

Бу гапларни эшитган Ф... хоним, ёхуд ҳақиқий оти Маликтож хоним бўлган бу аёл, бир нарса тушундими? Пешонасига нималар битилганини англадими?

Ҳар ҳолда ҳеч нима тушунмаган бўлса керак.

Никоҳ тўйида тушунмагани ҳолда «ҳа...» дегандан сўнг уч кун ўтгач, бир неча қавму қариндошлари билан биргаликда куёв томонидан келган бир неча ёт хотинлар билан барабар уни извошга ўтқазиб, эр уйига келтирадилар.

Маликтож хонимнинг бахти шу нуқтадан эдики, у тубан эрининг феъл-атворига тезда кўникиб олган, турмуш ишларида унга тугал қарам бўлган ва энг охири бир неча муддатдан сўнг чиройли қиз туғиб берган эди.

Жаҳолатда тарбия топган бу бечора хотиннинг ту-

шунчаси шу қадар тор эдики, ҳатто яшаган уйининг деворларидан ташқари ҳамма ёқдан бус-бутун хабарсиз эди.

Юқорида айтганимиздай, бир ажойиб йўл билан, ўзи буткул хабарсиз ва ризоси олинмасдан, ҳатто билмай туриб оғойи Ф... уссалтананинг¹ рафиқаси бўлиб қолган хотин ишқ ва муҳаббат нималигини билмаслиги билан баробар, икки киши ўртасида бўладиган муҳаббат ҳисларини ва уларнинг бир-бировлари суҳбатидан оладиган завқларини сезиш эмас, балки хаёлига ҳам келтира олмас эди. Чунки, завқ ва қайғунинг мазасини тотмаган киши ўзга бировларнинг завқ ва қайғусидан таъсирланмайди. Ҳузур, сайр-саёҳат учун автомобилга-тушиб олган бир амалдор қирқ саккиз соат оч қолган бир камбағалнинг ҳолини сезолмаслиги табиийдир.

Эндиги Маликтож хоним ҳам ўз қавм-қариндоши, эгачи-сингилларини бус-бутун ёдидан чиқариб юборган эди. Отаси ўлгандан сўнг, акасининг уйида етим яшаган пайтида кечирган оғир кунлари энди буткул ёдидан кўтарилиб кетган. Шундай гўзал ва тўқ турмуш ўтказиб тургани ҳолда, акаси ойлар бўйи унинг эсига ҳам тушмас, баъзида ёдига тушиб қолса ҳам, унинг исмини камситиш билан тилга оларди.

Қисқаси, нима бўлса ҳамки, эрига жуда ҳам муносиб бир хотин эди.

Биз ҳикоя қилаётган куни келинойиси Маликтож хонимни ва эрини кўргани келган эди. Уларнинг суҳбатларидан керакли ўринларини ўқувчиларимизга тушунтирдик. Энди уларни ўз ҳолларига қўйиб, бу икки боланинг ҳаракатларини кўздан кечирайлик.

Қизалоқнинг исми Маҳин, ўғилнинг исми эса Фаррух эди. Булар чарчашни билмасдан югурмоқда эдилар. Гоҳ ўғил бола қизалоқнинг, гоҳ қизалоқ ўғил боланинг орқасидан қувламоқда эди. Агар осмон узилиб ерга тушганда ҳам уларни ўйиндан тўхтатолмас, фақат чарчоқликкина ўйинларидан ажратиши мумкин эди.

Бироқ, ёшликда одам чарчаш нималигини билмайди.

Бу ерда ўйнаётган бу икки боланинг ҳаракатларига, айниқса Фаррухнинг ҳолига диққат билан қаралса, унинг юзида баъзида севинч, баъзида қайғу ифодаси кўзга аниқ ташланарди.

¹ ... уссалтана — ҳокимият арбоби (Эрон шоҳини даврида жорий бўлган қуйи вазирлик унвонларидан бири). — (Ред).

Бу нима эди?

Фаррух кичик ёшиданоқ Маҳинни севар эди десак, кўплар ўн бир-ўн икки ёшдаги болаларда севги қаерда бўлсин? деб бизга эътироз билдиришлари мумкин. Бироқ, нима бўлса ҳам бўлсин, шу пайтда Фаррух ўз қалбиди Маҳинга ҳисбатан айрича бир майл сезмоқда эди. Чунки, Маҳиннинг севинчига севинч билан қўшилиб, у қайғурганда бунда ҳам маҳзунлик кўринар эди.

Бундай покиза ҳисга нима деб от қўяйлик?

Бунга пок ва юксак бир севгидан бошқа бир нарса дейиш мумкинми?

Фаррух ўйнар экан, Маҳиннинг теварагидан парвонадай айланар эди. Унинг қўй кўзлари қизнинг мовий кўзлари билан тўқнашар экан, электр токи урган одамдай, турган жойида бир муддат қотиб қолар, бечора бола, у пайтларда ҳеч нима тушунмаса ҳам фақат Маҳинни севарди, доим у билан ўйнашга тайёр ва фақат у билан сўзлашувни истарди. Маҳин ҳам Фаррухнинг бирга бўлуvidан жуда севинарди.

Маҳин кўп чопганидан чарчади-да, скамейкалардан бирисига келиб ўтирди; Фаррух ҳам унинг чарчаганини кўрган замон, уни суяб, бошини кўксига босиб қучоқлади.

Бу пайт Маҳиннинг заъфар сочлари қордай оппоқ юзларига тарқалиб, унга ортиқ даражада гўзаллик берар эди.

Фаррух гўзал севгилисини бу ҳолда кўргандан сўнг, юрагида аллақандай бир сезги туйди. Уни бағрига яна қаттиқроқ босиб, бошини унинг тиниқ ва чиройли юзига яқинлаштирди ва ихтиёрсиз қип-қизил лабларидан бир ўпиб олди-да, деди:

— Оҳ... мен сени қанчалик севишимни билсанг эди!

IV 606

НАРВОН

Орадан етти йил ўтди.

Тун. Ҳаво ниҳоятда мусаффо. Осмондаги юлдузлар элас-элас кўзга чалинарди, чунки мовий осмон ой ёғдусидан мунаввар эди.

Ана шу дилкушо кечада ноумид ошиқи шайдонинг

қалби теракнинг баргидай титрар, кўз ешлари шашқатор оқиб, юзларини юварди. У нега йиғлаяпти, нега бу қадар маҳзун?

Маъшуқаси висолига эришишга умид боғлай олмаган ошиқ маҳзун бўлиб йиғламайдими, ахир?

Бутун олам унга маъшуқаси учун керак-да. Жаҳоннинг завқу сафосидан ёрнинг висол базмидагина баҳраманд бўлиш мумкин. Хушҳаво, тоғлар ва дашту биёбонлар ҳамда дунёдаги барча шоду хуррамлик маҳбубаси кўксига бош қўйиб турган чоғида унга лаззат бахш этади.

Ҳақиқий ошиқ маъшуқасининг хиёл жилмайишидан мамнун бўлиб, хандон ташлаб кулади, унинг андак қайғусини кўрса зор-зор йиғлайди. Маъшуқаси суҳбатидан бебаҳра ошиқ бахтсиздир. Ҳижрон маҳалидаги ойдин кечанинг ва ҳузурбахш шабаданинг унга нима кераги бор. Аксинча, у бутун олам ҳамдардлик қилиб зулматга ўралишини ва йиғлашини истарди.

19... йил баҳорининг ана шундай кечаларидан бирида катта боғ девори олдида бир йигит турарди. У гоҳ тева-рак-атрофига аланглар, гоҳ бир неча қадам юрарди-да, турган жойига қайтиб келиб, зўр диққат билан боғ ичига қулоқ соларди.

Бу кечада, яъни қуёш ботганидан икки соат кейин атрофдан тиқ этган товуш эшитилмасди.

Шу алпозда чорак соат ўтди. Йигит деворга яқин бориб ниҳоятда зўр диққат билан ичкарига қулоқ солди, лекин бир дақиқадан сўнг яна аввалги ерига қайтиб, секингина ўз-ўзи билан сўзлаша бошлади:

«Ҳалигача келмади, билмадим, нима бўлди экан? Ё бирор ҳодиса юз бериб қолдими? Маҳин берган ваъдасида турарди-ку, ваъда вақтидан ярим соат ўтди. Нима қилсам экан-а? Ҳали ҳам кўринмайди, менинг бўлса, боқса тушувим мумкин эмас».

Йигит яна деворга яқинлашиб, диққат билан қулоқ солиб, бирор шарпа сеза олмагани учун қайгуланди. Яна ўз-ўзига деди:

«Маҳин келмади. Албатта, бирор гап бўлиб қолган кўринади. Нега юрагим бунчалик сиқилмоқда! Жонгинам, севиклим, нима бўлди экан сенга?»

Шу пайтда аллақандай шарпа сезилди. Йигит қулоқ солди.

«Бу нима, оёқ товуши келаётганга ўхшайди. Шу ёқ-

қа қараб келяпти... Бу Маҳин бұлса керак. Ҳа, тўғри, шу тарафга келмоқда... Ана, яқинлашиб қолди».

Боғнинг ичкарисидан майин бир овоз эшитилди:

— Фаррух, жоним Фаррух! Сени жуда ҳам куттириб қўйдимми? Кечир! Тўхта, нарвонни қўяй, сўнг кечикканим сабабини сенга айтиб бераман.

Ичкаридан деворга нарвон қўйилди. Бир оздан кейин девор ортидан чиройли бир қизнинг боши кўринди. Қиз деворга ўтирди-да, йигит томонга энгашиб деди:

— Азизим! Ҳеч маҳал мени унутди ёки менга берган ваъдасини эсидан чиқарди деб ўйлама, ўзинг яхши биласан, бутун қалбим сеники, у сенинг ишқинг билан тепади, сен унинг ҳукмронисан.

Шу пайт ойнинг ёғдуси Маҳиннинг гўзал юзига тушиб, унинг бир ҳуснига ўн ҳусн қўшиб юборди. Майингина эсмоқда бўлган шабада, гўё жўрттага қилгандай, Маҳиннинг заъфар сочлари билан гоҳ юзини, гоҳ оламолам севги ва орзу тўла кўзларини яшириб, суратини гоятда севимли қилиб кўрсатар эди.

Фаррух ҳам йигирма ёшга етган. Авваллари Маҳин билан фақат сўзлашувгагина етиша олган бўлса, энди тўла бир иштиёқ ва ҳавас билан уни севар ва унинг вислолига етишувни истар эди.

Олти-етти йилнинг орасида Фаррух билан Маҳиннинг ўрталари қандай бўлганини, нима учун ҳозирги учрашув девор устида ўтаётганини, муҳтарам ўқувчиларимизга бир оз уқтириб ўтиш керак.

Фаррух Маҳин билан боғда ўйнаган кундан бери ҳар қачон аммасининг уйига келиб-кетар эди. Бироқ бу вақтларда у, ўрта мактабда ўқийдиган бўлганидан, мактаб топшириқлари ҳам кундан-кун кўпайиб бормоқда, у бутун вақтини Маҳин билан ўйнашга сарф қила олмас, фақат бўш вақтларида Маҳинларникида бўлар, у билан кўришиб турар эди. Бу аҳвол тўрт йил чўзилди, икки бола орасида бўлган бу севги бора-бора ортиб, уларда энди бошқа сезгиларни ҳам уйғота бошлади. Илгари кўнгиллари бир ўпиш билан тасалли топадиган бўлса, энди ишқ ўтида ўртанаётган қалбларига бу ўпишлар сув сепа олмас эди.

Бир маҳал Фаррух йиллик имтиҳонга тайёрланишга мажбур бўлгани сабабли уч ҳафтагача Маҳин билан кўриша олмади. Шунча ҳижрон кунларидан сўнг, бир кун аммасиникига келгани замон, Маҳин унинг олдига

чиқмасдан, фақат хизматчиларидан биттаси унинг олдига келиб: «Маҳин хоним сизга салом айтдилар» дейишидан қай даражада таажжуб ва ҳайронликка тушганлигини тасвир қила оласизми? Фаррух ноилож ўзини гўё бу ишга эътиборсиз қарагандай кўрсатди ва: «Мендан ҳам у кишига салом айтинг» деб жавоб берди. Шу ерда қовоғини солиб ўтирган аммасини кўриб, бир умр Маҳин билан учраша олмаслигига кўзи етди.

Шундай ҳолатдан кейин Фаррух ортиқ бу ерда қола олармиди? Унинг нозик қалби бу оғир зарбанинг аччиғига чидай олармиди? У Маҳин билан кўришмасдан яшай олармиди?

У уч кеча-кундуз ўйлади. Ахири, Маҳинга хат ёзиб, жуда усталик билан унга юбориш йўлини топди.

Фаррух, аммасининг-саводсизлигини ва Қазвин шаҳридаги иккинчи аммасидан келадиган хатларни ҳам доим Маҳинга ўқитишини билар эди. Шунга ишонганлиги учун, қўлига қалам олиб, Маҳинга хат ёза бошлади:

«Азиз севгилим!

Қайғу ва алам тўлқинлари ичида бўлган бир пайтда қўлимга қалам олиб, бир неча сатр хат ёзмоқчи бўлдим.

Аччиқ ва шунинг билан бирга кулгили воқеадан кейин, юрагимдаги туйғуларни тушунтирмай ва келажакда қандай йўл билан бўлса ҳам учрашиб туришимизни таъмин қилмоқ учун сени кўришим керак. Қандай бўлмасин кўришмоқ учун бир йўл, бир чора топишинг керак.

Сени ҳеч қачон унутмайдиган: Фаррух Дақиқ».

Яна бир бошқа хатни Қазвиндаги аммасининг тилидан: «Фотима бегимга, Сакина ойимга салом, бизлардан дуо деб қўясиз» каби гаплар билан тўлдириб, устига йирик ҳарфлар билан: «Бу хат қалбакп, мактубимни сенга етказа олмоқ учун битилган, ҳушёр бўл» деган сўзларни ёзди ва конвертга солиб, елимлади.

Иттифоқо, ўша куни Фаррухнинг дўстларидан биттаси автомобиль билан Анзалийга кетмоқчи эди. Фаррух вақтни қўлдан бермасдан ўртоғининг ёнига борди. «Баланд даражали Маликтож хоним» номига ёзилган конвертни унга топшириб, Янги Имом бекатида почта қутисига ташлашини илтимос қилди.

Фаррух янглишмаган эди. Ун саккиз соатдан кейин почтальон Маликтож хоним боғининг эшигини қоқди.

Маҳин хатни олиб, устидаги сўзларга кўзи тушган замони бу хатни Фаррух ёзганлигини англади: очиб ўқиди. Уша куни эрталабки чойдан кейиноқ ўз уйига кириб, бу тўғрида жуда кўп ўйлади. Ахири фикрига бир нарсга келди.

Оғойи Ф... уссалтананинг Машҳадий Козим номли қирқ етти ёшли, хушахлоқ, хушчақчақ бир боғбони бор эди. Бир куни тўсатдан унинг кўзи оғриб қолди. Бечора боғбон Техроннинг «машҳур» бир докторига мурожаат қилди. Доктор ҳам тажрибасизлигидан, керак бўлган дори ўрнига бошқа дори бериб, «қош қўяман деб, кўз чиқариш» қабиллида, уни кўр қилаёзди. У рўбарўсидаги нарсаларнинг фақат сояларинигина илгай олар эди. Шу боғбоннинг ўн олти ёшли қизи бўлиб, қиз у қадар чиройли бўлмаса ҳам, отасининг ёлғиз фарзанди бўлгани учун уни жуда яхши кўрар эди. Фалокат босиб, бу қиз ҳам бир муддат иситма касалига мубтало бўлган эди, отаси бу жиҳатдан жуда қайғули ва хафа эди.

Маҳин кўп вақт бозорга ёки бошқа бирор иш билан уйдан чиқадиган бўлса, боғбоннинг йўл устидаги уйига кириб ўтар, қизнинг аҳволидан хабар олиб, унга пул ва кийим-бош ҳадя қилар эди; унинг очик кўнгли, севги ва марҳамати яхши натижалар ҳам берган эди.

Ота ҳам қиз Маҳиннинг ҳақиқий, содиқ хизматчисига айланган эдилар. Уларнинг ҳар иккиси Маҳиннинг бу севги ва марҳамати олдида, қачон бўлса ҳам қатта бир хизмат қилмоқчи бўлар эдилар. Фақат Маҳин шу кунгача уларнинг хизматига муҳтож бўлмаган эди.

Маҳин хатнинг жавобини юбориш ҳақида ўйлади, ўз-ўзи билан гаплашди; боғбоннинг қизидан бошқа ўнгай ҳам қулай бир йўл топа олмади. Мактубнинг жавобини боғбоннинг қизи орқали юбориб, боғбон воситаси-ла Фаррух билан кўришмоқча жазм қилди.

Маҳин тезлик билан уйдан чиқди-да, оқсоч хотинлар турадиган уйга бориб, улардан биттасини боғбоннинг қизини чақирмоқ учун юбормоқчи бўлди, лекин, тасодифан боғбоннинг қизи шу ерда экан. Буни яхшиликка йўйиб, қизни хонасига бошлаб келди.

Маҳин қизга эътиمودи зўр бўлгани учун, ундан ҳеч нарсани яширмасдан, бутун аҳволотни: ота-онасининг Фаррух билан учрашувини ман этганини айтиб, бу ишда ундан ёрдамини сўради.

Шукуфа (боғбон қизининг оти) ҳудодан мана шун-

дай бир пайтни тилар эди. Худди шу пайтдаёқ, қандай иш бўлса ҳам жони билан бажо келтиришга тайёр эканлигини айтди. Маҳин ундан жуда хурсанд бўлди. Ҳозирча отасини учратиб, уни воқеадан хабардор қилишни ва қайси йўл билан бўлса ҳам, Фаррух билан кўришиш учун бир илож топишни илтимос қилди.

Шукуфа у ердан чиқиб, отасининг олдига кетди. Чо-рак соат ўтар-ўтмас қайтди-да:

— Иш жойида, отам бунинг учун ажойиб бир йўл топди,— деди.

Маҳин юраги гурс-гурс ургани ҳолда:

— Қандай йўл экан у?— деб сўради.

— Отам менинг гапимни эшитгач: «Боғнинг кунботар тарафига бир нарвон қўяман. Ҳафтада икки-уч марта кечалари ўша ерда, деворнинг устига чиқиб кўришишлари мумкин», дедилар.

Бу фикр Маҳинга жуда ҳам маъқул тушди, у вақти ганиматда Фаррухга хат ёза бошлади:

«Азиз Фаррух!

Хатингни олдим. Мен билан кўришмоқчи бўлсанг, қош қорайгандан икки соат кейин боғнинг кунботар тарафидаги девори олдига кел. Шу ерда ҳамма нарса ҳақида гапиришамиз.

Сени севган: Маҳин».

Маҳин хатни Шукуфага бериб, Фаррух билан учрашадиган ерини тушунтирди. Шундай қилиб, ўша кечаси Фаррух келиб, Маҳин билан кўришди. Ҳафтада икки кеча девор устида, бир кун боғбоннинг уйида кўришиб турадиган бўлдилар. Фақат, боғбоннинг уйида бўладиган учрашиш кўп вақт хавотирли бўлганидан, у ердаги суҳбатларидан истаганча фойдалана олмас эдилар.

Икки йил шундай ўтди. Энг охири шу воқеанинг орасида бир неча дақиқа жимжитлик билан ўтгандан кейин, Маҳин гапира бошлади:

— Оҳ, Фаррух!.. Севгимизнинг оқибати нима бўлишига ақлим етмай қолди. Сени шунча куттириб қўйган-лигимнинг сабабини биласанми? Буни сендан яширмоқчи эдим, лекин яширсам, бундан ҳар иккаламиз зарар кўрамиз.

Фаррух изтироб билан сўради:

— Азизим, қайдай бўлса ҳам майли, ҳатто шум хабар бўлса ҳам айти! Ҳеч бўлмаса ҳар қандай куйдан

кўра ёқимлироқ бўлган овозингни эшитиб, ҳузур қилай.

Маҳин туганмас қайғу билан деди:

— Фаррух, Фаррух... Айтмоқчи бўлганим унчалик яхши хабар эмас. Бу сенинг азобланишинга сабаб бўлади. Фақат, иложи йўқ, иккимизнинг келажагимиз шунга боғлиқ бўлганлиги учун айтишга мажбурман.

Фаррух, девордан икки қадам нарида ётган тош устига чиқиб, Маҳинга яқинлашди.

— Оҳ, жоним Маҳин! Бу гапларинг билан мени бениҳоя ташвишга қўйдинг. Тезроқ айт, азиз севгилим, қандай ҳодиса сенга бунчалик таъсир этди? Ўзи нима гап?

Маҳин секингина жавоб берди:

— Бир оз яқинроқ кел, ҳаммасини айтаман.

Фаррух деворга яқинлашди.

— Айт, Маҳин! Айт. Борган сари юрагим қаттиқ урмоқда. Агар юраги сал ором олсин десанг, ўша оппоқ қўлларингни бер, бир ўпай, кўксимга босай.

Маҳин девордан энгашиб, оппоқ пахтадай қўллари-ни узатди. Фаррух дарҳол уларни ушлаб, кўзларига сурди, кейин узоқ-узоқ ўпди.

Маҳин сўзида давом қилиб деди:

— Тахминан бундан бир соат аввал, отам мени ўз ёнига чақириб, баъзи бир гапларни айтди, уларни сенга айтсам, хафа бўласан.

Фаррух Маҳиннинг сўзини бўлди:

— Йўқ, жоним, йўқ, хафа бўлмайман. Тезроқ айт.

— Шундай қилиб, отам мени чақириб айтдики, «Эшитишимча, ёш бошингдан ўзингга номуносиб баъзи ишларни қилар эмишсан. Масалан, кўпинча тоғаваччанг Фаррух тўғрисида гап очиб, биздай олий насабларнинг қизига ярашмайдиган тарзда уни мақтар эмишсан. Буларнинг маъноси нима?»

Фаррух беихтиёр сўради:

— Айт-чи, отанг буларни қаердан билибди? Балки, бизнинг учрашиб юрганлигимиздан уларнинг хабари бордир? Қани, айт, сен унга нима жавоб бердинг?

Маҳин жавоб бермоқчи бўлиб оғиз ростлади-ю, лекин бирдан:

— Оҳ, Фаррух... Оёқ товушини эшитяпсанми, биров келаётганга ўхшайди, вой ўлмасам, келиб мени кўрсалар, нима жавоб бераман?— деб юборди.

Оёқ товуши тобора яқинлашиб келарди. Рўбарўда

икки шарпа кўринди. Икки киши, девордан тахминан эллик қадам нарида бўлган сарв дарахлари билан ўраб олинган боғчадаги тахта скамейкага ўтиришди. Уларнинг орқалари ўгириғлик бўлгани ва азим туп чинор дарахти пана қилиб тургани учун Маҳинни кўра олмас эдилар.

Маҳин бошини эгиб, Фаррухга шивирлади:

— Кимлар келганини биласанми? Отам билан онам. Худди бирор муҳим маслаҳатлари борга ўхшайди. Бўлмаса, бу ерга келиб гаплашадиган одатлари йўқ эди. Агар сен ҳам буларнинг ниятларини англамоқчи бўлсанг, секин деворга чиқ.

Фаррух тез, шипшитмай, эпчиллик билан деворга тирмашиб, Маҳин билан ёндошиб ўтирди.

Икки севгили қўлларини қўлларига бериб, бошларини бошларига суяб, нафасларини нафасларига улаштириб, хаёлдан қилинган ҳайкалдай жимгина, ҳаракатсиз ўтириб, суҳбатга қулоқ бера бошладилар.

Кечаси соат уч, ҳаво тоза, ой кўкнинг энг баланд нуқтасига бориб, ерга нур сочар, сарин шабада эсмоқда. Боғни тўла жимжитлик қоплаб олган. Теваракда бу тўрт кишидан бошқа ҳеч бир бедор киши йўқ.

Эр-хотин скамейкада ўтирар эдилар. Оғойи Ф... уссалтананинг юзига диққат билан қараган киши, унинг бугун жуда хаёлчан ва диққат бўлганини пайқар эди. Оғойи Ф... уссалтана хотинининг қўлини тутиб, сўради:

— Хоним! Сизни уйқудан маҳрум қилиб, бемаҳалда бу ерга бошлаб келганимнинг сабабини биласизми?

— Йўқ, ого, мен сизнинг бу хатти-ҳаракатингиздан гоятда таажжубдаман. Сабабинг айтишингизни кутаман,— деб-жавоб берди Маликтож хоним.

— Ундоқ бўлса, қулоқ солинг, сабабинг айтайини.

V 606

ОТА ВА ҚИЗ

Эр-хотиннинг суҳбатлари ва икки ёшнинг сутдек ойдин кечада девор устида учрашувларининг кейинги натижасини баён қилишдан аввал, муҳатарам ўқувчиларни бир неча соат олдин оғойи Ф... уссалтана билан қизи ўртасида ўтган сўзлар билан таништирайлик.

Маҳин девор олдига келмасдан икки соат аввал, оғойи Ф... уссалтана ҳовлисидаги ойнаванд эшиги боққа қараб очиладиган хоналардан бирида, ёзув столи ёнидаги креслода ўтириб, нималарнидир ёзарди. Лекин бирор одам унга яқинлашиб диққат билан қараса, унинг қўлидаги қаламни қоғоз устида бекордан-бекорга юргизганини ва олдидаги қоғозда кераксиз чизиклардан бошқа ҳеч нима ёзилмаганини кўрар эди.

Уни шунчалик хаёлга чўмдирган ва ташвишга тушувига сабаб бўлган нарса нима эди?

Ҳикоямизнинг бошларида оғойи Ф... уссалтананинг шахсияти ва ахлоқи тўғрисида баён қилган фикрларимизни ёдида сақлаган ўқувчиларимиз, шубҳасиз, бундай кишиларнинг, давлатларига қиттай зарар етишини сезсалар, қанчалик хафа ва паришон бўлишларини осонлик билан тушунадилар.

Оғойи Ф... уссалтана ҳам қизи унинг илгаридан тузиб қўйган режаларига мос тушмайдиган баъзи сўзларни гапириб юрганини эшитган эди. Шу ҳолатда ярим соатдан буён шу фикр ҳақида бош қотирмоқда эди. Ахири қаддини ростлаб, ўз-ўзича гудранди:

«Бу қиз қандай ақмоқ-а? Мен у тўғрида қанчалик ўйлаб, келажакда унинг бахтли бўлиши учун қандай қайғулар эдим. Энди қарасам, қизим қанчалик бекорчи хаёлларга тушибди, билмайман. Бир камбағал тоғасининг ўғлини яхши кўриб, менинг барча режаларимни чиппакка чиқариб юборишга сал қолибди. Йўқ, танимда жоним бор экан, бундай бўлишига йўл қўймайман. Чунки шаҳзода К. ни қуда бўламиз деб алдаганман. Шаҳзода К. бўлса, менга ўз деҳқонларидан кўп овоз йиғиб, мени депутат қилиб сайлашга ваъда берган. Маълумки, депутат бўлмай туриб, вазир бўлишнинг иложи йўқ.

Оғойи Ф... уссалтана бошини қўлига тираб, яна ўйга ботди. Унинг башараси жуда галати бир ҳолатга кирди. Гўё қилган барча ёмон ва чиркин ишлари ҳозир унинг юзига бўртиб чиққандай эди.

Бир неча дақиқадан кейин бошини кўтариб, стол устига ўрнатилган тугмачани босди. Эшик очилиб, пак-пакана, семиз, чўтир бир хотин кириб таъзим қилди-да, бурчакда сукут қилиб турди.

Оғойи Ф... уссалтана бошини кўтариб сўради:

— Феруза, хоним уйдами?

— Йўқ, ого! Хоним кечга яқин кетган эдилар, ҳали-гача келганлари йўқ. Лекин, Маҳин хоним ўз уйларида китоб ўқиб ўтирибдилар.

Бирдан оғойи Ф... уссалтана қаддини ростлади:

— Нима?! Китоб ўқияпти дедингми? Жуда яхши! Қанақа китоблар ўқийди?

Феруза, этаклари билан йўгон болдирларини оғосининг ҳирс билан тўла кўзларидан яширмоққа уриниб, жавоб берди:

— Ого, саводим бўлмаса қаёқдан билай... Эшитишимга қараганда, унда муҳаббат ва ошиқ-маъшуқлар ҳақида ҳикоялар бор эмиш. Масалан, фалон мадмазел¹ фалон мусьегга² қандай ошиқ бўлди. Ундай китобларни ўқиш одамнинг саводини орттиради дейдилар, мен қаёқдан билай.

Оғойи Ф... уссалтана янада ғазаби қайнаб сўради:

— Балки, роман ўқиётгандир?

— Тўғри, ого, худди ўзи, роман ўқияптилар.

— Жуда яхши, бор, Маҳинни бу ерга чақириб юбор! Феруза боши билан таъзим қилиб, чиқиб кетди.

Феруза чиқиб кетгандан кейин, оғойи Ф... уссалтана яна ўз-ўзи билан гаплашмоққа бошлади:

«Бу аҳмоқ қиз нима учун шундай бемаъни гапларни гапираётганлигини энди тушундим. Китобда: фалон йигит фалон қизга ошиқи шайдо бўлибди ва шунга ўхшаш бемаъниликларни ўқиган, ўз-ўзига хаёл қилиб айтганки, нима айби бор, мен ҳам бораман-да, ўз тоғамнинг ўғлига ошиқ бўламан, деган, холос, аҳмоқлик. Эҳ, қандай замонларга қолдик. Таажжуб, бизнинг замонимизда на ошиқ, на маъшуқ, на бунга ўхшаган гаплар бор эди. «Амир Арслон», «Искандарнома» ва «Хусайнгулд» китобларидан бошқа ҳеч қанақа китоб йўқ эди. Энди билмайманки, нима бўлиб қолди, бутун суҳбатлар шу мавзулар устида. Ҳамма айб ҳозирги янги мактабларда! Мен бўлсам, умрим бино бўлиб бирорта роман деган нарсани ўқиган эмасман. Саводим оз, ҳисобдан бўлса хотиржам, тарихни ҳам билмайман, шундай бўлса нима, бир нимама камайиб қолибдими? Мен шу жиндай маълумотим билан депутат, ҳатто лидер бўла оламан. Агар қизим бахтли бўлмоқчи бўлса, «оқ» қилишимни истама-

¹ Мадмазел (мадемуазель)— хоним (франц.)

² Мусье — жаноб (франц.)

са, гапимга кириб, кимга берсам, «лом-мим» демасдан, ўшанинг ўзига эрликка ҳам оголикка қабул қилиши керак.

Шу маҳал енгилгина оёқ товуши, унинг кетидан кийим-бошнинг шилдирагани эшитилди. Эшик очилиб, остонада Маҳин пайдо бўлди. Маҳиннинг ранги анча синиққан эди. У ичкарига кирар-кирмас, мовий кўзларини отасининг юзига тикди. Қиёфасидан жиддийлик ва қатъият сезилиб турарди. У эгнига пушти ранг ипакдан кўкраги очиқ кўйлак кийган, бошига эса, чодра ўрнига тўр дуррача ўраган эди. У салом бергандан кейин, унинг бир бурчагига бориб турди.

Бир неча дақиқа жимлик билан ўтди. Оғойи Ф... уссалтана айтадиган сўзларини бошига жамлаб, бир тартибга солмоқчи бўлаётганга ўхшарди. Ахири у бошини кўтариб:

— Қизим Маҳинжон! Нимага ўтирмайсан! Қани, ўтир,— дедн.

Маҳин жавоб бермасдан, эшик ёнидаги стуллардан бирига отаси билан юзма-юз ўтирди.

Отаси сўзга бошлади:

— Қизим Маҳинжон! Сени бу ерга чақирганимнинг сабабини биласанми? Сен билан бир оз жиддий суҳбатлашмоқчиман.

Бирдан Маҳиннинг эти жимирлаб кетди. У ўз-ўзига деди:

«Отанинг мен билан жиддий гаплашишига нима сабаб бўлди экан? Бироқ муҳим гап борга ўхшайди? Тайёрланиб турай».

— Тушундингми, қизим?— деб давом этди оғойи Ф... уссалтана.— Сен билан бир муҳим иш устида гапиришмоқчиман.

— Отажон, марҳамат қилинг, фармонишгини эшитишга ҳозирман.

— Қизим! Сен билан бир неча масала ҳақида гаплашмоқчиман. Аввало эшитдимки, вақтни бекорга исроф қиладиган, мяни суйилтирадиган ва одамни йўлдан оздирадиган бирталай бўлмагур китоблар йиққан эмишсан. Қизим! Мен сенга чинини айтсам, бу ишларнинг менга маъқул эмас.

Отасининг сўзларига жуда диққат билан қулоқ бериш билан бирга унга жавоб беришга ҳам тайёрланиб турган Маҳин тап тортмасдан деди:

— Агар шу тўғрида гапирадиган бўлсангиз, эшитишга ҳеч қандай истагим йўқ. Чиқиб кетишимга ижозат беришингизни сўрайман.

Бу жавобни эшитгач оғойи Ф... уссалтана худди ўт олган бомбадай портлаб, айюҳаннос тортиб бақирди:

— Ҳой қиз! Отаиң билан гаплашаётганингни унутиб қўйганга ўхшайсан-а? Ёки ўзингни биллиб, билмасликка уряпсанми?

Маҳин отасининг ғазабига парво қилмай, осойишта жавоб берди:

— Йўқ, отажон, мен сизга бўлган фарзандлик бурчимни ҳеч қачон унутмайман. Лекин, сиз менинг эътиқодимга зид сўзлар экансиз, гапингиз зое кетади, мен уларга қулоқ солмайман.

Оғойи Ф... уссалтананиннг ғазаби сал совиган бўлса керак, бир неча дақиқа жим қолгандан сўнг:

— Тўғри, қизим, тўғри,— деди.— Сен ҳақлисан. Бу масаланиннг унчалик аҳамияти йўқ. Бу тўғрида сен билан гаплашиб тўғри иш қилмадим. Хўш, мана бу иккипчи масала тўғрисида нима дейсан?

— Отажон, мен сизнинг бу жумбоқларингиздан ҳеч нима тушунмай турибман. Муддаонгизни очиқроқ айтишингизни сўрар эдим.

Оғойи Ф... уссалтана ўрнидан туриб, Маҳинга яқинлашди-да, унинг қўлидан ушлаб, мулойим овоз билан сўз бошлаб деди:

— Қизим, мен сенга яхшиликдан бошқа нарсани раво кўрмаслигимни биласанми?.. Шундай бўлгач, нима учун менинг олдимда ўзингни шунчалик билиб, билмасликка соласан. Доимо хаёлингга сақланган фикрларни менга очиқ айтишдан тортинасан?

Маҳин ётиғи билан жавоб берди:

— Отажон, сизга мен бошда айтдимки, мен бу хилда сўзлардан муддаонгизни англаёлмай турибман... Агар менинг тўғримда сизга бошқача гап айтишган бўлсалар, марҳамат қилиб айтинг, мен ҳам хабардор бўлай.

Оғойи Ф... уссалтана қайтадан аччиқланиб кетди:

— Ҳой қиз! Ўзингни бу қадар гофилликка солма!— деб бақирди-у.— Айтишни истамасанг, кўп яхши, айтмаёқ қўй. Мен сенга айтиб бераман! Тоғаннинг ўғли Фаррух тўғрисида айтган гапларингда нима маъно бор, қани айт, кўрай?

Бу гапларни эшитган замон Маҳиннинг юраги тез-

тез ура оошлади. Ранги бус-бутун ўзгарди. Аввали қизил, ундан кейин оқ, бора-бора оқлик ҳам йўқолиб, юзи сарғайди. Худди шу пайтда терговчи олдида ўз айбини иқдор қилмоқчи бўлган кишилар каби ўз-ўзига далда бериб деди:

— Ота... Ростини айтсам, мен шу вақтгача ўз сирини сизга очиқ айтишни истамас эдим. Лекин энди очиқ-ойдин айтаман: мен Фаррухни севаман. У ҳам мени севади. Қани, айтинг-чи, бир-бирини севиш айбми?

Маҳиннинг тўғри ҳам ҳалол иқдорини эшитган оғойи Ф... уссалтана зардаси қайнаб:

— Маҳин!— деб қичқирди.— Мен бу гапларни ёлгондир деб ўйлаб юрардим. Энди билсам, рост экан. Сен ҳақиқатан ҳам менинг барча режаларимни барбод этмоқчига ўхшайсан. Лекин мен ҳам сенга айтиб қўяй-ки, кўзим тирик экан, бу хаёлларинг рўёбга чиқмайди! Сенинг ўйлаган ўйинг асло-асло бўлмайди.

Отасининг бу гапларини эшитган Маҳиннинг ранги янада оқариб кетган бўлса ҳам, у ўзини тутиб деди:

— Отажон, намунча менга зарда қиласиз. Ундан кўра, нимага шу ишнинг бўлишлиги мумкин эмаслигини тушунтиринг. Сизда қандай сабаб ва далиллар бор? Мен шуларни билмоқчиман.

Оғойи Ф... усалтана ўйлаб туриб, ўз-ўзига дерди: «Қизим менинг жаҳлимдан қўрққан бўлса керак, дарҳақиқат, у қандай қилиб менинг истагимга қарши кела олади? Албатта, энди унга бойлик ва пулнинг қадрини тушунтириб, ўз фикримни айтсам, балки, бошидаги бекорчи хаёлларни ташлаб, гапимга қулоқ солар». Кейин ўз хаёлларининг таъсири билан гапира бошлади:

— Қизим, ҳар бир ота ўз фарзандининг бахтли бўлишини тилаганидай, мен ҳам сенинг ҳаётинг яхши бўлишини, бахтли бўлишингни истайман. Эсингдан чиқармаганики, ҳозирги замонда дунёнинг бирдан-бир тираги пулдир. Мен мана шу эътиқодимга суяниб туриб, сенинг бахтли бўлишинг учун ҳеч нимани аямайман. Фаррух гарчи тоғаннинг ўғли бўлса ҳам, лекин сенга қараганда жуда камбағал, пули йўқ. Қизим, энди бу ҳавойи хаёлни миянгдан чиқариб ташла. Бу бўладиган иш эмас. Бундан бошқа далил учун менинг оғзимни очирма, тушундингми? Ишонаманки, отангинг измидан чиқмаслигинг лозимлигини англаб, бўлмагур фикрларни миянгдан чиқарарсан-а?

— Отажон!— деди Маҳин,— агар бошқа тузукроқ далил бўлса айтинг, балки иккинчи далилингиз бундан кўра менга кўпроқ таъсир қилар. Чунки, Фаррухнинг камбағаллиги кўнглимни ундан қайтара олмайди.

Оғойи Ф... уссалтана мийиғида кулиб деди:

— Жуда яхши! Демак, сенингча бойликнинг ҳеч бир аҳамияти йўқ бўлиб чиқади. Ундай бўлса яхши, иккинчи далилга қулоқ бер, айтайин. Қизим! Бу кунларда одамларнинг кўпи ўз фарзанди, қавм-қариндошлари ёрдами билан баланд мартабаларга чиқади деса бўлади, айниқса бизнинг мамлакатда юқори мансабларни эгалламоқ буткул қариндош-уругчиликка боғлиқ. Масалан, агарда куёвим бош вазир бўлганда эди, албатта мен вазир ёки ҳеч бўлмаганда муовин вазир бўлар эдим. Қизим, энди нима демоқчи бўлганимни тушундингми?

— Йўқ, отажон, ҳалигача айтганларингиздан бирор нарса тушунганим йўқ.

— Ажабо! Яъни нимага тушунмадинг? Қизим, инсон дарахтни мевасидан баҳраманд бўлиш учун экади, фарзанд ҳам шунга ўхшаган нарса, яъни ундан бирор манфаат кўришни истайди: тўй қилиб, набира кўргиси келади, набираларим белимга қувват бўлсин, қўлимга ҳасса бўлсин деб орзу қилади. Энди мен ҳам, қизим, сени эрга бермоқчи бўламан, сенга муносиб бир эр ҳам топиб қўйганман. Энг охири, сенинг шу тўйингдан фойдаланиб, депутат бўлмоқчиман. Қани айт-чи, сен отангнинг бу ишига кўмаклашишни истайсанми? Ё ёрдамингни аяб, отангни хафа қиласанми?

Маҳин шошилиб:

— Отажон, тушундим! Демак, мени ўз хоҳиш ва тамангиз учун қурбон қилмоқчи экансиз-да?— деди.

— Йўқ, қизим, ундай эмас. Мен куёв танлаганда, сенинг аҳволингни ҳам назарга олганман. Сенга жуда бадавлат эр топганман.

Маҳин осойишталик билан:

— Йўқ, ота, бу далилларингиз билан Фаррухдан қўл силтаёлмайман,— деди.

Бу жавобни эшитган оғойи Ф... уссалтана ғазаби жўш уриб, қўлини бирданига юқори кўтарди-да, Маҳиннинг ўлишлар ва эркалашлар учун яратилган нозик кифтига бир мушт туширди.

Бечора Маҳин, бу муштнинг зарбидан инграб юбор-

ган бўлса ҳам, яна қилт этмай аввалги ўрнида тура берди.

Оғойи Ф... уссалтананинг аччиги бир мушт билан совимади, у Маҳинни яна бир неча марта муштлади, кейин:

— Сен жуда ҳаддингдан ошиб кетибсан, гапимга гап қайтарадиган бўлиб кетибсан-а? Жуда яхши, мен ҳам сени меросдан маҳрум, ҳамда «оқ» қиламан!— деб бақирди.

Маҳин отасининг ваҳшийлигидан уялиб, бошини қуйи солди.

Маҳиннинг шунчалик аянч аҳволи отасининг тош юрагига таъсир этди. Дарров авзойини ўзгартириб деди:

— Улгунча аҳмоқ бўлибсан; тур, йўқол, кўзимга кўринма! Шуни ҳам бир билиб қўйки, сен билан Фаррухнинг тўйи ҳеч қачон бўлмайди.

Маҳин бепарволик билан секин эшикни очиб, хонасига чиқиб ҳоргинлик билан ўзини ўринга ташлади. Бошини қўллари орасига олиб, секин-секин ўз-ўзига:

«Оҳ, нима қилайин, мен уни яхши кўрсам. Йўқ, йўқ! Мен Фаррухдан кўнгил узолмайман. Улдирсалар ҳам ундан бошқа кишига тегмайман,» деди.

Маҳиннинг кўзлари қизарган, юзига қараган киши унинг гоят даражада изтироб чекаётганини сезар эди.

Бирданига икки қатра кўз ёши Маҳиннинг қизил гулдай юзларидан оқиб туша бошлади. Шунда у киши юрагини эзиб юборадиган овоз билан: «Оҳ, биз бечора хотинлар, бу муҳит ичкарисида қандай бахтсизмиз!» деб фарёд чекди.

Маҳин анча вақтгача йиғлаб ётди. Фақат Фаррухнинг муҳаббати билан тепгувчи Маҳиннинг соф ва содда қалби отасининг шундай қўпол гапиришларидан гоятда таъсирланган ва қайғурган эди. У, отасининг қай даражада пул ва бойликка муккасидан кетганини, ҳам ўз қизини тама йўлида қурбон қилишга тайёр эканлигини ўйлади; кўзлари йиғининг зўридан қизарган, ёш томчилари юзидан оқиб тушар эди. Бечора қиз нега йиғламасин? У бу мушкул аҳволдан қутулмоқ ҳақида ҳар қанча ўйласа ҳам, бирор илож топа олмас эди. Ниҳоят бирдан бошини кўтарди. Кўзи шкафчанинг устига қўйилган соатга тушди. Бейхтиёр: «Вой! Ваъда вақтидан ярим соат ўтиб кетибди-ю, бечора Фарру-

хим, балки мени кутавериб чарчагандир!» деб ўрнидан турди.

Олтин сочларини тараб, бошига оқ тўр рўмолини ўраб, уйдан чиқди. Секин-секин зинапоялардан тушиб, боғнинг охиридаги деворга қараб чошиб кетди. Боғнинг қуюқ қўйнига кирган сари юраги зўр бериб урар эди. Фаррух билан учрашмоқ учун тайин қилган жойга келганда, уни ўша ерда кутиб ўтирган ҳолда топди.

VI боб

ДЕВОР УСТИДА ИККИ ОШИҚНИНГ ҚАРОРИ

Маҳни чиқиб кетгандан кейин оғойи Ф... уссалтана тахминан ярим соат аччиғидан тушмасдан, уйда айланиб юрди.

Ахири бориб-бориб ҳаяжони совиди, ўйлади ва ўз-ўзига деди:

«Йўқ, йўқ! Бу бекорчи хаёлларни қизнинг бошидан чиқариш керак. Қандай бўлса ҳам, бу пуч ўйлар ҳали ўзининг ёмон натижасини кўрсатмасдан илгари олдини олиш керак. Шаҳзода Қ. билан расмий суратда сўзлашиб, унга ваъда бермаган бўлсам ҳам, бундан бир неча кун илгари сўз орасида депутат бўлишим, у билан қуда бўлишимга боғлиқ эканини ишора қилиб қўйди. Мен уни қайтариб, ўзимга Фаррухга ўхшаган гадойваччани куёв қиламанми? Одамлар менга нима дейди? Бироқ, нима қилайин, сўзларимнинг ҳеч биттаси қизга таъсир этмади. Нима деган бўлсам, менинг гапим қаршисида терсайиб туриб олди. Бироқ, ҳали ҳам умидсизланиш керак эмас. Мен унинг нафини ўйлаб айтган гапларимни эшитгиси келмаган бўлса, балки онасига қулоқ солар, ишнинг яхшиси шуки, опасига айтайин, унга насиҳат қилиб, ҳам менинг, ҳам ўзининг бахтли бўлишини тушунтирсин; балки уни бир йўл билан эпақага келтирар».

Шу қарорга келиб, яна тугмачани босди. Эшик очилиб, шошилганича Феруза кирди-да, таъзим қилиб, бир бурчакда турди. Феруза оғосидан аччиқ сўз ва ғазабли буйруқларни кутган эди, аксинча, оғойи Ф... уссалтана осийшталик билан сўради:

— Феруз, хоним келдиларми?

— Ҳа, ого, ҳозир келдилар.

— Жуда яхши. Ундай бўлса, хонимга айт, дарров бу ерга келсинлар, зарур бир масала устида гапиришмоқчиман.

Феруза яна бир марта таъзим қилгач, чиқиб кетди. Оғойи Ф... уссалтана уйнинг у бошидан бу бошига юра бошлади. Баъзан девордаги суратларга, баъзан қимматбаҳо гиламнинг гулларига қарар эди.

Салдан кейин Эшик очилиб, Маликтож хоним кириб келди.

Маликтож хонимнинг эғнида кўк шойи кўйлак, бошида нозик дурра бор эди. Кўзлари чақнаб турарди. У нчкарига кирар-кирмас эри истиқболига чиқиб, европаликларга тақлид қилиб, такаллуф билан қўлини ўпиб, ёнидан жой кўрсатди.

Маликтож хоним қисқагина жимликдан сўнг, эронлик хотинларга хос ишваи-ноз билан сўзга бошлади:

— Мана, мен қелдим, оғо, қандай буйруғингиз бор эди, нима учун мени шундай шошилишча қиридингиз?

— Хоним, нимасини айтасиз? Илгарйлар, эшитган гапларга қулоқ солмасдан, эътибор бермасдан юрар эдим. У қулоғимдан кириб, бу қулоғимдан чиқиб кетар эди. Энди билсам, иш ҳаддидан ошибди. Менинг аввалдан тузиб юрган режаларим барбод бўлишига сал қолибди. Балки, сиз бу ишдан беҳабар бўлганингиз учун нима демоқчи бўлганимга тушунмагандирсиз.

Бу сўзларни гапирар экан, оғойи Ф... уссалтана деразадан қараб, боғнинг ҳар тарафини ўз нури билан ёритиб турган ойни томоша қилар эди.

— Малъун қизингиз жуда қонимга ташна қилди. Қани, жоним, туринг, ҳаво яхши — ойдин, боққа киримиз. Боғда бемалол гапиришамиз, ишнинг нима эканлигини ўша ерда тушунтираман.

Маликтож хоним ўрнидан турди. Эри билан қўл ушлашиб уйдан чиқдилар. Зинадан тушиб, Маҳин билан Фаррух учрашган деворнинг рўпарасига келишгач, юқорида айтганимиз скамейкага ўтирдилар.

Оғойи Ф... уссалтана сўзлай бошлади:

— Хоним, қизим мени жуда ҳам ташвишга солиб қўйди. Билмайманки, уни бу эгри йўлдан қандай қилиб чиқарсам экан?

Маликтож хоним мулойимлик билан сўради:

— Нима деганингизни тушунмадим, оғо. Мен, маса-

лан, алҳамдулилло, қизимда унчалик бир айб-нуқсон кўрмайман. У нима гуноҳ қилган эканки, бунчалик сизнинг талбингизни хира қилибди?

— Хоним, сиз бу ишдан бутун беҳабарсиз. Шундан ҳам ёмонроқ бир иш бўладимики, ахир, қизингиз тоғасининг ўғли Фаррухни яхши кўрса; бунинг натижасида сиз ҳам, мен ҳам хонавайрон бўламиз-ку!

— Буни сизга ким айтди? Қандай таги паст одам айтди? Вой худо-сэй, одамлар ҳам оёғи билан эмас, оғзи билан юрадиган бўлиб кетган-да, қанчалик ёлғонларни тўқиб чиқарадилар,— деди Маликтож хоним.

— Пўқ, хоним, сиз янглишяпсиз, айтган одам таги паст ҳам, ёлғончи ҳам эмас, бунинг ростлигини Маҳиннинг ўзи ҳам иқрор қилиб тургандан кейин, халқ нима дедини?

Маликтож хоним ҳайронлик билан:

— Нима? Маҳиннинг ўзи сизга «мен Фаррухни яхши кўраман», деб айтдимиди?— деб сўради.

— Ҳа, хоним, Маҳиннинг ўзгинаси айтди!

— Вой ўлай, ундай бўлса, нима дедингиз? Сизнинг фикрингиз қалай?— Бу вақт оғойи Ф... уссалтана бошини хотинининг қулоғига яқинлаштириб, секингина алланималар деди (бу гапни Фаррух билан Маҳин эшита олмадилар).

— Муҳтарам хоним, сиздан нимани ҳам яширайнин, менинг... вазирликдаги мавқеим унча мустаҳкам эмас. Ҳар кун улар мени хизматдан бўшатишни ўйлайдилар. Қелажакда ўзимга бир муносиб мавқени эгалламоқ учун, ҳар қанча ўйласам ҳам депутат бўлишдан бошқа чора топа олмадим. Албатта, Маҳинни ўғли Сиёвуш Мирзога сўраган шаҳзода К.нинг ёрдамисиз депутат бўлишим мумкин эмас. Энди, масаланинг қанчалик муҳимлигини эшитгандан кейин, тушунган бўлсангиз керак. Мен бундан бошқа чора топа олмадим.

— У қандай чора?— деб сўради Маликтож хоним?

— У чора шуки, шу фикрлар қизнинг бошидан бутунлай чиқариб ташланиши керак.

— Қандай қилиб чиқарса бўлади?

— Бу жуда осон иш: ишқ деган нарса унинг бошидан тамоман юлиб олиниши керак.

— Яъни, сиз истайсизки, бир йўлини топиб, Маҳинни севганига етиштириш керакми?

Оғойи Ф... уссалтана қаҳқаҳа уриб кулиб юборди:

— Йўқ, йўқ! Балки уларни жудо қилиш учун бир йўл топмоқ керакки, бир-бирларини унутсинлар.

Маликтож хоним бир оз жим қолиб, кейин:

— Ундай бўлса, қапи айтинг, нима қилиш керак, қандай иш кўришимиз керак?— деди.

Оғойи Ф... уссалтана бир оз ўйлагандан кейин, бошини кўтариб, хотинининг қулоғига бир нималар деб шивирлади.

Маликтож хоним ҳам секингина жавоб берди:

— Жуда яхши! Сиз ҳам борасизми?

— Бу тўғрида бир оз ўйлаш керак, балки менинг боришим керак ҳам бўлмас, ҳозирча тулинг, кетдик. Лекин, бу сирни ҳеч кимга, ҳатто унинг ўзига ҳам айта кўрманг.

Ниҳоят, ҳар икковлари туриб, секин-секин уй тарафга қараб кетдилар.

Ҳали уларнинг оёқ товушлари узилмаган ҳам эди, Фаррух деди:

— Жоним Маҳин! Бизнинг тўғримизда қандай фикрда бўлганликларини тушундингми?

Маҳин ҳаёлчан овоз билан жавоб берди:

— Эсизки, онамнинг қулоғига айтган охириги сўзларини эшита олмай қолдим, нима деганларини тушунолмадим.

Фаррух Маҳиннинг қўлларини сиқиб, ушлаб деди:

— Оҳ, жоним! Келажагимизни ғоятда ёмон аҳволда кўрмоқдаман. Улар бизни бир-биримиздан жудо қилмоқ учун аллақандай режа тузганга ўхшайдилар.

Маҳин севги билан тўлиқ, осмондай тиниқ мовий кўзлари билан Фаррухга тикилиб деди:

— Севгилим! Бекорга хафа бўлма, менинг ваъдам чин ваъда. Танимда жоним бор экан, сўзимдан қайтмайман. Сендан бошқа ҳеч кимса менга эга бўла олмайди. Бунни аниқ билиб қўй!

Фаррух беихтиёр Маҳиннинг қўлларини ўпди ва ошиқни шайдоларга хос жўшқин овоз билан деди:

— Жоним, ваъданга ишонсам бўладими? Меники бўлишликка чиндан сўз берасанми? Ҳақиқатан ҳам сен меники, мен сеникими?

— Фаррух, бу сўзни сенга неча бор айтишим керак? Мен бу кеча ҳам қасамларимни такрорладим, жоним, мен сени севаман, сени севгилим ва азиз эрим деб би-

ламан. Хотиржам бўл, сендан бошқа ҳеч киши менга эга бўла олмайди!

Маҳиннинг шунчалик иқрори Фаррух учун ортиқ ҳеч бир шубҳага ўрин қолдирмаган эди. У бирдан Маҳинни бағрига босди, лаблар бир-бирига улашиб кетди. Муҳаббат билан олинган бир ўпичнинг «чўлп» этиши тева-ракнинг жимжитлигини бузди ва бу аҳвол бир неча сония давом қилди. Икки ёшнинг нафаслари бир-бирига туташиб кетган эди. Астагина эсмоқда бўлган шабада Маҳиннинг сочларини юзларига тўзғитиб, секин-секин ҳаракатлар билан эркаламоқчи бўлар эди.

— Азизим, вақт алламаҳал бўлиб қолди, яна менинг бу ерда эканимни уйдагилар билиб қолмасинлар. Эрта, йўқ эрта эмас, индинга худди шу вақтда мени шу ерда кут!

Фаррух Маҳиндан айрилишни истамагани учун бу сўздан маъюсликка тушди. Уни яна бир марта бағрига босиб, юз-кўзларидан ўйиб, сочларини силаб, секингина деди:

— Йўқ, Маҳин! Яна бир оз ўтир, қара, қандай чиройли кеча. Билмайман, нима учундир кўнглим гап, худди бир ёмон ҳодиса юз берадигандек. Тўхта, жоним! Тўхта, яна бир оз дийдорингдан баҳра олиб севинайин. Йўқ! Кетма, кетма!

Маҳин мулойимлик билан севгилисига тасалли бериб деди:

— Нега бекордан-бекорга хафа бўласан? Қўй, мен кетай; индинга кечаси худди шу вақтда, яна шу ерда учрашамиз-ку! Уларнинг кейинги сўзлари ва мақсадларидан хабардор бўла олсам зора. Кўришгунча хайр, жоним....

Маҳин кета туриб, қўлини лабига тегизиб, яна бир ҳавойи ўпич ҳадя қилди-да, секин-секин у ердан узоқлашди.

Фаррух Маҳиннинг орқасидан узоқ қараб қолди. У келишган қадди-қомат хиёбоннинг охирига етиб, буткул кўздан гойиб бўлгандан кейин ўз юрагида ажойиб бир ўзгариш ҳис этди ва ўзини боққа ташлаб, Маҳиннинг орқасидан бориб, унинг чиройли юзини яна бир марта томоша қилишига сал қолди, шунда ўз-ўзига деди:

«Билмайман, қандай хаёлот мени чулғаб олди. Оҳ, нима учун юрагим бундай безовталаниб тепади? У

бўлса, оғт ичди, мендэн бошқа ҳеч кимни демасликка сўз берди. У меники бўлади. Қандай йўл билан бўлса ҳам отасини рози қиламан. Демак, ташвишланиш, хафа бўлишга ўрин йўқ».

Фаррух астагина девордан тушиб, келаси учрашиш умиди билан боғдан йироқлашди.

VII боб

РАҚИБ

Бу юқорида айтганларимиз ва оғойи Ф... уссалтаннинг уйдаги ишлар бўлиб турган кечада, Техроннинг жануби-ғарбий тарафидаги маҳаллалардан биринда, яъни Дарвозайи Қазвинга яқин бир жойда, тамом бошқача ҳодисалар юз бермоқда эди.

Шу маҳалладаги муҳташам бинонинг бир хонасида икки киши суҳбатлашмоқда эди. Булардан биттаси юмшоқ креслода ўтирар, иккинчиси эса, унинг қарши-сида тик турарди.

Бу бино ғоятда ҳашаматли бўлиб, хоналари бошдан-оёқ қимматбаҳо гиламлар билан безалган эди. Бу икки киши суҳбат қилмоқда бўлган хонанинг жиҳозлари эман ёғочидан бўлган ёзув столи ва бир неча дона янги стуллардан иборат бўлиб, ёзув столида машҳур хаттот ёзган китобларнинг бир қанча танланган қўлёзмалари қўйилган эди. Ичкари кирган замон бу ернинг бир иш кабинети эканини дарров пайқаш мумкин эди.

Суҳбатлашувчиларнинг ҳар иккиси ҳам ёш эди. Ёзув столининг қаршисида — креслода уятсизларча галтайиб ўтирган, бугдой рангли, чўтир, кўзлари чақчайган, қирра бурун, мўйлови сабза ура бошлаган, новча бўйлиси жуда ёш, яъни йигирма иккиларда эди.

Бу йигитнинг исми Сиёвуш Мирзо. Отаси шаҳзода К. эл кўзида Техроннинг бадавлат ва бой кишиларидан ҳисобланса ҳам, ўзи мирқуруқ — бутун мол-мулклари гаровда эди.

Бу йигитнинг қаршисида тикка турган киши ўттиз икки ёшларда бўлиб, энгил-бошидан бойваччанинг югурдаги эканлиги билиниб турар эди. У ўрта бўйли, кўзлари кичкина, лаблари юпқа, қирра бурун, юзи сарғиш, ҳар ҳолда афт-башарасидан айёрлик ва зийраклик

асари ошкора кўриниб турарди. Бу кишининг исми Муҳаммад Тақи эди.

Улар шу қадар қизгин суҳбатлашар эдиларки, тева-рак-атрофдан тамоман беҳабарга ўхшардилар.

Сиёвуш Мирзонинг олдига қўйилган «варшава пат-нис» устидаги биллур графининг учдан икки қисми оқ суюқлик билан тўлдирилган бўлиб, графининг ёни-да мўъжазгина қадаҳча, бошқа бир патнисдаги косага бодринг тўғрилиб, қатиқ аралаштирилган эди. Сўз орасида Сиёвуш Мирзо ҳар гал графинидаги оқ суюқ-ликдан, яъни ароқдан қадаҳчани тўлдириб ичиб олар эди. Сиёвуш Мирзо жуда хурсанд кўринарди. У сизгара тутатиб, юмалоқ ва чақчайган кўзларини Муҳаммад Тақига тикиб айтар эди:

— Хўп, Муҳаммад Тақи, сенинг гапингга қараган-да, у ерда танноз, дўндиқчалари топилар экан-да?

— Ҳа, оғо,— деб жавоб берарди Муҳаммад Тақи,— бундан бир ой бурун бир кечаси сиз билан у ерга бор-ганимиз эсингиздами? Сиз у ерда ҳеч қайси қизни ёқ-тирмасдан, қайтиб кетган эдингиз. Эсингиздами? Шу вақтдан буён уй эгаси, сизнинг хотирингиз ва сиздай-ларни ўзига тортиш учун, аҳволни тамоман ўзгартириш хаёлига тушибди ва кеча менга одам юбориб, бир келиб кўринг, деди. Мен бордим. Нимасини айтай энди, оғо, сизга! Билмайман, шундай чиройли нозанинларни қаер-дан топиб у ерга йиққан экан?! Айниқса, ораларида бит-таси бор экан, умримда бунақа қулинг ўргилсин жо-нонни кўрган эмасман, оғо!

Сиёвуш Мирзо Муҳаммад Тақининг таърифларини эшитар экан, ўзида жуда ажойиб ҳолат сезмоқда эди. Бир қадаҳ ароқни кўтариб, деди:

— Жуда яхши, Муҳаммад Тақи! Бу сўзларинг би-лан иштаҳамни қитиқлаб қўйдинг. Энди бўлмаса, у ерга қачон борсак бўлади?

Муҳаммад Тақи уни яна қизиқтириш учун:

— Ҳазратим, сиз қай вақт бораман десангиз, мен хизматингизга тайёрман.

Сиёвуш Мирзонинг завқи келиб, ҳовлиқиб кетган эди.

— Жуда яхши, демак жўнаймиз,— деди у, кейин қў-шимча қилди:— Лекин Муҳаммад Тақи, сен менинг ҳамма сирларимдан воқифсан, сен билан бир масла-ҳатим бор. Қани, шунга сен нима деяр экансан. Отам менинг тўғримда нималар ўйлаб юрганини биласан-

ми? Кеча мени чақириб: «Ўғлим, вақт келди, энди бунақа юришинг яхши эмас, сени уйлантириб қўямақ», деб қолди. Мен бўлсам, ҳали уйланмоқчи эмасман, бу менинг учун ҳозирча мумкин эмас, десам ҳам қулоқ солмасдан: «Бекор гапларни гапирма!» деди. Менга олиб бермоқчи бўлган қизи жуда чиройли бўлиши билан баробар, бадавлат ҳам эмиш. Унга уйлансам, давлатманд бўлиб кетар эмишман, отамнинг ҳам кейинги вақтларда жуда бузилиб кетган баъзи ишлари режага тушармиш. Шундан кейин, мен ҳам ўйлаб турдим-да, ўзимга айтдим: «Модомики, иш шундай экан, нима айби бор? Қизни оламан, айтганларидай бир ўқ билан уч нишонни бирдан ураман, бир томондан, эҳтиросимни шундай чиройли қизнинг суҳбати билан қондираман, иккинчи томондан, унинг давлатини сарфлаб, бошқа таннозлар билан айш-ишрат қиламан, ундан кейин отам бечорага ёрдам бераман — қашшоқликдан қутулади». Шуни ўйлаб розилик бердим. Хўш, сен қандай ўйлайсан? Ё қилган ишим чаккими?

Муҳаммад Тақи одоб билан жавоб берди:

— Оғо, жуда яхши қилибсиз. Бундай уйланишдан ҳеч қандай зиён-заҳмат кўрмайсиз. Лекин кимнинг қизи экани ҳамда қанча давлати бор эканлигини била олдингизми?

Бу саволни беришдан Муҳаммад Тақининг шахсий бир мақсади бор эди. Чунки у ўз маънафини назардан қочирмайдиган югурдаклардан бири эди. У бир тўда ярамас ишлар воситаси билан ҳам ўзини, ҳам бошқаларнинг кўнглини овлар эди. Масалан, кимнинг уйида яшаса, ўша ердаги хотинларни бегона эркаклар билан учратишни, яъни қўшмачиликни ўзига ҳунар қилиб олган эди. Айниқса, шаҳзода К.нинг уйига келгандан буён ҳар вақт Сиёвуш Мирзодан, масалан, уни маълум жойларга олиб бориш, олиб боргандан кейин ўша жойдаги уй эгаси айтди деб Мирзодан ортиқча пул ундириб, ундан бир озини уй эгасига, кўп ҳиссасини ўзининг чўнтагига уриб қолиш сингари ишларни қойил қилар эди.

Сиёвуш Мирзо, қўлидаги олтин билан зийнатланган мундштукдаги сигарани оғзинга олиб, бир тортди-да, тишлари орасидан паға-паға тутун чиқариб гапини давом эттирди:

— Мен қизнинг ким эканлиги ва давлати тўғриси

да отамдан сўраб билмоқчи бўлсам ҳам, отам менга ҳеч нарса айтмади. Қандай бўлмасин, яқин ўртада ҳам-ма ишдан хабардор бўламан.

Уқувчиларимиз бу фикрларни ва шайтончасига ўйланган бу хаёлларни фақат Сиёвуш Мирзогагина махсус бўлганлигини тасаввур қилмасинлар, эрон йигитларининг кўплари шундай. Улар шундай хаёллар билан уйланадилар, чунки улар турмушларига шерик бўладиган хотиннинг ҳеч қачон юзини кўрмайдилар, ҳаттоки йиллар бўйича хотин бўладиган қизни қай рангда — сариқми, оқми, қорами, ориқми, семизми, паканами, новчани эканини ҳам билмайдилар. Шунинг учун ҳам кўпинча уйланиш, фақат манфаатни қўлга киргиши мақсади билан юзага келади. Ҳатто баъзилар куёвнинг уйида қорнини тўйғазиш, ёхуд никоҳ мажлисида сарупо кийиш, пул олиш нияти билан қизнинг сифатини, башарасини, бечора йигитнинг олдида шу йигитнинг табиатига қараб жуда ҳам ҳаддан ошириб, бўлмаган гаплар билан таъриф ва тавсифлар қилдилар.

Сиёвуш Мирзо ўрнидан турди, яна бир неча қадаҳ ароқни кетма-кет кўтариб:

— Хўп, жуда яхши, қани, юр кетдик!— деди.

Қора мовут пальтосини кийгач, кичкина қорақўл кулоҳини бошига қўндирди, калта ҳассасини қўлига олиб, ўзи илгариди, Муҳаммад Тақи унинг орқасида зинапоялардан боққа тушдилар. Ой тик кўтарилган, ҳаво тоза эди. Сиёвуш Мирзо ва Муҳаммад Тақи икки тарафига гулу райҳонлар экилган торгина йўлқадан ўтиб, боғнинг дарвозасига етдилар. Дарвоза яқинидаги бир ҳужрада яшовчи қари дарвозабон уларни секингина чиқариб юборди.

Соат саккизлар чамаси эди. Сиёвуш Мирзо эшикдан чиқар-чиқмас, Муҳаммад Тақиға қараб:

— Демак, пиёда борар эканмиз-да?— деди.

Муҳаммад Тақи дарров жавоб берди:

— Ого, уйнинг эгаси кечқурун соат тўққизларда келинг, деб айтган эди, ҳали саккиз ҳам бўлгани йўқ. Ҳаво тоза, ойдин, секин-секин кетсак, худди вақтида етиб борамиз.

Сиёвуш Мирзо эътироз билдирмади. Ҳар иккиси ёнма-ён кета бошладилар. Дарвозайи Қазвин хиёбонидан ўтиб, Ҳасанобод чорраҳасига етдилар. У ерда Сиё-

вуш Мирзо Боғи Шоҳ дарвозаси томон кетаётган бир хотинни кўриб, Муҳаммад Тақига деди:

— Қани юр, шу хотиннинг орқасидан тушамиз. Бирор иш чиқаролсак, у ерга бормай қўя қоламиз.

Муҳаммад Тақининг бу сўзга аччиги чиққан бўлса ҳам, бир нима демади. Сиёвуш Мирзо хотиннинг орқасидан кета бошлади. Истихор хиёбони рўбарўсида у хотинга тегишиб, сўз ота бошлади. Фақат хотин: «Мен сизнинг айтган кишингиз эмасман. Балки, сиз суд маҳкамаси раисига беш туману икки қирон жарима тўламоқчидирсиз?» деганидан кейин таажжубланиб, бунақа хотинларнинг орқасидан юриш бефойда эканини тушунди. Ичидан севинган Муҳаммад Тақи билан Истихор хиёбонига кирди. Сўнгра кунчиқар тарафига айланиб, бир неча кўчаларни босиб, оғойи Ф...уссалтанининг қасри яқинига бордилар ва унга эътибор бермай ўтиб кетдилар.

* * *

Юқорида айтганимиздай, Фаррух секингина девордан тушиб, ўз уйига келмоқда эди.

Фаррух ғоятда ташвишланган, бошида минг турли хаёллар, фикрлар қайнар, бошини қуйи солиб, хаёл суриб, ўйлаб келарди. Агар биров унга жўрттага тегиб кетса ҳам, у ўз аҳволини бузмас эди. Ун беш дақиқача шу аҳволда юрди. Йўл-йўлакай ўз-ўзига дер эди:

«Шунчалик хафа бўлишнинг нима кераги бор? Одам деган матонатли бўлиши лозим. Маҳинни ҳеч қачон қўлдан чиқармайман. Мени хафа қиладиган бир нарса — поччам амманнинг қулоғига айтган гапи, буни бўлса, Маҳин эртага билиб, менга айтади».

Бора-бора тинчланиб қадамини жадаллаштирди. Бирданига юз қадам олдинда икки киши шарпасини кўрди, улар ҳам секин-аста юриб шаҳарнинг шимолишарқий томонига қараб келишарди.

Шу маҳал Англия элчихонасининг соати тўққизга занг урди. Нодирий хиёбонида одамларнинг оёғи тортилиб қолган, кўчада ҳеч ким кўринмас эди. Техрон кўчаларининг шунчалик барвақт ҳувиллаб қолиши ажабланарли эмас. Чунки, эронликлар рамазон ойи-

дан бошқа вақтда кечалари кўчада изғиб юришни одат қилган эмаслар. Эронда кечаси деган сўз кун бо-тишданоқ бошланади. Фақат баъзи саёқ йигитлардан бошқа бутун аҳоли уйларидан ташқарига чиқмайдилар ва болалар бошларини онасининг тизига қўйиб, уйқуга кирадилар. Фақат дунёнинг ҳамма лаззатидан маҳрум бўлган бечора хотинлар шундай ахлоқсиз эр-каклар билан кечани саҳарга улаштириб, азоб-уқубатда ҳаёт кечирадилар!

Бирдан, келаётган икки кишининг олдиндагиси сўради:

— Анови оғодан сўрайлик, шу пайтда нима қилиб юрган экан? Балки биз бораётган ерга кетаётгандир.

Иккинчиси жавоб берди:

— Оғо, бировнинг ишига аралашининг нима кераги бор?

Биринчиси бизга таниш бўлган Сиёвуш Мирзо эди. У сўзида давом қилиб деди:

— Муҳаммад Тақи! Сал сабр қил, қани кўрайлик, ким экан!— Сиёвуш кулди.

Шу маҳал Фаррух ҳам уларга етиб олган эди. Беш қадамча яқинга келар-келмас, Сиёвуш Мирзо унга юзланиб сўради:

— Муҳтарам оғо, кечаси алламаҳалда қаерга кетаётибсиз, айтишингиз мумкинми?

Фаррух рўбарўсидаги кишини девона деб ўйлади. Бирдан бошини кўтариб, таажжубланиб деди:

— Оғо! Маҳмаданагарчилигингизга қараганда, жуда ўзига бино қўйган одамга ўхшайсиз, ҳамма ўз ишидан менга маълумот бериб юришга мажбур деб ўйлайсиз чоғи?

Сиёвуш Мирзо жавобиди:

«Эҳа! Жуда баланд кетдингиз-ку, сал секинроқ гапираверинг!» демоқчи бўлган эди, айтолмади, тили гўлдираб қолди. Кайфи ошиб қолгани сезилди.

Фаррух маст йигит билан пачакилашиб қолганлигини тушуниб, ўз-ўзига:

«Кайфи бор одам билан пачакилашиб ўтиришнинг нима кераги бор», деб ўтиб кетмоқчи бўлди.

Муҳаммад Тақи ҳам жанжал бу кечаси топадиган даромадидан маҳрум қилиши мумкинлигини ўйлаб ўртага тушиб, Сиёвуш Мирзога:

— Оғо, ҳозир бу гапларнинг жойи эмас, юринг,

кетамиз! Бекорга кеч қоламиз, кеч қолсак киргизмайди,— деди.

Сиёвуш Фаррухнинг бепарво кетишига ҳам, Муҳаммад Тақининг ўртага тушишига ҳам эътибор бермасдан, бир неча қадам юриб олдинга ўтди-да, қўлидаги калта ҳассаси билан Фаррухнинг йўлини тўсиб қичқирди:

— Ҳеч ёққа кетмайсан! Сени қўйиб юбормайман! Айтиб кетасан.

Фаррух бундай бемаза, мияси айниб қолган йигитнинг қўлидан яхшилик билан қутула олмаслигини тушунганлиги учун, Сиёвуш яна тикилинч қилгудай бўлса, бир мушт тушириб, қутулиб кетишни ўйлаб деди:

— Ого, агар сиз бекорчи бўлсангиз, билмадим, лекин менинг зарур ишим бор, қўйинг, мен кетай.

Кайфли йигитларнинг таъбири билан айтганда, кайфи чоғ бўлган Сиёвуш Мирзо Фаррухни йиқитмоқчи бўлиб беихтиёр қўлини унинг ёқасига узатди. Худди шу вақтда Фаррух ҳам қўлини кўтариб, қулочкашлаб бир мушт туширмоқчи эди, лекин қўли бирданига ҳавода биллагидан ушланиб қолди. Фаррух орқасига қаради, бир қўл билан Сиёвуш Мирзони ушлаб турмоқда бўлган Муҳаммад Тақини кўрди. Улгунча кайфи ошиб кетган Сиёвуш Фаррухнинг ёқасини қўйиб юборди. Муҳаммад Тақи ўз-ўзича гўлдирамоқда бўлган Сиёвуш Мирзони судраб хиёбоннинг нариги бетига олиб ўтиб кетди. Маст одам билан жанжаллашиб ўтиришни ўзига эп билмаган Фаррух, унга эътибор қилмасдан, бепарволик билан ўз йўлига кетди.

Хиёбоннинг бир томонидан ариқча оқар эди. Ариқчада сув лиммо-лим эди. Сувда ойнинг нури аксланар, дарахтлар унга қўланка ташларди. Муҳаммад Тақи Сиёвушни шу ариқчанинг бўйига олиб бориб, бир неча ҳовуч совуқ сувни юз-кўзига сепди. Икки-уч дақиқадан кейин Сиёвуш Мирзо ҳушёр тортиб, секин сўради:

— Мен нима қилдим, у ким эди?

Муҳаммад Тақи хушомадгўйлик билан жавоб берди:

— Ҳеч гап бўлгани йўқ. Бир оз айний бошлаган эдингизу, худога шукур, ҳушёр тортдингиз. Қани, юринг, тезроқ борайлик!

Спёвуш ўрнидан турди, лекин оёқлари майишиб, гандираклар эди.

— Хўп, майли, қани, юр кетдик; у дунёга десанг ҳам кетавсераман,— деди.

VIII боб

БЕМОР МАҲАЛЛАНИНГ ЧУРИЛАРИ

Теҳроннинг шимоли-шарқий тарафларида, яъни Давлат ва Шимрон дарвозаларининг ўртасида, Сипаҳсолор деб аталган машҳур бир хиёбон бор. Кунботар тарафдан кунчиқар тарафгача чўзилган бу хиёбонни ўтгандан кейин Сипаҳсолор боғидан икки минг кадамча узоқлашиб Зиллисултон деган машҳур паркка етилади, ундан минг кадамча юрилгач, ярим обод маҳаллага етиладик, бу ерда бир неча боққоллик, атторлик ва шароб дўконларидан бошқа ҳеч нарса кўринмайди.

Бу ерлар Оташкада хиёбони номи билан шуҳратланган. Бу хиёбоннинг тугалишида шимолдан жанубга қараб тўғри чўзилган бошқа бир хиёбон ҳам борки, у, Сенни номи билан машҳур.

Бу маҳаллада бирталай пастқам уйлар кўзга кўрингандай, уйларнинг эшикларида ҳам хира шишали кичкина фонусчалар ёниб туради. Бу хиёбоннинг пастида доим полиция айланиб юради. Бу ердан ўтқувчиларга диққат қилиб қараган киши, булардан бир қисми кўчанинг муюшида бирданига кўздан ғойиб бўлиб қолганини ва ёки шу ердаги бир уйнинг эшигини тақиллатиб турганини кўради.

У ердан ўтиб кетувчилар ҳамиша соз, камонча, орасира ашула айтмоқда бўлган хотинларнинг овозларини ҳам эшитиб қолади. Фақат рамазон, муҳаррам, сафар ойларида, кайф-сафони севадиган йигитлар айтганидай, шундай «жонни қитиқлайдиган» музикаларни тинглашдан маҳрум бўладилар.

Нима бўлса ҳам, бу маҳаллада хаёлга сиғмайдиган, ҳам айтиб бўлмайдиган даражада бир расволик ва ҳаёсизлик кўзга ташланади. Диққат билан қараган одам бу ерга йигитлар ва чоллар, европача кийинган кишилар ва салла-қаллали руҳонийларнинг шу томонга ошиқиб келишини ҳамда хотинлар эшиклардан мўралаб имошиора, баъзилари махсус ҳаракатлар билан уларни

Ўз домларига илннтиришга уринишларини кўрган бўларди.

Бу маҳаллада яшовчи дўкандорлар бўлса гўё қар ва соқовга ўхшардилар, чунки шунчалик қабиҳ сўзларни эшитсалар ва ярамас ҳаракатларни кўрсалар ҳам, ҳеч таъсирланмасдилар. Улар ўз олди-сотдилари билан машғул бўлиб, ҳеч вақт хотин билан эркакнинг нарх тўғрисида ...жанжалларига аралашмасдилар.

Шу кечаси, яъни Сиёвуш билан Фаррух учрашган, Фаррух билан Маҳиннинг бир-бирларига оит ичган ҳам оғойи. Ф... уссалтана билан хотинининг ошиқ-маъшуқларни жудо қилмоқ учун режа тузган кечаси, бу маъшхур маҳалланинг Оташқада хиёбонида, эшиги кўк ранга бўялган уйнинг саҳнида бир неча хотин янги ва гўзал бир гилам устида суҳбатлашиб ўтирар эди.

Астагина эсмоқда бўлган шабада ўртага қўйилган шишаси синиқ чироқни гоҳ туташтирар, гоҳ ўчирмоқчи бўлар эди. Хотинлар суҳбатга машғул эдилар.

Ўрталарида қора ва ифлос товоқда бир неча сарғайган бодринг билан бир оз қотган нон қўйилган. Суҳбат орасида ора-сира шу нарсалардан ейишарди.

Бу иморат янгида солинган бўлиб, унинг уч тарафида яъни шарқ, ғарб, шимол тарафларида бирмунча бўлмалар бор эди. Уйларнинг остида ертўла — сув турадиган жой ва ошхона бор эди. Чоғроқ ҳовлининг ўртасида ҳовузча бор бўлиб, шимол тарафдаги иморатнинг қаршисида айвон, унинг икки тарафида тўрт пояли икки зина қўйилган.

Уйларга кирадиган киши у ерда унчалик жиҳозларни кўрмас эди. Фақат, ҳар уйда бир неча курси ҳам диван қўйилган, бир жойда катта қизил рамкали ойна ўрнатилган, миҳга эса дутор ва доира осиб қўйилган эди.

Бошқа бўлмаларда биттадан гиламча, баъзида эски палос парчаси солинган эди. Уйларнинг биттаси бошқа уйлардан ажралиб турарди, чунки бу уйда эски бир каровот ҳам бор эди.

Бу ҳовлининг ҳар тарафида иккитадан уй (ҳаммаси бўлиб олти уй) бўлиб, улар даҳлиз билан туташарди.

Қани, бу жойдаги суҳбатлашиб ўтирган тўрт хонимга яқинлашайлик. Кўрайлик, ҳам нималар тўғрисида сўзлашаётганларини эшитайлик.

Булардан биттаси, ҳовузга орқа ўгириб ўтиргани Ашраф номли бўлиб, баланд бўйли, оқ юзли ва бир оз

ғалай, сариқ сочли хотия эди. Эгнида этаклари бурма, кўкраги очиқ, енги қисқа, лиму рангли кўйлаги бор эди. Боши очиқ, сочлари ҳам бошига турмаклаб қўйилган. Ақдас номли иккинчи хотин бунинг тескариси ўлароқ, пакана, қорачадан келган, кўзлари чуп-чуқур, эгнида оқ мунчоқлар қадалган кўк ипак кўйлаги бор эди. У папирос чекарди.

Иффат деган учинчи хотин: ўрта бўйли, бодом кўзли, қора қошли, ингичка, нозик бурунли, қизил лабли бўлиши билан баробар, ҳар икки дугонасидан ҳусни билан ажралиб турар эди. У эгнига узун, енглари кенг, пушти шолпардан кўйлак кийган эди. Оз кулиб, оз гапирганлигига қараганда, янги келганлиги ва бу ерга бегона эканлиги англашилиб турар эди.

Ахтар номли тўртинчи хотин, баланд бўйли, анчагина семиз эди. Юзу кўзига қараб баҳо берганда, у, бу ердаги ҳар учала хотиндан кексароқ эканлиги маълум эди. Катта кўзлари, бароқ қошлари, қалин лаблари, шу хислатларига муносиб бурни, марвариддай тишлари, чиройли бағбақаси бор эди.

Эгнига оч сариқ рангли кўйлак кийган бўлиб, унинг чуқур очилган ёқасидан оппоқ кўкраклари кўриниб турар эди.

Бу кечаси бу ерга ҳеч одам келмаган эди. Тўғрироғи, «меҳмонлари» бўлмаганлиги учун бу тўрт хотин, керакли нарсалар олиш баҳонаси билан, баъзи йигитларни уйларига етаклаб келиш пайида хиёбонларга чиқиб кетган хўжайин хотиннинг уйда йўқлигидан фойдаланиб, бир ерга йиғилиб ҳасратлаша бошлаган эдилар.

Уларнинг юз-кўзларига чаплаб ташлаган упа-эликларига қарамасдан, бахтсизлик ва тутқунлик асарини чеҳраларидан оп-очиқ кўриниб турар эди.

Биттаси, бундан бир неча кун илгари бир кеч қўниб кетган кишининг оғзи сассиқлигидан жирканганлигини, иккинчиси, хўжайин хотиннинг койишларидан ва бир ёш йигитнинг эрта билан туриб пул тўламасдан қочиб кетгани учун ноҳақ жарима тўлаганлигидан, учинчиси, икки кун аввал полиция участкасида йигирма тўрт соат қамалганлигидан гапириб, юракларини бўшатмоқда эдилар.

Нима бўлса ҳамки, суҳбатларида гўёки, шундай разил, беномус ҳаётда яшаш тамоман тинкаларига тегиб, бу ифлос доирадан қанчалик кетмоқ истаганлари ошқора кўриниб турар эди.

Ора-сира ўрталаридаги сариқ бодрингдан ҳам могорлаб кетган нондан еб, оғизларини лаззатли қилиб турар эдилар. Хўжайин хотин билан қариндош бўлгани учун, бу уч хотин устидан саркорлик қилишни истаган Ашраф:

— Келинлар, бу кеча меҳмон келгунча бир оз суҳбат қилиб, ҳаммамиз ўз таржимаи ҳолимизни навбат билан сўзлаб берамиз,— деди.

Бу таклифни Иффатдан бошқа ҳамма қабул қилди. Иффат бўлса, таржимаи ҳолини сўзлашдан тортинар эди. Чунки, юзидан унинг ёлгончи эмаслиги маълум эди. Тўғриси, баъзи сабабларга кўра, айтишни истамасди. Аммо, нима қилсин, бошқа уч хонимга қарши ҳеч нима дея олмас эди. Кўпчиликка бўйсунмишга, навбати келганда, у ҳам ўз таржимаи ҳолини сўзлашга ваъда берди.

Соат кеч етти яримлар чамаси. Ой, аввалоқшомда чиқиб, аста-секин юксалмоқда. Бирдан қаттиқ шамол эсмоққа бошлади. Рўбарўларидаги чироқ ўчди. Кечаси ойдин бўлганлиги учун, чироқни қайтадан ёқишни лозим кўрмадилар.

Бу ерда шу тўрт нафар хонимдан бошқа битта ёш бола ва ҳар бир муомала ишларида бош суқиб турадиган қари ошпаз кампир ҳам бор эди. Улар бўлса ўчоқ бошида ўзларича суҳбатга машғул эдилар.

Ашраф, гиламда ётган бир папиросни олиб тутатди-да, бир тортгандан кейин:

— Менинг ҳикоям у қадар узун эмас,— деб сўз бошлади.— Сиздан нимани яширайин. Менинг отам қассоб, онам бўлса, Ноҳид хонимнинг (шу жойнинг эгаси) синглиси бўлиб, кундуз кунлари уйда чарх йигирар эди. Уйимиз Хонобод хиёбонида бўлиб, ҳовлимиз жуда тор бўлиши билан баробар, иккита кичкинагина уйдан иборат эди. Отам қассоб бўлганлиги учун, давлат гўшт нархини арзонлаштириш ҳақида фармон чиқарганидан кейин, халққа ит, мушук гўштларини сотиб бўлса ҳам, бойлик орттиришга уринар эди. Бироқ сармоясини бўлмаганлиги учун, бу ишдан ҳам у қадар кўп фойда келмасди. Кунда фақат беш-олти қирон фойда қолар эди. Шу билан бизнинг бир нав рўзгоримизни тебратар эди. Жуда оғир бир вазиятда турмуш кечирар эдик. Мен ёш вақтимда ҳам ўлгунча суқ ҳам тамагир эдим. Масалан, кўшнимизнинг қизларидан биттаси янги кийим-бош кийгудай бўлса, кам деганда бир кеча-кундуз йиглаб, ота-

онамни жуда хуноб қилиб, мажбуран, уй-рузғор асбобларидан бирорта нарсани гаров қўйдириб, ё соттириб бўлса ҳам пул топиб, шундай кийим-бош олиб беришга мажбур қилар эдим. Бизнинг кўчамизда бирмунча давлат амалдорлари — аъёнларига хос катта иморатлар ҳам бор эди.

Шу иморатлардан бирида, ўша вақтда отини билмаганим бадавлат бир одам яшар эди. Бу кишининг ёш, чиройли ўгли бор эди. Кўчада ҳамма уни қўлини бигиз қилиб кўрсатарди. Мен ҳам уни ёқтирар эдим. Шунинг учун кўчада, қўшни болалар билан ўйнаб юрган вақтларимда, уни кўриб қолсам, тушунмаганим ҳолда рўбарўсига келиб, ўзимни кўрсатишни истар эдим. Ўн саккиз ёшларда бўлган бу ёш йигит ҳар вақт менга қараб кулар эди. У вақтда мен ҳам ўн икки ёшга кирган бўлиб, доим янги, озода кийим-бошларни орзу қилар эдим.

Бир кун, кўчада ўйнаб юрган вақтимда, нима бўлди-ю, оёғим тошга туртиниб кетиб, қаттиқ оғрий бошлади. Оғриқнинг зўрлигидан куч билан ўзимни девор тагига етказиб йиқилдим. Ўйнаб турган болалар жуда кўп бўлгани учун, менга нима бўлганини ҳеч ким билмади. Девор тагида ўзимдан кетиб қолибман. Бирдан кўзимни очиб қарасам, нима кўрганлигимни айтиб берайми? Қичкинагина, шинам қилиб безалган бир уйда, ўша вақтга қадар кўрмаганим бир каравотда ётибман. Ҳалиги йигит бош томонимда папирос чекиб ўтирибди.

Мен ўзимни йўқотар даражада:

— Бу ер қаер, мен қаерга келиб қолдим, отам қани, онам қаерда?— деб сўрадим.

У жавоб ўрнига хохолаб кулиб, мени ўпди-да:

— Ҳеч нима бўлгани йўқ, онанг уйингда, сен бу кеча шу ерда қолиб, эрта билан уйингга кетасан,— деди.

Қўлимни қўлига олиб кўриб:

— Қиз бола деганнинг қўли ҳам шунақа ифлос бўладими?— деди. Шу пайтда анча қоронғи тушиб қолган эди.

Ёш йигит бирдан стол устида бўлган оқ бир тугмани босди. Бир нафас ўтмасдан эшик очилди. Ичкарига бир одам кирди. Бу йигит кирган одамга қараб: «Қарачи, ҳаммом тайёрми?»— деб сўради.

Хизматкор таъзим қилиб чиқиб кетди. Икки дақиқа ўтар-ўтмас, қайтиб:

— Балли, ого, ҳаммом ҳам, бошқаси ҳам тайёри— деди.

— Яхши, бўлмаса, Ҳамида опага айтгин, мана бу қизни (мени кўрсатиб) ҳаммомга тушириб, яхшилаб чўмилтирсин,— деди-да, менга қараб,— қайи туринг, шу кишининг орқасидан ҳаммомга боринг, иншоолло, ҳаммомдан қайтганингиздан кейин кўришамиз,— деди.

Мен бу хилдаги ширин сўзларни эшитишга одат қилмаганлигим учун ҳеч нима деб жавоб бермадим-у, дарров ўрнимдан туриб, хизматкорнинг орқасидан кета бошладим. У киши мени ўртаси гулзор қилинган ҳовлидан олиб ўтди-да, кичкина, ички томони мрамар қилинган ҳаммомчага олиб кирди. У ерда чироқ ёниб турар эди.

Ҳаммомда Ҳамида аввал лат еган оёғимни силашга бошлади. Кейин мени ювинтириб, ташқари олиб чиқди. У ерда мен учун чиройли кийим-бошлар тайёрлаб қўйилган экан. Менга бу кийим-бошлар бир оз кенг бўлса ҳам, кийдим, сўнг Ҳамида сочларимни тараб, чиройли қилиб ўриб қўйди. Бориб ойнага қараб, ўз-ўзимни танимай қолдим. Шу башанг кийим-бошлар ва-шундай яхши безаниш менга жуда гўзал бир сурат ва чиройли башара бахш этган эди. Ун дақиқа ўтар-ўтмас, бояги айтганим кичик уйга кирдим. Йигит шу ерда мени кутиб турар экан. Ичкарига киришим билан истиқболимга чиқиб ўпди-да: «Хуш келдингиз!» деди, ярим соатдан кейин кечки овқатни келтирдилар. Албатта, бу овқатлар шундай овқатлар эдики, ҳалигача мен буларнинг лаззати у ёқда турсин, отларини ҳам эшитмаган эдим. Овқатни егандан кейин ёш йигит ўша уйнинг ўзида кийим-бошларини ечмоққа бошлади...

Эрта билан уйқудан турганимда, ёнимда ҳеч ким йўқ эди. Ўрнимдан туриб, деворга қўйилган катта ойнада ўзимни кўрсам, рангим бир оз синиққан, кеча кечаси бошимга тушган баъзи воқеаларни хотирламоққа бошладим. Бирданга эшик очилиб, Ҳамида ичкарига кирди ва деди:

— Ого Шимронга кетдилар. Мана шу конвертни сизга бериб, уйингизга жўнатишни менга тайинладилар.

Мен ҳам ўйлаб кўрмасдан, гўё ҳеч нима йўқотмагандай, конвертни олиб уйга келдим.

Онам мени кўриши биланоқ кучоқлаб бағрига босди, фарёд урмоққа бошлади.

— Келинлар, келинлар, қизим топилди, худога шукур, қизим топилди!— деб қичқириб, ҳамма қўни-қўшнилари бошига йиғди.

Кечадан бери, яъни мен йўқолган вақтдан буён, у бечоралар ҳеч ухлмасдан, овқат емасдан қидирганлари, ҳатто полицияга ҳам хабар берганликларини айтдилар ва онам мендан:

— Жуда яхши, қани айт-чи, қаерда эдинг, нима бўлди?— деб сўради.

Қўни-қўшниларимиз — хотинлар йиғилишиб, атрофимни ўраб олдилар. Мен ҳам уялмасдан кеча кечаси бўлган аҳволни бошдан-оёқ уларга айтиб, қўлимдаги конвертни онамга бердим. Онам дарров конвертни очиб, ичидаги беш туманлик пулни кўрган замон, мен сабабини тушунмаганим ҳолда:

— Войдод! Қизимнинг номусини барбод берибдилар, қизимни бепарда қилибдилар!— деб фарёд-фиғон кўтариб, бошига, кўкрагига муштлаб, сочларини юлиб, йиғламоққа бошлади.

Қўшни хотинлар онамга тасалли беришга бошладилар. Улардан биттаси менинг ёнимга келиб, у ёш йигитнинг уйи қаерда эканлигини сўради. Мен ҳам унга айтиб бердим. У бирданига:

— Дод, ҳамадонликнинг дастидан дод!— деб қарғамоққа бошлади.

Мен кечаги ёш йигитнинг ҳамадонлик бўлганлигини шу ерда билдим. Энг сўнг, бир оз ўтгандан кейин, онам мени етаклаб, назмияга олиб борди. Бошимга тушган савдоларнинг ҳаммасини раисга¹ айтдим. Раис ҳам дарров бояги йигитнинг уйига одам юборди. Фақат ун дақиқа ўтар-ўтмас, юборган одами қайтди-да:

— Оғо уйда йўқ эканлар. Хизматкорларига: «назмия идораси мени йўқласа, ўрнимга сен бориб келгин», деб кетган эканлар. Хизматкорларини бошлаб келдим,— деди.

Кеча кечаси кўрганим хизматкор ичкарига кириб, назмия раисининг олдига борди. У билан аста-секин нималарнидир сўзлашгандан кейин, раис баланд овоз билан сўзга бошлади:

— Жуда яхши, онажон, аввало шуки, бу иш бўлмагани яхши эди. Энди бўлар иш бўлибди, энди қандай чора бор? Оғойи Ҳайдарқулихон шу қилган ишлари

¹ Раис — полиция бошлиғи.

учун сизга, қизингиз бадалига бир қадар пул беришга тайёр. Шунга нима дейсиз?

— Йўқ, оғо! Бу мумкин эмас. Агар ўз гуноҳини яхшилиқ билан ювмоқ истаса, қизимни сийға¹ тариқасида хотин қилиб олсин.

Мен онамнинг бу сўзидан, яъни ўша мазали кечанинг... такрорланишини англаб, жуда ҳам севиндим. Лекин назмия раиси зарда билан деди:

— Аҳмоқ хотин экансан! Айтаётган гапингни ўйлаб айтяпсанми? Оғойи Ҳайдарқулихон қандай одам эканлигини биласанми? У зот қассоб қизини ўзларига хотин қилармидилар? Рози бўлсанг, мен буюраман, ўттиз туман берсинлар. Йўқ, деб шаллақилиқ қиладиган бўлсанг, ҳозир қамаб қўяман.

Мен яна бир қайта у ёш йигитни кўра олмаслигимга жуда ўқиндим. Бечора онагинам, назмия раисининг пўписасидан жуда ҳам қўрқиб кетди. Ортиқча бир сўз айтмасдан, ўттиз туманни олишга рози бўлди. Шу ернинг ўзидаёқ бояги хизматкор онамга йигирма беш туман берди. Уйимизга қайтдик.

Бу воқеадан кейин онам бирмунча вақт йиғлашни одат қилиб олди. Кейинчалик кўз ёшлари тийилган бўлса ҳам, яширинча ташвиш чекаётганини англаб эдим.

Онамнинг яхши бир хотин бўлганлиги ва менинг ҳам шу ишни ўйлаб кўрмасдан қилганимни ҳамма яхши билар эди. Бизга яқин, қўшни деса ҳам бўладиган бир сувоқчи йигит бор эди; шу йигит, агар онам қўлидаги ўттиз туман пулга боққолчилик дўкони очиб берса, мени олишини айтибди. Онам ҳам худди шунини истар эди. Дарров розилик берди. Намозгар пайтида маҳалланинг имомни келиб, никоҳ ўқиди. Шу кечаси мен билан унинг (оти Аҳмад эди) тўйимиз бўлди.

Орадан олти ой ўтди. Менинг дардим билан сил бўлган онам бирданига касал бўлиб ўлди. Отам ҳам борйўғини қорадорига сарфлаб тугатгани учун, ҳамма нарсадан ажраб, уйга кириб қолди. Бир ярим йилдан

¹ Сийға — Шиа мазҳабидаги мусулмонларда, хусусан, Эронда шарият қонунига биноан, вақтинча никоҳлаб олинадиган хотин. Никоҳ муддати, (бир, икки, уч, беш, ўн ой) одатда, уйланувчи кишининг хоҳишига боғлиқ бўлади. Шу муддат тугагандан кейин эр олган хотинини қўйиб юбориши ёки истаса никоҳ муддатини узайтириши мумкин. (Ред.)

кейин у ҳам ўлди. Бу икки ўлимнинг аччиғи мени жуда ҳам эзиб ташлади.

Мен боққол Аҳмад билан бирга яшар эдим. Фақат анови биринчи кеча ҳеч қачон эсимдан чиқмасди. Ҳамиша ўша чиройли кийим-бошлар, ўша ёш йигит, ўша лаззатли таом, ўшандай қимматбаҳо ётоқларнинг орзусини қилар эдим.

Отам ўлгандан кейин орадан яна тўрт йил ўтди. Бир кун мана шу холам (Ноҳид хоним) бизникига келиб, мени ўз уйига олиб кетди. Мен унинг нима иш қилишини билмас эдим. Фақат онамнинг: «Бир холаи бор, баъзи бўлмағур ишларни қилганлиги учун, у билан борди-келди қилмаймиз» дегани эсимда бор эди. Нима бўлса ҳамки, Аҳмад менга ҳеч қачон уйдан ташқари чиқишга ижозат бермас эди. Қўшнилариимизда бўладиган таъзиялардан бошқа ҳеч қаерга бора олмас эдим.

Бир кун ундан бир иложини топиб жавоб олдим-да, эрта билан кўнкага ўтирдим. Сўрай-сўрай шу уйга келиб етдим. Холам мени яхши қабул қилди, эғни-бошимга қараб:

— Жиянимнинг эғнида шундай эски-туски кийим-бош бўлишини истамайман, бор, анови уйда янги кийим-бошлар бор. Ўшаларни олиб кий!— деди.

У вақтларда мен ўн етти ёшимда эдим. Тайин қилинган уйга кириб, у ерга қўйилган чиройли кийим-бошларни кийдим, зийнат асбобларини тақдим, ўзимга яхшигина оро бердим. Чиққанимдан кейин холам менга:

— Юр, олдимга туш! Мана бу уйда бир одам сени пойлаб ўтирибди,— деди.

Мен ҳам тортинмасдан ичкари кирдим. Уй мебеллар билан безанган эди. (Ашраф шу ердаги хоналардан бирини кўрсатди). Хоналарнинг бирисида ёш бир офицер ўтирар эди. Мен уни кўрар-кўрмас, ташқарига чиқиб кетмоқчи бўлсам ҳам холам мени чиқармади. Бу ёш офицер йигитнинг ғоятда гўзал, айниқса юқорига қараб буралган мўйловлари менга маъқул тушиб, ўзига мафтун қилди.

Холам менга деди:

— Бу оғо қариндошимиз бўлади, сен билан кўршигани бу ерга келибдилар.

Мен ҳам тортинмадим. Холам ўрнидан турди:

— Бемалол ўтириб гапиришинглар, мен сизларга ҳалақит бермай,— деб уйдан чиқиб кетди.

Мен бир оз кўрқиб, хавотир олган бўлсам ҳам, ёш офицернинг чиройли сиймоси менинг бутун ваҳималаримни йўқотиб юборди.

Холам кетгандан кейин ўн дақиқа ўтар-ўтмас, ёш офицер менга яқинлашиб, сийнамга қўл узатганини кўриб уялдим, ўз-ўзимча: «Бу йигит мен билан бирданига шундай муомала қилишдан нега ҳаё қилмади экан?» деб ўйладим. Лекин ёш офицер тортинмасдан, бирдан мени ўпди-да, секингина қулоғимга:

— Холанг ёлғон гапиряпти, мен қариндошинг эмасман. Балки, сенинг хушторингман,— деди.

Мен ҳам холамнинг ёлғон гапирганини англадим. Лекин ёлғон бўлса ҳам, яхши ёлғон айтибди. Чунки, шундай бир ёш йигит билан сўзлашиб ўтириш, Аҳмаднинг суҳбатидан минг қатла яхши эди. Охири ҳеч сўз демасдан ноз-карашма қила бошладим.

Бир соатча ҳалиги йигит билан бирга бўлдик...

Кейин офицер туриб кетди. Ўн дақиқадан кейин холам ичкарига кирди. Мен уялганимдан терлаб кетдим, холам менга қараб:

— Бу ерни кўрдингми? Ўз уйингни ҳам кўргансан-а? Эринг бўлса, менинг уйимни билмайди. Бу ерга келганингдан шубҳа ҳам қилмайди. Агар бу ердан, ҳам мана шу ёш йигитдан хурсанд бўлган бўлсанг, эртага эрингга айтмасдан, секин уйдан чиқ-да, тўғри шу ерга келавер. Бу ерда ҳар вақт шундай чиройли ёш йигитлар билан кайф қилиб, ҳаминша чиройли уст-бошлар кийиб, лаззатли овқатлар еб умр ўтказасан,— деди.

Ундан сўнг кетар олдимда қўлимга битта олтин пул бериб:— Ма! Бунни ол! Эртага келишингда извошга тушиб кел,— деди.

Мен чиқиб, уйга кетдим. Фақат ўқтин-ўқтин ёш офицер эсимга тушиб, қаршимдаги эрим Аҳмадни кўрар эканман, ҳаётимдан безор бўлар эдим.

Эрта билан уйқудан турдим. Аҳмад кетгандан кейин, ўзимга қарашли майда-чуйдаларимни йиғиштириб, бир бўҳча қилиб тугдим-да, холамникига жўнадим. У кечаси ҳам ўша офицер келди, кечаси билан икковимиз лаззатли «суҳбат» қилиб, тонг оттирдик.

Энди уч йилдан бери шу ердаман. Шу маҳалгача бир неча марта ёмон касалларга мубтало бўлдим. Ҳозир холамдан олтиш туман қарзман, бу пулни ҳеч қачон узиб адо қила олмасам керак.

Ашрафнинг ҳикояси тамом бўлгандан кейин орага бир неча дақиқа жимлик чўкди. Сўнгра Ақдас сўз бошлади:

«Навбат меники бўлгани учун, мен ҳам ўз тарихимни айтиб берайин. Мен бир баззознинг қизи эдим. Отамнинг иши унчали яхши эмасди. Ҳовлимиз Ҳозор ёнида, Аббособод деган маҳаллада эди. Менинг бир чўтир ва хунук опам бор эди. Отам билан онам уни яхши кўрар эдилар. Мени бўлса унча хушлашмасди. Лекин кўп вақтда бизникига келган совчилар опамни ёқтирмас эдилар. Мени бўлса, ота-онам совчиларга кўрсатмасди. Демак, менинг пешонамнинг очилиши опамнинг бахтига боғлиқ эди. Яъни, опам эрга теккандан кейингина, мен эрнинг юзини кўришга умидвор бўла олар эдим. Тасодифан опам, «ўзинг учун ўл етим» дегандай, билмадим, нима бало бўлди-ю, домла мулла Иброҳимдан дуойи афсунга амал қилдирдим, ишқилиб, папирос сотадиган бир ёш йигитни эргаштириб келиб, ўзига боғлади.

Шу кундан бошлаб мен ҳам эрга умидвор бўлиб, анчагина хушчақчақлик билан яшай бошладим. Ниҳоят, мақсадимга етиб, эрга ҳам тегдим. Аммо, қандай эр денг?

Бир кун бизникига уч хотин совчи бўлиб келди. Мени кўриб ёқтирганларидан кейин, куёв ёш, бадавлат, тамакифурушлик қилади, дедилар. Ота-онам менинг бахт-саодатим ҳақида у қадар бош қотирмаганлари учун, ўйлаб ва суриштириб кўрмасданоқ розилик бериб юбордилар. Никоҳ кунини тайин қилишди. Шу кун кўёвнинг ҳам келишидан дарақ беришди.

Мен энди чиройли, ёш, башанг кийинган, қадди-қомати келишган бир йигитни кўраман, деб кўзларим нигорон бўлиб ўзимга оро бериб ҳар дамда бир ойнага қараб ўтирар эдим. Уф! Нима кўрганимни биласизларми? Бирдан эшикдан йўғон овоз билан, «Бисмиллоҳир-рахманиррахим» деб найнов, қип-қизил соқолли, соч ва соқолини устарада қиртишлатиб олдирган, чўтир, сапсарғайиб кетган тишларининг кўпи тўкилиб кетган, эгнида узун бир сурра чопон, унинг устидан оқ, ўрама белбоғ боғлаган бир чол кириб келди. Ичкарига кириш олдида, кавушини ечиб, қўлтиғига қисиб, менга рўбарў келди, уялмай-нетмай чап юзимдан «пўп» этиб овоз чи-

қарган қўпол бир ўпич олди. Маймунга ўхшаган бу ҳайкални кўрган қариндош, қўни-қўшниларнинг ҳаммаси тарқалиб кетдилар. Уйда ёлғиз куёв томонидан келган қариндошларгина хурсандчилик қилар эдилар. Шулардан биттаси секингина қулогимга:

— Агар совға олмоқчи бўлсанг, куёвни битта ўпиб қўйгин,— деди.

Мен ўз-ўзимга: «Совғасини отасининг гўрига олиб борсин. Бу одамга ўхшаган ифлос соқолли девнинг юзидан қандай ўпаман?» деган сўзни фақат ичимдагина айта олдим. Шу кунга қадар юрагимда сақланиб келган чиройли бир ёш йигитнинг хаёли билан унинг ўша ир-кит юзларидан ўпдим.

У бўлса, бунга мукофот юзасидан ёқут кўзли қимматбаҳо бир олтин узукни бармоғимга солди. Фақат, худога кўп шукурлар бўлсинки, ўша куни икки мартаба ўпишдан ортиқ менга азият бермади.

Тўрт кундан кейин катта тўйнимиз бўлиб, мени олиб бориб, ўша ифлос одамнинг қўйнига солдилар. Бахтимни қарангки, бу одам унчалик ахлоқсиз эмас экан. Яъни, худонинг бир бандаси бўлиб, кеча-кундуз дуо, оят ҳам намоз билан машғул. Ҳар қайси бир каттароқ савдосотиқнинг олдидан тасбеҳ ўгириб, қуръон ўқиб, фол очиб, толе синар экан. Бу киши, юқоридаги уч нарсага ўлгунча маҳкам ишониб, имон боғлаган экан.

Нима бўлди-ю, бир гал уч кун муттасил уйга келмай қолди. Мен жуда кутиб ташвишга тушдим. Фақат ўз-ўзимча, қаерга борар эди, бир худонинг бандаси, ёш-ялангларга ўхшаган саёқ эмаски, ҳар хил бемаъни ерларга борса, деб ўйлар эдим.

Бу орада қўшнилариимиздан биттаси бизникига чиқди. Мен ҳам Ҳожи ого (эрим Ҳожи эди)нинг неча кундан буён уйга келмаганлигини айтдим.

У бўлса:

— Ҳа, айланай, ажабланишнинг ўрни йўқ. Балки бошқа хотинларининг олдига бориб қўнгандир,— деб жавоб берди.

Қўшнимизнинг бу жавобидан ҳайрон бўлдим. Ундан сўраб билсам, Ҳожи ого ҳақиқатан, чинакам бир мусулмони комил экан. Яъни, мендан бошқа иккитаси никоҳли, иккиси сийға — тўртта хотини бор экан. Қўшнимизнинг гапига қараганда, Ҳожи ого қайта бошдан тасбеҳ ўгириб, қуръон ўқиб, фол очиб, шу ой, ё шу ҳаф-

тада хотин олса, киши бахтли бўладими, йўқми деб толе синаб юрган экан.

Мен бу гапдан кейин шундай хулқли, шундай ахлоқ эгаси бўлган бир одам билан яшай олмаслигимни дилимга маҳкам тугиб қўйдим. Агар у ёлғиз мен билангина кифояланса эди, унинг молу дунёси билан балки, яхши, тинч турмуш ўтказган бўлар эдим. Фақат у ҳар фол очиш билан бир хотин олмоқни истаса, албатта, бу иш менга унча хуш келмас эди.

Жуда диққат бўлиб кетдим. Уша кун кечқурун бозорга бордим. Бир тўда ейдиган, ичадиган ва нина, ип, сақич, шунга ўхшаган нарсаларни олмоқчи эдим. Бозор одамлар билан тўла эди. Кишилар тўда-тўда бўлиб, хотинларга эргашиб юрар эдилар. Мен бўлсам, бир бурчакда туриб, шуларни томоша қилар эдим. Бирданига йигирма ёшлар чамасида бўлган, бошида яхшигина кулоҳ, эгнида сариқ кўйлак, бўйнига Аҳмад шоҳнинг сурати босилган яхши галстук таққан бир йигит менга яқинлашди-да, ҳеч ўйламай-нетмай.

— Хоним, мени бир соатгина хушнуд этсангиз,— деб сўради.

Мен бундай сўзларни эшитишга одатланмаган эдим. Фақат ёш йигитнинг қараши, юзлари Ҳожи оғонинг қизил соқоли, қиртишланган боши, томоқларининг таги билан тенглаштириб кўрганимдан кейин, йигитни ёқтирганим учун, ноз-карашма билан жавоб бердим:

— Оғожон, нима деяпсиз? Уйингиз яқин орадами?

Худди шу маҳалда бир полициячи кўчадан ўтиб борар эди. Йигит уни кўриши билан, бир тарафга йигирма қадамча тортилиб яширинди. Полициячи узоқлашгандан кейин яна қайтиб келиб, менга деди:

— Мана шу ерда яқин бир жой бор. Юринг, ўша ерда папирос чекишиб, истироҳат қилишимиз мумкин.

Мен, «папирос чекишамиз» деган сўздан унчали ҳайрон бўлмадим. Яъни, бу сўзнинг худди шу ерда имошорат юзасидан ишлатилганлигини пайқадим. Демак, «папирос чекишамиз» деган сўздан мақсади бошқа экан...

Ортиқча гапиришмасдан, йигитнинг орқасидан эргашдим. У мени тикувчилар бозоридан олиб ўтди-да, ўнг қўлдаги тор кўчага олиб кирди. У ерда яна бешта жин кўчаларни босиб ўтдик-да, кичик бир эшик олдида тўхтадик. Эшик очилди. Бир кампир чиқиб мени кўрди. Ҳеч бир таажжуб қилмасдан:

— Қани, марҳамат қилинг!— деди.

— Қани, хоним, кираверинг, қўрқадиган ҳеч нарса йўқ,— деди йигит.

Мен бўлсам юрагим гурс-гурс ургани ҳолда ичкарига кирдим. Ўз-ўзимга: «Бу ерда минг киши бўлса ҳам ҳеч қайсиси Ҳожи огага ўхшаган хунук бўлмаса керак», дер эдим. Ҳовлига киргандан кейин, йигит кампирга:

— Ойижон! Қани, самовар қўйиб юборинг!— деди.

Сўнгра иккимиз бир уйга кирдик; уй кичкинагина эди, деворлари кир, бирталай токча раплари бор эди. Ерга бўлса, эски бир гилам солинган. Йигит зўр билан юзимни очиб, менга битта папирос тутди. Мен олиб чекдим. Суҳбатга бошлаб, менинг ким эканлигимни сўради. Мен:

— Тамакифуруш Ҳожи оғо... нинг хотини бўламан,— дедим.

Ун беш дақиқадан кейин чой келтиришди. Ичдик. Бирдан йигит юзимдан ўпди. Мен жуда уялиб кетдим, қизардим. Сиздан нимасини яширай: «Ҳеч бўлмаса юзи тузук-ку! Ҳожи огага ўхшаган, кишига озор бермайди-ку», дер эдим.

Шундан кейин йигит мендан аста-секин бошқа нарсаларни ҳам талаб қила бошлади. Мен бўлсам ўз-ўзимга:

«Нима бўлса ҳам, Ҳожи оғодан яхши-ку», дедим, тўғри, агар у сени бир мақсад билан ва чинакам бир севги билан севса эди, у пайтда Ҳожи оғодан яхши бўлар эди. Ҳолбуки, у фақат бир неча дақиқалик нафсини қондириш учун сенга тармашади. Ҳожи оғонинг суҳбати ҳақиқатан жирканч, лекин бу билан яна у сени алдаб, номусингни барбод уриб кетмайди, у шунақанги ёлгончи ва уятсиздан минг марта яхшидир».

Мен у йигит билан хайрлашиб қайтар вақтда қўлимга бир нарса берди. Уйдан чиқиб қарасам, битта беш қиронлик олтин пул экан.

Нима бўлса ҳам ҳафтанинг маълум икки кунда ўша ерда учрашиб туришга ваъдалашдик. Ҳар ҳафтада икки мартаба ўша ерга бориб, ўз-ўзимча, гўё шундай ёш йигитнинг суҳбатидан баҳраманд бўлар эдим.

Бир кун сўзак касалига гирифтор бўлганлигимни кўрдим. Уч кундан кейин бу касал Ҳожи оғога ҳам юқди. Фақат бечора Ҳожи оғо, хотинларининг қайси биридан юққанлигини билмагани учун, ноилож қолган эди.

Қайси биттасини муттаҳам қилишни ўзи ҳам билмасди.

Мен, агар Ҳожи оғо касалнинг мендан юққанлигини билиб қолса, уйдан икки қўлим тепамда қувилишимни олдиндан билганим учун: «Кўп хотинлик кишида туришни истамайман!» дедим-да, талоқ қилишни талаб қила бошладим.

У ҳам мендан кейин янги бир қиз олиш хаёли билан:

— Агар маҳрингдан кечсанг, талоғингни бераман,— деди.

Мен рози бўлдим. У мени талоқ қилди. Мен икки қўлимни бурнимга тиқиб, отамнинг уйига қайтдим.

Орадан икки ой ўтди. Отамнинг уйида яшаб, лекин ҳамма вақт, ўз мўлжалида, ўша йигитни ва ўша йигит мен билан таништириб қўйган Ф... вазирлигининг аъзоларидан биттаси бўлган ўртоғининг олдига бориб келар эдим. Лекин бадбахтликни қарангки, улардан олган пулларимни Носирия хиёбонидаги докторга беришга мажбур бўлар эдим. Бу доктор ҳам аввалбошданоқ, менинг кайф-сафо йўлида юрган бир хотин эканлигимни билиб, шайтонлик қилмоққа бошлади. Кичкина дардимни боқа туриб, худди фолбин хотинларга ўхшаб: «Бу касалингни ё олти кунда, ёки олти ҳафтада, ё олти ойда тузатиб юбораман», деб ваъда берди.

Бир йилгача докторга қатнай бериб тинка-мадорим қуриди. Ахири бир кун пулим бўлмаганлиги учун, пулнинг ярмисини берганимданми, ё бўлмаса ўз маълумотининг даражасига ўзи ишонмай, мени тузата олмаслигига кўзи етганиданми, ҳар ҳолда:

— Хоним, сизнинг касалингиз оғирлашиб кетган. Бундан кейин, қаратганингиз билан тузалмайди,— деди.

Мен, «қаратган билан тузалмайди» деган сўзни эшитиш билан жуда ҳам жаҳлланиб кетдим:

— Оғо, сиз кимни аҳмоқ қилмоқчи бўласиз? Халққа шу қадар азият ҳам озор беришдан мақсадингиз нима эди? Мен бир йилдан буён бу ерга келиб, сизга ва доридармонга озмунча пул сарф қилганим йўқ. Энди келиб-келиб «қаратган билан тузалмайди» дейсиз. Бунини нега илгаридан айтмадингиз?

Доктор лоқайдлик билан дўқ уриб:

— Хоним, жанжал қилманг. Бўлмаса хизматкорни чақираман-да, сизни зўрлик билан жиннихонага юбортираман,— деди.

Мен шовқин сола бошладим. У эса хизматкорини чақириб, мени уйдан кўчага чиқариб ташлади.

Мен уйга келиб, бундан кейин у докторга бормасдан, бошқа докторга қаратишга қарор қилдим. Энди Чароғон хиёбонида бўлган иккинчи докторга (у ҳам ахлоқ ва маълумот жиҳатидан аввалгисидан қолишмас эди) қатнай бошладим. Худди шу пайтларда бирданига ота-онам Қарбалони зиёрат қилиш хаёлига тушиб, мени уйда ёлғиз ташлаб кетдилар.

Мен бўлсам ҳар галгидек Бозор ва Лолазор хиёбонларидаги йигитлар билан айш-ишратга машғул бўлар эдим.

Тақводорликнинг уччига чиққан бир қўшнимиз бор эди. Бир соат ҳам намоз-ниёздан бўшамас эди. Уша хотин бир куни бизникига кириб:

— Шавкат хоним! Мен сенинг қандай ишлар қилиб юрганингни яхши биламан,— деди. Мен жуда қизариб, уялиб кетдим.

— Лекин бундай юриш сенга ҳеч қандай фойда бермайди. Агар аҳвол ва маншатинг яхши бўлишини хоҳласанг, қани, мен билан бирга юр, мен сени бир ерга олиб бораман, сен у ерда доим нози неъматлар ичида сузиб юрасан, доим ёш, чиройли йигитлар билан учрашиб турасан,— деди.

У менинг ҳамма ишимдан хабардор экан. Ортиқ яширишнинг фойдасизлигини кўриб, унинг маслаҳатига кўндим. У хотин ҳам мени шу ерга бошлаб келди-да, отини ўзгартиб, Ақдас қўйди. Икки йилчадан бери шу ерда яшаб, Ноҳид хонимдан қирқ тумандан ортиқроқ қарздор бўлдим. Ота-онамдан бўлса, ҳалигача ҳеч бир дарак йўқ. Йўлда ўғрилар ўлдириб кетганми, Қарбалода бошларига бошқа кулфатлар тушганми, маълум эмас...

Ақдас шу ерда ўз тарихини тамом қилди ва чарчаганлиги учун, косадаги бодрингдан биттасини олиб, тўрт тилим қилди, бир бўлагини ўзи еди, қолган учтасини дугоналарига тақсимлаб берди.

IX БОБ

БАДАВЛАТ ХОНАДОННИНГ ҚИЗИ

Энди навбат Иффатники эди. У, бошда ўз таржимаи ҳолини сўзлашга майли бўлмаганлигини ёзган эдик. Қандай бўлса ҳам, мажбурият остида сўзга бошлади.

«Мен на қассоб ва на баззозининг қизиман. Мен, Техроннинг улуғ хонадонларидан биттасининг яккаю ягона қизи эдим».

Бу сўзни эшитар экан, анови уч нафар дугоналар бутун диққатларини Иффатга бериб, тингламоққа бошладилар.

«Бизнинг уйимиз Техроннинг шимоли-ғарб томонида эди. Отам бадавлат кекса бир киши эди. Мени ҳаддан зиёда яхши кўрадиган онам бечора бўлса, жуда покиза бир хотин эди. Мен ота-онамнинг азиз фарзанди бўлганим учун, ёшлигимдан буён мени ҳар хил ўйинлар, эрмаклар, ҳам қўни-қўшнидаги ўғил ва қизлардан уйга чақириб олиб, улар билан ўйнамоғимни таъмин қилар эдилар.

Шундай қилиб, ўн тўрт ёшга кирганимда ҳам ўйинни тарк қилмаган эдим. Мени ўқишга, мактабга киришдан кўра, ўртоқларим билан ўйнашга кўпроқ қизиқтирар эдилар.

Қани айтинг-чи, ўртоқлар, илм ўрнига бутун умрини ўйин билан ўтказган, кўзи боғлиқ бир қиз бундан ортиқ бир нарса тушуна оладими? Албатта, йўқ. Менинг билган нарсам, биттагина — мени ўстириб, тарбия қилган мураббия хотиннинг доим айтадиган гапи: «Ота-онанга итоат қил!» сўзларигина эди. Лекин бу итоат деган нарсанинг ҳам бирорта қатъий чегараси, ёки бир ўлчови борми, ёхуд доим кўзинг боғлиқ итоат қилавериш керакми? Уни ҳам билмас эдим. Баъзида мураббиям менга Марварид тўпнинг¹ бахт очишини айтиб, мени ҳам шу замбаракнинг қудратига ишонтирмоқчи бўлар эди.

Шаҳарда аъёнлар орасида ота-онанинг ёлғизгина фарзанди, эркаси, нури-дийдаси бўлганим учун менга жуда каттакон мол қўшишлари тўғрисида овоза тарқалган эди. Ҳар куни уйимизга тўда-тўда совчилар келарди. Лекин нима учундир шу келган совчиларнинг орасида яхши ҳам мукамал илмли йигитларнинг совчилари бўлгани ҳолда, ота-онам кичкина бир айбини топиб, уларни қайтарар эди.

Ниҳоят, бир кун бизникига иккита хотиннинг совчи

¹ Марварид тўп — Яқин кунларгача Техрондаги Майдония Тўпхонада тургувчи қадимий тўплардан бири. Авом халқ орасида қайси бир қиз дуо ўқиб, шу тўпнинг остидан бир печа марта эмак-лаб ўтса, унга яхши куёв nasib бўлади деган эътиқод бор. (Ред.)

бўлиб келганликларини кўриб, яшириндим. Ун беш дақиқалар ўтар-ўтмас, мураббиям келиб:

— Хоним! Нариги уйга марҳамат қилар экансиз,— деди.

Мен туриб, ўзимга сал-пал оро бергандан кейин, совчилар ўтирган уйга кирдим. Чорак соатлардан кейин совчилар туриб кетдилар. Менинг юрагим қаттиқ-қаттиқ урмоққа бошлади. Гўёки, бир яширин овоз: «Шу одамга эрга тегсанг, сени фалокат кутади», дегандай бўлар эди. Фақат бу яширин овоз онамнинг юрагида акс садо бермаган эди. Чунки, бу қудаликни ёқтириб, дарровгина отамни ҳам кўндириб, шунга рози бўлган эдилар.

Бир ҳафтадан кейин унаштирилдик. Шу кунни бизнинг уйга икки юздан ортиқ Техрон хотинлари чақирилган эдилар. Фотиҳа маросими жуда ҳам тантана билан ўтди. Куёв ҳам келган эди: у баланд бўйли, гўзал юзли бир ёш йигит эди. Ҳатто ерни, мишатдор бўлсанг босаман, дегандай виқор билан юрар эди.

Йигитни шу хилда кўргандан кейин ўз-ўзимга, «бекорга ташвиш қилиб юрган эканман», деб қўйдим.

• Менга унаштирилган йигит ... вазирлигининг ҳисобот идорасида бошлиқ муовини экан. Албатта, шу кичик ёшда идора муовини бўлган йигитнинг сал улғайиб, ўттиз-ўттиз беш ёшларга етганда вазир бўлишлиги унчалик қийин бир иш эмас эди.

Бир ой ўтгандан кейин ота-онам жуда ҳам кўп мол ҳозирлаб, тўйга рухсат беришди.

Бизнинг тўйимиз бир қиш кечаси, юлдузлар мусулмон хотинларининг чиройли кўзлари каби бошларига парда тортган, осмондан шиддат билан қор ёғиб турган пайтда бўлди.

Мен куёвнинг қариндошларидан икки хотин билан бирликда бир извошда ва қариндошларимиздан бир нечтаси бошқа извошларга тушганимиз ҳолда ҳаммамиз куёвнинг уйига жўнадик.

Эримнинг ... Обод хиёбонида бўлган катта ва чиройли иморатида бирталай чироқлар ёнар, жуда ҳам тантанали бир тўй мажлиси қурилган эди. У ерга етишимиз билан, мени кичкина, озода ва безатилган бир хошага олиб кирдилар. Мен у ерда ўтириб, зийнат асбобларимни тузатиб, кийим-бошларимни тўғрилаб, мен учун олиб келинган бир пиёлача шарбатни ичдим.

Бир соатдан кейин мени катта бир залга олиб кир-

дилар. Тўрға қўйилган чиройли бир стулга ўтирғиздилар. Сал ўтар-ўтмас: «Куёв келаётир, куёв келаётир» деб хабар бердилар. Бирдан эшик очилиб, куёвнинг ўрнига пакана, зарча юзли, эгнига сариқ або¹ кийган, кўзларига занжирли кўзойнак таққан бир йигит келиб кирди. Унинг орқасидан куёв:

— Марҳамат, ҳазратим... марҳамат... Узингизнинг уйингиз, ҳамма нарса сизники, биз дарвозабондан бошқа киши эмасмиз,— деган ҳолда ичкари кирди.

Менинг бахтсизлигим худди мана шу ердан бошланди! Шу пайтда бу ердаги хотинларнинг кўплари ўринларидан туриб:

— Биз бу ерга тўйга келган эдик, ўзимизни номаҳрам кишиларга кўрсатиш учун келган эмасмиз,— деб, гўнғиллаб-гўнғиллаб, уйдан чиқиб кетдилар. Мен ҳам тортинмасдан ўрнимдан туриб, бошқа эшикдан чиқиб кетмоқчи бўлган эдим, бироқ кўрдимки, бир киши қулоғимга:

— Жоним, жоним, тинчланинг! Эр деган хотиннинг хўжайини бўлади, нима қилмоқчи бўлса, шуни қабул қилишингиз керак!— деди.

Орқамга ўгирилиб қарасам, мураббиям турган экан. Менга яхшилиқдан бошқани истамайди-ку, деб ишонганим учун ҳеч нима демасдан, ўтирган жойимда қола қолдим. Шу пайтда эрим томонидан ҳазрат... деб аталган киши менга яқинлашди. Юзимдаги тўрни кўтариб:

— Бай, бай, бай, қандай чиройли келин экан,— деди. Сўнгра бир йўталиб олиб, яна:

— Жуда яхши, демак, энди сизларнинг қўлларингизни қўлларингизга беришимиз лозим бўлса керак. Хўп, марҳамат қилингиз!— деди-да, куёвнинг қўлидан ушлаб, менинг олдимга келтирди. Мен ҳам қўлимни узатдим. Аввало қўлимни бошқача қилиб бир сиқиб қўйди-да, кейин қўлимни куёвнинг қўли устига қўйиб, шу пайтда оғзини эримнинг қулоғига яқин олиб бориб, бир нима деди.

Қарасам, эрим аввал қизарди, ундан кейин бўзарди-да, энг сўнг:

— Жоним билан, ҳазрат, жоним билан... Итоат қилиш бизнинг вазифамиз!— деб жавоб берди. Шу пайтда сариқ аболи йигит:

¹ Або — эркакларнинг енгсиз уст кийими.

— Унутмайсиз-а! Мен кутиб тураман,— деб тезлик билан уйдан чиқиб кетди.

Эрим бўлса: «Қани, хотинлар, чироқ тутинглар», деб ҳазратнинг орқасидан чиқиб, уни эшиккача кузатиб қўйди.

Бир неча минут ўтгандан кейин куёв менинг олдимга қайтиб келди. Меҳмонлар эса тўда-тўда бўлиб чиқиб кетмоқда эдилар. Энг сўнг уйда куёв билан ёлғиз қолдим. Қўп ўтмасдан куёв мени ўрнимдан турғизиб, бир неча кичкина уйлардан олиб ўтиб, деворлари бир-талай суратлар билан безалган, юмшоқ мебеллар қўйилган чиройли кичкина бир хонага олиб кирди-да:

— Қани, марҳамат қилинг, хоним!— деди.

Мен юмшоқ креслога ўтирдим.

Шу пайтда эрим:

— Мен сиз билан каттакон ва муҳим бир иш тўғрисида суҳбат қилмоқчиман,— деб сўзга бошлади.

Тўй кечаси куёв билан келиннинг қандай каттакон, муҳим иш тўғрисида суҳбат қилишлари мумкин, деб бир оз ўйлаб қолдим ва уялганим ҳолда секингина:

— Қани, марҳамат қилиб айтинг!— дедим.

— Азиз хоним! Ҳалиги сиз кўрганингиз киши менинг хўжайиним ва улуғим бўладилар. Мен фақат шу кишининг воситаси ва илтимоси билан шу даражага етдим. Охирда вазирликнинг ҳисобот идорасига муовин бўлиб тайин қилиндим,— деди.

Мен жавоб бермаганим учун, у ўз сўзида давом этди:

— У киши мени бирталай азият чекиб шу даражага етказгандан кейин, бу кун кечаси мендан бир нарсани илтимос қилиб қолдилар, мен ҳеч қандай йўл билан йўқ дейишнинг чорасини тополмадим. Бундан ташқари, агар, у кишининг истагини ерига етказмасам, эртага эрта билан қамалиб, сизнинг дийдорингиздан буткул маҳрум бўлиб қоламанми деб қўрқаман.

Мен, эримнинг мақсадини тушуна олмасдан, ундан:

— Ого, мен сизнинг сўзларингиздан ҳеч нима тушуна олмай ётибман. Мақсадингизни очиқроқ айтсангиз экан. Бу киши сиздан нимани илтимос қилади? У кишининг истаган нарсасининг менга нима дахли бор?— деб сўрадим.

— Ҳа, балли, азиз жонгинам!— деб уялмасдан жавоб берди эрим.— У мендан истайдикки, бу кечалик куёвлик ҳуқуқидан кечиб, сизни унга топширсам. Бу йўл-

дан бўйин товлаёлмаслигини сизга айтдим. Мен ўйлайманки, сиз ҳам менинг мушкул аҳволда қолганимни назарга олиб, маслаҳатимга рози бўлиб қабул қиларсиз.

Мен унинг бечоралигига юрагим ачиб, мураббиямнинг сўзларини эсладим. Хўп десам, натижанинг шунчалик обрўйимга ва помусимга доғ бўлиб тушишини ўйламасдан:

— Ого, агарда шу ишингиз менга боғлиқ бўлса, сизнинг истаингизча бўлсин!— деб жавоб қилдим.

Эрим бу сўзни эшитган замон:

— Уҳ, рози бўлдингизми, жоним! Худога минг қатла шукурки, балодан қутулдим,— деб дарров хизматчисини чақириб айтди:

— Мен хоним билан бир ерга бориб, кун чиқар-чиқмас қайтиб келаман. Биров сўраса, куёв билан келин аллақачон ухлаб қолганлар, деб жавоб бер! Ҳеч кимни уйга йўлатма: хўжайиним бундай ишларни ёмон кўрадилар, деб ҳаммани қайтар!

Бу гаплардан кейин хизматчисининг қўлига битта олтин бериб, менга:

— Қани, чодрангизни ёпининг,— деди.

Мен чодрамни ёпиндим. Соат ўн бирлар бўлган эди. Қор шиддат билан ёғиб турмоқда. Эрим қўлимдан ушлаб, боя ичкарига кирганимиз эшикнинг рўбарўсидаги бошқа эшикдан, турли мева дарахтлари экинган бир саҳнга олиб чиқди. Кейин, узун бир йўлакдан ўтиб, эшикка чиқдик. Бу эшик иморатнинг нариги тарафидаги кўчага чиқар экан.

— Сиз шу ерда бир оз туринг!— деди-да, ўзи бориб, иморатнинг катта эшиги олдида турган усти берк извошни чақирди. Извош бизга яқинлашганидан кейин, мени ўтказиб, извошчига: «Паркка олиб бор!» деб буюрди. Ўзи бўлса хиёбоннинг иккинчи тарафида турган бошқа извошга миниб, бизнинг орқамиздан изма-из кела бошлади.

Х б о б

АЛИ АШРАФХОННИНГ МАРТАБАСИ

Бу парк Техроннинг ғарб тарафида, Боғи шоҳ дарвозаси деб аталган хиёбоннинг яқинида эди. Қоронғи ва совуқ. Ҳавонинг совуқлигини бундай пайтда мен у қадар

сезмас эдим. Уз-ўзимдан: «Ахир, мен бу кун келин бўлиб келган бўлсам, нега кечаси билан роҳат қилиб ётмасдан, эшикма-эшик тентираб юрибман?» деб сўрар эдим. Баъзида: «Мени шаҳардан ташқарига олиб чиқиб, бўйним ва бармоқларимдаги қимматбаҳо буюмларим ва олтинларни шилмоқчимми?» деб хаёл қилар эдим.

Бироқ, эрим тушган извошнинг овози сўнгги хаёлимнинг ўринсиз эканини англашиб турар эди.

Извошларимиз ўн беш дақиқача юрди. Сўнгра паркиннг темир дарвозаси қаршисига етар-етмас, худди бизнинг келишимиздан илгари хабар бериб қўйилгандай, ўша дақиқадаёқ дарвозанинг ҳар икки табақаси очилиб, извошлар боққа кирди. Икки хиёбондан ўтиб, европача солинган саройнинг зинапоялари олдида тўхтади.

Мен извошдан тушишимни ҳам, тушмаслигимни ҳам билмас эдим. Лекин эрим дарров тушиб, мен тушган извошнинг эшигини очди-да:

— Марҳамат қилинг, хоним!— деди.

Мен дарров ўзимни йиғиштириб, эримнинг қўлидан ушлаб, извошдан тушдим. Қаршимиздаги зинапоядан юқори чиқа бошладик. Зинапоялар мрамардан ишланган эди. Иморатнинг эшиклари ҳаммаси ҳам ойнавонлик ва ойналарига қараганда, иморатнинг ич тарафидаги катта бир хитой қандилнинг атрофга нур сочиб турганлиги кўринар эди.

Эрим мени икки уйдан билиб ўтиб, ахири каттакон бир залга олиб кирди.

Ичкарида шу бугун кечаси эримнинг уйига, менинг қўлимни куёв қўлига бериш учун келган сариқ аболи йигит бир столнинг атрофида айланмоқда эди. Бизнинг оёқ товушларимизни эшитиб тўхтади:

— Эй, Али Ашрафхонми, келдингизми? Кута бериб жуда тоқатим тоқ бўлиб кетди,— деди.

Эрим таъзим қилиб:

— Бир оз кечикиб қолдик. Бироқ, бутун ишни ҳазратларининг майлларига муносиб қилиб тайёрлашга мажбур бўлганлигимдан маъзурман. Афв этасиз, деб ишонаман,— деди.

Пакана йигит менга яқинлашиб, қўлимни ўпди. Сўнгра эримга яқинлашди-да, елкасига қоқиб:

— Раҳмат, раҳмат, баракалла! Ҳозирча бизни ёлғиз ташлаб кетарсиз! Худо хоҳласа, яхши мукофотлар кўрасиз,— деди.

Эрим икки букилгани ҳолда менга ҳасрат назари билан бир-икки мартаба қаради-да, уйдан чиқиб кетди.

Мен иккана йигит билан ёлғиз қолдим. У йигит мени қўлтиқлаб:

Суюкли хоним, қани, юринг, марҳамат қилинг, мана бу уйларни бир айланиб томоша қилайик,— деди.

Мени бир неча уйларни кездириб, яхши, нафис гулли, пардалари бахмалдан жуда ҳам енгил, кўз қамаштирувчи ранг-баранг гиламчаларни кўрсатгандан кейин:

— Қани, энди чодрангизни очинг!— деди.

Мен ҳам мажбуран чодрамни очдим. Сўнгра мени кичкина уйга олиб кирди. Ойнакдан паркнинг ҳовузлари кўриниб турар эди.

— Хоним, қани, марҳамат қилиб ўтиринг,— деб жой кўрсатди.

Стул устида ранг-баранг ичимликлар билан тўла бир неча шишалар қўйилган эди. Қаршима-қарши ўтирдик. Йигит у шишалардан бирини очиб:

— Хоним, Техронда топилиши мумкин бўлмаган шампань виноларининг энг яхшисидан,— деди-да, иккита қадаҳни тўлдириб, бирини менга берди ва иккинчисини ўзи ичди.

Мен то шу кунгача ичкилик ичмаганим учун бир оз тортиниб тургандан сўнг қадаҳдаги винони ичдим.

Ун дақиқадан сўнг иккита хизматчи овқат келтирди. Овқатлар яхши бўлиш билан баравар, жуда иштаҳа очадиган эди. Масалан, қовурилган жўжа, балиқ ва бир неча хил европа овқатлари ҳам бор эди. Ичкилик менга секин-секин таъсир қила бошлади. Мен кетма-кет кулар эдим. Йигит ҳам менинг ширакайфлигимдан фойдаланиб, тинмай ўпар эди.

Овқат ер эканман, яна икки қадаҳ ичкилик берди. Овқатдан ярим соат ўтар-ўтмас, ҳар икковимиз бошқа бир уйда, пўлат каравотда бир-биримизнинг қучоғимизда ётар эдик...

Тонг, соат беш пайтларида уйқудан турдим. Кеча кечасидаги йигит ёнимда йўқ эди. Бироқ, эрим каравотнинг бош тарафида туриб:

— Қани, хоним, туринг, кетамиз. Вақт ўтиб кетаётир!— деди.

Мен жуда чарчаган эдим. Урнимдан тургим келмас, бироқ нима қилиш керак? Мажбур эдим. Урнимдан туриб, кийимларимни кийдим.

Эрим мени айвондаги юз-қўл ювадиган жойга олиб чиқди. Юз-қўлларимни ювдим. Сўнгра бир неча дақиқадан кейин чодрани ёпиниб, эрим билан бирга кечаги зал ва бошқа уйлардан ўтиб, сарой зиналаридан тушдик. Кечаги извошлар яна ўша ерда бизни кутар эди. Биз жўнаб кетдик.

Орадан бир оз вақт ўтгандан кейин, эримнинг уйига етдик. Яна кечаги чиққанимиз эшикдан ўтиб, кичкина ётоқ уйига кирдик. Эрим чодрани очди. Ўзи ҳам бутун кийимларини ечиб, мени қучоғига олди...

Бу воқеадан икки кун ўтгандан кейин, намозгар пайтларида, эрим уйга келган вақтида жуда хурсанд ва шод кўринар эди. Менга яқинлашиб, «Гўзалим, жоним, мана, кўрдингизми, ўша кечасидаги қийналишлар зое кетмади. Мана, қарагин!» деди-да, чўнтагидан бир конверт чиқариб, менга берди ва ўқимоғимни буюрди. Мен ҳам, гўё саводлилардай, хатни ўқиёламан, дедим-да, қўлидан олдим.

Ниҳоят, хатни олиб ўнгу терсини бир-икки мартаба кўздан кечирганимдан кейин ҳеч нима тушуна олмаган-лигимга жуда ўқиндим. Сўнгра қоғозни эримга қайтариб, қани, сиз ўқинг, мен эштай, дедим.

У қоғозни олиб, хохолаб кулди-да, ўқимоққа бошлади:

«...вазирлигида ҳисобот идорасининг раиси оғойи Мирзо Жалолиддинхон ҳамиша касал бўлиб юрганлари сабабли, истеъфога чиққанлари учун, у кишининг ўрнига мувофиқ ва лойиқ бир кишини тайин қилиш лозим бўлиб, шу идоранинг муовини оғойи Али Ашрафхоннинг шу кунгача қилиб келган яхши хизматларини эътиборга олиниб ва 790-номерли буйруққа асосан, мазкур оғойи Али Ашрафхон ҳисобот идорасининг раислигига тайин қилинадилар. Оғойи Али Ашрафхоннинг ойлик маошлари икки юз туман ва бунга эллик туман қўшимча ёрдам тариқасида пул тайин қилинади... Мулк вазирлиги...»

Қоғозни ўқиб бўлгандан кейин дарров мени бағрига босиб ўпди.

— Шундай даражага кўтарилишим сенинг қадминингнинг қутлуғлигидан, гўзал жоним,— деди.

Мен ўз-ўзимга:

«Менинг қадамим қутлуғ бўлса, ўша кунни кечаси совуқда унинг уйига бориб, каллаи саҳарлаб қайтиш лозим бўлмас эди», дер эдим.

Эрим яна сўзга бошлаб:

— Менга бу вазифани бағишлаган киши ким эканлигини билсанг керак?— деди.

Мен уяла-уяла жавоб бердим:

— Ҳа, биламан.

— Жуда яхши. Ундай бўлса, билиб қўйишиг керакки, Эронда ҳар бир иш учун аввали жиндаккина шунақа «совга» берилиши лозим. Иш ўринлагандан кейин «зиёфат» берилади. Демак, бу ишни, яъни менинг даражамнинг ортиши учун сени у кеча у ерга бориб келишиг бир «совга» қаторида эди. Лекин, ишнинг ҳали «зиёфати» бор, чунки ҳазратим ўша кунги кечани яна бир мартаба истаб қолдилар. Айниқса, кеча кечқурун бу гапни бирталай одамларнинг ичиди очиқдан-очиқ айтганлари учун бу кеча яна ўша ерга боришимиз лозим бўлади.

Мен эримнинг менам фойдаланиб, мени ўзгаларга тақдим қилиш билан юқори мартабаларга минмоқчи эканлигини англадим. Хотинларнинг кўпинча шундай йўллар билан бузилиб кетишларини тушунмасам ҳам, бироқ, шу биричи кечани ҳеч ёқтирмаганлигим учун, эримга жавоб қайтардим:

— Ого, мен бундан сўнг ҳеч қачон у ерга бормаيمان, боришни ҳам истамайман,— дедим.

Эрим, мениг бу жавобимни эшитар-эшитмас, оёқларимга йиқилиб ўпди ва менга ғариблардай ялинди:

— Қимматли гўзалим, наҳотки сен мениг нобуд бўлишимни, беобрў бўлишимни истайсан? Худди эртага эрта биланоқ, иккита полиция келиб, мени ўғрилиқда, ёки бирор катта ёнғинда иштирок қилган, деб қамаб қўйсинларми? Агар эрингни севсанг, агар унинг беобрў бўлмаслигини истасанг, илтимос қиламан, ялинаман, айтганимни қабул қилиб, бу кечаси яна бир мартаба у ерга борасан. Лекин энг охири дафъа. Мен сенга сўз бераманки, ҳазратимнинг бундан сўнг орзуси қонади.

Мен эримнинг бу аялч аҳволини кўриб, ўз-ўзимга: «Бечора нима ҳам қилсин, у беғуноҳ», деб ўйладим-да, бу кечаси ҳам боришга рози бўлдим. Бу кун ҳам бундан уч кеча илгариги тартиб билан унниг бордик. Пакана йиғит мени жуда яхшилаб қабул қилди ва икки юз туманлик бир ёқут узукни бармоғимга тақиб қўйди.

Қандай бўлса ҳам эрим билан бизнинг турмушимиз шу хилда бир неча вақт давом қилди. Бир неча дафъа

қайтадан ёлворди. Ялинди. Мени бўлса ... ҳазратнинг ёнига олиб бораверди. Мен бўлсам, эримнинг ялиниши, илтимосини ва бу аҳволни ҳеч кимга, ҳатто отамга ва ўзимни боқиб ўстирган мураббиямга ҳам айтмадим.

Бир кун эрим уйга келганда аҳволи жуда ҳам паршон эди. Мени кўриши билан:

— Эртага... ҳазратим Европага кетар эканлар. У киши кетиб қолсалар, таянчсиз қоламиз. Жуда кўрқяпман. Аста-секин мени шундай юқори вазифадан оёғимни осмондан келтириб туширадилар-да,— деди.

Уша кун эрим менга ҳеч нима демади. Фақат эртаси кечаси «...ҳазрат кетганларидан кейин мени хафа қилиб юрмасинлар, шунинг учун у кишидан бирорта мустаҳкамроқ қоғоз ёздириб олишим керак. Бу бўлса, албатта, қуруқ бўлмайди», деган баҳона билан мени яна унинг ёнига олиб борди. Уша кеча ... ҳазрат билан энг охири мартаба «улфатчилик» қилдик.

Орадан ўн кун ўтди. Бир кун эрим уйга қайтиб:

— Худога юз минг шукурки, қутулдим. Ҳамма ишларим юришиб кетди,— деди.

Мен бу севинчинг сабабини сўрадим.

— Давлат кабинети ўзгарди. Янги тайин қилинган вазир ... ҳазратлари мен билан жуда яқин таниш киши ва ... ҳазратимнинг яқин дўстлари бўлади,— деб жавоб берди.

Шундан сўнг яна беш кун ўтди. Эрим эрта билан ўрнидан турар экан: «Кечқурун меҳмонимиз бор. Тайёргарлик кўриб қўйинглар», деди.

Мен, бутун уйдагилар, эримнинг топшириғига мувофиқ, меҳмонларни кутиб олиш учун яхшигина ҳозирлана бошладик. Уша кунги намозгар пайтида, саҳнада туриб хизматкорларга ҳар хил топшириқлар бериб турган вақтимда, эрим мени чақирди.

— Хоним, бу ёққа қараб кетинг, жиндаккина гапим бор!

Мен дарров унинг орқасидан уйга кирдим. Бир бурчакда турдим. Эримнинг дилида, нима бўлса ҳам, бир сўзи бор эди. Бироқ, нима учундир айтишга ийманар эди. Мен буни дарҳол сездим ва меҳрибонлик билан сабабини сўрадим.

— Нима бўлди, нима учун айтмоқчи бўлган сўзингизни айтмаётибсиз? Қани, айтаверинг!

У бўлса башарасига сохта аянч тус бериб деди:

— Хоним, бугунги меҳмонни сиз кутиб оласиз...

Мен бу сўздан гоят газабландим ва баланд овоз билан қичқирдим:

— Ого, сиз қанақа беномус одамсиз? Сиз бир дафъа мени шундай ифлос ишларга етаклаганингиз етмасми-ди? Энди яши қайта бондан шу ишни такрор қилмоқчи бўласизми? Мен ҳеч қачон бу таклифингизни қабул қила олмайман. Агар зўрлайдиган бўлсангиз, айтганингизда тураверсангиз, отамнинг уйига бораман-да, сизнинг бутун қилгиликларингиздан шикоят қиламан,— дедим.

Лекин, менинг бу сўзларим эримга заррача бўлсин таъсир қилмади ва айтганларимга парво қилмасдан, эшикнинг олдини тўсиб, жилмайиб кулди ва мазах қилиб деди:

— Хоним, бас, жим бўлинг! Ҳалигача менинг сизга эътибор берганим-ишонганим, парваришим зое кетганини энди тушундим. Сиз билан бошқа эркакларга ўхшаб «эр, хотинини ўлдирса ҳам ихтиёри бор» деб, ҳар истаган нарсани аўрлик билан ерига етказишим керак экан. Хоним, агар менинг истагимни қабул қилмасангиз, ит куллариини бошингизга соламан. Сиз ҳали мендан шикоят қилгунингизча, мен сизни номуссиз, бузуқ бир хотин эканлигингизни бутун шаҳарга ёйиб юбораман.

Бошимга чақмоқ тушса эди, бу кейинги икки оғиз сўздай менга таъсир этмаган бўларди. Бу беномус ўзи сабаб бўлган, ўзи етаклаган жиноятларни юзимга солиб, мени муттаҳам қилмоқчи бўларди. Ҳали айтганларига ҳам қаноат қилмай, илова қилди:

— Агар гапни чўзаверсангиз, шу ондаёқ домлалардан биттасининг олдига бориб, сизни ... ҳазратим ила алоқада бўлганингизни очиб ташлайман. Бу номусни бўйнимдан соқит қилиб, талоқ хатингизни бераман.

Унинг бу дўқларидан оқизмай-томизмай шармандаларча барча нарсани очиб ташлашини пайқаб, жуда ўзимни йўқотиб қўйдим. Гуноҳ унда эканини ишонтирмоқ учун ҳеч бир далил келтира олмас эдим. Чунки, хотин киши эдим! Бундай муҳитда мен ва менинг жинсимда бўлган кишиларнинг кичкинагина ҳам бўлсин, ҳуқуқлари кўзга илинармиди?

Бу бир шундай муҳитки, ахлоқсиз тўғрисида хотинларнинг бир сўз айтишга ҳақлари йўқ; бу бир шундай ерки, эрлар хотинлари билан истаганларича муомала қилишга ҳақлари бор. Бу бир шундай маконки, эрлар

Ўз хотинлари билан яшамоқ учун лозим бўлган бир во- сита каби муомала қиладилар ва истаган вақтларида уни рад қилмоқлари ва алмаштирмоқлари мумкин. Бу бир шундай мамлакатки, эркак хотиннинг ҳар қандай нуқсонини айта олади. Лекин, хотин эрнинг ҳеч бир айбини очишга ҳақи йўқ.

Шундай бўлар экан, шу муҳитда муштипар бир қиз нима ҳам қила олар эди?!

Албатта, у ҳар бир маҳкамага борса жазоланади, чунки ҳар нима бўлганда ҳам номусини қўлдан бериб қўйган.

Бундай бир одам билан баҳслашиб ўтиришнинг ҳеч фойдаси бўлмаслигини англадим. У ҳақиқатан мени расво қилишга уринарди. У ҳар ишнинг режасини ав- валдан чизиб қўйган ва ҳар маҳал мендан ғолиб кели- ши аниқ эди.

Бошқа бирор нарса қўлимдан келмагани учун йиғ- ламоққа бошладим. Кўзларимдан қонли ёшлар оқиздим. Фақат бу кўз ёшлари унинг ўжарлигини боса оларми- ди, уни ёмонликдан қайтара олармиди? Йўқ! Йиғла- шимни кўриб, қайтага ғазабланди.

— Йиғлашнинг фойдаси йўқ! Айтганларимни буткул қабул қиласиз.

Мен чорасиз бўлганлигимдан, унга қарши бирор сўз айтолмай, бу сафар ҳам кўндим.

Уша кеча автомобиль билан ўттиз уч ёшларда, ўрта бўйли, қора ва жингалак сочли, ёш вазир «меҳмон» но- ми билан уйимизга келди.

Мен уни кутиб олиш учун мажбуран уйимизнинг эшигигача бордим. У ерда уни кутиб олдим. Мен уни ку- тиб олишим илгаридан унга маълум экан шекилли, таажжуб қилмасдан мени қўлтиқлаб олди. Эрим бўлса, ҳеч уялмасдан биз билан бирга меҳмонхонага кирди.

Меҳмонхона жуда ҳам мукамал. Дастурхон нози неъматлар билан тўла эди. Ҳар хил мавзуларда сўз бо- рар эди. Бироқ, менинг юрагим сиқилиб тургани учун ҳеч гапирмас эдим. Икки-уч соат шундай ўтгандан ке- йин, овқат келтирдилар. Вазир овқатни егандан кейин, эрим уйдан чиқиб кетди. Мен мажбуран вазир билан уйда қолдим...

Эрта билан вазир кетди. Эрим менинг ёнимга келиб, кўнглимни кўтармоқчи бўлиб деди:

— Кеча айтганларимнинг ҳаммаси маслаҳат тариқа-сидаги гаплар эди. Узинг ўйла-чи, ким сендай хотиндан юз ўгириб, тухмат билан расво қила оладик, мен қилсам?

Ниҳоят, у шундай сўзларни сўзладик, мен яна ишониб, ота-онамга бу сирларни айтиш фикридан қайтдим.

Иффат сўздан тўхтади.

Шу пайт Синаҳсолор мачитининг соати саккизга жомурди. Демак, тамом бир соатдан буён бу хотинлар суҳбат этар эдилар.

Иффат яна сўзида давом қилди:

— Орадан бир неча кун ўтди. Бир кун кечқурун эрим уйга келиб: «Биз Исфаҳонга сафар қиладиган бўлиб қолдик», деди.

Мен бу тўсатдан бўлган сафарнинг сабабини сўраганимда, у деди:

— Бу кун эрта билан оғойи вазир мени чақириб: «Сизга муҳим бир вазифа бериш лозим бўлгани учун ва Исфаҳон раиси ...нинг бирталай ўғирлик ва хиёнатлари маълум бўлиб, ишдан олингани учун, вазирлик яхшигина ойлик билан сизни у ерга юбормоқчи бўлиб қолди, дедилар. Мен ҳам ҳазрати вазирнинг бу яхшиликларига ва марҳаматларига ташаккур билдириб, бу вазифага боришга тайёр эканлигимни билдирдим.

Тайинлов ҳақида икки кундан кейин вазирликдан фармон ҳам чиқди. Икки кундан кейин кетадиган бўлдик. Маълумки, ҳазрати вазир, мен билан ўтказган кечанинг лаззатини унутмаганлари учун, дарров бу фармонни берган эканлар.

Мен, одат ва расмга биноан, отамнинг уйига бориб, ота-онам ва мураббиям билан хайрлашдим. Мураббиям биз билан кетишга жуда тарафдор бўлса ҳам, эрим унамади. Улар билан хайрлашар эканман, жуда кўп йиғладим. Юрагимда қандайдир бир қоронғилик бор эди. Бу сафарнинг менинг учун яхши бўлмаслигини илгаридан сезиб турар эдим. Охири, усти берк извошга тушиб, Қум ва Қошон деган шаҳарлардан ўтиб, беш кунда Исфаҳонга етдик.

Йўл-йўлакай эримнинг мен билан бўлган муомаласи анча ўзгарди. Мен билан сўзлашганда, «хоним» калимасини ортиқ қўшмас эди. Ҳатто, баъзан, оғир, қўпол муомалаларда бўлар эди. Мен бундан жуда ҳам ҳайрон эдим. Фақат ўз-ўзимча: «Балки, ҳазиллашаётгандир,

нима қилса ҳамки эрим-да, ҳаққи бор», деб ҳеч нима демас эдим.

Биз Исфаҳонда ҳеч ким билан таниш эмас ва ҳеч ким билан суҳбат қилмас эдик. Икки ой ўтди. Фақат эримнинг ахлоқи кундан-кунга ўзгариб борарди. Яъни, Техронда менга қарши анчагина ҳурмати бўлса, ҳозир улар орадан кўтарилиб кетган эди. Ҳар кеча ҳаддан зиёда ичиб келиб, мастлик билан мени сўкар, баъзида уришдан ҳам тортинмас эди. Охири шундай бир аҳволга тушиб қолдимки, ҳаётимдан ҳам беза бошладим.

Бир кеча яна мени сўкар экан, чидаёлмасдан:

— Билмайман, сизга нима бўлиб қолди, бундай ўринсиз сўзларни нима учун айтяпсиз? Агар мендан зериккан бўлсангиз, талоқ қилинг, мени Техронга жўнатиб, кетай,— дедим.

У менга ҳақорат назари билан қараб кулгандан кейин деди:

— Ўҳў, сен жуда содда экансан! Сен ҳали ҳам ўзингни менинг хотиним деб ҳисоблаб юрибсанми? Мен сени ўша паркка бориб келган кечадан бошлаб талонингни бериб қўйганман. Сен менинг мақсадларимга етиш йўлида қўлимда бўлган бир қўғирчоқдан бошқа нарса эмассан. Ҳозир бўлса, ёнимда битта бузуқ ўйнашимдан бошқа обрўйинг йўқ.

Бу сўзлар мени ғоятда ғазаблантирди. Қўлимдан келса эди, ўша ердаёқ этини бир бурдадан қилиб ташлар эдим. Бироқ, нима қилайинки, ўзимда шундай бир қувват кўра олмас эдим.

Мен ортиқ чидаёлмадим:

— Жуда яхши, ундай бўлса, энди бундан кейин мендан манфаат кутолмайдиган бўлсанг, қўй, мени Техронга жўнат, ота-онамнинг олдига кетай,— дедим.

У яна илгаригича кулиб туриб, деди:

— Мени ҳам ўзинг каби гўл деб ўйлама; сен ўйлайсанки, Техронга бориб, ота-онангни кўриб, уларга мендан шикоят қилсанг; бироқ билиб қўйки, мен буларнинг ҳаммасини аввалдан ўйлаб, тадоригини қилиб қўйганман. Ҳатто бу ерга келгандан кейин қилган бутун бузуқликларингни, яъни мени ва ота-онангни қанчалик расво қилганликларингни уларга ёзиб, хабар берганман. Мана, қара! Онангнинг менга ёзган хати.

У чўнтагидан бир хат чиқариб, ўқий бошлади:

«Менинг азиз кувём! Номуссиз қизимнинг бошингиз-

га келтирган фалокат ва қайғули ишларидан хабардор бўлдим. Бу аҳволдан қанчалик ғам-ғуссаларга тушганлигимни ёзишдан ожизман. Шу даражага етдики, бу гапларни эшитиб, отаси ғам-ғуссадан ўлишига сал қолди. Мен ҳам ўзимни тамом йўқотганман. Сиздек бир йигитнинг бизга куёв бўлиб, шундай бир ифлос хотинга дучор бўлганлигингизга ачинаман. Бошқа нима ҳам дейи, қандай бўлса бўлсин, ҳаракат қилинг, балки уни бу ярамас йўллардан сақлаб қоларсиз.

Сизнинг иккинчи онангиз...»

У хатни ўқиб бўлгандан кейин гўё бошимга осмон қулаб тушгандай бўлди, кўз ўнгим қоронғилашиб, беҳуш бўлиб йиқилдим.

Ҳушимга келганимдан кейин бошимга қандай ҳодисалар келганини менга шундай деб айтдилар: ўн икки кечаю ўн икки кундуз иситмалаб, ўзимни билмасдан, алаҳлаб ётибман.

Ўн икки кундан кейин ҳолим бир оз яхшиланганда, кўзимни очиб қарасам, тепамда бир кампирни кўрдим, у айтар эди:

— Ич, болам, шуни ҳам ичгин, худо хоҳласа, яхши бўлиб қоласан.

У менга дори ичирди.

Мен ҳайронлик билан теварагимга қараб, ўз уйимда эмас, балки бошқа бир уйда эканлигимни билдим. Уй торгина бўлиб, деворлари зангори рангга бўялган, ерга титилиб кетган бўйра солинган, бу уйнинг ягона зийнати — рапда турган иккита стакан ва бир чинни косадан иборат эди. Тагимга ифлос, увадаси чиқиб кетган қизил кўрпа тўшалган, устимга эса, титилиб кетган тивит рўмол ёпилган эди. Мен жуда ҳам таажубланиб, кампирдан сўрадим:

— Онажон, бу ер қаер, нимага мен бу ерга келиб қолдим? Эрим қаёққа кетди, хизматкор, оқсочлар қани? — дедим.

Кампир кулиб жавоб берди:

— Қизим, ҳозирча бу ерда эр, хизматкор, оқсоч деган нарсалар йўқ. Худо хоҳласа, сенга эр ҳам топилиб қолар, худо хоҳласа, ўша маҳалда оқсоч, хизматкорлар ҳам бўлиб қолар. Қизим, бундан саккиз кун илгари бир йигит келиб, менга: «Қамбағал хотин экансан, пул топишни хоҳласанг, бир касал хотин бор, ўшани шу ерга келтириб ташлайман. Шунинг ҳолидан хабар олиб тур!»

деди-да, ўн туман пул бериб кетди. Мен ҳам худодан шундай ишни кутиб ётган эдим. «Дарров олиб келинг», дедим, у: «Етти-саккиз кунгача яхши бўлса бўлди, касали кучайиб кетса, яна пул келтириб бераман», деди. Мен севинганимдан унинг уйи қаерда, ким эканлигини ҳам сўрамабман. Бу кун тўққиз кун бўлди, ҳали у қайтиб келгани йўқ. Ўзига келганда, унга бериб қўярсиз, деб, бир хат ташлаб кетди.

— Хат қани? Тезроқ олиб келинг уни,— дедим.

— Мана, ўзинг ўқиб кўр!— деб бўйранинг тагидан бир парча қоғоз олиб қўлимга берди.

— Менинг саводим йўқ,— дедим.

Кампир бир оз ўйлаб тургандан кейин, эшик томонга қараб:

— Ҳасанали, Ҳасанали, бери кел, болам,— деб чақира бошлади.

Ўн-ўн икки ёшлардаги бир бола кириб келди. Кампир унга хатни бериб:

— Ўғлим, шу хатни ўқиб бер, яхши ўқисанг, битта анор бераман,— деди-да, ёстиқнинг остидан битта анор олиб унга берди.

Отинойида саводини чиқарган, дуо ва ҳафтиякдан бошқа нарса ўқимаган Ҳасанали бўлса, ўн-ўн беш дақиқа ҳижжалаб, тутила-тутила бир амаллаб, хатни ўқиб чиқди. Хатда шундай дейилган экан:

«Муҳтарам хоним!

Бундан кейин сиз билан бизнинг кўришмоқлигимиз мумкин эмас. Менинг уйимга боршини хаёлингизга ҳам келтирманг. Чунки, борганингиз билан сизни киритмайдилар. Техронга қайтсангиз, ота-онангизнинг уйига борманг, сиз номуссиз, пардаси йиртилган бир қиз бўлганингиз учун улар сизни аллақачон «оқ» қилганлар. Бир умр сизни уйларига киритмайдилар. Чунки мен уларга, «Қизингиз уйдаё қочиб кетди, эшитишимга қараганда, фоҳишахонада эмиш», деб ёзганман. Шунинг учун улар сизнинг бетингизга ҳам қарамасликка қасам ичганлар».

· X I 6 o 6

АЛАМ ВА ҚАЙҒУ ИУЛИ

Бу хатни ўқигандан кейин, қайта бошдан ўзимдан қетдим ва олти кун тамом иситмалаб ётдим.

Мен Исфаҳонда ҳеч ерни ва ҳеч кимни билмас эдим, қаерга борайин? Дардимни кимга айтайин? Саргардон бўлдим. Ахлоқсиз эрим ўзи мени номуссиз ишларга судрагани етмагандай, «фоҳиша» деб ота-онамни менга қаршн қўзғатиб қўйган экан.

Энди тушундимки, у пакана йигитни ва вазирни уйга келтиришдан мақсади, мени сотиш ва шу орқали катта мансабларга миниш экан. Энди у орзусига эришди. Бу ерда бўлса, ундан юқори мартабали киши йўқки, мени унга олиб бориб қўшса ва ундан бир манфаат қўлга киргизса, энди кераксиз бўлиб қолганимдан кейин, уйдан ҳайдаб, бу бегона шаҳарда мени етим ва қувғин қилиб қўйди. Нима ҳам қилай?

Шоҳбожи деган бу кампир анчагина яхши ва кўнгилчан бир хотин эди. Мен касал бўлган бу олти кун ичида ҳаддан зиёд менга марҳамат қилиб, меҳрибонлик кўрсатди.

Иситмам тарқалиб, аҳволим яхшилангандан кейин, кампир мендан таржимаи ҳолимни сўради. Мен ҳам бошимга келган бутун фалокатларни унга айтиб бердим. Ота-онамнинг Теҳронда ким эканлиги, эримнинг Исфаҳонда қандай ишларга бошлиқ бўлганлигини тушунтирдим. Шоҳбожи менга чинакам хайрихоҳ бир хотин бўлганлигидан, Теҳронга, ота-онамнинг олдига қайтишимни маслаҳат берди. У, Исфаҳон халқининг ахлоқини анчагина яхши билар эди. Шунинг учун менга:

— Сен бу ерда ҳеч бир иш чиқара олмайсан, эринг бадавлат ва амалдор бир киши бўлгани учун, керакли ерларга пора бериб, ҳар ерда ва ҳар маҳкамада сендан устун келади. Аммо сенинг ҳеч киминг йўқ,— деди.

Шоҳбожининг ҳақли эканлигини мен ҳам яхши билар эдим. Бироқ, Теҳронга қайтмоқ учун менга йўл кира керак эканлигини ўйладим. Ҳеч нима йўқ эди. Эрим шунчалик инсофсизликни қилган эдики, ҳатто келинлик узугимни ҳам касал вақтимда бармоғимдан чиқариб олган экан.

Қўлим кўкрагимга текканда, у ерда бир нарса осиглиқ эканлигини сездим. Виждонсиз эрим мени шилар экан, қандай бўлибди-ю, кўкрагимдаги олтин соатни унутиб қолдирибди.

Мен Шоҳбожига:

— Шоҳбожи, Теҳронга кетиш учун йўл кирам йўқ, лекин мана шу соатим бор. Шунинг учун сиздан сўраб

эдимки, шу соатни занжири билан сотиб, пулини менга келтириб берсангиз. Балки шу пул билан бир амаллаб Техронга етиб оларман,— дедим.

Шоҳбожи дарров чодрасини бошига ёпиниб, соат билан занжирни олиб бозорга кетди. Пешин пайтларида бозордан қайтиб, соатни занжири билан ўн туманга сотганини айтди. Шоҳбожининг қилиқларидан ва юзидан тўғри бир хотин эканлиги кўриниб турар эди. Бироқ, Техронда ўттиз туманга олинган соатни ўн туманга сотганлиги, Исфаҳон халқининг қандай «инсофли» одамлар эканлигини очиқ кўрсатиб турар эди.

Эртасига эрта билан бир киракаш арава Техронга кетар экан, мен ҳам шу аравада кетмоқчи бўлдим. Шоҳбожи билан хайрлашиб кетар чоғимда, у менга бир бўхчада тугилган бир нима берди. Бу, йўл учун тайёрланган тўқоч ва юпка эди. У мени ўпди. Мен ҳам уни ҳеч қачон унутмасликка сўз бердим.

Сешанба кuni чошгоҳда Исфаҳондан жунаб кетдим. Аравада мендан бошқа яна уч хотин, икки эркак бор эди. Хотинлардан иккитаси анови иккита эркакнинг хотинлари экан. Бироқ, бўлак бир хотин мендай эгасиз ва кимсасиз экан. Табиий, у иккита хотин эрлари билан суҳбат этганларида, мен ҳам учинчи хотин билан у ёқдан-бу ёқдан гаплашиб ўтирдик. Кейин ҳасратлашмоққа бошладик.

Маълумки, бундай аравалар кунига олти-етти фарсах¹даш¹ ортиқ йўл боса олмайди. Кечалари бекатларда тўхтаб, дам олишга тўғри келади. Шундай қилиб, Техронга ўн беш-йигирма кунсиз етиб боришимизга кўзимиз етмасди.

Бу хотин ўрта бўйли, сариқ юзли, кичкина кўзли, лаблари ҳабашларнинг лаблари сингари қалин, афтидан қирқ ёшларда деб чамалаш мумкин эди. Нима бўлди-ю, у билан икки ўртамизда табиий бир яқинлик пайдо бўлди. Унга аҳволимни гапириб берсам, менинг учун ҳеч қандай зиён-заҳмат бўлмас деб ўйладим, лекин янглишган эдим.

— Қизим, мен бундан бир ой аввал Техрондан келган эдим. Сизларнинг маҳаллангизда яшайман. Сизларга қўшниман. Уша ерда сизнинг тўғрингизда бир талдай бўлмағур гапларни эшитдим. Кўнглингизни хира

¹ Фарсах — тахминан етти чақирим чамаси масофа. (Ред.)

қилиб қўярман, эшитганларимни айтганимдан айтмаганим яхшироқ, деб ўйлаб турибман.

Мен қаттиқ ҳаяжонга тушиб шу ондаёқ:

— Майли, билганларингизнинг ҳаммасини айтинг,— дедим.

У яна сўзида давом қилиб деди:

— Мен Азизхон чорсуси яқинидаги бир бойнинг уйида кирини ювар эдим. Уша ерда эшитдимки, ота-онангиз сизни Теҳронга келсангиз уйларига киргизмасликка қасам ичибдилар.

Мен бу хотиннинг айтганларини эшитиб, ўз-ўзимча нима қилишим ва қаерга боришимни ўйлар эдим. Шундай бир қавм-қариндош, хеш-ақрабom йўқ эдики, уларнинг уйига бориб, менга тақилган гуноҳларни кечиришлари учун ота-онамга воситачи қилиб юборсам.

Бу сўзлар менга жуда қаттиқ таъсир қилди. Ўзимнинг бечоралигимни яна қаттиқроқ сездим. Тездан ақлдан озилгимни англар эдим. Шундаг кейин ўзимни ҳақиқатан ҳам жиноятчи эканман деб ҳисобладим.

Шу пайтда хотин яна сўзга кириб деди:

— Бечора қизгина, бунчалик кўп қайғура бермай Сенинг бу балоларга ноҳақдан гирифтор бўлганлигини мен яхши тушундим. Сенга юрагим туздай ачишяпти. Бўлар иш бўлибди, энди нима қила оласан. Теҳрондан менинг бир синглим бор. Унинг яхшигина уй-рўзғори бор, сени ўша ерга олиб бораман. Бир неча кундан кейин ўзим бориб, бутун аҳволни онамга айтиб бераман. Сенинг гуноҳсиз бўлганингни исбот қиламан, тинчлан, қизим, тинчлан.

Мен бу сўзлардан шу қадар хурсанд бўлдимки, севинганимдан кўзларимдан ёш тўлқинланиб оқмоққа бошлади. «Менинг учун нажот йўли очилди» деб ўйладим. Бироқ...

Ун беш кунлик сафардан кейин Теҳронга келиб едик. Мен у хотин билан аравдан тушиб, кўнкага ўтириб, Тўпхона майдонига етиб келдик. Бу ерга келаркелмас, хотин «тушамиз», деди. Худди ўша ерда кўнкадан тушиб, Алоуддавла хиёбони томон кетдик. Бир оз юргандан кейин, кунботар тарафга бурилиб, унчалик обод бўлмаган ва Буржи Нуш номланган бир хиёбонга кирдик. Бу ердан ҳам ўтиб, бир жойга етишдикки, у ерда бирталай казаклар кўринмоқда эди. Энг охири яна кунботар тарафга бурилдик, унча узоқ юрмай, бошқа

бир кўчага кирдик-да, кўк рангли эшик олдида тўхтадик.

Ифбатнинг бу сўзини эшитган Ақдас ила Ашраф дафъатан:

— Ҳа, ҳа, сени Арус Мажурнинг уйига олиб борган эканлар!— дейишди.

Ифбат уялгани ҳолда сўзида давом қилди:

— Тўғри, Арус Мажурнинг уйи эди. Бироқ, мен бундан илгари хабардор бўлмаганлигим учун у ернинг қанақа жойлигини билмас эдим. У хотин менга бир сўз демасдан, эшикни қоқди. Эшик очилди.

Бошлаб келган хотин менга қараб:

— Қани, юр ичкарига! Ота-онангникидай яйра, ҳеч қандай бошқа фикр-хаёлга тушма!— деди.

Мен у билан бирга уйга кирдим, ҳовлига кирганимизда, менга бир уйни кўрсатиб:

— Сен анови уйга кириб тур, ҳозир мен синглим билан кўришиб, у билан олдингга кираман,— деди.

Мен унинг кўрсатган уйига кирдим. У яхшигина, тоза, супурилган, атрофига стуллар ва духоба билан қопланган диванлар қўйилган эди. Ушалардан биттасига ўтириб, тирсагимни диван дастасига тираб, хаёл суриб кетдим. Ота-онамнинг уйда кечирган кунларим, тўй кечасидаги воқеалар, Исфаҳонда тортганим ачиқ ва унутилмас ҳодисалар кўз олдимга келиб, ҳам тўлқинлари орасида йиғлар эдим. Тўғридан ҳам мен тортган бу азоб-ўқубатларимга ҳеч бир хотин чидаёлмас эди.

Кейин: «Ҳали ҳам нима бўлибди, худога шукур, нажот йўли очилди, балки мен энди шу яқин ўрталарда ўз уйимда, ота-онамнинг бағрида бўларман», деб ўз-ўзимга тасалли берар эдим.

Мен хаёл суриб ўтирган вақтимда бирданига эшик очилди, повча бир хотин — уй эгаси Арус Мажур ва орқасидан мен бу ерга келтирган хотин ичкарига кирдилар. Повча хотин бошдан-оёқ диққат билан текшириб чиққандан кейин мени бошлаб келган хотинга ўғирлиб:

— Ёмон эмас. Бундай хотин воситаси билан мўмайгина фойда қилиш мумкин,— деди.

Бу сўзлар мени яна алангага итариб юборгандай бўлди. Мени қайтадан ваҳима ва ташвишга солиб қўйди. Мени келтирган хотинга юзланиб:

— Хоним, сиз ўз уйишга деб келтирган эдингиз,

бу уй қандай уй эканини тушунолмай қолдим. Нима учун менинг ҳуснимдан сўзлашаётирсизлар?— дедим.

У хотин менга яқинлашиб:

— Эй қизгинам, ота-онанг сени уйга киргизмасликка қасам ичиб қўйганликларини-ку, ўзинг биласан, бу ер мана шу хотиннинг уйи. Мен кетаман. Сен бу ерда қоласан. Мабодо бу ерга битта-яримта йигит-яланглардан келиб қолса, сен улар билан суҳбатлашиб, вақтинги чоғ қилиб, маза қилиб умр ўтказасан. Бу аҳвол, балки икки-уч кунга ҳам бормас, мен бугун, қўлим тегмаса, эртага, албатта, уйингга бориб, ота-онангин бутун аҳволдан хабардор қилиб, сени кечирришларини илтимос қиламан.

Мен нима қилар эдим? Ночор мажбур бўлиб, қолишга қолдим.

Ўша кунни кечаси, йигирма беш ёшларда, оёқларига оқ туфли, бошига қорақўл кулоҳ кийган, башараси одамдан кўра кўпроқ маймунга ўхшайдиган бир йигит келди.

Уй эгаси: «Бу кечаси шу йигит билан бу ерда қолмасанг, худди шу соат уйдан чиқариб юбораман», деган пўписа билан мени йигит кирган уйга олиб кирди...

Эртаси эрта билан йигит чиқиб кетди. Шу пайтда мени бу ерга келтирган хотинни чақирдим. Унга йиғлаб-ёлворишга бошладим. Ота-онамга бориб, менинг гуноҳсизлигимни тушунтириб, афв этишларини илтимос қилдим. У ҳам гапимни қабул қилиб, бир сўз айтмасдан чодрасини ёпиниб, чиқиб кетди. Бироқ, кеч пайт, менга даҳшатли хабар келтирди: «Ота-онанг Қум шаҳрига кетган эканлар, йигирма кун ё бир ойсиз келмас эмишлар», деб мени яна қаттиқ бир қайгу ичига ташлади.

Ҳар қанча ўйласам ҳам, бирорта қутулиш йўлини тополмас эдим. Қандай қилай, қаерга борай, бу ерда қолсам, ҳар кечаси биттаси келади... не чора, ҳеч қаёққа кета олмас эдим. Икки ярим ойга яқин мени шу уйда тутиб, турли кишиларга рўпара қилдилар.

Ҳали бунга ҳам шукур қилишим керак эмиш. Чунки, ўша ердаги хотинлардан биттасининг сўзига қараганда, ўша кунлар бозорнинг касод вақти экан. Борди-ю, илгариги вақтлар бўлса эди, меҳмонларнинг серқатновлигидан бир соат ҳам дам олиш мумкин бўлмас экан.

Ота-онамдан хабар сўраганимда, доим: «Ҳали эйбратдан қайтганлари йўқ. Худо хоҳласа, яна бир неча

кундан кейин келиб қолишар»дан бошқа жавоб ололмас эдим. У ерда мендан билан ҳеч қачон сўзлашмасдим. Уч ойгача уйдан чиқмадим. Бир кун уч-тўрт хотиннинг бизга келганларини кўрдим. Булардан биттаси бизнинг шу кунги соҳибамиз Ноҳид хоним эди.

Мен бозорнинг касодлигини гапирган хотиндан бу келувчиларнинг ким эканликларини ва бу ерга нима учун келганларини сўраб билдим.

Антарак исмли бу хотин секингина қулоғимга шивирлади:

— Шу кунларда бу ернинг бозори касод ва Арус Мажурнинг уй харажатларини ҳам кўтармай қолди. Шунинг учун хоним зиёрат қилиш учун Машҳадга кетмоқчи. Бу хотинлар муҳаббат даллаларики, булар Арус Мажурга қарзларимизни тўлаб, бизни ўз уйларига олиб кетадилар, яъни бизни сотиб олмоқчилар;— деди.

Мен:

— Сизнинг Арус Мажурдан қандай қарзингиз бор?— деб сўраганимда, у жавобида кулиб:

— Гапингизга қараганда, гўё ўзингизнинг қарзингиз йўқдай-а,— деди.

— Нима даяпсиз, хоним, тушунмаётирман. Мен бу одамдан ҳеч қачон пул олган эмасман-ку? Қандай қарзим бўлсин?— дедим.

— Бу кийганларингиз, эрта-ю кеч еган овқатларингизнинг ҳаммасининг ҳисоби бор. Ҳали уларнинг қўғозлари сизнинг муҳрингиз билан муҳрланиб, Арус хонимнинг сандиғида ётгандир,— деди.

Мен ортиқ бунга бирорта айтадиган жавобим қолмагани учун, ўз-ўзимга: «Бу жинни бўлиб қолганми», деб ўйладим.

Шу пайтда у хотинлар бизнинг уйимизга кирдилар. Уйда бўлган бошқа хотинлар ҳам битта-битта у ерга йиғилишди.

Арус Мажур айтди:

— Азиз меҳмонларим, мен сизларга кўрсатмоқчи бўлганим хотинлар мана шулар.

Сўнгра бизларнинг ҳар биримизни айрим-айрим белгилаб, ҳар қайсимиз учун бир баҳо тайин қилди.

Навбат менга етганда:

— Бу етмиш туман қарздор,— деди.

«Етмиш туман қарздор» деган сўзни эшитиб, ғаза-

"Бим қайнаб кетди. Қандай ҳаёсизлик билан мени алдаб, бу ерга келтирганликларини юзларига солиб, жанжаллашмоқчи бўлсам-да, бироқ фойдасиз бўлганлигини англаб, индамадим.

Бош оғриғи баҳонаси билан уйдан чиқиб кетдим. Эсимда шуниси қолганки, бир соат ўтгандан кейин Ноҳид хоним менинг олдимга келиб:

— Қизим, бу ер сенинг учун жуда оғир келибди. Бироқ, бизнинг уйимизда ундай бўлмайди, у ерда тинч ва роҳатда яшайсан. Тур, чодрангни ёпин, кетамиз!— деди.

Мен ҳам бу бадбахт уйдан қутулиб, у ерда ота-онамга етишмоқ учун бирор йўл топарман, деган умидда, улар билан кетмоққа рози бўлдим. Улар билан бирга извошга тушиб, бу ерга келдим ва ўзингиз билганингиздай, тамоман бир ойдири, шу уйдаман.

Ҳали бу сўзларининг охири калимаси Иффатнинг оғзидан чиқмаган ҳам эдики, уни қаттиқ йўтал тутиб қолди. Охирида, кўзларидан икки томчи ёш юзини чизиб тушгандан кейин, ўзига келиб:

— Ота-онамнинг обрўсига путур етмасин деб, ёнимга келатурган йигитларнинг ҳеч қайсисига чурқ этиб оғиз очмайман,— деди.

* * *

Энди навбат Ахтарники эди. Яъни, оқ ва семиз хотинники бўлгани учун у сўзга бошлади:

— Мен на қассоб, на баззоз, на амалдорнинг қизиман. Ота-онамни кўрмаганим учун, уларнинг ким ва қандай эканликларини ҳам билмайман.

Бироқ эс-эс хотиримга келадикки, болалик вақтимда Ноибуссалтана сарбозхонасининг яқинида кичик бир ҳовлида турар эдик. Тирикчилигимизнинг мазаси йўқ эди. Уша вақтларда қандай яшаганимизни аниқ билмасам ҳам, баъзида сув сотувчи, аттор, боққол, қассоб ёки казак солдатларнинг уйимизга келиб, кечалари у ерда бўлган иккита ёмон хотин билан бир уйда қолганларини кўрар эдим.

Ёш бўлганлигим учун у ерда ҳеч ким менга эътибор бермасди. Энди билсам, уй эгаси Хонимбожи мени келажакка мўлжаллаб сақлар экан. Аҳён-аҳёнда битта сариқ, буришган бодринг ёхуд мағиз бериб, мени севин-

тирар, қаҳратон қиш кунлари менга ўз каравотининг оёқ томонидан жой берар эди. Бошқа вақтларда бўлса, йиртиқ бир кўрпага ўралиб, ўчоқ бошида тонг отгунча дилдираб ётардим.

Мен жуда зийрак эдим. Баъзи кечалар уйимизда бўлган жанжалларни ва натижада Хонимбожини, ёхуд уйга келганлардан баъзиларини маъмурий идораларга олиб борганларини кўрар эдим. Бироқ, унчалик синчков бўлмаганимдан, ўрнимдан туриб ўртага тиқилмас эдим.

Шундай қилиб, бир неча йил ўтди. Табиий, мен ҳам кундан-кунга улғая бордим. Ёшлигимданоқ баланд бўйли, миқтигина бўлганим учун, кўпларнинг кўзига иссиққина кўринар эдим. Шунинг учун у ерга келган кишилардан кўписи мени кўрар экан, ёнига чақирар, мен ҳам уялмасдан уларнинг ёнига бориб ўтирар эдим. Улар мен билан ўйнашиб юзларимга уриб, чимчилаб, ёхуд ўпгандан кейин қўлимга бир оз пул берар эдилар. Бироқ эшикдан икки қадам узоқлашар-узоқлашмас, Хонимбожи қўлимдан пулни тортиб олар эди.

Ўн икки ёшга етганимда, бир кун Хонимбожидан:

— Менинг ота-онам бормиди?— деб сўрадим.

— Қизим, ота-онасиз ҳам одам бўладими. Лекин ота-онанг сени кўчага ташлаб кетган. Кейинги вақтларда билишимча, сенинг отанг катта амалдорлардан экан. Аммо нима учундир, болани ёқтирмас экан. Шунинг учун онанг билан шартлашган эканки, бола туғса, айниқса қиз туғса, талоғини бериб, уйдан қувадиган бўлган экан. Онанг сени отанг сафарда экан вақтида туғибди. Лекин отангдан қўрққани учун сени кўчага ташлаб кетибди. Мен ҳам сени кўчада кўриб, баъзи мулоҳазалар юзасидан олиб келиб, шу вақтгача тарбиялаб келаман.

Мен ёш бўлишимга қарамасдан, унинг сўзларини эшитиб жуда хафа бўлдим. Лекин қайғумнинг фойда бермаслигини яхши билар эдим. Чунки, дунёда бойлар ва бадавлат кишилар бор бўлган бир вақтда, ҳар қачон, ҳар идорада, ҳатто ... идорасида ҳам шундай тенгсизлик бўлиб келган, бўлаверади. Шу ёшларимда мен анчагина чиройли, истараси иссиқ қиз эдим. Тўсатдан бир кун бизга янги бир киши, яъни ҳалигача келадиган, сув сотадиган ва аттор, боққоллар ўрнига бир кавуш-дўз келган эди.

У ўрта бўйли, кўзлари катта-катта, қора ва узун мўйловларини юқорига бураб қўйган бир йигит эди. Қора сочларини орқасига қараб тараган бу йигит, бизга келиши билан Хонимбожи ва у ердаги икки хотин жуда қувонишиб, шошиб қолишди. Чунки, бу бечоралар учун шундай бир катта пул сарф қилатурган йигитнинг келиши осмондан тушган бир неъматдай эди.

У йигит ўн беш дақиқа ўтириб, уйнимздаги хотинларнинг ҳеч бирини ёқтирмади ва секингина Хонимбожига:

— Булар менга унчали ёқмади. Бошқаси бўлса, келтиринг,— деганда Хонимбожининг қанчалик қайғурганлигини айтиш жуда қийин.

Хонимбожининг ранги ўзгарди, бу серпул йигитни қўлдан чиқариб юборадиган бўлганига ачинарди. Чунки, бу ерда ҳалиги иккита хотиндан бошқа ҳеч ким йўқ эди.

Бирданига худди эсига бир нарса тушгандай, кавушдўз йигитга юзини ўгириб:

— Истасангиз, бу ерда бир қиз ҳам бор,— деди.

Мен ҳовлининг бир бурчагида турган эдим. Йигит дарров менга қайрилиб қаради-да, Хонимбожига:

— Ҳа, бунингиз чакки эмас,— деди.

Мен улар ўртасида ўтган сўзнинг ҳаммасини эшитолмадим. Бир оз ўтмасдан йигит чиқиб кетди. Хонимбожи мени ҳаммомга олиб борди.

Уша кун кечқурун кавушдўз йигит келди. Мен ҳам ўзим тушунмаганим ҳолда, тонг отгунча у билан бирга ётдим...

Шундан бошқа менинг турмушимда янги бир ҳодиса юз берган эмас. Мана, роса ўн уч йил бўлдики, шу иш билан кун кечираман. Тахминан ўн мартача қўлма-қўл ўтдим, бир неча дафъа Қазвинга бориб ҳам келдим.

Ахтар ҳали сўзини тамом қилмаган эдики, бирдан шиддат билан эшик тақиллади. Ошхона эшигининг рўбарўсида кампир билан суҳбат қилиб ўтирган дастёр бола югуриб бориб эшикни очди. ●

Эшикдан Ноҳид хонимнинг бақиргани эшитилди. У: «Эшикни нега кеч очдинг?» деб дастёр болани ҳақорат қилар эди. Ҳолбуки, бечора бола эшик тақиллаган замони очган эди. Ноҳид хонимнинг бу қилиғидан маълум бўлдики, бутун меҳнати зое кетибди, бирорта ҳам йигитни йўлдан уриб, бошлаб келолмабди.

ЯНГИ УЧРАШУВ

Ноҳид хоним бу уйнинг эгаси бўлиб, эллик ёшларда, паканагина, пўрдоқ бир хотин эди. Бурни ҳаддан ортиқ катта, лаблари қалин, юзининг гўштлари, айниқса кўзларининг атрофидаги гўштлари бўртиб чиққанлигидан, кўзлари ботикроқ кўринар эди. Юзини қора доғ босган, ёши қайтганига қарамасдан, муҳаббатдан, лаззатгина эмас, балки манфаат ҳам ахтарадиган баъзи жазманларнинг назарига илиниб ҳам турар эди. У уйга кирар-кирмас, овозини баралла қўйиб, ўз-ўзига гапира бошлади.

— Билмадим, бу эркак қурғурларни қайси ер ютиб кетган экан? Бозор бошидан Лолазорнинг охиригача борган бўлсам ҳам, бирортасини учрашиб, уйга бошлаб кела олмадим. Қандай замонга қолдик-а... Чиндан ҳам бу шаҳарда пул қуриб кетибди. Йигитларда пул бўлса эди, менинг шу энг олий, покиза жойлардан ҳисобланган уйимга келмасмидилар?

Уй эгасининг овозини эшитиш билан ўринларидан турган бу тўрт хотин унинг рўбарўсига келиб, айрим-айрим салом бердилар.

Ноҳид хоним ғазабланган бир ҳолда Ашрафга қараб:

— Мен йўғимда бу ерга бирор одам келдимми?— деб сўради.

Ашраф дарров:

— Йўқ, хоним, ҳеч ким келгани йўқ,— деди.

— Нима бало бўлиб қолди, нега бу ерга ҳеч ким келмайди? Бизнинг Муҳаммад Тақи ҳам келмадимми?

— Йўқ, айтдим-ку, ҳеч ким келгани йўқ, деб.

Ашрафнинг: «айтдим-ку, ҳеч ким келгани йўқ» деган жумласини эшитган Ноҳид хоним, бешбаттар тутақиб кетди.

— Энди менга гап сотиб, ноз-ғамза билан жавоб берадиган бўлиб қолдингми? Сен, ўзингни нима деб фаҳмлаётибсан? Жуда кеккайиб кетибсанми?

Ашраф, гап қайтариб ўтиришнинг ўринсиз бўлганини тушуниб, ҳеч нима демади. Бироқ, Ноҳид хоним аламини бошқасидан олмоқчи бўлган каби, юзини Иффатга ўгириб, сўради:

— Иффат! Кийим-бошларни тикиб бўлдингми?

Иффат довдираган бир ҳолда қўрқа-писа жавоб берди:

— Йўқ, хоним, худо хоҳласа, эрта билан тикиб тамам қиламан.

Ноҳид хонимнинг ғазаби янада алангаланиб кетди.

— Билмайман, сизларга бунчалик оғзи ботирлик қилишга ким ижозат бердийкан? Истаганингизни қиласиз. Илгари вақтда ким ва қай хилда бўлганлигингизнинг менга ҳеч бир алоқаси йўқ. Бу ерда нима бўлса бўлсин, менга итоат қилишингиз лозим. Менга бекорчи, қуруқ гаплар керак эмас. Сизга бераётганим овқат, кийим-бошларнинг савобини отамнинг арвоҳига бағишлаб бераётганим йўқ. Шунини билиб қўйинг, хонимлар! Сиз билан мен фоҳишамиз, фоҳишаликнинг чонини еймиз.

Бундай ҳақоратга тоқат қилолмаган Иффат, ғазабидан қўлидаги рўмолининг учини чайнагани ҳолда уйга кириб кетди. Лекин Ноҳид хонимнинг аччиғи босилмади. У гапида давом қилиб деди:

— Фалон кишининг уйи доим саёқ йигит-яланглар билан тўла бўлгани ҳолда, нима учундир менинг уйимга ҳеч ким келишни истамайди.

Шу пайтда ошпаз кампир, ошхона эшигидан бошини чиқариб, Ноҳид хонимга салом берди. Ноҳид хоним уни кўриши билан:

— Нона Абожи, манови жувонмаргларнинг заҳар-заққумига кечга нима овқат қилдинг?— деб сўради.

Ошпаз кампир дудуқланиб жавоб берди:

— Ҳеч нимамиз йўқ эди. Озгинагина исмалоқ қовуриб қўйдим. Ризода пул бўлмаганлиги учун, тухум ҳам ололмадик.

Ноҳид хоним аччиқланди:

— Ростини айтсам, сизнинг бундай орзу-ҳавасларингизга нима дейишни ҳам билмайман. «Ҳеч нимамиз йўқ эди, бир оз исмалоқ қовуриб қўйдим-а...» Гўёки, исмалоқ қовуриш ҳеч нима эмасмиш. Яна тухум ҳам керак эмиш. Йўқ, моможон, модомики, бу кеча меҳмонларимиз йўқ экан, шунинг учун исмалоқ ҳам йўқ. Бор, ўчоқнинг оловини ўчир. Ризога айтгинки, бориб бозордан бир оз қорин-қачоқ, ичак-чавоқ олиб келсин, заҳарларига есинлар.

Ҳали Ноҳид хонимнинг гапи ва ичак-чавоқ тўғрисидаги буйруғи уларнинг қулоғидан кетмаган, ҳали ошпаз

кампир ошхонага қайтмаган эдики, бирданига эшик тақиллаб қолди.

Эшикнинг тақиллашини эшитган Ноҳид хоним, севинчидан ошпаз кампирга:

— Оловни ўчирма!— деб бақирди-да, ўзи эшикка қараб югурди. Бу ердаги хонимлар ҳам «оловни ўчирма» сўзидан сўнг ичак-чавоқдан қутулганлари учун севиниб, ҳар тарафга тарқалиб кетдилар. Орадан икки дақиқа ўтмасданоқ Ноҳид хонимнинг мулойим овози эшитилиб қолди.

— Марҳамат, қани, ичкарига кирсинлар, марҳабо,— меҳмонларга мулойимлик билан хушомад қилар эди.

Бир дақиқадан кейин Сиёвуш Мирзо билан унинг орқасидан Муҳаммад Тақи ичкарига кирди.

Муҳаммад Тақи Ноҳид хонимга:

— Ҳазрати оғо бундан анча илгари келмоқчи эдилар, лекин йўлда кутилмаган бир ҳодиса юз бериб қолди. Шунинг учун бир оз кечикдик.

Ноҳид хоним кулимсираб:

— Жуда яхши, жуда яхши. Худога шукур, ҳайтовур ўша монелик йўқолибди,— деди.

Сиёвуш Мирзо Ноҳид хонимга қараб ярим ҳазил, ярим жиддийлик билан:

— Лекин, ўтган гал бизни унча хурсанд қилолмадингиз...— дедим.

Ноҳид хоним бир оз уялгандай бўлса ҳам, дарров:

— Худо хоҳласа, бу кеча ҳиссасини чиқараман,— деб жавоб берди.

Муҳаммад Тақи, суҳбатдан қуруқ қолмаслик ва Ноҳид хонимни миннатдор қилиш учун, сўзга араллашиб деди:

— Мен ҳазрати оғога бугун ажойиб бир нозанинни кўрасиз, деб ваъда берган эдим.

Ноҳид хоним меҳмонларни мебелли уйга олиб кириб, ўтиришларини таклиф қилди. Чироқ ёқдилар. Ноҳид хоним ташқарига чиқиб ошхонада, ошпаз кампирга буюрди:

— Булар бу кечаси қолишса керак. Ма, мана бу пулни олиб, дарров бозорга бориб, гуруч келтир. Паловнинг масаллиғини ҳозирлаб қўй.

Икки дақиқа ўтар-ўтмас Ноҳид хоним меҳмонлар олдига қайтиб кириб, очиқ чеҳра билан:

— Нима истайдилар? Жиндаккина дори-пори ҳам қиладиларми?— деб сўради.

Сиёвуш Мирзо кўп ичганлик орқасида бундан чорак соат бурун ўтган расвогарчиликларни унутиб, сипоҳгарчиликни қўлдан бермай:

— Албатта, албатта. Кўпроқ ароқ, камроқ вино келтиринг,— деди.

Ноҳид хоним ҳар галги одатига хилоф иш тутди. У ҳар гал харажатнинг пулини меҳмонлардан ундирар эди. Бу гал бўлса, Ризони чақириб, унинг қўлига бўш шишаларни тутқазди-да, икки юз қадам нарида бўлган Шаъбон яҳудийдан ароқ ва вино келтиришни буюрди. Қайтиб, яна кулимсираб уйга кирди. Сиёвушга эгилиб:

— Жуда яхши, ҳазрати ого, бу кеча бизда қўнадиларми?— деб сўради.

Сиёвушнинг рўбарўсида ўтирган Муҳаммад Тақи Ноҳид хонимга жавоб берди:

— Шундай, ҳазрати ого бугун бир оз нотоброқ бўлганлари учун, уйларига қайтмайдилар, шу ерда қоладилар. Бирорта овқатнинг ҳаракатини қилинг.

Сиёвуш ҳам Муҳаммад Тақининг айтганини тасдиқ қилди.

Ноҳид хоним яна уйдан чиқиб, ошхонага борди. Ошпаз кампирга палов буюриб, яна қайтиб уйга кирди.

— Энди хонимларни кўрмоқчи бўлсангиз, чақирайин,— деди.

— Ҳа, майли, кирсиңлар, марҳамат қилсинлар,— деди Сиёвуш.

Ноҳид, хонимларни бир-бир отларини айтиб, майин ва мулойим товуш билан чақирди.

Орадан ўн дақиқа ўтар-ўтмас, юқорида таржимаи ҳолларини баён қилган хотинлардан Ақдас, Ашраф ва Ахтар кириб келдилар. Булар ичкари кириш билан Сиёвуш Мирзога бошқача қилиб қўл беришиб, унинг икки ёнига қатор ўтирдилар. Бироқ, Сиёвуш Мирзо буларни бир неча мартаба кўрган эди. Шунинг учун ҳам башарасидан буларнинг ҳеч бирига эътибор бермаганлиги сезилиб турарди.

Оғосига янги бир хотин ваъда қилган Муҳаммад Тақи кўзи билан Ноҳид хонимга имлаб қўйди. У ҳам: «Бир оз сабр қилинг!» дегандай ишора қилди. Бир дамдан кейин Иффат, ўша шўрлик қиз, сарғайган юзига мажбуран упа-элик сурган ҳолда уйга кириб келди.

Иффат руҳий азоблар остида эзилганига ва юзидаги қайғу-ҳасрат ифодасига қарамадан, гоътада гўзал эди. Ҳаракатсиз кўзлари аллақандай бир нуқтага тикилган эди. Сиёвуш уни кўриш билан ўзини тузатиб, Муҳаммад Тақининг ёлғон айтмаганлигини тасдиқлади ва Иффат яқинлашаркан, ўрнидан туриб, у билан қўл беришиб кўришди.

Хотинлар, ҳар янги келувчи меҳмондан папирос сўраш одат бўлгани учун, Сиёвуш Мирзодан папирос сўрадилар.

Сиёвуш Мирзо кумуш портсигарини очди. Мундштуги зарҳал қилинган папирослардан тўрттасини олиб, хонимларга тақсим қилди. Бир оз у ёқ-бу ёқдан суҳбатлашгандан кейин, хонимлар туриб кетдилар.

Ҳалигача бир бурчакда турган Муҳаммад Тақи Сиёвушга яқинлашиб:

— Ого, кўрдингизми, қулбаччангиз ёлғон гапиришни ёмон кўради. Рост эканми?— деб сўради.

Сиёвуш қўлидаги калта ҳассаси билан Муҳаммад Тақининг орқасига эркалаб урди-да:

— Офарин, офарин, жуда гўзал, жуда яхши,— деди.

Шу пайтда Ноҳид хоним қўлида бир баркаш билан ичкарига кирди.

Баркашда бириси ароқ, бириси вино билан тўла икки графин, бир оз шўр данак, қовурилган нўхат, бир неча дона бодринг ва бир косада қатиқ бор эди. Ноҳид хоним баркашни Сиёвуш Мирзонинг олдига қўйди, қайтиб чиқар олдида Муҳаммад Тақи унга яқинлашиб:

— Тўхтанг, бирга чиқамиз,— деди ва Ноҳид хоним билан бирга ташқарига чиқди.

Сиёвуш Мирзо уйда ёлғиз қолиб, ароқ ичиб, папирос чекиш билан машғул бўлди.

Муҳаммад Тақи ҳовлига чиққанидан кейин:

— Ого тўртинчисини ёқтирдилар. Бир кеча учун неча пул оласиз?— деб сўради.

Ноҳид хоним ўн тўрт ёшли қизлар каби буралиб:

— Вой ўлай, бу нима деганингиз? Огога қай даражада ҳурмат сақлаганимни ўзингиз яхши биласиз-ку. Энди мен у киши билан савдолашиб ўтирар эдимми? Оз берсалар ҳам биз кўп ўрнида қабул қиламиз,— деди.

— Хоним, бунақангги гапларни қўйинг, очингни айтаверинг!

Ноҳид хоним бир оз ўйлаб олгандан кейин:

— Кечки овқат, ичкилик — ҳаммаси бўлиб ўн беш туман берилса бўлади,— деди.

— Йўқ, ўн беш эмас, ўн туман оласиз. Бироқ, мен оғомдан йигирма туман оламан. Бу тўғрида унга ҳеч нима демайсиз.

Ноҳид хоним сўз қайтармасдан қабул қилди.

Муҳаммад Тақи уйга қайтиб кириб, йигирма туманга байлашганини оғосига айтди ва ўзидан Сиёвуш Мирзони миннатдор қилиб:

— Менинг ҳурматим учун йигирма туманга рози бўлди-да, бўлмаса, қирқ-эллик тумандан келар эди,— деди.

— Эй аблаҳ, айтмадингми, ого яқинда уйланадилар, катта давлатга эга бўладилар деб, ҳозирча бунақа қаттиғидан тутмасин.

Муҳаммад Тақи жилпапгиланиб жавоб берди:

— Ҳаммасини айтдим, у бу ишга жуда хурсанд бўлганлиги учун қоқ ярмига кўнди.

Ўн минутдан кейин, шўрлик Иффат уйга мажбуран кириб, Сиёвуш Мирзонинг ёнига ўтирди. Бир соатдан кейин Сиёвуш Мирзо учун хом-хатала палов келтиридилар. Лекин, Сиёвуш Мирзо кайфи баландлигидан овқатнинг яхши-ёмонлигининг фарқига бормас эди. Овқатдан кейин Сиёвуш билан Иффат ётоқ уйга киришди.

Муҳаммад Тақи бўлса, бундан кейин яна бир мартаба оғосини бу ерга келтиришни ваъда қилиб, бу кечаси Ахтар билан бирга бўлиш учун Ноҳид хонимдан розилик олди.

Сипаҳсолор мачитининг соати эндигина ўн бирни урган эдики, бирдан эшик тақиллади.

Дастлаб ҳеч ким эшикнинг тақиллашига эътибор бермади. Ризо ухлаб қолган, ошпаз хотин бўлса, туришга эринар эди.

Эшик янада қаттиқроқ тақиллади. Бу гал Ноҳид хонимнинг ўзи мажбуран ўрнидан туриб, ғўнғиллаб-ғўнғиллаб: «Эшик очишга ярамаса, бу уйга хизматкорнинг нима кераги бор», деб эшикка қараб кетди. Лекин уйга бир тўда бегона одамларнинг келишидан қўрққани учун, эшикни очмасдан туриб:

— Ким у?— деб сўради.

Овозининг қўполлигидан маст экани сезилиб турган бир киши:

— Эшикни нимага очмайсизлар, биз пул бермай-мизми?? Бизнинг пулимиз қалбакими?!— деб бақирди.

— Ҳамма ҳам пул беради. Лекин, сизнинг исми-шарифингизни билмоқчимиз, исмингиз нима?— деб сўради Ноҳид хоним.

— Мен исми-шариф, писми-шарифингни тушунмайман. Тез бўл, эшикни оч!— деб эшикни бир тепди келган одам.

Ноҳид хоним катта хиёбонда, почтада доим полиция тургани ҳолда унинг эшигига қандайдир бир одамнинг келиб, эшикни тепиб турганини кўриб ҳайрон бўлди.

Эшик орқасидаги киши яна уч-тўрт мартаба эшикни тепди.

— Оч яхшиликча, очмасанг, синдириб кираман-да, бошлаб ўзингни ўлдираман,— деди.

Ноҳид хоним бу қўрқитишдан кейин ноилож қолиб, эшикни очди. У ойдин кечада рўбарўсидаги кишининг бир маст казак¹ эканини кўриб, нима учун полиция аралашмаётганлигининг сабабини тушунди. Бу казак ўттиз икки ёшларда, ўрта бўйли, дуркун бир йигит эди. Тилидан теҳронлик оддий казак бўлмасдан, илгари Чаламайдон маҳалласининг аҳлидан экани маълум эди. Гап орасида қўлидаги ярмиси ичилган шишани карнай қилиб кўтариб турарди.

Ноҳид хоним эшикни очар-очмас қўрққанидан эшикнинг орқасига яширинди. Казак ичкарига кириб, баланд овоз билан:

— Қани, менинг отимни сўраган ким? Менинг отим Ҳасан Ризо бўлади!— деб бақирмоққа бошлади.

Эшик орқасига бекиниб олган Ноҳид хоним қўрққанидан нафас ҳам олмас эди. Ахири ўзига дадиллик бериб, секингина казакнинг орқа тарафидан ўтди-да, ўзини уйдан чиқиб келган қилиб кўрсатиб:

— Ризо ҳароми, эшикни нимага очмадинг? Билмайсанмики, бизнинг ноиб Ҳасанхон қачон келсалар, ўз уйларига кирадилар. Бу жой ўз жойлари. Биз бўлсак, у кишининг чўрилариимиз,— деди.

«Ноиб» калимаси ва бу ширин сўзларни Ноҳид хоним қўрққанидан айтар эди. Ҳолбуки, у бу казакни танимас ва унинг ноибми, ноиб эмасми эканини ҳам билмас эди.

¹ Казак — чор офицерлари томонидан тузилган, Эрон шоҳининг бригадасида хизмат қилувчи солдат. (Ред.)

Бу сўзлар казакка таъсирсиз қолмади. У Ноҳид хонимни кўриши билан, овозининг борича кулиб:

— Салом алайкум, хоним, аммо бизни анча қийнашди-да,— деди.

Ноҳид хоним, маст казак билан юзма-юз келганлиги ва унинг ҳар бир истагига бўйин эгишдан бошқа чораси йўқлигини яхши билар эди. Лекин кўнни кўрган туллак хотин бўлгани учун, ич-ичидан: «ўлгунча ичибди, олиб кириб тагин бир-икки стаканини босиб берсам, учиб қолади. Эрталабгача ҳеч бўлмаса, жонимиз ором олади-ку», деб ўйлади ва шу мақсадда казакка:

— Кечиринг, жаноби ноиб, ёш бола тушунмабди. Эрта билан жазосини бераман. Қани, марҳамат қилинг,— деб казакни мебелли уйга чақирди. Казак мастликнинг зўридан чайқалиб-чайқалиб, Ноҳид хонимнинг кетидан уйга кирди. Ноҳид хоним чироқни ёқди. Уйнинг ичи ивирсиқ эди. Бодринг пўчоқлари, данаклар сочилиб ётар эди. Ноҳид хоним «у шунчалик мастки, бу нарсаларнинг фарқига бормас» деб ўйлаган эди, бироқ иш у ўйлаганча бўлиб чиқмади. Ҳасан Ризо уйга кириш билан стол устидаги пўчоқларни кўриб:

— Ҳа, ҳа, бу ерда одам бор экан. Эшикни очмаганингизнинг сабабини энди тушунидим. Хўш, меҳмонингиз қани?— деб сўради.

Ноҳид хоним шошиб-пишиб жавоб берди:

— Ноиб, умрингиз узоқ бўлсин, бу кечаси меҳмонимиз йўқ. Жувонмарг бўлгур Ризо ҳароми кечадан бери уйни супуриб-тозалаб қўймабди.

Шу пайт девор орқасидаги иккинчи уйда ётган Сиевушнинг хурраги эшитилди. Ноҳид хонимнинг қўрққанидан ранги қум-қув ўчиб кетди. Ҳасан Ризони гапга солиб, хуррак овозининг эшитилишига монелик қилмоқчи бўлса ҳам хуррак тобора авжига чиқмоқча бошлади.

Ароқни шишаси билан кўтариб ичмоқчи бўлиб турган Ҳасан Ризо бирданига хурракка қулоқ солганича туриб қолди:

— Хўш, нимага ёлгон гапирасан, мени аҳмоқ қилмоқчи бўлдингми? Тўхта! Азбаройи худо... отамнинг арвоғига қасам бўлсинки, бу меҳмоннинг казак ёки бизнинг одамлардан бўлмаса, менинг қўлимдан саломат қутулмайди!— деди.

Ноҳид хоним ишнинг жанжалга айланишини билиб,

жуда шбиб қолди. У Сиёвушнинг ўлишидан эмас, эртага назмияга бориб сўроқ беришдан, жарима тўлашдан қўрқар эди. Шунинг учун у Сиёвуш ётган уйга қараб кетаётган Ҳасан Ризонинг йўлини тўсмоқчи бўлди. Ҳасан Ризо бир мушт уриб, Ноҳидни ерга ағдарди. Етоқ уйининг эшигини бир тепган эди, занжири узилиб, эшик ланг очилиб кетди.

Ичкарида Сиёвуш билан Иффат қандай ҳолда ётганларини тасвирлашдан ожизмиз... Шунчалигини билемизки, Сиёвуш Мирзо кайфи ошиб қолгани учунми ёки бошқа бир сабабданми, бу тўс-тўполондан уйғонмаган эди. Лекин, шундай, тўсатдан бўладиган воқеаларни бошидан кўп кечирган бечора Иффат, дом бедор ва потиш эди. Шунинг учун эшикнинг овозига сесканиб кўзларини очди, ҳамда қоронғиликда девор соатининг капкири каби бир одамнинг икки томонга чайқалиб уйга кирганини кўрди.

Каравотга ўч қадам қолганда Ҳасан Ризонинг кўзи Сиёвушнинг каравотга осиб қўйилган оқ ёқаси ҳам галстугига тушди ва қўпол овоз билан:

— Оқ ёқа таққан, галстукли экан! Мен галстукли эканини аввалдан билган эдим,— деб ўз-ўзича гўнғиллади.

Ҳасан Ризо қиличини сугурди. Қилич анчагина юқори кўтарилгандан кейин, бирданига Сиёвуш билан Иффатнинг оёқлари ўртасида қадалди.

Уйдаги одамларнинг ҳаммаси жўрттага ўзларини уйқуга солиб ётар эди. Чунки, шунчалик тўполондан кейин уйғонмаслик мумкин эмасди. Лекин, баъзилари бундай ишларга ўрганиб кетганлари учун уйқуларини ҳаром қилиб, ўртага тушиб ўтиришни лозим кўрмас эдилар. Бизнинг ошпаз кампир билан Ризо дастёр шу хилдагилардан эди. Баъзилари бўлса, жонини қўриқлаб, бировни ҳимоя қилиш учун ўртага тушишни ёмон кўрадиганлардан эди. Муҳаммад Тақи шу хилидан эди.

Иффат қилич зарбидан бақириб юбориб, ўзидан кетди. Лекин, қилич зарби Сиёвушга бошқача таъсир қилиб, уни уйқудан уйғотди. У, кўзларини очиб, рўбарўсида Ҳасан Ризони кўриб, дарров ўрнидан турди. Ҳовлининг юзида товушининг бориचा: «Полиция! Ёрдам қилингиз!» деб бақириб юрган Ноҳид хонимнинг овозини ҳам эшитди. Сиёвуш каравотдан сакраб тушиб, Ҳа-

сан Ризога ҳамла қилди. Ҳасан Ризо қиличини ташлаб, белидаги тўппончага қўлини узатди. Лекин Сиёвуш ҳам бўш келмай, Ҳасан Ризонинг ҳар икки қўлини маҳкам ушлаб, тўппончани олишига қўймади. Иккаласи ҳам маст, лекин, Сиёвуш озгина мизғиб олгани учун Ҳасандан кўра ҳушёрроқ эди. Ҳасан Ризо оғзига келганини қайтармай, бўралаб сўкмоққа бошлади.

Бирданига Сиёвушнинг оёғи тирғаниб йиқилди. Ҳасан Ризонинг қўллари халос бўлганди. У жон ҳолатда Сиёвушнинг устига миниб, тўппончасини чаккасига қадади. Сиёвушнинг тирик қолиши учун ҳеч қандай илож йўқ эди. Ҳасан Ризо кайфнинг зўридан нима қилаётганини ўйламасди. Сиёвушнинг ўлишига бир баҳя қолган эди. Ҳасаннинг бармоғи тўппончасининг тепкисини босиб юборди.

Тўппонча отилди, лекин Сиёвуш тирик қолди.

XIII боб

КУЕВНИНГ БАХТИ

Биз Фаррухни Нодирий хлебонидан ўтиб уйига кетаётган жойида қолдириб кетган эдик.

Бундан ўн дақиқа илгариги маст билан учрашувининг учун аҳамиятсиз бир ҳодиса эди. Уни ташвишга солган нарса, ёлғизгина оғойи Ф... уссалтана билан унинг муҳтарам рафиқаси ўртасида бўлиб ўтган суҳбат эди. Фаррух, оғойи Ф... уссалтананинг дунёда пулдан бошқа ҳеч бир нарсага ишонмаслиги ва унинг луғатида виждон, ахлоқ, илм, одамғарчилик каби сўзларнинг маъносиз бўлганлигини яхши биларди. Қисқаси, у, аммасининг эрини яхши танир, ҳатто шахсий манфаат кўзлаб, баъзи ерларда «ватан» сўзини ишлатиб юрса ҳам, бу сўзга қанчалик қиммат ва аҳамият берганлигини ҳам билар эди.

Шундай бир махлуқ орада турган ҳолда, Фаррухнинг севгилисига етишмаги унчалик осон бир иш эмас эди.

У Маҳиндан кеча олармиди? Йўқ. У Маҳинни шаҳват назари билан эмас, балки ўз ҳаётининг асоси деб билар ва севар эди. Шунинг учун унга Маҳинсиз яшамок мумкин эмас эди.

Оғойи Ф... уссалтананинг тош юрагини юмшатмоқ

учун нима қилиш керак? Қайси бир йўл билан уни бу ишга рози, ёинки мажбур қилиш мумкин? Шароитга бўйсуниб «муборак жойлар авлиёларнинг» арвоқларига сиғишсинми ёинки ўз йигитлигига ишонсинми?..

Бечора йигитнинг хаёлини шундай қарама-қарши фикрлар чулғаб олган ва атрофида нима ишлар бўлиб турганлигини унчали сезмасдан, уйига қараб кетмоқда эди.

У вақтларда Техроннинг хиёбонларида электр чироқлари бўлмаса-да, лекин кеча ойдин эди. Йўловчилар хиёбонларнинг ўнқир-чўнқирларига тушиш қийинчилигидан қутулган эдилар. Фаррух, Дарвозаи Давлат хиёбонининг чап томонида бўлган ўз уйининг эшигига етди. Лекин, хафа ва паришон бўлгани учун, уйга киришни маъқул кўрмай, шундай соф, ойдин кечада бир оз кезмоқчи бўлди. Эшигига ҳам қайрилиб қарамасдан, у Дарвозаи Давлат хиёбонини орқада қолдириб, Сипаҳсолор хиёбонига ўтди-да, кейин Дарвозаи Шимрон йўлига тушди. Фаррух, қаерга, нима учун кетаётганини ўйламасдан, телбаларча ўз-ўзи билан сўзлашиб кетмоқда ва хиёбонлардан хиёбонларга ўтиб, кезмоқда эди. Шу зайлда бир ярим соат айланди. Оташкада хиёбонига етар-етмас қўрқинчли бир овоз эшитди.

Фаррух қулоқ солди. Юз қадамча нарироқдан бир хотиннинг:

— Вой-дод, мусулмонлар! Уйим куйди, уйимда одам ўлдираётирлар, полиция! Полиция!— деб чинқириб додлаганини эшитди.

Кейинроқ овоз сусая бошлади. Овоз эшитиларди-ю, лекин англаб бўлмасди.

Фаррух ёрдам сўрагувчининг ким экани, бу маҳаллада қай хилдаги одамларнинг туришини англаса ҳам, лекин ҳар ҳолда, бир тирик жон бошқа тирик жоннинг қийноғи остида қолганини, балки ўлимга яқинлашганини назарга олиб: «Бечорага ёрдам бериш керак, балки қутқара оларман», деб овоз келган тарафга қараб югурди. Уч дақиқа ўтар-ўтмас рўбарўсидаги кўк эшикни қаттиқ бир итарган эди, эшик очилди, чунки Нохид хоним Ҳасан Ризодан қўрққанидан эшикни беркитишни унутган эди. Фаррух ичкарафга кириб, ўрталикда бўғиқ овоз билан додламоқда бўлган хотинни кўрди. Нохид хоним Фаррухни кўриши билан уни полиция деб ўйлаб,

қўли билан Сиёвуш ётган уйни кўрсатди. «Мана шу уйда, шу уйда!» деган сўздан бошқа ҳеч нарса айта олмай, ўша ердаёқ ўзидан кетиб йиқилди.

Фаррух югурганича уйга кирди. Бу худди Ҳасан Ризо Сиёвушни йиқитиб, тўппончанинг оғзини унинг чаккасига тираб турган вақтига тўғри келган эди. Фаррух ҳеч нарсанинг мулоҳазасини қилмай, Ҳасаннинг елкасига қаттиқ бир мушт туширди. Ҳасаннинг қўли бир томонга сурилди, худди шу маҳал тўппонча отилиб кетди. Лекин ўқ Сиёвуш Мирзога тегмади, каравотнинг устидан ўтиб, деворга қадалди.

Ҳасан Ризо бундай довюррак кишининг кимлигини билиб, унга ўз хаёлича яхшигина танбеҳ бериб қўймоқ учун ўрнидан турди. Бироқ фурсат топа олмади. Чунки ўгирилиб қарар экан, чаккасига қаттиқ бир мушт тегди-да, қўлидаги тўппончасини туширди, ўзини ҳам ўша ерга қулатди.

Шу орада Сиёвуш ўрнидан турди. Унинг кайфи тарқаб кетган эди. Ҳасаннинг қўрқитиши уни буткул ҳушёр қилиб қўйган эди. Қеча шу даражада ойдин эдики, ҳар бир нарсани аниқ кўриш мумкин эди. Сиёвуш бундан икки соат бурун учрашгани йигитни кўриб таниди. Бирдангина тиз чўкиб Фаррухга деди:

— Ого, сиз менни ўлимдан қутқардингиз, меннинг отим Сиёвуш. То тирик эканман, сизга ўзимни қарздор деб биламан. Бу яхшилигингизни ҳеч қачон унутмайман. Ҳар пайт нимаки юмушингиз бўлса, бажаришга тайёрман.

Фаррух:

— Ҳозир бу гапларнинг ўрни эмас. Туринг, мумкин қадар бу ердан тезроқ жўнанг! Полиция келиб, сизни қамашни мумкин. Гарчи сизнинг гуноҳсиз эканингиз унга маълум бўлса ҳам, бироқ, бу мамлакатда гуноҳсизлар яна тезроқ жавобгар бўлиб қоладилар, турциг, кетинг! — деди.

Сиёвуш Фаррухнинг насиҳатини қабул этиб, унга амал қилмоқчи бўлган эди, бироқ урдасидан чиқолмади. Чунки, қиличдан олган яраси ҳаракат қилишга тўсқинлик қилар эди. Сиёвушнинг ярасидан оққан қон уни ҳолдан тойдириб қўйган эди. Фаррух ишни дарров тушуниб, чора қидирмоққа бошлади. Шу пайтда Муҳаммад Тақи кўйлакчан ҳолда уйга кириб келди. Гўё бу тўполон-жанжаллардан ҳеч нима билмагандай: «Ҳа, ҳа,

нима гап бўлди?» деб сўрай бошлади. Фаррух вақтни бекорга ўтказмаслик учун Муҳаммад Тақига:

— Оғонг ярадор бўлибди, қани, тез бўл, уни дарров бу ердан олиб кет!— деб буюрди.

Муҳаммад Тақи ташқарига чиқди. Бир оздан кейин қайтиб келиб беҳуш ётган Сиёвүш Мирзони елкасига олди. Ҳовлига чиқдилар. Ҳовлида беҳуш ётган Ноҳид хонимга эътибор бермасдан, эшикдан чиқиб кетдилар.

Булардан хотиржам бўлган Фаррух ҳам, тезликда бу ердан чиқиб попок ва қўрқинчли уйдан кетмоқчи бўлар эди. Бирданига аччиқ ва аламли бир овоз эшитиб, орқасига қайтди. У буни казакдир деб ўйлади. Лекин казакнинг ҳушсиз ётганини кўриб таажжубланди. «Мени хаёл олиб қочдимикан», деб ўйлади. Шунда ҳалиги овоз:

— Мени халос этинг, мени халос этинг,— деди.

Бу гал Фаррух диққат билан теваракка қаради. Каравотнинг оёғида йиқилиб ётган оқ бир нарсага кўзи тушди ва унга яқинлашди. «И-я, бу хотин киши-ку», деди-да, бир сония таажжубланиб қараб турди. Хотиннинг ўнг сонидан қон оқаётганини кўриб эгилди. Қаршисида чиройли хотин ётар, унинг ярим очиқ кўзлари мадад сўраб мўлтилаб тикилиб турарди. Унинг:

— Ого, мени бу ердан қутқазинг!— дейиши Фаррухни жуда шошириб қўйди.

Фаррух бир неча сония тараддудланиб тургандан кейин:

«Ҳар нима бўлганда ҳам, бу хотин бузуқ эмас, уни алдаб бу ерга келтирганлар», деб хаёлидан кечирди-да, дарров елкасига кўтариб, кўчага олиб чиқди.

Фаррух йўлда полицияга учраб қолиб, елкасидаги хотин билан назмиёга олиб боришларидан чўчиб, жуда эҳтиёт билан кетмоқда эди. Мумкин қадар полиция постларининг рўбарўсидан ўтмасдан йўлини ўзгартиб борарди. Рост кўчаларни қўйиб, қингир-қийшиқ паст кўчалардан ўтиб, жадаллик билан уйга кетарди. Дам ўтмай чарчаб, у бечора жонли ҳайкални секингина ерга қўяр, сал нафасини ростлагандан кейин яна кўтариб, йўлида давом қиларди. Ярасидан кўп қон оққанлиги учун ва бу даҳшатли воқеадан жуда ҳам қўрққанидан, Ифбатнинг ранги бўздай оқариб кетганди. Ойдин кечада симобдай ялтираётган сочлари ёйилиб, кўкрагига тушган эди. Кўзлари эса юмуқ. Фаррух чарчамасдан елкасида кўтариб кетаётгани гавданинг табиий нозик-

лиги, гўзаллигини ва дилраболигини сезмай борар эди.

Фаррух бу шўрликни қайси алвасти алдаб, шу тубан ерларга судраганини билмагани ҳолда унга ачинган ва бутун янчилган бир одам назари билан қарар эди. Фаррух бошқача хатти-ҳаракат қила олармиди? У бутун кўнглини тўншириб қўйгани Маҳинни унутиб, унга бошқача кўз билан қараслармиди?! Албатта, йўқ. Чин, покиза сени билан севгани Маҳин унинг буткул эгаллигига молик бир эзгу орзуси эди.

Ун беш дақиқадан кейин Фаррух уйига яқинлашди. Вахти ёр бўлиб, йўлда полиция тугул бошқа бирор кимса ҳам учрамади. Эшикни тақиллатди. Икки дақиқа ўтмасдан қари бир кампир эшикни очиб, Фаррух билан Иффатни ичкарига олди.

* * *

Сийвеш, Муҳаммад Тақи билан, Фаррух эса, Иффат билан чиқиб кетганларидан кейин аҳвол қуйидагича эди.

Ноҳид хоним бор кучини қоровул ва ёрдамга одамлар чақиришга сарфлаб қўйгани сабабли ер билан битта бўлиб беҳуш ётарди. Ошхонанинг бир бурчагида ётган Ризо бу жанжал-суронлардан хабардор бўлса ҳам, жуда илиққина ва маза қилиб ётгани учун, бўлаётган ҳодисаларни «тушим» деб қабул қилишни маъқулроқ топар эди.

Ошпаз кампир шунчалик қари ва гаранг эдики, унинг қулоғи тубида тўп отилса ҳам эшитмас, то уйқуси пишмагунча уйғонмас эди.

Муҳаммад Тақи билан бирга ётган Ахтар маст, қаттиқ уйқуда эди. У тўппонча товушини эшитган бўлса ҳам буни қўшнингнинг уйда отилди, деб қўя қолди ва қайтадан бошини буркаб, уйқуга кетди.

Бироқ, қолган икки хотин — Ашраф билан Ақдас ҳамма воқеадан хабардор эдилар-у, лекин аралашувга қўрқардилар. Улар меҳмонлари бўлмагани учун ечиниб ётган, бир нафис ўзларининг келажаклари тўғрисида сузлашдилар. Эшик шиддат билан тепилганда улар ўрниларидан туриб, деразага келган ва маст казак қандай қилиб меҳмонхона тарафга ўтганини ҳам кўрган эдилар. Бироқ, бу икки хотин, бундай кечаси келгувчи маст казак ва бошқаларга кўникиб қолганлари учун, «казак қайси биримизга чанг солар экан?» деб ўйлаб,

ташвишлана бошладилар. Лекин уларни ҳеч ким чақирмади.

Бирданига Ноҳид хонимнинг бақиргани ва ўқ товуши эшитилди. Улар яна ўринларидан туриб, деразага югурдилар. Улар Муҳаммад Тақи Сиёвуш Мирзони ва Фаррух Иффатни елкасига кўтариб кетганини кўрган бўлсалар ҳам, ташқарига чиқиб, бу ишларга аралашувага юраклари бетламади.

Орадан ярим соат ўтди. Сипаҳсолор минорасининг соати ўн иккига занг урди. Шу маҳал қўққисдан шошиб-пишиб полиция кийимидаги икки киши Ноҳид хонимнинг ҳовлисига кириб келди. Буларнинг бири офицер, иккинчисининг милтиғи ва аломатидан постда турган соқчи эканлиги англашилار эди.

— Жаноби ноиб,— деб ахборот беришга бошлади соқчи ҳовлига киришганидан кейин,— бундан ярим соатча бурун шу ҳовлининг эшигини аллаким тақиллатаётганини кўрдим. Узоқдан унинг казак эканини пайқаганимдан кейин рўпара келсам, ишим пачава бўлади деб ўйладим. Шунда яқинимдаги постга бориб бирорта соқчини ёрдамга чақириб жазм қилдим. Лекин минг қадамча юрганим ҳам йўқ эдики, хотин кишининг «қоровул» деб бақираётгани қулоғимга чалинди. Мен бўлсам, ўз-ўзимга: «Ҳозир қайтиб келаман-ку», дедим. Лекин бахтга қарши, қанча ахтарсам ҳам соқчини топа олмадим. «Балки, шу яқин орада ухлаб ётгандир, ёки қўшни уйлардан бирортасига кириб бир-икки соат мизғиб олмоқчи бўлгандир», деб ўйладим. Шу маҳал жаноблари келиб қолдилар, иккаламиз бу ерга келдик...

— Хўп, бас қил,— деб унинг сўзини кесди офицер,— бу ерда нима ҳодиса рўй берганини суриштириб билиш керак.

Улар эшиги ланг очиб турган ётоқ уйга киришди. Ногаҳон офицер бир нарсага қоқилиб, ағдарилаёзди, лекин бир амаллаб ўзини тутиб қолди-да, деди:

— Э, бу ерда одам ҳам ўлдиришганга ўхшайди-ку!

Офицер энгашиб, беҳуш ётган хотинга кўзи тушди. Соқчи ҳам энгашиб қараб, ерда беҳуш ётган хотин Ноҳид хоним эканини таниди. Лекин, Ноҳид хонимнинг ҳеч қаерида қон ва жароҳат асари йўқ эди. Унинг қўрқувдан беҳуш бўлиб қолгани маълум бўлди. Соқчи ҳовуздан бир ҳовуч сув олиб келиб, Ноҳид хонимнинг юзи-

га сепди, кейин кўллариини уқалади, орадан икки дақи-
қача вақт ўтгач, Ноҳид хоним кўзини очди.

— Мен қаердаман, нима воқеа бўлди, у қаёққа кет-
ди?— Шу маҳал офицерга кўзи тушиб, сўради:

— Уни тутганиларми, йўқми?

— Йўқ, биз ҳали ҳеч кимни тутганимиз йўқ,— деб
жавоб берди офицер. — лекин жиноятчини, албатта, қўл-
га оламиз. Қани, тур ўрнидан. Полиция маҳкамасига
борамиз, ўши ерда қандай воқеа юз берганини гапириб
берасан...

XIV боб

ВРТАЛАБ

Фаррух эрта билан соат еттида уйғонди. Кўзини
очиб, боши устиди энагасини кўриб, ҳайрон бўлди. Са-
бабини сўрамоқчи эди, лекин энагаси гал бермасдан:

— Баракалла, ўглим! Чакки эмассан,— деб хохолаб
кула бошлади. Бечора хотин Иффатни Фаррухнинг сев-
гилиси деб таниган ва Фаррухнинг дадиллигини мақтаб,
уни қутламоқда экан. Фаррух унинг соддалигига кулиб,
ҳеч нима демасдан бошини иргатди-да, дарров ўрнидан
турди ва холасидан Иффатнинг аҳволини сўради.

— Кечаси яхши ухлади. Ҳозир уйғоқ, лекин ҳали ўр-
нидан тургани йўқ,— деб жавоб берди энага.

Бир оздан кейин Фаррух Иффатдан ижозат олиб ич-
карига кирди.

— Муҳтарам хоним,— деди у,— юз-кўзингизга қара-
ганда, сиз унақа тубан ерларнинг одами ва ундай нопок
ишлар билан шуғулланадиган хотинлардан эмассиз.
Менимча, эрингизнинг ахлоқсизлиги, ёинки ярамас хо-
тииларнинг алдамчи тиллари сизни йўлдан уриб, шун-
дай ишларга етаклаган бўлса керак. Нима бўлса ҳамки,
ўтган ишга са тавот, энди билмайман, ота-онангиз бор-
ми, уйингизга кетишни истайсизми? Сизга ёрдам бериш
учун мени аҳволингиздан хабардор қилиб, таржимаи
ҳолингизни сўзлашингиз мумкинми?.. Агар ота-онангиз-
ни, ҳовлингизни айтишни истамасангиз, ихтиёр ўзингиз-
да. Ярангиз тузалгунча шу ерда қолишингиз мумкин.
Соғайганингиздан кейин уйингизга, ёхуд истаган ери-
нгизга кета оласиз.

Неча вақтдан буён жабр-жафодан бошқа нарса кўр-

май, аччиқ ва қўпол сўзлар эшитиб юрган Иффатга бундай мулойим оҳанг билан берилган Фаррухнинг саволлари уни ҳайрон қолдирди.

— Ого, сиз шу маҳалгача учратганим одамлардан эмассиз. Сизга нима десам экан? Таржимаи ҳолим жуда ҳам узун. Зарур ишингиз йўқ бўлса, малол келмаса, айтиб бераман,— деди Иффат.

— Албатта, айтингиз, менинг ҳеч қандай зарур ишим йўқ. Ҳаммасини қапоат билан тинглашга тайёрман.

Бечора Иффатнинг ўзини шундай ердан қутқазган Фаррухга ҳам ишонмасликка ҳаққи бор эди. «Балки, бу ҳам Ноҳид хоним каби мени халос этдим номи билан бир ердан иккинчи ерга кўчириб, аввалгилардан ҳам бешбаттар бир аҳволга солмасин», деб анчагина тараддудда ҳам қолди. Ортиқ уни ёт бир эркак билан тунашга мажбур қиладиган ҳеч қандай қўрқинч йўқлиги, эрта билан турганда Фаррухнинг энагаси каби покиза бир аёл ва Фаррух сингари йигитнинг тоза ва соф овозини, ниҳоят, теваракка қараганда, бешармлик ва пардасизлик каби ярамас ҳолатлардан нишона кўрмаганлигини англаб, тортинмасдан таржимаи ҳолини сўзламоққа бошлади.

Муҳтарам ўқувчилар Иффатнинг таржимаи ҳолини унутмаган бўлсалар керак.

Бу аччиқ воқеани эшитган Фаррух шундай асабийлашдики, ёлғиз боши билан шундай паст ва тубан кишилардан ўч олмоқ учун ўша замониёқ ўрнидан туриб кетмоқ истарди. Бироқ, қанча ўйлаган бўлса ҳам, лекин ўзини босиб, фикрини тўплаб: «Бир оз кўрай, қани, ҳикояни охиригача тинглай, натижасини билай» деб қулоқ солмоққа давом этди.

Иффат таржимаи ҳолини бир соат гапирди. Фаррух муштипар қизнинг ўз жаҳолати орқасида бир тўда паст ва ахлоқсизларнинг кайфларига қурбон бўлиб, шу даражада азоб-уқубатларга дучор бўлганини англади.

Чиндан ҳам Фаррух бундай воқеадан шу даражада қайгуланган, шу даражада таъсирланган эдики, ўзича турли режалар чизиб, еру осмон билан ёқа бўғишмоқчи бўлар эди. «Шундай махлуқларни нима учун яратдинг, нима учун кучлилар кучсизларнинг ҳақини ейдилар, шуҳрат йўлида ҳар нимани ўзларига қурбон қиладилар, нима учун халқнинг иззати нафси, молу жони бир тўда разил кишиларнинг қўлида ўйинчоқ бўлиб қолади?» деган

хаёллар билан осмонга мушт дўлаяр, фалакка эътироз қилар эди. Осмонга боқиб, унга лаънат ва нафратлар айта эди. Лекин Фаррухнинг шундай енгил ўйлари Иффатнинг дардига чора бўлмас, унга ҳеч бир фойдаси йўқ эди. Бир озгина ўйлагандан кейин Фаррух, юзини Иффатга ўгириб деди:

— Муҳтарам хошим, сизнинг илмсизлигингиз ва эрингизнинг палидлиги орқасида юз берган бундай ачинарли воқеадан гоётда таъсирландим. Мен, истаганингиздай, ўшалардан ўч олишга ўз-ўзимга сўз бердим, фақат ҳаммадан аввал сиз уйингизга, яъни, ота-онангизнинг ёнига кетишингиз керак. Чунки, бу ерда қолишингиз мени ва отамнинг тинчлигига тўсиқ бўлмаса ҳам, фикримча, бир талай борди-келди гапларга сабаб бўлади.

— Ого, ихтиёр сизда,— деди Иффат,— лекин ота-онам эримга ёзган хатларида мени фарзандликдан чиқарганларини сизга гапириб бердим. Энди мен уйимга бориб, ота-онамдан гуноҳимни кечирешларини қайси юз билан сўрайман?

— Айтганингиз шу хатнинг тўғри ё нотўғри эканини қаердан биласиз? Балки, эрингиз сизни шу аҳволга солиш учун қалбаки хат ёзган бўлса, нима дейсиз? Нима бўлса ҳамки, айби йўқ. Мен ўзим ота-онангизнинг ёнига бораман. Аҳволотни бошдан-оёқ уларга айтиб, сизни кечирешларини сўрайман.

Фаррух ўрнидан турди:

— Бу кун бир талай зарур ишларим бўлганлиги учун отангизнинг ёнига боролмасам керак, лекин эртага, албатта, отангизни бу ишдан хабардор қилишимга ишонинг!— деб уйдан чиқди.

«Эрта» калимасини эшитган Иффат: «бу ҳам Арус Мажруннинг найрангига ўхшаб чиқмасин», деб шубҳаланди. Бегона кишиларнинг уйга киришларидан қўрқиб, ўйламоққа бошлади. Роса бир соат шундай ўтди. Бирданига бегона бир одамнинг уйга томон келаётганини кўриб қалтирай бошлади. Бироқ кўп ўтмасдан қўрқуви тарқалди, чунки келувчи одам унинг ярасини боқиш учун Фаррух бошлаб келган доктор экан. Доктор келиб Иффатнинг ярасини кўрди:

— У қадар қўрқинчи эмас. Истаган вақтда туриб юрса бўлади. Лекин бир оз дам олсин,— деди.

Шу вақт Иффатни қаттиқ йўтал тутиб, бу йўтал икки дақиқача давом этди. Охирида рўмолчасини оғзи-

га гутар экан, доктор ҳайрон қолиб, қайта бошдан унинг юрак ва жигарларини текширмоққа бошлади. Бир неча дақиқадан кейин бошини чайқаб эшикдан чиқди.

Уни кузатиб қўймоқ учун Фаррух ҳам унинг кетидан чиқди.

Иўлда ундан нима учун бош чайқаганини сўради. Доктор тортинмасдан:

— Бечора хотин сил бўлиб қолибди,— деб жавоб берди.

Бошига шунчалик мушкул савдолар тушган чоғида йигирма кунга яқин Шоҳбожи билан яшаган Иффат силга йўлиқиб, ҳалокат ёқасига бориб қолган эди.

Соат эндигина тўққизга яқинлашган эди. Эшик қоқилди. Фаррухнинг отаси, энагаси ва хизматкор чолдан бошқа уйда ҳеч ким йўқ эди. Шу пайтда ҳовлида юрган хизматкор чол бориб эшикни очди. Келувчи киши боғ-боннинг қизи Шукуфа эди. У ҳовлига кирган заҳоти Фаррухни сўради.

Чол ҳали жавоб бергунча йўқ эди. Шукуфани деразадан кўриб югурган Фаррух уни қарши олди.

Шукуфа саломлашгандан кейин имо билан Фаррухга хабар келтиргани, лекин чолнинг олдида айта олмаслигини тушунтирди. Фаррух ишорани англаб:

— Юр бўлмаса,— деб Шукуфа билан бирга уйга кирди. Фаррух курсига ўтириб, Шукуфани ҳам ўтиришга буюрди. Шукуфа ўтиришни истамай, тархашлик қилди. Охирда ўтирди.

— Нима гап? Янги бир воқеа юз бериб қолдимиз?— деб сўради Фаррух Шукуфадан.

— Йўқ, ҳеч гап йўқ. Лекин бундан бир соат илгари Маҳин хоним мени чақириб, сизга етказиш учун мана бу хатни берди,— деди.

«Ҳеч гап йўқ» калимасини эшитгандан кейин Фаррухнинг ташвишли кўнгли андак ором олди ва хатни кўриш эса, ишқ жароҳатлаган қалбига қўйилган малҳамдай бўлди.

Маъшуқа хатини кўриш жароҳатига малҳам бўлди, деган иборани ишлатиб хатога кетдикми? Қоронғи кечада ёқимли куйдай эшитилган бўлса — икки лабнинг бир-бири билан қовушиши, бир неча сонияга бўлса ҳам, инсон ички оламига таскин бериб, ошиқнинг жароҳатли қалбига малҳам бўлмайдими? Маъшуқанинг хиёл жилмайиб қўйиши бошқа минг-минг гўзалларга бир қайри-

либ қарамайдиган ошиқнинг қалбига малҳам эмасми, ахир? Маъшуқанинг арзимаган бир ҳадяси ошиқни умидвор этиб, мажруҳ қалбига малҳам бўлмайдимми?

Шундай экан, нега севган кишининг бутун ички оламни кўз олдинда намоян қиладиган хатни малҳам билан, ҳаётбахш малҳам билан таққослаш мумкин бўлмасин?

Фаррух хатни ўн мартаба ўнгандан кейин, очиб ўқий бошлади:

«Азизим Фаррух!

Кеча кечаси айтган сўзларинг бир соат ҳам мени тинч қўймагандай, сенинг фикринг ҳам, ишонгинки, бир дақиқа ҳам хаёлимдан нари кетмайди. Лекин ҳали бу ҳам оз эмиш. Бадбахтликни қарагинки, ҳали булар ҳолва экан. Бу кун эрта билан онам мени чақириб: «Сен Фаррухга тегмайсан, шуни билиб қўй!» деб ҳалигача ҳеч эшитмаганим бир кишининг отини айтди. Хафалигим ошиб кетганидан ўнинг исмини сўрашни ҳам эсимдан чиқарибман. Шу кеча-кундузда мени унга унашиб, ундан кейин бир ой Қум зиёратига кетар эмишимиз. Лекин, онамнинг юзидан ёлгон гапирётгани сезилиб турар эди. Бу бир ойлик сафар зиёрат учун эмас, балки бизни бир-биримиздан жудо қилмоқ учун бир режа. Улар бизнинг учрашувимизни сезиб қолишибди. Лекин жойини билмайдилар. Хулласи калом, эртага эрта билан тўрт киши — онам, мен, бир ходима ва бир хизматкоримиз аравада йўлга чиқамиз. Улар шундай мўлжал қилаётирларки, қайтганимиздан кейин дарров тўй бошлаб, никоҳ қилиб, мени зўр билан ўша кишига бермоқчилар. Бундан ташқари, онам бир талай бошқа гапларни ҳам айтди. Бахтга қарши, вақтнинг озлиги ҳам бу уйда хат ёзиб ўтирганимни кўрмасинлар, деб улардан хавотир олиб, батафсил ёза олмадим. Шуни билиб қўйгинки, эртага кечқурун кўришолмаймиз. Бу кун кечқурун учрашувимизни жуда ҳам истар эдим. Лекин эшитишимга қараганда, мендан шубҳаланиб бутун ҳаракатларимни таъқиб остига олишмоқда. Шукуфанинг келиб қолгани мени жуда хурсанд қилди. У менинг шу хатимни сенга етказди. Шу нарса хаёлингда бўлсинки, Фаррух, мен сени севман, сени ҳеч унутмайман!

Сени севган Маҳин»

Бу хатни ўқиш Фаррухга чақмоқ ургандай таъсир қилди. Бироқ, Маҳиннинг энг охириги икки: «Мен сени

севаман, сени ҳеч унутмайман!» деган жумласини қайта-қайта ўқиб, ўзига далда берар: «Худо хоҳласа, йигитлигимга ишонамай, уни ўзимники қиламан», деб ўз-ўзи билан гапиришар эди. Аммо худо қачон ошиқларга ёрдам қилган эди?!

Ниҳоят Фаррух юзини Шукуфага ўгириб:

— Мен бугун Маҳинга хат ёза олмайман. Сен эртага уларнинг соат нечада кетишларини биласанми?— деб сўради.

— Гапларига қараганда, арава эрта билан худди соат ўнда бекатдан жўнаб кетади,— деб жавоб берди Шукуфа.

Фаррух сўнгги вақтларда эронликларда тўғри сўз бўлмаслиги, чопархона идорасида соат ўн дегани пешингача чўзилиб кетишини яхши билар эди. Шунинг учун Шукуфадан эрта билан барвақт келиб, Маҳин учун ёзиб қўйилган хатни олиб кетишни сўради.

Шукуфа ўрнидан турар экан:

— Бўлмаса эрта билан соат еттида келаман,— деб чиқиб кетди.

Шукуфа кетгандан кейин Фаррух бошини икки кафти орасига олиб, хаёл суриб кетди.

XV БОБ

ОНА ВА ҚИЗ

Энди муҳтарам ўқувчиларимиз билан бирга оғойи Ф... уссалтананинг уйига, яъни ўша муҳташам бинога кириб, Маҳиннинг бошига келган воқеаларни ва унинг юқорида айтганимиздай бир хат ёзишга сабаб бўлган ишларни билайлик. Маҳин девордан астагина тушгандан кейин, ётган кишиларни уйғотишдан қўрқиб, оёқ учи билан юриб, уйга келди.

Боққа чиқиладиган катта эшикни авайлаб очди-да, секингина ўз ётоқхонасига кирди, ечиниб каравотига чўзилди.

Ҳамма ёқ тинчиди.

Бир маромда нафас олишидан уни ухлаётган деб гумон қилиш мумкин эди.

Лекин у бедор, бир талай ўй ва хаёллар билан банд эди. У ҳам Фаррухга ўхшаб: «Энди нима қилиш керак?» деб ўз-ўзига савол берарди.

Маҳин Эроннинг саводсиз ва бахти қора қизларидан

эмасди. У ота-онасининг ҳурмати, онлада ҳар замон керак бўлганини тасдиқ этиш билан барабар, бу эҳтиром ва бўйсунушнинг бир даражада ўлчови, кишининг кўзини боғлаб қўядиган даражага бормаслигини ҳам англаб эди. Маҳин ҳеч қачон ўз тақдирини ота-онасининг орзусига, айниқса олий мартабаларга етмоқ учун уни бир зинапоёга айлантирмоқчи бўлган ва ўзининг ҳирси ва тамаи йўлида қурбон қилмоқчи бўлган отага қурбон бўлмаслиги керак эканлигини тушунар эди.

Маҳин ўз келажагининг эргагина боғлиқ эканини билар, бу эрнинг яшаш қондаларини баҳам кўришга мажбур бўлажанини ҳам тушунар эди. Маҳин билар эдики, эр қандай ахлоқда бўлса, яхшими, ёмонми, унга бардош бериш, кўникиш керак. Маҳин билар эдики, агар эри шарият ва одат бўйича хотинни уришга раъйи бўлган эронликлардан бўлса, яна таёқ Маҳиннинг бошида синади. У эрининг тарёк чекишига, ичкилик ичишига, хотинбозлигига, баччабозлигига чидаб, тилини тийиб, эрининг обрўсини оёқ ости қилмаслик учун ҳар ерда уни худонинг бир бавдаси, айбсиз, гуноҳсиз, қўй оғзидан чўп олмаган, пок ва табаррук бир кишидай кўрса-тиши керак.

Модомики, шундай экан, бу ерда энди отанинг раъйи ва иродасининг нима дахли бор? Ўз ихтиёри билан балонинг оғзига рўпара бўлиш нима учун керак? Куёвнинг қадди-қомати отага ёқиб қолгани учунми, ёинки, куёвнинг ялтоқлик, хушомад билан кўрсатган ҳаракатлари отанинг завқига, табиатига мувофиқ келгани учунми?

Маҳин онасини яхши билар эди. Уни ҳаддан ортиқ севиб, ҳамиша ҳурматини кўзи ўнгида тутар, шу билан барабар, онасининг қай даражада содда ва ижтимоий муносабатлардан беҳабар бўлганлигини ҳам англаб эди. У онасини отасининг қўлида бир ўйинчоқ бўлганлигини ва онасининг ўзига шахсан мустақил бир фикри бўлмасдан, ҳамиша бошқа бир фикрга қул эканлигини ҳам тушунар эди.

Онаси билан бошлайтурган талашув, атиги бир мартаба йиғлаш ва бир мартаба мени зўр билан ўшанга берсангиз, бахтим қора бўлади, деган сўз билан тамом бўлишини ҳам Маҳин яхши билар эди.

Лекин, отаси бундай эмас эди. Отаси тушунар, отаси мустақил фикрга эга эди. У ишни ҳам, қизининг тўғри гапираётганини ҳам биларди. Бироқ ҳирсу тама ҳам-

да депутат бўлиш савдоси унга тўсқинлик қилар эди, У қизини шуларга қурбон қилмоқчи. Қизининг хушвақт бўлиши учун эмас, балки бадбахт бўлиши учун чалишарди.

Ярим кечада уйқусиз Маҳин шундай фикр-хаёллар билан машғул эди. Шу хаёллар Маҳинни аллақачонларга олиб кетди. Охири уйқу бу хаёлларни қувди.

Маҳин эрталаб уйқудан уйғонганида, қуёш деразадан мўралаб турарди. Дарров ўрнидан туриб, юз-қўлини ювиб, нонушта қилишга улгурмасдан Феруза кириб:

— Хоним, онангиз сизни ўз хоналарига чақираёттирлар, — деди.

«Ўзи нима гап?» деб ўйлади Маҳин, чунки ҳар кун эрта билан ота-онасининг ёнига чиқиб, улар билан кўришар эди. Бироқ, бу кун нима бўлди-ю, уни йўқлаб қолганларига ҳайрон бўлди. Онасининг хонасига кириб, отасининг бу хонада йўқлиги таажжубини янада оширди.

Саломдан кейин отасининг қаерга кетганлигини сўради.

Онаёи дарҳол жавоб берди:

— Бир ерда зарур ишлари бор эди, эрта билан извошни қўштириб кетдилар, — деди.

Она ҳалигача тик турган Маҳинни ўтиришга ундади. Маҳин ўтиргандан кейин, Маликтож хоним кулимсираб деди:

— Қизим Маҳин, кеча отанг билан икковингизнинг орангизда нима гап ўтди? Қиз деган ҳам шундай оғзи ботир бўладими? Доим сенинг раъйингга қараган, тинч-лигингни истаган, бошқа ўртоқларингдан афзал бўлиб юришингни хоҳлаган ота билан шундай муомала қилдингми?

Маҳин онасининг феълини яхши тушунар эди. Бу сўзлар онасининг ўз сўзи эмасди. Бундай сўзларни у бу кечаси дарс олган эди. Яъни, онасининг сўзларида отасининг руҳини кўриб, ишни тушунди ва секин деди:

— Сизга нима десам экан-а?

Онаси ҳазиллашгандай яна сўзида давом этди:

— Қани, қизим, айт-чи, меҳрибон ота ўз фарзандининг бахтли бўлишини кўзда тутиб, унинг учун топган энг мувофиқ эрни масхаралаб, уялмасдан, ҳурматини кўзда тутмасдан: «Мен унга тегмайман, менинг эрим фалончи бўлади» дейиши яхшими? Бундай сўзлар қиз бола учун номус эмасми? Ўзинг қандай ўйлайсан?

Маҳин индамади. Онаси яна сўзида давом қилиб деди:

— Қани, айт-чи, қизим, нима дейсан? Ота-онанг сени оловга ташлаётгани йўқ, сувга оқижаётгани йўқ, сени бадбахт қилмайди. Йўқ, қизим, бундай хаёллар тубдан янглиш. Бизнинг қайғумиз, саъйи ҳаракатимиз ёлғиз сенинг учун. Отанг сени Фаррухга бермайман деган бўлса, бу ҳам сенинг яхшилигингни назарга олиб, уни сенга лойиқ кўрмагани учун. Чунки, Фаррух тоганнинг ўғли бўлса ҳам, унчалик софдил йигит эмас. Мана, одамларнинг оғзида гап юрибдики, у айш-нишратга муккасидан кетганмиш, кишига иснод келтирадиган бемаза ишлар билан шуғулланармиш. Бекорчилиги орқасида бечора отасининг бор бисотини сотиб-совурган эмиш.

Маҳин онасининг энди ифво бошлаганини ва борган сари ҳар нарсани унутиб, ҳеч кими йўқ, таянчсиз бўлгани учун, қўлида дипломи бўлса ҳам, иш тополмаган бечора Фаррухни ахлоқсиз, паст деб номини булғаб ўтиргани қонини қиздириб юборгач, жиддий бир вазиятда деди:

— Онажон, ҳеч бўлмаса эсингиздан чиқмасинки, Фаррух акангизнинг ўғли бўлади, «султон суягини хўрламас», дейдилар.

Маликтож хоним унчалик юраги тош одамлардан эмас эди. Бу сўз унга сал таъсир қилди.

— Албатта, у акамнинг ўғли. Онаси бевақт ўлиб кетгани учун мен унга ҳам она, ҳам ҳар ишда суянчиқ бўлишим керак. Бироқ, нима қилиш мумкин, унинг ўзи шундай. Саёқ, муомалага кўнмайдиган сўтак, умуман одам бўлишни истамаса, мен нима қилай!— деди.

Маҳин онаси билан бошланган бу тортишувнинг фойдасизлигини англаб:

— Жуда яхши, онажон, энди мени бу ерга чақириб, шу сўзларни айтиб ўтиришингиздан тилагингиз нима?— деб сўради.

Маликтож хоним бир оз ўйлаб тургандан кейин жавоб берди:

— Қизим, тилагим шуки, сен бундан кейин Фаррухнинг отини тилингга олма. Шундай бир ахлоқсиз йигитнинг севгилисиман, деб ҳаммага айтиб юрма. Отангнинг маслаҳат кўрган одамини эрим деб қабул қил. Ақлу ҳушингни бошингга йиғ, қизим. Отаси ўз фарзандини ўтга отса, ҳатто ўлдирса ҳам ҳаққи бор. Ҳолбуки, сенинг па-

дари бузрукворинг бундай фикрда эмас. Шунинг учун ўқиган, хотинларнинг орқасидан юрмайдиган, бузуқ кўчаларга кирмайдиган, ичкилик ичишни ўзига фахр деб билмаган бир одамни топиб, яъни, ёш бир шахзодага сени эрга бермоқчи бўлади. Шундай бўлгандан кейин, шундай бир яхши отани бекорга хафа қилиб, икки ўртага совуқчилик тушириб ўтиришнинг нима фойдаси бор?

Маҳин аччиқланиб сўради:

— Менга айтадиган гапингиз шугинами?

— Ҳа, шу. Нима, бу гаплар бекорчи гап деб ўйладингми? Йўқ, қизим, менга қара! Мен онанг бўламан-а! Сен нима деб ўйласанг ўйлагинки, мен сени ўйлаганингдан минг мартаба ортиқ яхши кўраман. Сендан сўрайманки, менга ҳам отангга қилганингдай муомалани қилма. Менинг олдимда ҳеч қачон бундан кейин Фаррухнинг отини атамайман ва отамнинг айтганларини қабул қиламан деб сўз бер.

Маҳин бу гап маъқул тушмаганини англатиш мақсадида бошини чайқаб қўйди.

Маликтож хоним умидсизликка тушмай яна сўзга бошлади:

— Майли, ҳозирча бу гапларни қўя турамиз. Бир неча кундан буён сал тобинг қочиб юрибди, шунинг учун ҳам фикринг бўлиниб қолибди, қизим. Худо хоҳласа, сафарга бориб келганимиздан кейин соппа-соғ бўлиб кетасан. Ота-онангнинг айтган насиҳатларини қабул қиласан.

Маҳин «сафар» сўзини эшитгандан кейин ҳаракатланди:

— Сафар? Қандай сафар, қаерга кетасиз?

— Қум шаҳрига бораман деб айтганингни унутдингми? Сени яхши кўрган отанг, сўзингни ерда қолдирдимми, кеча кечаси отанг бир ойга Қум шаҳрига боришимизга ижозат берди.

Маҳин ота-онасининг тилагини, яъни Фаррух билан учрашиб турганларига жўрттага тўсиқ бўлмоқ истаганликларини тушуниб, баланд овоз билан айтди:

— Яхши, онажон, ахир, мен Қум сафарига боргим келган вақт ёзининг қизиқ вақти эмас, кўклам эди.

— Азизим, зиёрат деган қай вақт бўлса ҳамки, зиёрат; эҳтимол, ўша вақтда ҳазратим бизларни хоҳламасдан, энди бу кун ўзларига тортаётган бўлсалар. Унинг

айби йўқ. Худо хоҳласа, борамиз. Яхшилаб сизиниб, кейин қайтиб келамиз.

Маҳин отасининг раъйига қарши турулмаглигини тушуниб, ўз-ўзига: «бу сафарга эътироз билдириб ўтиришнинг фойдаси йўқ. Бироқ мен Фаррухдан бошқа кишига тегмайман. Сўзимда маҳкам туришим, ўз сўзимга ўзим эга эканлигимни ҳаммага билдириб қўйишим керак» деб ўйлади ва кетмоқ учун ўрнидан турди.

— Жуда яхши, қай вақтда, соат нечада кетамиз?

— Эртага эрта билан кетамиз. Соат нечада экинлиги маълум эмас. Қандай бўлса ҳам бориб, у ёқ-бу ёқларингни йиғиштириб, эрта билангача тайёр бўлиб тур!

Маҳин ортиқча бир сўз демасдан, онасининг олдида чиқди. Ўз хонасига кириб ўтирди. Секингина ўз-ўзи билан сўзлашиб: «Булар мен билан Фаррухнинг учраша турган еримизни билиб қолган бўлсалар керак. Лекин қанчалик уринсам ҳам онамнинг сўзидан бир нарсани ўқиб ололмадим. Ҳаммасидан ҳам шуниси яхши бўлдики, мен бу сафарга кетишга рози бўлдим. Чунки йўлда онам билан ёлғиз сўзлашиб, балки бир ҳийла билан уни кўндираман. Агар уни ўз фикримга унатолам, менинг катта ютуғим» деб ўйлар эди. Шуларни ўйлай-ўйлай Маҳин қаламни олиб, ўтган бобда ўқиганимиз хатни ёзиб, Шукуфадан бериб юборди.

Шукуфанинг хатни Фаррухга олиб бориб, Фаррухдан эртасига эрта билан жавоб олмоқчи бўлганини ҳам биламиз. Шукуфа оғойи Ф... уссалтананинг уйига келди. Аҳволни Маҳинга айтди. Шу кунни оғойи Ф... уссалтананинг уйида ҳеч қандай воқеа юз бермади.

Маҳин эртаси сафар учун керак-яроқларни тайёрлаш билан машғул бўлса ҳам, аммо бечора қизнинг юраги нотинч эди. Доим, «Фаррух» калимасини такрор-такрор ўйлар, гўё, шундай қаттиқ ота-онаси бор бўлгани ҳолда ўз севгилисига етишмоқдай мушкул бир масалани ҳал қилмоқчи бўлар эди.

Ниҳоят, кеч кирди. Маҳин тонг отгунча вақтини турли хаёл билан ўтказди. Маҳин эрта билан кеч уйғонди. Бироқ кўзларини очиб, Шукуфанинг қўлида кичик бир хат ушлаб, боши устида турганлигини кўрди. Фаррухдан жавоб келтирганлигини билди. Дарров ўрнидан туриб, Шукуфанинг қўлидан хатни олиб ўқиди. Маҳин хатни ўқиб жуда завқланиб кетгани учун, яна бир қайта ўқиб чиқди. Рўбарўсида турган Шукуфа, хатда нима

ёзилганлигини билмаганлиги учун, Маҳиннинг уни қайта-қайта ўқиганлигини кўриб, ҳайрон бўлар, аммо, савол беришга ботина олмас эди. Маҳин, сўнгги дафъа ўқигандан кейин: «Бунақа ота-она билан, албатта, худди мана шундай муомала қилиш керак», деб қўйди. Шукуфа Маҳиннинг юзига қаради, унинг жуда ҳам ҳаёлга ботиб кетганини кўргач, секингина уйдан чиқиб кетди.

Маҳин, қамоққа солинган девоналардай, тинмасдан унинг у бошидан бу бошига кезмоқда эди. Бир соатдан кейин, қатъий бир фикрга келгандай, Шукуфани чақирди-да:

— Фаррухни кўрсанг: «Маҳин сен истагандай ҳаракат қилар эмиш, дегин», деди.

XVI боб

ҚАЙГУЛИ СЕВИНЧНИНГ ХАБАРЧИСИ

Соат ўн.

189-номерли извош Аббосий хиёбонидаги оқ рангли янги бир иморатнинг қаршисига келиб тўхтади. Извошдан оқ жужунча пиджакли, қора галстук таққан бир йигит тушиб, иморатнинг эшиги олдида турган узун қора кийим кийган, чувак юзли дарвозабонга яқинлашди-да:

— Оғо, оғойи Р... уддавланинг¹ уйлари шуми?— деб сўради.

Дарвозабон ҳам дарров боши билан таъзим қилиб, жавоб берди:

— Ҳа, оғо, шу.

Шу вақт йигит чўптагидан визит карточкасини олиб, дарвозабонга берди.

— Агар уйда бўлсалар, мана шу карточкани бериб, шу одам сизни бир зарур иш билан кўрмоқчи экан, денг,— деди.

Дарвозабон визит карточкасини олиб, уйга кириб кетди. Орадан беш дақиқа ўтар-ўтмас қайтиб чиқди.

— Қани, марҳамат қилинг, кутиб турибдилар,— деди-да, ўзи олдинга тушиб, йўл бошлади. Паст ва оқ деворли бир йўлакдан, зинапоядан чиқиб, иккита кичкина

¹ ... уддавла — Эрон шоҳлиги даврида давлат арбобларига бериладиган қуйи унвонлардан бири. (Ред.)

уйдан ўтгандан кейин, европача жиҳозланган анча каттагина бир уйга кирдилар.

Бу уйнинг жиҳози европача бўлишидан ташқари, дид билан харид қилинган, ғоятда қимматбаҳо эди.

Креслолар, Техроннинг энг сўнгги модасида, яъни чор бурч ва устига гиламчалар сирилган, деворида ҳам қимматбаҳо гиламлар осилган, яхши чинни тувакка эса, япон лимони экилиб қўйилганди.

Йигит уйга кириши билан, тўрда, креслода қари бир одам ўтирганини кўрди. Лекин, чол йигитнинг киришига унчалик эътибор бермади, ўрнидан ҳам турмади.

Йигит уни бу аҳволда кўриб, ўз-ўзига: «Нима учун бу киши менга эътибор бермади экан, нима учун эронликлар орасида одат бўлган саломлашни унутди экан?» деб ўйлади. Бироқ сабаби дарров англашилди. Бечора чол бўгин сили касалига мубтало экан.

Йигит одоб ва мулойимлик билан таъзим қилди. Чол саломга алик олгач, бир креслога ишора қилиб, ўтиришни сўради.

— Марҳамат қилинг, ўтиринг,— деди у.

Йигит ўтирди. Кўп ўтмасдан хизматкор Эронда ясалган кумуш патнусда икки кумуш стакан чой келтирди. Чой ичилгандан кейин, чол деди:

— Бадбахтликни қарангки, жанобиңгизнинг суратларига қанчалик диққат билан қарасам ҳам, ҳеч нима хотиримга келмаётибди. Тагини сўрасангиз, бизда эски одамлар ўзларини ҳозирги одамлардан четроққа тўртадилар, уларга аралашмайдилар, сабаби бўлса, ўзингизга маълум. Шоҳи шаҳид Музаффаршоҳ¹, (худо у зотни раҳмат қилиб, қабрларини нур билан тўлдирсин!) замонларида етишган бир одам бу кунги турмушга ҳеч кўникиб кета олмайди. Қандай чидайки, ҳар нарса тескарисига айланиб кетган бўлса. Уша вақтларда бошқа овчининг ўқи билан урилган овни ёлғондан «аъло ҳазрат урдилар, ўқингизга қурбон бўлайлик, қиблан олам», деб тўрт юз туман инъом олган бир одам, албатта бу кунгги озгина моаш учун дарбадар кезиб хушомадгўйлик қилишни истамайди. Хусусан, мен, бўгин сили касалига мубтало бўлиб қолганлигимдан, ўрнимдан ҳам туролмайман.

¹ Машҳур Эрон миллатчиси Мирзо Ризои Кирмоний томонидан ўлдирилган Насриддиншоҳ (1848—1896)ни сарой аъёллари «Шоҳи шаҳид» деб атар эдилар. (Ред.)

«Албатта энди, шундай, ўз вақтида ҳадя ва инъом йўли билан бир талай пул ишлаб олган, бир неча йиллар учун ўз майшатини таъмин қилиб қўйган бўлса керак», деб ўйлади йигит.

Шу вақт чол, яна бошини кўтариб, кўзойнак остидан йигитни бошдан-оёқ диққат билан текшириб чиқди. Сўнгра афсуслангандай бошини чайқаб қўйди-да:

— Эсизки, сизни ҳеч қаерда кўрганим эсимга тушмаяпти,— деди ва қўлида ушлаб турган суратни яна бир мартаба кўзлари олдига келтириб:

— Бу янги одамларни ҳеч танимайман,— деб овозини барала қўйиб ўқиди:— Фаррух Дақиқ.

Ҳозирча Фаррух билан бизга ким эканлиги маълум бўлмаган, бўғин силига мубтало бўлган бу чолнинг суҳбатларини тинглашни бир чеккага қўйиб турайлик.

Фаррух Маҳиннинг хатини ўқигандан кейин, унинг бу ерга нима учун ва қандай ўй билан келганини билмайлик.

Соат тахминан етти яримларда Шукуфа, «Эртага эрта билан келаман» деб Фаррухнинг уйдан чиқиб кетди. Фаррух ўйлар ва чора ахтарар эди. Маҳиннинг орқасидан Қумга боришдан бошқа ҳеч бир нарсани кўз олдига келтирмас эди.

Бироқ, бундай сафарда унга ёрдамчи ва кўмакчи бўлиш учун зийрак бир йигит — ходим керак эди.

Фаррух Техроннинг жануб қисмида яшайдиган бечораларга, камбағалларга жуда ҳам ачинар ва ишонар эди: «Уларнинг кўнгиллари бизнинг кўнглимизга қараганда кўпроқ хароб бўлган бўлса ҳам, пок ва тозадир» дея эди. «Улар биздай сиёсат ва алдовни билмайдилар, мунофиқ эмаслар. Бир мартаба айтилган «азбаройи худо» учун ҳар нимадан, ҳатто жонларидан ҳам кечадилар. Улар, ўз умрларида кўп пул кўрмаганликлари учун пулпараст эмаслар, яъни, пул учун ҳар бир нарсани топтаб ўтмайдилар. Улар, у даражада катта ёлгонларни эшитмаганликлари учун унга одат ва қурол кўзи билан қарамайдилар. Улар ўз биллак кучларига суянадилар. Бир турли тама билан яшайдиганлар каби бошқаларнинг лаганларини ялашни ўзларига фахр деб билмайдилар», деб ўйлар эди.

Бу воқеадан бир кун илгари Фаррух Техроннинг жануб тарафида турувчи мактабдошларидан биттасининг ёнига борган эди. Биринчи бобда айтганимиз қаҳвахо-

нанинг рўбарўсида бир ёш йигитнинг турганлигини кўриб, ёқтирди. «Ҳа, менга мана шундай бир одам керак», деб ўйлади. Ун тийинга магиз олиш баҳонаси билан қаҳвахонанинг рўбарўсидаги боққолнинг дўконига кирди ва боққолга қаҳвахонанинг олдида турган бояги ёш йигитни кўрсатиб, унинг ким эканлигини суриштириб билди. Онасининг бепарволиги натижасида сўпоқ бўлиб қолган, бошига сариқ эчки тери кулоҳ кийиб олган бу боққол йигирма тўрт ёшларда эди. У Фаррухга:

— Оғо, бу йигитнинг оти Жавод,— дегандан кейин, унинг таржимаи ҳолини юқорида билганимиздай Фаррухга бошдан-оёқ сўзлаб берди. Бироқ, устаси билан жанжаллашганлигидан хабарсиз бўлгани учун бу тўғрида Фаррухга ҳеч нима айтмади.

Фаррух керак бўлган вақтда уни топа олиш учун:

— У йигит ҳар куни шу қаҳвахонага келиб туради-ми?— деб сўради.

— Балди, оғо, бу қаҳвахона шу маҳалла аҳолисининг бирдан-бир йиғиладиган жойи. Кимни истасангиз, шу ердан топа оласиз.

Фаррух бундан ортиқ ҳеч нарса сўрамади, магизнинг пулини тўлади. Мағизни бўлса, кўчада тупроқ ўйнаб юрган битта болага, уйига жўнаб кетиш шарти билан берди-да, ўзи ҳам уйига қайтиб кетди.

Фаррух ўша куни кечқурун қаҳвахонага келишини хаёлда тутса ҳам, бироқ, янги кийим-бош билан қаҳвахонага кириш шубҳали бўлгани учун, кийим-бошни айирбош қилишни, ўзи ҳам қаҳвахонага кирмасдан, бошқа бир одам воситаси билан йигитни ёнига чақиритишни маъқул кўрди.

Фақат Маҳиннинг хати ва унинг орқасидан кетиш масаласи Фаррухнинг Иффатга боглиқ бўлган режасини ўзгартди. «Қандай бўлса ҳам шўрлик қизни отасига етказишим керак», деб ўрнидан турди-да, энагасини чақирди:

— Мен баъзи зарур ишлар билан кетаётибман. Қиздай яхшироқ хабардор бўлиб туринг,— деб эшикдан чиқди. 189-номерли извошни чақириб, оғойи Р... уддавланинг адресини айтиб, кейин йўлга тушди.

Юқорида билганимиз каби энг охирги оғойи Р... уддавланинг унинг визит карточкасини ўқиб, ўзи таниманган одамни муҳтарам ўқувчиларимизга танитдик.

Бу вақт Фаррух чолга, яъни «Шоҳи шаҳид» ва «Му-

заффариддин шоҳнинг дарборида умрини ўтказган чолга юзланиб:

— Ого, шу кунга қадар ҳузурингизга келиб, сиз билан таниш бўлолмаган бўлсам ҳам, балки хотирингизга келиб қолар деб ўйлайман. Мен, оғойи Х... нинг ўғли бўламан.

Кейинги бу икки сўз Фаррухнинг оғзидан чиқиб бўлмасиданоқ оғойи Р... уддавла ўрнидан қўзғалгандай ҳаракат кўрсатиб:

— Ҳа, ҳа, энди танидим!— деди.— Боракалло, боракалло, отангизнинг сиздай шу ёшдаги ўғли бўлишини хаёлимга ҳам келтирмабман-а, бай-бай-бай, қандай чиройли йигит, қандай кўркам йигит! Боракалло, боракалло, отангиз билан кўпдан бери танишлигимиз бор. У киши билан кўп кунларни бирга кечирганмиз. Неча йил бир ерда шоҳи шаҳид ва Музаффариддин шоҳнинг дарборида бўлганмиз. Айниқса бир кун шоҳи марҳум бир оз бўлса ҳам кулиш, хурсанд бўлиш учун икковимизнинг оёқларимиздан бир палаққа остириб савалатди. Уша ҳеч эсимдан чиқмайди.

Чол бу сўзларни айтар экан, ачиниш ва таъсирнинг зўрлигидан кўзларидан икки қатра ёш чиқиб, юзидан думалаб тушди. Фаррух ўз-ўзича чолнинг соддалигидан кулган бўлса ҳам, лекин юзидаги жиддийликни сақлаб, чол билан бирликда маршрутачилар¹га ланаътлар ёғдиришда шерик бўлди. Икки гапнинг бирини:

— Рост, рост, отам ҳам кўп вақт менга бу тўғрида айтиб берар эди,— деб қўшиб қўяр эди.

Чол, йигит унинг гапларини тасдиқ қилиб ўтирганидан жуда ҳам севиниб, уни ўзига яқинроқ ўтқазиб деди:

— Ўғлим, жуда яхши, энди қани, айт, кўрай, отанг сени бу ерга нима учун юборди? Қўлимдан келадиган бир иш бўлса албатта, аямайман. Билмадимки, аҳмоқ, бедин маршрутачилар унинг бор-йўғини тортиб олдиларми, шу сабабдан қариган чоғида у бечора муҳтожликка тушиб қолдимми?

Фаррух дарҳол чолнинг сўзини бўлиб:

— Йўқ, ого, аввало шуки, мени бу ерга отам юборгани йўқ. Иккинчидан, мен сизнинг хизматингизга қарз ёки ёрдам сўраб келганим йўқ,— деди.

¹ Маршрутачилар — конституция тарафдорлари. (Ред.)

Чол таажжубланиб, «бу йигитнинг менда нима иши бор? У сиёсат ишларига аралашмайдики, Фаррухни ҳозирги вазирлардан бирортасига тавсия қилиб, хизматга олдирса, шундай бўлгандан кейин, йигит нимага келди? Уни бу ерга келтирган нарса нима?» деб ўзича ўйламоқда эди.

Бироқ, бу ўйлашлар унча ҳам узоққа чўзилмади, негаки, Фаррух озини унинг қулогига яқинлаштириб, секингина:

— Сиз билан кўришмагимнинг куёвипгизга дахли бор,— деди.

Чол худди ўрнидан турмоқчи бўлгандай бир ҳаракат қилиб:

— Ҳа, нима гап? Куёвим ўлдими? Қизим бева қолдими? Уларнинг бошига қандай фалокат тушди? Шундай бир шум хабар олиб келдингми?— деб асабий бир тусда унга қаради.

Фаррух уни бир амаллаб жим ўтиришга мажбур қилди-да, деди:

— Ҳазрати олий, қулингизнинг арзини тингламай туриб беҳудага ҳаяжонланманг. Куёвингиз ўлгани ҳам, қизингиз эрсиз қолгани ҳам йўқ. Лекин ундан кўра қизикроқ ҳодисалар юз берган.

Чол аввалгисидан зиёдроқ ҳовлиқиб сўради:

— Қандай ҳодиса юз берди? Эри талоқ қилдими? Еки ўзи касал бўлиб қолдими? Ахир, қандай ҳодиса юз берди, айтсангиз-чи?

Бечора чол қизини ҳаддан ортиқ севганидан «ҳодиса» калимасини, қўрқиб ва ташвишланиб, эшитишга юраги йўқ эди.

Фаррух бу одам қизининг шу қадар қайғули можаросини эшитишга чидаёлмаслигини тушунса ҳам, бироқ чораси йўқ, бутун воқеани батафсил айтиб беришга мажбур эди. Шўрликларни куёвларининг разиллиги ва қизларининг бегуноҳлигидан хабардор қилиши керак эди. Шунинг учун оғойи Р... уддавлага юзланиб деди:

— Агар асабийлашмасдан, тинчлик билан қулоқ солсангиз, қизингизнинг бошига тушган можароларни тўқис-тугал айтиб бераман. Бироқ сизни олдиндан ишонтириб қўяйки, айтадиган гапларимнинг ҳаммаси яширинча юз берган воқеалар бўлиб, бу ишлардан ҳеч кимнинг хабари йўқ. Сизнинг номусингизга путур етмаган.

Чол, муҳим бир ҳодиса юз берганини сезди-да, Фаррухга беваж асабийлашмасдан, диққат билан унга қулоқ беришга сўз берди.

Фаррух ҳам Иффатнинг оғзидан эшитган воқеаларнинг ҳаммасини оғойи Р... уддавлага ҳикоя қилиб берди. Лекин, Арус Мажур уйига келганда бир оз тўхтаб олиб, сўзни бошқачароқ йўлда айтмоқчи бўлди. Аммо ғазабидан пешонасини совуқ тер босган чол, Фаррухга ёлвориб, можаронинг бўлганича, тўғриси айтишни, ундан ҳеч бир нарсани яширмаслигини сўради.

Фаррух унинг юзига қараб, кўзларида юракни сув қилиб юборадиган даражада қўрқинчли ғазаб алангасини кўрди.

Охирида тортинмасдан, ўтган воқеаларнинг ҳаммасини айтиб, Иффатни ўша уйдан қандай қилиб қутқазганини, ҳозир бўлса, ярадор ҳолда уларнинг уйда ётганини ҳам қўшиб қўйди.

Бечора чолнинг, бу сўзларни эшитар экан, қандай аҳволга тушганлигини тасвир қилиш мумкин эмас. Қарилик ва бедармонлигига қарамасдан кўзлари косасидан чиқиб кетадиган даражага келгани, бутун гавдасининг титрамоққа бошлаган, тишларининг гижирлагани унинг ғазабини қай даражада даҳшатли эканлигини англатар эди.

Бечора чол Исфаҳонга кетмасидан илгари бир неча дафъа худди ўз ўғлидай санаб юрган чиройли у йигитдан, шу даражада ярамас, шу даражада беобрў ва разолатни кутганмиди? Қуни эртагаёқ унинг саноқсиз бойликка эга бўладиган бир қизининг ойлар бўйи фоҳишахонада қолиб, бошқалар бўлса, унинг ёт одамлар билан ишрат қуришидан манфаатдор бўлиб, ҳаттоки энг бир паст хотин ҳам унинг покиза ва тоза қизига: «Мен билан сен фоҳишаликнинг нонини еяётибмиз», деб айтган сўзини ҳатто миясига келтирармиди?

Қандай бўлса ҳам, бу ҳикояни эшитган чолнинг ўша дақиқада юраги ёрилмасдан тирик қолганлиги ҳайрон бўладиган даражада бир иш эди. Энди бу чол ўша беномус йигитдан интиқом олиш тилагида яшамоқ истаётганга ўхшарди.

Чол бир оздан кейин ўзига таскин бериб деди:

— Сиз ҳикоя қилган вақтингизда биз томонимиздан ёзилган ва куёвим қизимга кўрсатган бир хат тўғриси-

да гапирдингиз. Мен бўлсам, ҳеч қачон хат ёзмагандим! Онаси ҳам менсиз унга хат ёзмаган бўлса керак деб ўйлайман,— деди-да, бошқа уйга қараб: «Алиакбар!» деб чақирди. Хизматкор кирди. Чол унга:

— Бор, бекангга айт, бу ерга келсин,— деб буюрди.

Хизматкор: «Хоним бу бегона одамнинг олдига қандай келади?» деб ўйлаб, таажжуб билан қараб, уйдан чиқди. Оғойи Р... ўддавла хизматкорнинг ҳайрон бўлганлигини тушуниб, баланд овоз билан деди:

— Алиакбар, бу оғонг менинг ўғлим, бинобарин, бекангнинг ҳам ўғли бўлади, чақир, келаверсин!

Бир неча дақиқадан кейин хоним келиб эшик олдида тўхтади-да:

— Нима хизматингиз бор эди?— деб сўради.

— Бу ёққа келинг, бегона одам йўқ. Оғойи Фаррух сизнинг ҳам, менинг ҳам ўғлимиз қаторида.

Қирқ-қирқ беш ёшларда бўлган, баланд бўйли, оқ юзли хоним — бошига катта оқ рўмол ўраган хотин ичкари кириб, яқиндаги стуллардан биттасига ўтирди. Фақат, у ичкари кирар-кирмас, гўёки, оғойи Р... уддавланинг газаби совугандай, бирданига болалар каби ҳўнграб йигламоққа бошлаб деди:

— Уҳ, нималар бўлганлигини, бечора қизимизнинг қандай бебахт қилганингизни биласизми? Бу оғо унй қаерларда кўрганидан хабарингиз йўқ.

Шўрпешона она ташвишга тушиб, эрига яқинлашди-да, ҳаяжон билан:

— Нима бўпти, қандай ҳодиса юз берибди?!— деб сўради.

Эридан сўраган нарсаларига жавоб ололмаган бечора хотин охири юзини Фаррухга ўтирди:

— Оғо, худо ҳаққи, айтингиз, қизимга нима бўлди, ахир?

Фаррух бу вақт кетиш учун ўрнидан турган эди, ишорат билан «оғо сизга айтиб берадилар», деб чолнинг ёнига келди, ундан кетмоқ учун ижозат сўради ва ўз уйининг адресини бериб:

— Энди бўлар иш бўлган, бугун пешиндан кейин бизникига бориб, қизингизни кўришингиз мумкин,— деб уйдан чиқди.

Рўбарў келган бир извошга тушиб, борадиган жойини айтди-да, жўнаб кетди.

ҚУМ ЙҮЛИДА

Қош қорайған. Осмоннинг гарб тарафида Зухро юлдузи кўриниб, қоронгилик борган сари теваракни қопламоқда эди.

Бирданига кенг тош йўлда тўрт от қўшилган бир почта арава кўринди. Аравакаш бошига юнги ўсиқ телпак кийган, унинг ёнида мош-гуруч соқолли ўрта яшар хизматкор ўтирарди. Почта аравада учта хотин бор эди.

Бу катта Қум йўли бўлиб, почта арава Шўр дарёга яқинлашарди. Бир оздан кейин бус-бутун қоронги тушди. Арава кўприкдан ўтиб, қаҳвахона олдида тўхтади. Дарров аравакаш аравадан тушди-да, қаҳвахонага кирди, икки стакан иссиқ чой ичиб чиқиб аравага ўтирди-да, туркча ашула айтмоққа бошлади.

Шу пайтда Қум тарафидан бир дилижон-арава келди. Дарҳол отларини айирбошлагандан кейин, Муҳаммад Алихон қалъаси деб номланган бекатга қараб чопмоққа бошлади.

Йўлнинг бу қисми ғоятда ўнқир-чўнқир бўлиб, эгри-бугри ерлар кўп эди. Отлар бу йўл билан таниш бўлганлиги учун, аравакаш қўрқмасдан уларнинг жиловларини қўйиб юборган ва Ҳасанқулига (хизматкорнинг номи) ўз саргузаштини турк тилида ҳикоя қилар эди.

Бироқ, Ҳасанқули туркча билмас, аравакашга гапини тушулмаганлигини ва эшитишга ҳафсаласи йўқлигини тушунтирмоқчи бўлса ҳам аравакаш ўзини эшитиб, эшитмасликка солар, ёинки чиндан ҳам форсча билмаганлиги учун Ҳасанқулининг сўзига аҳамият бермасдан, яна ўша туркча бошлаган сўзини давом эттирар эди.

Ойнинг йигирманчи кечаси, теварак-атроф ғоятда қоронги. Ярим кеча бўлмасдан ойнинг чиқишига умид йўқ эди.

Ниҳоят, беш соатча йўл юрганларидан кейин, ўша зим-зиё кечанинг қоронғилигида Муҳаммад Алихон қалъасининг чироғи кўринди. Арава келиб, ўша ердаги меҳмонхона қаршисига тўхтади. Бу ерда айирбош қилиш учун от тайёр бўлмаганлигидан, икки соат чамаси кутиш лозим бўлди. Ҳасанқули эзма аравакашдан қутулганига шукур қилиб, араванинг эшигини очди ва хотинларга пастга тушиш лозим эканлигини айтди.

Маликтож хоним, қизи Маҳин ва чўтир хотин — чўри Феруза аравадан тушиб, меҳмонхонага қараб юрдилар. Чопархона ноиби, яъни почтахона мудир катта огилхонадан чиқиб, аравага яқинлашди. Аравакашдан туркчалаб Шўр дарёдан соат нечада чиққанликларини сўради ҳамда аравадан палос ва озиқ-овқатларни олиб келаётган Ҳасанқулига учраб: «Қани, қоғозингизни беринг, кўрай-чи», деди. Ҳасанқули қўлидаги нарсаларини ерга қўйиб, чўнтагидан қоғоз чиқариб узатди. Аравакаш ҳам яширин равишда чўнтагидан бир хат чиқариб, ноибга берди-да, туркчалаб бир неча сўз қўшиб қўйди.

— Жуда яхши,— деб кетди ноиб.

Хотинлар девори қизғиш рангга бўялган бир уйга кириб, кечки овқатни емоққа машгул бўлдилар. Нарсаларни пойлаб ётган Ҳасанқули ҳам қоронғида ўтириб овқат кавшар эди.

Маликтож хоним бу сафардан жуда ҳам мамнун, қандай бўлса ҳамки, тезроқ Қумга етиб, зиёрат қилишга шошарди. Маҳиннинг чеҳрасидан бўлса, юрагида катта бир ҳаяжон бўлганлиги кўринар эди. У, кўнгли ғашлигиданми ёки хафа бўлганлигиданми, нима учундир, ҳеч нима емади. Онаси билан Феруза бунинг акси ўлароқ, тамом иштаҳа билан овқатланмоқда эдилар. Ҳар нафас онаси Маҳиннинг кўнглини очиш учун:

— Бу ерда Фаррух билан шаҳзоданинг гапи йўқ-ку, нега тагин тумтайиб ўтирибсан?— дея, Маҳин бу сўзларга ҳеч қандай жавоб бермас, лекин кўнглидаги ташвиш яна кучайиб, унинг хафагарчилигини орттирмоқда эди.

Ҳалигача унинг қандай ташвишга тушганлигининг сабаби бизга маълум бўлмаса ҳам, Фаррух юборган энг сўнгги хатнинг таъсири бор эди.

Бекат назоратчиси билан от бергин деб жанжаллашиш бефойда эди. Кутишдан бўлак чора йўқ. Сайёҳларимиз ётишди. Елғиз Маҳин бедор эди.

Икки соатдан кейин аравани қўшдилар, йўлчилар ўз ўринларига ўтирдилар. Янги аравакаш теҳронлик бўлиб, туркча эмас, форсча сўзлашар эди. Ҳасанқули бундан жуда хурсанд бўлди. Кечаси соат бирда арава йўлга тушди.

Маҳиннинг тутқун ва хафа бўлишлиги онасини ўйламоққа мажбур қилмоқда эди. У ўзича: «Худо кўрсатмасин, қизимга тагин бир нима бўлиб қолмасин» деб ав-

лиёларга бир даста шам ва тўрт жума оқшоми равза¹ ўқитиш учун назр-ниёзлар атаб қўйди.

Шу пайтда Маҳин бирданига бошини кўтариб, она-сидан сўради:

— Онажон, Қумга етмасдан илгари қатъий суратда менинг ишимни бартараф қилинг. Яъни, менинг бўлажак эрим ким эканини менга ошкора айтиб қўйинг,— деди.

Онаси ҳаддан зиёда севиниб кетди:

«Худога шукур-эй, қизимга ақл кирибди. Ота-онага итоатнинг вожиб эканлигини тушуниб қопти», деб ўйлаб, қизига жавоб берди:

— Қизим, бу тўғрида мен ҳам, отанг ҳам сенга кўп гапирдиқ, шу гапларни яна такрорлаб ўтиришнинг фойдаси йўқ. Қандай бўлса ҳамки, шу шаҳзодани қабул қилиб, мен билан отангни хотиржам қилишинг керак, айланай қизим!

Маҳин ғамгинлик билан жавоб берди:

— Менинг бу саволдан мақсадим гапингизни қайтадан эшитиш эмас эди. Мен Фаррухдан бошқага тегмайман. Лекин шуни билишни истайманки, қани кўрай, менинг хушбахтлигимни кўзда тутиб, сиз ўз фикрларингиздан қайтдингизми ё йўқми?

Маликтож хоним қизининг дилига озор бермаслик учун гапни бошқа ёққа бурди:

— Жуда яхши, биз ҳозир Қум ҳақида сўзлашиб турганимиз учун бу гапларнинг ўрни эмас,— деб Ферузага қаради.

Ҳалигача индамасдан ўтирган Феруза ҳам сўзга аралашди:

— Рост, айланай, шу гал билан беш мартаба Қум зиёратига мушарраф бўлдим,— деди ва сўнгида эридан нима учун чиққанлигини, бир кун бир хотиннинг уй ахтариш баҳонаси билан келиб, уни бахтсиз қилганини, остонасининг тагига «камал» кўмиб кетганини, шунинг учун кейинги пайтларда эри буни қўйиб, ўша хотинни олганини ҳасрат ва надоматлар билан ҳикоя қила бошлади. Бу гаплар ирим-чиримларга ишонадиган Маликтож хонимнинг ишончини янада астойдил мустаҳкамлар эди. Маҳин бу сўзларни эшитар экан, ичидан кулиб, бечора

¹ «Равза» — шна имомлари Имом Ҳасан ва Имом Ҳусайнларнинг ҳалок бўлишлари ҳақидаги афсонавий қисса.

хотиннинг қанчалик жаҳолатда қолиб кетганига ачирди.

Орадан ўтган уч соат вақтнинг ҳаммаси ана шундай суҳбатлар билан кечди. Бирдан қоронғи кечада узоқдан бир ёруғлик кўринди. Аравакаш Ҳасанқулига ўша ёруғликни кўрсатиб:

— Бу кўринган Кўшки Нусрат чопархонаси,— деди.

Чорак соатдан кейин арава Кўшки Нусрат чопархонаси рўбарўсида тўхтади. Кўшки Нусрат Қум йўлидаги бошқа чопархоналарга қараганда анча чиройли эди. У хушҳаво бир тепа устида қурилган бўлиб, кунчиқар тарафида Ҳавзи Султон номли кўл кўзга ташланарди. Тонг, бутун борлиқ аста-секин ёришиб келмоқда ва бу ёруғлик кўлни мавжлантириб, унинг латофатини орттирмоқда.

Аравакаш отларни чиқаргач, отхонага олиб кетди. Ҳасанқули ҳам тушиб, араванинг эшигини очди. Хотинларни ҳам пастга тушмоқча ундади. Маликтож хоним, Маҳин ва Феруза аравадан тушдилар. Маликтож хоним Ҳасанқулига деди:

— Ноибага айтилганки, бизни бу ерда бир соатдан ортиқ тўхтатмасин, тезроқ жўнатсин.

Ҳасанқули таъзим қилиб:

— Жоним билан, бекам,— деди.

Шу пайт чопархона ноиб араванинг ёнига келиб, қоғозларини сўради. Ҳасанқули қоғозни бериб:

— Буюк хоним бизни тезлик билан жўнатиб юборишингизни сўраяптилар,— деди.

— Бош устига,— деб хонимга таъзим қилди ноиб.

Отларни отхонага боғлаб келган аравакаш, ноибга яқинлашиб: «Техрондан сизга хусусий бир хат бор», деб хатни унга узатди. Ҳасанқулидан бўлса, чой пулини олди.

Ҳақиқатан ҳам Эрон чопархоналарида расм бўлган бу чой чақа бериш одати жуда галати. Бу ёмон одатни дастлаб ким расм қилгани маълум эмас. Агар бечора йўловчилар ўзларига қарши қилинган барча қўполлик ва дағаллик учун берадиган инъомлари пулини билетнинг устига қўйиб бир йўла олинса, ҳам йўловчилар извошчиларнинг даъволаридан халос бўларди, ҳам извошчилар тиланчилик қилишдан қутулардилар.

Энг кулгили жойи шу ердаки, агар извошчи извош, карета ёки фойтонни ағдариб юбориб, йўловчини майиб

қилган ёки қовурғасини синдирган бўлса ҳам, яна безбетлик билан инъом талаб қилаверади.

Чопархона ноибни мактубни олиб, нега идора менинг номимга махсус мактуб юборибди, бирор ёмон иш қилиб қўйдимми, ёки бирор йўловчи билан қўполроқ муомалада бўлган бўлсам, устимдан Техронга шикоят ёздими, деб қаттиқ қўрқиб кетди. Ноиб дарҳол қаҳвахонага кириб, чироқнинг ёруғида хатни ўқиди. Ўқиб чиққач, ғамгин чеҳраси сал очилди. Устидан шикоят ёзилмаганига шукур қилди.

Маликтож хоним, Маҳин ҳамда Феруза меҳмонхоналарнинг бирисига бориб, у ердаги палослардан биттасига ўтирдилар. Озгина дам олгандан кейин, жўнаб кетмоқчи бўлдилар. Ҳасанқули бўлса, аравага чиқиб ётди. Икки соатдан кейин кун чиқди.

Маликтож хоним, Маҳин, Феруза қаҳвачининг келтирган чойини ича бошладилар.

Маликтож хоним Ҳасанқулини чақириб:

— Ноибга бориб айт, отларни қўшин, кетамиз,— деди.

Ҳасанқули ноибни қидириб, отхона тарафига кетар экан, унинг қаҳвахона эшигига суяниб турганини кўриб, унга деди:

— Оғойи ноиб, буюринг, отларни қўшинлар, йўлга тушамиз.

Аммо ноиб маъюслик билан бошини чайқаб жавоб берди:

— Отлар оқсаб қолибди. Юролмайди. Бир оз кутинглар, Қум тарафидан бошқа арава келади, шуларнинг отини қўшиб, сизларни йўлга соламан.

Ҳасанқули ҳайрон бўлиб деди:

— Ие, бу қандай бўлди, бундан икки соат бурун айтдингизки, отлар тайёр, қачон хоҳласангиз айтинг деб, энди айтиб ўтирибсизки отларнинг оёғи оқсаб қолди, деб.

Ноиб аччиқланди:

— Борди-ю, отлар ўлса сиз эмас, мен жавоб бераман. Давлат сизнинг истироҳатингиз учун ўз отини ўлдиришга ижозат бермайди. Бир оз кутинг. Қумдан арава келди дегунча, жўнайсизлар.

Ҳасанқули қўлидан ҳеч нима келмаслигини тушунди, қайтиб бориб, ноибнинг гапини Маликтож хонимга етказди. Шу пайтда Маҳиннинг юзига диққат билан қа-

ралса, бу хабар уни ажаблантирмагани, балки у худди шундай бўлишини кутганлиги англашилар эди.

Маликтож хоним дарров ишониб қоладиган хотинлардан эмасди. У Ҳасанқулига қараб деди:

— Бориб айтгинки, сизда ҳамиша тайёр от бўлади. Бизни қийнашнинг нима фойдаси бор, дегин. Айт, агар отни дарров қўшса, яхшигина инъом ҳам берамиз.

Ҳасанқули бориб, беш минутдан кейин қайтиб келди — Ноибни ҳеч қандай қилиб уната олмадим. У ҳеч бўлмаса, тушгача кутасизлар, деяпти,— деди.

Маҳин бўлса, ҳар нафас онасига:

— Шунча шошининг нима зарури бор, етиш бўлса бориб етармиз. Қўйинг, бир оз дам олайлик,— дер эди.

Итоат қилишдан бошқа чора йўқ. Онаси чошгоҳгача у ерда қолишга унади. Ҳеч нарса дсмай ўринга чўзилдилар. Елғиз бечора Маҳингина ётмади.

Чошгоҳ бўлди, Маликтож хоним ҳаммадан аввал уйғониб, шошганича Феруза билан Маҳинни уйғотди. Ферузани Ҳасанқули олдига юборди. Ҳасанқули келиши билан, Маликтож хоним:

— Бор, ноибга айт, тагин нима дер экан, энди бизни жўнатармикан, от берармикан?— деди.

Ҳасанқули ноибнинг олдига бориб, ўн беш дақиқадан кейин қайтди.

— Ҳалигача бирорта арава келмабди, тагин бир оз кутинглар, деяпти,— деди.

Маликтож хонимнинг жуда ҳам жиғибийрони чиққан ҳолда, баланд овоз билан:

— Бориб унга айтгинки, биз билан бундай муомала қилмасин. Менинг эрим депутатликка номзод. Яқин ўртада депутат бўлади. Балки кўп ўтмасдан вазир ҳам бўлар. Вазир бўлганда ҳам биринчи дафъада почта-телеграф вазири бўлади. Бундай қилмасин. Агар шундай қилса, бу ноибни ишдан бўшаттириб, жазо ҳам бердираман,— деди.

Содда Ҳасанқули бу пўписаларнинг, ҳаммасини ноибга етказган бўлса ҳам, лекин ноиб Маликтож хонимдан кўра Техронни яхшироқ биларди. Ноиб Техронда амалга ошмайдиган нарсаларнинг энг биринчиси шикоят эканини яхши билар эди. Шунинг учун Ҳасанқулига деди:

— Бориб, буюк ховимга айтгинки, бунчалик жиғибийрон бўлиб, шикоят қилишнинг фойдаси йўқ.

Ҳасанқули ноибнинг сўзларини хонимга етказди. Маликтож хоним: «Балки, ўзим уни кўндирарман», деб ўйлади-да:

— Бор, ноибга, хоним сизни чақираётибди дегин,— деб Ҳасанқулини юборди. Бир оздан кейин ноиб келди. Эшик олдида туриб, салом берди. Маликтож хоним алик олгандан кейин деди:

— Оғойи ноиб, биз билан нима учун бундай муомала қиласиз? Бизни кеча кечасидан то шу маҳалгача йўлдан қўйиб, от бермайсиз. Бу яхши эмас.

Ноиб эҳтиром билан жавоб берди:

— Хоним, мен айбдор эмасман. Мен сизларни мумкин қадар тезроқ жўнатиб юборишни истайман, бироқ нима қилайки, от йўқ. Қумдан арава кутиб турибман. Бир амаллаб унинг отларини сизнинг аравагизга қўшиб, жўнатиб юбораман.

Маликтож хоним Қумдан арава келиши ва келган отларга бир оз дам берилиши, ҳаммаси бўлиб тўрт соат вақт ўтишини тушунар эди, бироқ нима қилсин? Ҳали эрининг овозаси бу ерларга етмаган. Ўша пайтда бирданга Ҳасанқулининг бақириб-чақирган овози эшитилди. Шунинг билан баравар, у ўзи ҳам ҳовлиқиб-шошиб хотинлар ўтирган уйга кирди-да, ҳаяжон билан сўзлашга киришди:

— Хоним, отхонага бориб, у ерда бир эмас, тўртта отнинг тайёр эканлигини кўрдим. Иккита аравакаш ҳам ўша ерда бекор ўтирибди. Мен улардан биттасига яқинлашиб: «Шунча от бўла туриб, ноиб нимага бизга от бермайди, нега бизларни қийнайди, шу ҳам мусулмончилик бўлдимиз?» деган эдим, ўша ерда ўтирган икки киши мендан баланд келиб, «кофир бўлибсан» деб оғизларига келганини қайтармасдан сўкдилар, бу ҳам етмагандек, қўлларининг қичиғи қонгунча мени тутиб олиб урдилар. Энг охири чарчаб, мени қўйиб юбордилар. Агар шунга бировга айтсанг, яна тутиб олиб урамиз, деб қўрқитдилар,— деди.

Маликтож хонимнинг аччиқланишининг чеки йўқ эди, у чинқириб деди:

— От бермаганингиз етмагандай, эримнинг хизматкорини ҳам тутиб олиб урибсиз. Жуда яхши, Техронга соғ-саломат етиб олсам, сиз билан қандақасига гапиришишимни ўзим биламан.

Ноиб бу қўрқитишларни эшитмади. Чунки, Ҳасанқули келиши билан у астагина сиргилиб чиқиб кетган эди. Соат икки бўлди.

Тўрт соат ўтди, ҳали ҳам аравадан дарак йўқ эди. Ниҳоят, кунботар олдида Қум тарафидан бир почта араваси кўринди. Бу арава давлатга оид почталарни олиб келаётгани учун ноиб Маликтож хонимнинг қичқиршишларига аҳамият бермасдан, тўхтатмай жўнатиб юборди.

XVIII боб

АЖОИБ БИР ҲОДИСА

Борлиқни қоронгилик қоплаган эди. Осмонни қопқора булут босганлигидан бирорта ҳам юлдуз кўринмасди. Иссиқ шамол юриб, ҳавони оғирлаштириб юборган эди.

Истак, талаб, қўрқитишлар ноибга ҳеч таъсир қилмади. Бечора Маликтож хоним аччигининг зўридан уйдаги палоснинг ўртасига ўтириб, бўҳчасидан бир дуо китобини олди ва баланд овоз билан ўқимоққа бошладди. Зора ром қилсам, деб ҳар ўқигани дуодан сўнг, ноиб тарафга қараб дам солар эди.

Маҳин бунинг аксича, ноибнинг от бермаслигидан, кутиб қолишдан хафа кўринмаса ҳам, бироқ бошида минг хил хаёллар кечаётганлиги маълум эди. Ҳаво қоронгилашган сари унинг ҳам бетоқатлиги ортмоқда эди. Ҳар нафасда эшикка бориб, ҳар дақиқада меҳмонхонанинг айвонига чиқаркан, йўлдан кўтарилган чангга қарар, арава ёхуд извош овозини эшитмоқчи бўлган каби, диққат билан қулоқ солар эди.

Феруза бўлса, Маликтож хонимнинг ёнига келиб дуони оҳиста-оҳиста, калима-бакалима ўқиниши илтимос қилар эди, токи у ҳам такрор қилиб ўқиболсин.

Маликтож хоним саводсиз бўла туриб, дуо ўқий билиши ҳайрон қоладиган бир ҳодиса эмас. Чунки, Эронда кўп вақт боладарни дуо ўқинишга ўргатганлари учун диний китоблардан бошқасини ўқиёлмайдилар.

Бутун гавдасидан ҳали тарсаки ва муштнинг зарби кетмаган Ҳасанқули бўлса, ёндош уйда узала тушиб ётиб, аста-секин гўнгиллаб ашула айтмоқда эди.

Ноиб бўлса, буларга ҳеч нарво қилмасдан ўз каби-

нетига кириб, бемалол арпа, сомон, бедаларнинг ҳисоби билан машғул эди.

Бирданига Теҳрондан келаётган бир араванинг овози эшитилди.

Орадан ўн дақиқа ўтмасдан арава келиб, чопархонанинг рўбарўсида тўхтади. Араванинг эшиги очилиб, ундан бошига катта кулоҳ кийган ёш бир йигит тушди.

Шу пайт араванинг ичидан бир овознинг астагина:

— Бор, ноибга айт, дарров бу ерга келсин,— дегани эшитилди.

Йигит кетди. Бир нафасдан кейин чопархона ноиб келиб, бошини араванинг ичига суқди.

— Ого, нима ишингиз бор эди?— деб сўради ноиб.

— Кеча Теҳрондан сизга юборилган хатни олдингизми? Уша мусофирлар шу ердами?

— Балли, ого, раис ҳазратларининг қўллари билан ёзилган хат кеча менга келиб тегди. Буйруқларини бажо келтирдим. Ўн саккиз соатдан буён уларни «от йўқ» баҳонаси билан бу ерда ушлаб турибман,— деб жавоб берди ноиб.

— Жуда яхши, сизнинг бу қилган ишингиз ҳақида раисга бориб айтаман. Ҳозирча сиз мана бу хатни ҳам олиб қўйинг.

Ноиб хатни олиб кетди. Йигит ёлғиз қолиб, ўз-ўзига: «Ҳозирча иш ёмон эмас, худо мадад берса, истаган нарсамни қўлга киргизаман», деб ўйлади. Салдан кейин ноиб келиб:

— Бош устига, қандай буйруғингиз бўлса, итоат этишга тайёрман, марҳамат қилинг,— деди.

— Уларга бориб, ярим соатдан кейин кетасизлар, нарсаларингизни йиғиштириб тайёрланар эмишсиз, денг,— деди йигит.

Ноиб кетди.

Йигит яна ёлғиз қолди. Шу пайтда бояги катта кулоҳли йигит аравага яқинлашди. Ичкаридаги йигит унга секингина бир неча сўз айтди. У бўлса, жавобида:

— Хўп бўлади, бажо келтирамиз,— деди.

Ноибнинг хотинларга бориб, ўн беш дақиқадан кейин от тайёр бўлади, ярим соатдан кейин кетасизлар, деган сўзи Маликтож хонимни ҳаддан ташқари қувонтириб юборди.

У дарҳол Ферузага қараб:

— Кўрдингми, дуо унга қандай таъсир қилди, дуога шак келтирганга лаънат!— деди. Бироқ, аксинча, Маҳин жуда хафа, у на онаси, на Феруза билан сўзлашишни истар эди. Ноиб араванинг ёнига келиб, интизорликда қолган мусофирларнинг қай даражада севинганларини йигитга айтди. Шунда йигит астагина:

— Кечадан буён бу ердан нечта арава ўтди?— деб сўради.

— Фақат битта почта арава ўтди. Уни ҳам тўхтатмай жўнатиб юбордим.

Йигит бу жавобни эшитгандан кейин араванинг бурчагида ўтирган бир кишига астагина деди:

— Сен айтасанки, мен арава билан Техронга келатган эдим, Кўшки Нусратда тушган эдим, ўша ерда бошқа бир арава турган экан, билмасдан ўшанга тушиб қолибман. Агар иш чатоқлашиб кетса, ўзингни кар-соқовликка солиб, миқ этмай туравер. Қумга етгандан кейин чопархонага бориб, мана бу хатни раисга берасан. У сени беэзор Техронга қайтариб юборади.

Чорак соатдан кейин Маҳин туриб онасига:

— Мен бориб, аравада ўтираман,— деди.

Ун беш дақиқадан кейин Маликтож хоним билан Феруза ҳам аравага тушдилар. Кеча жуда қоронги эди. Икки қадам нарида бўлган нарсани кўриш мумкин эмасди. Бир эмас, тўртта от қўшилган арава, ниҳоят, Қумга томон йўл олди. Боя Техрондан келган йигитнинг араваси бўлса, Техронга қайтиб кетди.

Аравакаш отларни савалаб, Маликтож хоним тушган аравани чоптириб кетмоқда эди. Орадан тўрт соатча ўтгандан кейин Манзария чопархонасига етдилар. Маликтож хоним шунчалик шошар эдики, ҳатто шу ерга тушиб, бир озгина дам олишга ҳам рози эмас эди. Бу тўғрида Маҳин билан гапиршиб, ундан ҳам тўхтамаслик жавобини олди. Аравакашнинг чойчақасини берди. Чопархона ноиби бўлса, Кўшки Нусрат ноиби каби ўжар эмас эди. Дарров отларни айирбош қилишга буйруқ берди. Бу иш Маликтож хонимни шунчалик хурсанд қилдики, у Ҳасанқулига ноибга бир тўман инъом беришни буюрди. Бундай сажийлик Маликтож хонимдан ҳалигача кўрилмаган бир иш эди. Ярим соатдан кейин арава ҳеч қандай тўхтовсиз яна йўлга тушди.

Йўлда бўлса, ортиқ уларни тўхтатиб қоладиган чопархона йўқ эди. Аравакаш эрон туркларидан эди. Сер-

гап бўлиши билан баравар, оғзидан махоркасини ҳам қўймас, кетма-кет тутунини тутунига улаб чекар эди.

Тонг ёришиб қолди. Юлдузлар ҳам бирин-сирин сўна бошлади. Арава Манзариядан икки ярим тош узоқлашди. Узоқда Қумнинг гунбази кўринмоқда эди. Бирданига Маҳиннинг рўбарўсида гапириб ўтирган Ферузанинг кўзи Маҳиннинг оёғига тушиб, ҳайрон бўлди. Маҳиннинг оқ кавуши ўрнида қора кавуш бўлиб қолганини кўрди. Кўзини юқорироқ кўтариб, пайпоқ рангини, чодрасининг ҳошияси бошқа бўлиб қолганини кўрди. Қизинг юзига диққат билан қараб, ҳайронликда оғзи очилиб қолди. Аранг бошини араванинг бир бурчагига қўйиб ўтирган Маликтож хонимга қўли билан ишора қила олди. Маликтож хоним Ферузанинг ишорасидан ҳайронликка тушиб, унинг қўли кўрсатган тарафга қаради-да, таажжубдан юраги ёрилаёзди.

Буларнинг ҳайрон бўлишларига сабаб нима эди?

Улар гўзал ва ёқимли Маҳин ўрнида ола кўз, сапсариқ маймунга ўхшаш бир қизнинг таажжубларига парво қилмай ўтирганини кўрдилар.

Дуо билан ноибнинг кўзлари боғланганига ишонган Маликтож хоним билан Феруза Маҳиннинг осмонга учиб кетиб, унинг ўрнига бир жин ёки бир алвастининг ўтирганига ишонишлари ҳам мумкин эди. Ниҳоят, Феруза сал дадилланиб, юзини қизга ўгирди.

— Сен кимсан? Бу ерда нима қилиб ўтирибсан? Маҳин хоним қаёққа кетди?— деб сўради.

Лекин у саволларига жавоб ололмади.

Маликтож хоним ҳам ўзини сал босиб олиб, қизнинг қўлини силтаб деди:

— Нега жавоб бермайсан? Сен менинг қизим эмасан. Менинг қизимга нима бўлди, қизим қани? Бўл тез, жавоб бер!

Шу маҳал Ҳасанқули бу галати гапларни эшитиб, аравани тўхтаттирди-да, шовқин-суроннинг сабабини сўради.

Бироқ, у ҳам ёшлигидан буён кўриб келган Маҳиннинг ўрнида безрайиб ўтирган, ола кўз, сариқ қизни кўриб, турган ерида қотиб қолди. Маликтож хоним бевозта бўлиб, пайдар-пай:

— Ҳай, айтсанг-чи, сен кимсан, қизимга нима бўлди?— деб сўрар эди.

Энг охири Феруза:

— Бу қиз ҳам кар, ҳам соқовдир,— деди.

Бегона қиз ишорат билан Ферузанинг гапини тасдиқ қилди.

Феруза:

— Кўрдингизми, мен айтдим-ку ахир, кар ҳам соқов экан,— деди.

Бироқ кар бўлганида, Ферузанинг гапини эшитиб, тасдиқ қилармиди? Феруза бўлса, бунинг фаҳмига бормасди.

Аравакаш ҳам пастга тушиб, аҳволдан хабардор бўлди. Ҳайронлигидан бармогини тишлаб қолди. Чунки, ўн беш йилдан буён шу йўлда юрса ҳам, ҳеч бундай ҳодисага дуч келмаган эди.

Бирданига Маликтож хонимнинг кўзларидан маржондай қаторлашиб ёш оқмоққа бошлади.

— Қандай қиламан бу чўлу биёбонда, додимни кимга бориб айтаман? Вой айланайлар-ей, қизимга нима бўлди? Бошига қандай фалокатлар тушди экан-а, уни ўғирлаб кетишдимикан, бу ишни қайси йигит ўлгур қилган экан?— деб ўкраб-ўкраб йиғлади.

Ҳасанқули ва Феруза ҳар қанча ҳаракат қилсалар ҳам, уни тинчйтишдан ожиз эдилар, бечора она йиғидан ўзини тўхтата олмасди. Шу пайтда Ҳасанқули аравакашга айтди:

— Бизни Манзарияга қайтар. Хоҳлаганингча пул берамиз.

Аммо аравакаш:

— Отлар чарчаган, шаҳарга яқинлашиб қолдик, қайтсам, отлар касал бўлиб қолади, мен жавобгар бўламан,— деб таклифни қабул қилмади.

Маликтож хоним хотин киши эди. У кўнгли юмшоқ бўлгани учун ҳеч маҳал қизига огир сўз айтиб, хафа қилмаган эди. Чунки, у қизини ҳаммадан ортиқ севар эди. Шундай бўлгандан кейин қизидан юз ўгириб, уйига қараб кета олармиди? Бироқ, нима ҳам қилсин, аравакаш унамас эди. Ҳатто унга беш туман пул бермоқчи бўлган бўлсалар ҳам, аравакаш эронликларнинг одатига хилоф ўлароқ ўз вазифасини яхши адо қилувчилардан бўлиб чиқди, таклифни қабул қилмади.

Ола кўз, сариқ қиз бўлса, араванинг бир чеккасида чурқ этмай ўтирарди.

Маликтож хоним бир неча мартаба аччиқланиб уни бўғмоқчи бўлганида, Феруза ўртага тушиб:

— Хоним, Қумга бориб бу қизни полиция маҳкамасига топшириш керак. Тергов қилиб, ишнинг тафсилотини билсин,— дерди.

Тергов ва назмия сўзларини эшитган қиз кичкинагина бир ҳаракат қилиб, ранги ўзгарса ҳам яна ўзини тўхташиб олди. Сўнгра бир неча йиғлашлардан кейин Маликтож хоним, орқага қайтиш мумкин эмаслигини англаб, мажбуран Қумга кетишга рози бўлди. У ерга етиш билан полиция маҳкамасига хабар бериб, қизини топиш учун улардан ёрдам сўрашга жазм қилди.

Арава кетар эди, бир соатдан кейин йўл божи олинадиган энг сўнги дарвозадан ўтиб, Қум дарёси кўпригига кета турган кенг хиёбонга кирди. Бу хиёбонни ўтгандан кейин, чап тарафга, чопархона биноси бўлган катта бир майдоннинг рўбарўсида тўхтади. Бу пайтда Ферузанинг «дод-фарёд қилиш, оғойи Ф... уссалтананинг обрўсига доғ туширади» деган насиҳати бўйича, Маликтож хоним тинчланиб, Феруза билан бирга аравадан тушиб, бир бурчакда турдилар: Ҳасанқулини бўлса, қўноқ жойи қидириб топиш учун шаҳар ичига юбордилар.

Маҳиннинг ўрнида қолган сариқ қиз ҳам аравадан тушиб, Маликтож хонимнинг кўп йиғлаганлигидан бедармон, Ферузанинг бўлса, у билан овора эканлигини кўриб, уларнинг кўзини шамғалат қилиб, астагина ёнларидан ўтиб, чопархона раиси идорасига кирди.

Кун чошгоҳ бўлиб қолган. Чопархона раиси идорада эди. Қиз унга бир хат узатди. Раис хатни ўқигандан кейин:

— Жуда яхши. Ҳозир Техронга бир арава кетади. Сизни ўша арава билан жўнатиб юбораман,— деди.

Қиз бир нима деб унинг қулоғига шивирлади. Раис унга жавобан:

— Анови уйнинг орқа тарафидаги уйга бориб туринг. Хотиржам бўлинг, ҳеч ким у ерга кирмайди,— деди.

Қиз сирғилиб ўша уйга кирди. Ун беш дақиқадан кейин қиёфасини тамоман ўзгартириб, яъни бошига оқ хошияли чодра ўрнига кўк хошияли чодра, оёғига кавуш ўрнига калиш кийиб, қошига йўғон қилиб ўсма қўйиб, кўзларига сурма тортиб, уйдан чиқди ва оҳ-воҳ қилмоқда бўлган Маликтож хоним ва Ферузаларга парво қилмасдан, рўбарўларидан ўтиб, чопархона эшигидан чиқиб кетаверди. Бир соатдан кейин Ҳасанқули қайтиб келиб, яхши бир жойни ижарага олганлигини айтди.

Маликтож хоним бўлса, ҳали ҳам йиғламоқда эди. Шу маҳал бирданига уларнинг эсига сариқ қиз тушиб қолди. Югуриб бориб аравага қарадилар. У ерда йўқ эди. Топа олмадилар. Ферузанинг эсига унинг раиснинг идорасига кириб кетганини тушиб, у ерга бориб хабар олдилар. У ерда ҳам йўқ.

Бу қизнинг ҳам йўқолиши Маликтож хоним билан Ферузанинг таважжубини янада орттириб юборди.

Оз бўлмаса улар жин-парининг инсон ишларига аралашувига чиндан ҳам ишониб, бу ишнинг шулар тарафидан қилинганига лаққа тушаёздилар.

Чопархонанинг ҳар тарафини ахтарсалар ҳам, фойдаси бўлмади. Сариқ қиз йўқолган. Умидларини узиб, воқеани полицияга билдириш нияти билан йўлга тушдилар. Полиция идорасининг эшигига етар-етмас, Феруза бирданига бояги қизга ўхшаган, лекин кўк ҳошияли чодра ёпинган, оёғига қалиш кийган бир хотин чопархонга қараб келаятганини кўриб қолди. Қиёфасидан, юриш-туришидан бояги қизнинг ўзи эканлигини тахмин қилган Феруза унга яқинлашиб:

— Айланай эгачи, бу ким нима?— деб сўради.

У қиз юзидаги пардасини бир оз кўтариб, уларга диққат билан қарагандан кейин:

— Бу ким шайбон ойининг йиғирманчиси — пайшанба кими,— деб жавоб берди.

Сўзлаган вақтида тишларидан бу худди бояги қизнинг ўзини эканлигини аниқ билган Феруза дарров унинг ёқасига ёпишиб бақирди:

— Ҳа... ҳийлакор хотин, мени алдамоқчи бўлдингми? Сен Маҳири хонимнинг ўрнига аравада келган хотин эмасмисан? Қани юр, олдимга туш. Ҳасанқули, бери кел. Буни ушла, худди ўзи. Бориб уна-элик қўйиб, башарасини ўзгартиб келибди, маҳкам ушла!— деди.

Қиз бу дод-фарёдларга эътибор бермасдан:

— Ойнажон, сиз янглишаётирсиз, мен Тохронга кетаётган бир мусофирман. Кеча билет олиб қўйган эдим. Бугун йўлга тушмоқчи бўлиб турибман,— деди.

Феруза бу сўзларга ишонмагани учун унинг ёқасига лна маҳкамроқ ёпишди. Бу жанжалга теварақдан бир неча одамлар йиғилиб, уларни қуршаб олдилар. Охирида чопархона раиси ҳам идорасидан чиқиб, бу дод-фарёднинг сабабини сўради. Феруза аҳволни унга айтди.

Раис Ферузанинг гапларига баланд овоз билан кулиб деди:

— Онажон, янглишасиз, бу хотинни мен биламан. Кеча келиб, мендан билет олиб кетган эди. Бугун Теҳронга кетади. Балки, бу умрида сизни кўрмагандир ҳам.

Ферузанинг овозига йиғилган одамлар раиснинг сўзини эшитгандан кейин бирин-бирин тарқаб кетдилар. Феруза қанчалик жанжал-сурон қилса ҳам ҳеч ким унга қулоқ солмади. Чопархона раиси ҳам идорасига кириб кетди. Кўк ҳошияли чодра ёпинган хотин бўлса, вақтдан фойдаланиб, чопархонага кириб яширинди. Йиғидан кўзлари қизариб, кўпчиб кетган Маликтож хоним Ҳасанқулининг ёрдами билан секин-секин йўлга тушди. Кўприкдан ўтиб, Дорушшифога¹ борадиган кўчадаги ижарага олган уйларига кирдилар. Узини йўқотиб қўйган Маликтож хоним, ичкарига кирар-кирмас, юз ва кўкракларига уриб:

— Қизимни олиб қочдилар, дод қизгинамнинг бошига қандай фалокатлар тушди экан?— деб қичқира бошледи.

XIX БОБ

ҲАҚИҚИИ ДУСТ

Биз Фаррухни извошга тушиб, извошчига айтилган адрес бўйича кетар экан, йўлда қўйиб кетган эдик.

Ун дақиқа ўтмасдан извош Буржи Нўш хиёбонининг охирида эшиги устида аниқ қилиб, «Қум, Султонобод ва Исфаҳон йўлларининг чопархонаси» деб ёзилган катта бир карвонсаройнинг олдида тўхтади.

Фаррух извошдан тушиб, кутиб туришни буюрди. Сарой йўлагидан ўтиб, чопархона раисининг идорасига кирди.

Фаррух Маҳиннинг бизга маълум бўлган хатини ўқигандан кейин унинг ортидан Қумга боришга аҳд қилган эди.

Фаррух ичкарига кириб, стулнинг орқасига ўзи тенги бир йигитнинг диққат билан хат ўқиб турганини кўр-

¹ Қум шаҳридаги Биби Фотима мазорини руҳонийлар «Дорушшифо», яъни «Шифо уйи» деб атайдилар. (Ред.)

ди. Оёқ товушини эшитиб, йигит бошини кўтарди. Шу он ҳар икковлари бирданига таажжубланиб қолдилар.

Ҳар икковлари ҳам баланд овоз билан:

— Ҳе...— деб бир-бирларига қўл узатдилар.

Фаррух нотаниш бир одамга учрашаман деб ўйлаган ўринда ўзининг энг самимий ва яқин дўсти бўлган Аҳмадалихонни кўрди. Аҳмадалихон унинг мактабдоши эди. Уқувчига буларнинг қандай дўстликларини англамайлик. Булар ёшлигидан бир жойда катта бўлган, бир ерда ўқишган ва ҳар йил барабар имтиҳон берган, икки айрилмас ўртоқ эдилар. Маълумки, кўпинча дўстлик мактабда бошланади. Мактаб шароитида ҳамма илм олиш билан машгул бўлади, у ерда кишининг шахсий фазилати, лаёқат ва заковати эътиборга олинади, у ерда рақобат йўқ, пул ва хотин масаласи ўртага тушиб орани бузмайди, шу жойда дили пок икки вужуд тезда бир-бирлари билан яқинлашиб, ҳамфикр ва ҳаммаслак бўлиб қоладилар. Оталари ҳам буларнинг дўстлигидан таъсирланиб, ҳар икковларини ўз ўғиллари каби севар эдилар. Булар ўзларининг ҳар қандай маърифий сирлари, ҳатто турмушларида юз берган кичик воқеаларгача бир-бирларига айтишиб, дардлашар эдилар. Кўп йиллар шундай самимият ўтди. Охирида, ҳар икковлари ҳам мактабни битириб, диплом олишга муваффақ бўлдилар.

Юқорида айтганимиздек, Фаррух ўзига ишонган бир киши бўлгани учун, давлат идораларининг юқори ўрини эгаллаб турган, лекин нолойиқ кишиларга ялиниб-ёлвориб, бундан ташқари, яна икки йил текинга хизмат қилиб, ойига ўн беш туман маошга бўйин эгиб кетишни хоҳламас эди. Аҳмадалихон диплом олган вақтида отаси ўлган, оиланинг тирикчилиги унинг зиммасига тушгани учун, ноилож, почта идорасига кириб хизмат қилаётган эди. Толеи ёрдам бериб, кундан-кун юқорилашиб, уч йилдан кейин чопархона идорасига раисликка кўтарилган эди.

Фаррух билан унинг ўртоқлиги шундай эдики, бир ҳафта бир-бирларини кўрмай тура олмас эдилар. Лекин, кейинги ҳафталарда ишнинг кўплигидан у билан кўриша олмагани учун, Фаррух дўстининг бир ҳафта бурун Қум ва Ироқ йўли раислигига тайин қилинганлигини билмас эди.

Албатта, Фаррух ўзининг шундай яқин ва самимий дўстини Қум ва Ироқ йўли идорасида раис бўлганини кўриб қанчалик таажжубланса, шунчалик хурсанд ҳам бўлди.

Аҳмадалихон дарров олдидаги қоғозларини бир тарафга йиғиштириб, ўрнидан турди-да, Фаррухнинг қўлини маҳкам сиққандан кейин:

— Менинг бу ерга тайинланганимни қаёқдан билдинг? Сени қандай шамол учирди?— деди.

Фаррух деди:

— Ичкарига кирганимда сени кўриб, ҳайрон бўлиб қолганимни сезмадинг. Мен бўлсам, чопархона раиси ёнига билет олишга қелган эдим. Бахтимни қараки, бу ерда сени кўрдим.

— Сафарга кетяпсанми? Менинг ҳеч хабарим бўлмабди. Жуда яхши, қани айт, қаерга бормоқчисан? Ёки хизматга кирасану хизматинг бошқа шаҳарда, шунга кетаётибсанми?

— Йўқ, ҳали ҳеч қайси идорага кирганим йўқ. Ниҳоятти Қумга зиёратга бормоқчи бўлиб турибман,— деди Фаррух.

Фаррухни жуда яхши била турган Аҳмадалихон унинг юзига диққат билан тикилиб турди-да:

— Биладан, биладан, нима учун Қумга кетаётганингни. Қимнинг ортидан кетаётганингни ҳам биламан,— деди.

— Улар келиб, билет олдиларми?

— Ҳа, бундан бир соатча бурун хизматкорлари келиб, Қумга кетиш учун соябон арава кира қилди.

Шу пайтда Фаррух чўнтагидан эрта билан Шукуфа келтирган хатни олиб, Аҳмадалихонга узатди.

— Мана, ўқиб кўрсанг, ишимизнинг қай даражага етганини биласан.

Аҳмадалихон хатни олди, кейин қўнгироқ чалди ва кирган идора хизматчисига икки стакан чой буюрди.

Хатни бошдан-оёқ диққат билан ўқиб чиққандан сўнг Фаррухга ўгирилиб деди:

— Жуда яхши, модомики, иш шундай экан, энди фикринг қандай, нима қилмоқчи бўласан?

Фаррух кифтини қисди:

— Ҳозирча унинг орқасидан Қумга боришдан бошқа ҳеч бир хаёлим йўқ. Яна тўғриси, ортиқча бир фикр ақлимга келмаётир. Лекин, қандай бўлса-бўлсин, шун-

дай разил одамлар билан ишни бирваракай тугатиб қўя қолмоқчиман!

Аҳмадалихон жавоб бермасдан, бир оз фикрга кетгандан кейин, бирданига Фаррухга ўгирилиб деди:

— Менинг ақлимга бир нарса келди. Юрагинг дов берса, шу ишни қилсанг дейман.

Фаррух дарров унга стулини яқинлаштириб:

— Қани айт, кўрай,— деди.

— Агар майли десанг, мен бир ишни қойил қиламан. Маҳинни дарров ота-онасидан қочириб олиб кетасан. Ундан кейин улар ҳам мажбур бўлиб, уйланишингга рози бўладилар.

Фаррух худди шундай бир хабар эшитишни кутиб турар эди. Кўзларини Аҳмадалихоннинг кўзларига тикиб деди:

— Илтимос қиламан, ўйлаган режангни тезроқ айт.

— Жуда осон иш, йўлда, бир қоронғи кечада, Маҳинни бошқа бир хотин билан айирбош қиласан.

Севгилисидан бошқа тилаги бўлмаган Фаррух буни дарров маъқуллади ва бу режани қандай бажариш мумкинлигини ҳам айтиб беришни ўртогидан сўради.

Аҳмадалихон деди:

— Аввало шуки, бизнинг қурган режамиз ўринласин учун, Маҳин ҳам бу ишдан хабардор бўлиши зарур. Маҳин розилик берса, қолган иш унчалик қийин эмас. Бекатларнинг биттасида сенинг ва уларнинг араваси учрашади. Қулай бир пайт пойлаб, қоронғи кечада сен билан бирга борган хотин уларнинг аравасига, Маҳин бўлса келиб, сенинг аравангга тушади. Улар Қумга, сен тўппа-тўгри Техронга қайтасан. Лекин, бу ишни эплаштириш учун бошқа тadbирлар ҳам керак. Агар сен айтганларимни қабул қилсанг, қолганларини мен ўз зиммамга оламан.

Фаррух бу сўзлардан шу даражада севинган эдики, гўё ўзини бутун тўсиқларни босиб-янчиб ўтиб ва шу иш воситаси билан Маҳиннинг чинакам эгаси бўлгандай сезар, хаёлида уни қучоқлаб ўпар ва ўйлар эди. «Азизим Маҳин, ўзингни азоблама, қайғурма, отанг сени хафа қила олмас, онанг бўлса, озгина ўлкалар, Маҳин, бу мен, сенинг Фаррухинг, сенинг қулиниг, мен сени севаман...» Шундай ширин хаёллар бошида айламар экан, Аҳмадалихонга юзланиб деди:

— Маҳин қабул қилса ҳам, қилмаса ҳам, сен ишнинг бу томонини тўғрилаб қўявер. Менга битта билет тайёрлаб қўй. Агар Маҳин унаса, бу ишни бажарамиз. Унамаса, ўзим ҳам шундай бир Қумга бориб келамаң,— деди ва садоқатли дўсти билан хайрлашиб, чиқиб кетди. Эшикда кутиб турган извошга тушиб, жадаллик билан уйига олиб бориб қўйишни буюрди.

Бечора Фаррух шу даражада шошиб қолган эдики, уйга келган замоноқ, Маҳиннинг хатига жавоб ёзиб юборишни истар эди. Лекин, бахтга қарши, Шукуфа эртага эрта билан келишни ваъда қилганди.

Ун дақиқалардан кейин уйига етиб келди. Севинганидан, извошчига икки туман пул берди.

Ҳаммадан аввал энагаси унга рўбарў келди. Ундан Ифбатнинг ҳолини сўради. Энагаси жилмайиб жавоб берди:

— Аҳволи жуда яхши, сизни кўрмоқчи бўлиб турган эди.

Фаррух юқори қаватга кўтарилиб, эшикни тақиллатди. Ижозат олгандан кейин ичкарига кирди. Ифбатнинг ота-онаси олдига борганидан гапирга бошлади:

— Сизларникига борган эдим. Отангизни воқеадан хабардор қилдим. Сиз айтганингиз хатдан у бечораларнинг ҳеч қайсиларининг хабари йўқ экан. Бу ишларнинг ҳаммаси ўша виждонсизнинг найранги экан. Улар сиз ўйлаганингиздай, сизни фарзандликдан чиқармаганлар. Улар сизни ҳалигача, Исфаҳонда эри билан тинч яшаб юрибди, деб ўйлашар экан. Бу кун кечга томон улар келадилар. Сиздан илтимос қилар эдимки, ҳозирча бошингизга келган қайғуларни уларга айтмай туринг. Айтсангиз, ҳаётларини хавф остига қўясиз.

Ифбатнинг кўзларидан икки томчи ёш думалаб тушди:

— Билмайман, сизнинг туғишган ака-укадан ортиқ менга қилган бу яхшилигингизга ва марҳаматингизга қандай ташаккур айтсам экан.

Фаррух, меҳрибон акалар каби, унинг пешонасидан ўпиб деди:

— Сиз менинг синглимсиз, ҳалигача мен сизнинг бошингизга тушгандай оғир, киши қалбини азоблайдиган бир воқеани эшитмагандим. Бу йўлда жон берсам бераману, лекин ўша разил одамдан сизнинг ўчингизни оламай.

Шу сўзларни айтар экан, Фаррухнинг ранги ўчиб, кўзларидан ўт чақнарди.

Фаррух Ифбатга бир нафас ухлаб олишни тайинлаб, уйдан чиқди. Ўз хонасига тушиб, қуйидаги хатни ёзди.

«Азиз севгилим!

Хатинени олдим. Кеча кечасиёқ, мен отангни (агар ижозат берсанг, юраги тош ва ақлсиз деяр эдим) сендан мени, яъни тандан жонни жудо қилиш учун онангга йўл-йўриқлар берганлигини сезган эдим. Мен кеча кечаси қўлинг қўлимда бўлган вақтда, отангга қараб, унинг депутат бўлишдан бошқа дарди йўқ эканини англадим. Отанг, ҳар қандай йўл билан бўлса ҳам, сени ўз мўлжаллаган кишисига беради. Агар сен ўша кишини эрликка қабул қилмасанг, йўлда онангдан ажралиб, мен билан кетасан.

Иш бундай: сизлар Кўшкчи Нусрат бекатига етганларингизда, чопархона ноибига берилган топшириқлар бўйича сизларни «от йўқ» баҳонаси билан, мен орқангиздан етиб боргунчи тўхтатиб турадилар. Сизлар у ерда бир кеча қолмасангиз, мен етиб боргандан кейин, сизларнинг аравангиз учун от тайёр бўлади. Лекин, сен ўша ерда ўз шижоатингни кўрсатишинг керак бўлади. Сен менинг аравамга тушасан-да, мен билан бирга Теҳронга қайтасан.

Онанг воқеадан дарров хабардор бўлиб қолмасин учун, сенинг ўрнингга бошқа бир хотин араваларингизга тушади.

Маҳин! Отанг муҳаббатнинг нималигини билмайди. У сенинг васлингга етишимга рози эмас. Отанг суқ, мансабпараст одам. Баланд мартабага етмоқ учун тарбиясиз, онгсиз, ахлоқсиз, лекин бой бир куёвни мendan афзал кўради. Онанг мустақил фикр эгаси бўлмагани учун, унга умид боғлаш керак эмас. Унинг қўлидан ҳеч нарса келмайди. Маҳин, йўлаб кўр! Уйлаб, фикр юрит. Қатъий қарорга кел.

Сени севган, кўкларга кўтарган Фаррух Дақиқ».

Фаррух хатни буқлаб, конвертга солган вақтда чошгоҳ тўпи отилган эди.

Фаррух кун қиём бўлганини англаб, иштаҳаси бўлмаса ҳам овқат сўради. Қелтирилган овқатдан озгина чўқилагандан кейин, креслога ўтириб, бошини икки кафти орасига олиб, хаёлга чўмиб кетди.

У пулдан бошқа ҳеч нарсага ишончи бўлмаган кишиларга қарши уруш очмоқчи бўлса ҳам шу пайтгача доим пулнинг зўр келганлигини тушунганлиги учун ўйлар эди.

Фаррух ёш эди. Фаррух Маҳинни чинакам бир ишқ билан севар, унга етишмоқ учун жонини қурбон қилишга ҳам тайёр эди. У ўз-ўзига:

— Толеим менга ёр бўлгани учун Аҳмадалихонни менга тўғри келтирди ва у орқали менга йўл кўрсатди,— дер эди.

Бечора билмас эдики, толе кўпларга шундай пуч умидлар бериб, охири бирданига шундай ноумид қиладики, киши ҳаётнинг бундай аччиқларига чидаёлмайди, шундай турмушдан қутулиш учун ўз-ўзига, ўз хоҳиши билан ўлимни ахтариб қолади.

XX 606

УЧ ОЛИШ ИҶЛИДА

Кундуз соат икки. Икки бақувват от қўшилган қора рангли арава, унинг орқасидан хусусий бир извош Фаррухларнинг эшиги олдида тўхтади.

Араванинг эшигини ўтган бобда оғойи Р... удавланинг уйида кўрганимиз хизматкор очди. Аравадан қўлтиқтаёқ билан юрагидан бир чол тушиб, хизматкорларнинг ёрдами билан Фаррухларнинг уйига томон юра бошлади. Орқадаги извошдан бўлса, қора чодрага бурканган, узун бўйли бир хотин тушиб, хизматкорлар билан бирга келиб, эшикни қоқди. Эшик очилди, ичкарига кирдилар.

Фаррух уларни кўрар-кўрмас, таъзим қилиб, чолнинг қўлтиғига кирди, ҳаммалари секин-секин юқорига чиқмоққа бошладилар.

Бечора Иффат бўлса, кута бериб тинка-мадори қуриган эди. Ота-онасини кўрган замон: «Мени ўз бепарволигингиз билан нима учун шундай бир разил одамга бердингиз?» деб аччигини тўкмоқчи, сўнгра улар билан бирга ўз уйига қайтиб, бир оз бўлса ҳам, осойишталик билан умр ўтказмоқ учун шошар эди.

Бахтсиз бу қиз шундай жирканч ерлардан бир умрга қутулиб кетганига ҳеч ишонмас эди. Эшик очилиши билан Иффат онасининг елкасига таянган отасини кўр-

ди, ўрнидан туриб, уларнинг қучоғига отилмоқчи бўлса ҳам, лекин уддасидан чиқа олмади, беҳуш бўлиб йиқилди. Бир неча дақиқадан кейин ўзига келганда ота-онасининг каравот атрофида ўтирган ва йиғлаган ҳолда кўриб, у ҳам чидаёлмай, секин-секин йиғлай бошлади. Бу аҳвол бир неча дақиқа давом этди.

Эшик очилди, Фаррух оҳиста ичкарига кириб, деди:

— Йиғлаяпсизларми? Йўқ, ортиқ йиғининг жойи эмас. Энди ўч олиш фикрига тушиб, шундай муттаҳамларга виждонсизликнинг оқибати нимага олиб боришини билдириб қўйиш керак.

Иффат унинг сўзига қўшилиб:

— Ҳа, бўлар иш бўлди энди. Энди бир йўлини топиб, ўша баттолни қаттиқ жазолаш лозим,— деди.

Лекин, Музаффариддин шоҳ дарборида лаганбардорликка ўрганиб қолган шундай бир ҳунарсиз, кишига эгилиб-букила беришни зарур вазифалардан санаб, унинг раъйига қарши чиқишни худога қарши чиқиш билан баравар деб ўйлаган бир ота ва ўз тарбиясини отинбувида тамом қилиб, жин, алвастидан бошқа нарсага эътиқод қилмаган бир она ўчининг нима эканлигини тушуниб, йўл қидира олармиди?

Йўқ, чунки улар шунчалик сизсиз бўлганликларидангина бу бечора қизни бахти қаро қилиб, шундай аҳволларга солганликлари кўз олдидадир. Отаси бир оёғи ерда, бир оёғи гўрда бўлгани учун, тарки дунё қилиб, «ҳаммасига шукур» дейдиган дарвешнамо бир одам. Онаси бўлса, дажжолнинг эшағига, «Мулла Иброҳим яҳудий домланинг амалига», шайтонларга, опала-алвастиларга ишонадиган бир хотин.

Буларнинг ўчлари биттагина бўлиши мумкин — қирқ кеча чиллаёсин ўқитиш, ёки яҳудий домла берган тутатқини тутатиб, куёв бўлган йигитга ўлим тилаш. Ё бўлмаса, Фуломҳасан сеҳргарнинг кўз боғлаш дуосига умид тутиб, турлича дуолар билан юпанмоқ. Фаррух бўлса, бундай чирик ва бўлмағур нарсаларга ишонадиган одамлардан эмас. У бундай муттаҳамларни йўқотмоқ учун, ўз йигитлигига суянган кишилардан битаси. Иффатнинг ота-онасидан бир иш чиқмаслигини билган Фаррух, Иффатга юзланиб деди:

— Хоним, сиз ҳеч қайғурманг. Агар ундан ўч олинадиган бўлса, у ўч менинг қўлим билан олинадди. Саргузаштингизни менга сўзлар экансиз, юрагимга қўрдай

тўкилган газаб олови аллақачон алангаланиб кетган. Бу олов у разил муттаҳамни йўқотмагунимча сўнмайди.

Фаррухнинг бу қатъий қарорига шак келтирмаган - Иффат:

— Фаррух! Сиз менинг акамсиз!— деди.

Фаррух бу сўзни эшитар экан, юраги қаттиқ уришга бошлади. У диққат билан Иффатга қараб, бечора қизнинг юзлари қизарганини кўрди. Фаррух Иффатда бўлган бу ўзгаришни кўриб кўрмасликка сөлмоқчи бўлдида, оғойи Р... уддавлага ўгирилди.

Иффат юрагида Фаррухга нисбатан бошқача бир туйғу сезмоқда эди. Бироқ, нима қилиш мумкин? Фаррух унга акагина бўла оларди, холос.

Ун беш диқақадан кейин, оғойи Р... уддавла хотинига қараб:

— Хоним, кетсак бўлар эди,— деди ва ўрнидан турди. Фаррух, Чаламайдон қаҳвахонасига бориши зарур бўлгани учун, уларнинг қўзғалишларига тўсиқ бўлмади.

— Ҳозир бир-икки кунлик сафарга кетаётиман. Албатта, қайтганимдан кейин Али Амирафхон тўғрисида суриштириб, унинг жазосини бераман,— деди Фаррух.

Фаррух оғойи Р... уддавгани отасининг ёнига олиб борди. Икки эски дўст анча маҳалгача истибдод замонларида ўтказган кунларидан ва подшодан эшитганлари сўкишлардан сўзлашиб, бир неча карра маршрута ва маршрутачиларни сўкиб олгандан кейин ўринларидан туриб, ажралишдилар. Ниҳоят, оғойи Р... уддавла, хоним ва Ифрат билан бирликда зинапоялардан тушиб, Фаррухдан тез-тез уйларига бориб туришга ваъда олгандан кейин эшикка чиқдилар.

Фаррух ярим соатча ўйлаганидан кейин ўзи учун битта йўлдош, бир ёрдамчи топиш зарурлигини сезди ва Чаламайдон қаҳвахонасига боришга қарор берди. Эгнига эски кийим-бош кийиб, эшикдан чиқди.

Юқорида билганимиздай, келиб Жавадни қаҳвахонада кўрди ва уни бир бола воситаси билан ёнига чақириб, ишни бошдан-оёқ тушунтирди ва унга тўртта уч туманлик пул бериш билан, яъни уч-тўрт кунлик уй харажатидан тинчитиб қўйиш билан унинг юрагини қўлга киргизди ва бир талай ваъдалар бериб, унинг тинчлигини таъмин этишга ишонтирди.

Шу куни Фаррух уйига қайтиб келган вақтда соат саккиз эди. Ичкари кириб, пастдаги уйда Аҳмадалихонни кўриб: «Бирор янги гап чиқиб қолди, шекилли», деб ҳайрон бўлди. Аҳмадалихон Фаррухнинг ҳайрон бўлганлигини кўриб:

— Бу масала билан жуда ҳам қизиқсиниб қолганим учун бу ишнинг қандай бажарилиши тўғрисида сенга баъзи тушунтиришлар бергани келдим,— деди.

Фаррух Маҳинга ёзган хати, эртага эрта билан бу хат унга бориб етишини Аҳмадалихонга билдирди, ҳам ундан ишларнинг қай хилда бажарилганини сўради. Аҳмадалихон айтди:

— Сен улардан йигирма тўрт соат кейин жўнай оласан. Чунки мен Кўшки Нусрат чопархонаси ноибига хат ёзиб, сизнинг аравангиз боргунча, уларни тўхтатиб туришни буюраман ва хатни бўлса, Теҳрондан кетадиган аравакашга бераманки, у Қаҳрезак аравакашига, у бўлса Ҳасанободга, шундай қилиб, қўлдан қўлга ўтиб, унга етади. Сенга ҳам бир хат бераман, шу хатни олгач, у сенинг ҳар бир истагингни бажо келтиради. Кўшки Нусратга етгандан кейин, ўзинг билан бирга олиб кетган хотинни Маҳиннинг ўрнига тушириб юборасан. Энг охири, Қум чопархонаси раисига ҳам бир хат ёзаман. У хатни сен билан бирга кетадиган хотинга бераман. Токи, хотинни дарров Теҳронга қайтариб юборсин. Мабодо полиция ва ё назмия идоралари тарафидан бирорта тўсиқлик чиқиб қолса, унга ёрдам берсин.

Аҳмадалихон шу йўл-йўриқларни ўргатиб, кетди.

Фаррух эрта билан соат бешда уйқудан туриб, Шукуфани тепасида кўрди. Хатни унга топшириб, дарҳол Маҳинга етказишни сўради.

Шукуфа хатни келтириб Маҳинга берганини ва Маҳин бўлса, бу хатни такрор-такрор ўқиб чиққандан кейин: «Фаррухга бориб айт, мен унинг истаганича ҳаракат қиламан»,— деб айтганидан хабардормиз.

Шукуфа ҳам дарҳол орқасига қайтиб, Маҳиннинг айтган гапини Фаррухга етказди. Фаррух жуда ҳам севиниб, Шукуфанинг шунча қилган хизматларига муккофот ўрнига бир олтин берди ва шу соатдаёқ Аҳмадалихонни бу гапдан хабардор қилиш, яъни Маҳиннинг унаганини ва тайёр эканини айтгач, ёзиб бера турган хатларини ёзишни илтимос қилиб, ўзи Чаламайдонга кетди.

Жавод ўз ваъдасининг устидан чиққан эди. Тайин

қилинган ерда, белгиланган вақтда, Фаррухни кутиб турар эди. Фаррух битта ҳам эронликда кўрилмаган шундай яхши сифатни Жаводда кўриб, уни мақтай турган оҳанг билан:

— Гапларимнинг ҳаммасини онангга айтмадингми?— деб сўради.

— Балли, балли, берган пулларингизни ҳам топширдим. Бир-икки кунлик сафарга кетаётганимни ҳам айтдим. Улар мени кузатиб қўймоқчи бўлган эдилар, мен унамадим.

— Жуда яхши бўлибди, юр, кетдик. Биз Қумга сафар қилишимиз мумкин. Лекин, бу сафаримиз, ҳар ҳолда, икки кундан ортиққа бормас,— деди.

Сўнгра ҳар икковлари Фаррухнинг уйига келиб едилар. Фаррух ичкари кириши билан энагасини чақириб, аммасининг қизи Ҳамидани айтиб келишини сўради.

Ҳамида ажойиб хотин эди. Ҳамида тўққиз ёшда экан вақтда, ўн саккиз ёшларда бўлган бир дурадгор йигитга эрга берилган эди. Шундан кейин йигирма тўрт ёшга киргунча еттита эрга тегиб чиқди. Албатта, саккизта эрга теккан, саккиз турли ахлоқ эгаси бўлган кишиларнинг уддасидан чиққан бир хотиннинг қўлидан нима ишлар келиши ўз-ўзидан маълум. Бир маҳал домла билан яшаган. Бир муддат бўлса, ароқхўр эр билан қадаҳ уриштирган, бир неча ой Техрон қулфбузарларидан бирига эрга чиқиб, кечани кундузга улаган. Бир неча кун бир оқ ёқа, яъни галстук таққанга хотин бўлган. Бир неча вақт бир ҳожи буванинг валдирашиши эшитган, кейин бир бойваччани алдаган. Энг ажойиб жойи шу ердаки, у кексайиб қолган шаҳзодалардан бирига бир неча ой хотин бўлиб, унинг соқолини силаб ётган.

Фаррухнинг айтганини бажариши учун, Ҳамидага ўхшаш ҳеч балодан тоймайдиган хотин керак эди.

Ярим соатдан кейин Ҳамида Фаррухнинг энагаси билан бирга кириб келди. Фаррух ёшлигида Ҳамида билан бирга ўйнардн, шунинг учун тортинмасдан унга гапнинг шўскаласини айтиб қўя қолди:

— Ҳамида, сен менга бир ишда ёрдам беришинг керак. Бунинг учун биз билан бирга Қум шаҳрига боришингга тўғри келади.

«Қум» сўзини эшитган Ҳамиданинг юзида зўр қувонч кўринди.

— Дунёда авлиёлар қабрини зиёрат қилишдан ҳам савоблироқ иш борми?— деди. Ўз ичида бўлса: «Балки у ерда бирорта эр топиб оларман», деб ўйлади.

— Балки, Қум шаҳрига етмасдан, ярим йўлдан қайтармиз. Қандай бўлса-бўлсин, ишқилиб, Қумга сафар қиламиз. Лекин сен Кўшки Нусратда бизнинг аравадан тушиб, бошқа бир аравага ўтирасан. Шунчалиги ҳам борки, у аравадагилар сени полицияга топширадилар. Аммо сен аввалда ўзингни соқов қилиб кўрсатасан, полиция жуда қийин-қистовга олса, «Техронга кетаётган эдим, қоронғи кечада билмасдан бошқа аравага тушиб қолибман», дейсан. Лекин, мен ишнинг шу даражага бормаслигига ҳаракат қиламан. Тагин сенга бир хат ҳам бераман. Қумга етишинг билан чопархона раисига берасан. Ундан бир холироқ жой сўраб оласан-да, афти-башарангни ўзгартириб, кийим-бошларингни айирбош қилиб, қош-кўзларингга ўсма-сурма қўйиб, устингга бошқа чодра, оёғингга бошқа кавуш кийиб, ташқарига чиқасан.

Ҳамида асли ҳийлакор ва алдамчи бир хотин бўлганлиги учун бунақа ишлар унга чўт эмас эди. Ҳозиргача ўз умрининг бир неча кунини назмийда қамоқда ўтказган эди. Ҳеч қўрқмасдан, ваҳимага тушмасдан, бу ишни гарданига олишга тайёр эканлигини билдирди. Фаррух бўлса, сафардан қайтиб келганидан кейин унга чиройли бир йигитни топиб, тўй харажатларини ҳам ўз зиммасига олишга сўз берди.

Икки соатдан кейин Аҳмадалихоннинг хатлари тайёр бўлиб келди.

Биринчи хатда шулар ёзилган эди:

«Ҳукумат фармони. Кўшки Нусрат чопархонаси ноибига!

Кечаги ёзилганларга қўшимча. Ушбу мактубни бергувчининг бутун буюрганларини адо этинг ва ции битиб кетгунча ёрдам қилинг.

Қум-Ироқ йўллари чопархонаси бошлиғининг ноибига Аҳмадалихон».

Иккинчи мактуб Қум чопархонасининг бошлиғига ёзилган эди:

«Азиз дўстим! Дуойи саломдан кейин, шуни илтимос қиламанки, ушбу хатни бергувчи хотинга тезроқ Техронга қайтиб кетиши учун ёрдамингизни аямасангиз. Тафсилотини ўзи айтар. Илтимосининг бажарилиши

зицмамга ғоят катта миннат юклаган бўларди. Дўстингиз Аҳмадалихон».

Фаррух кейинги хатни икки лира пул билан Ҳамидага топширди-да, тегишли йўл-йўриқлар кўрсатди.

Кеч кирди. Фаррух жуда ҳам ташвишли эди. Эртага кураш бошланиши керак. У бартараф қилиниши мушкил бўлган бирорта тўсиққа рўбарў келиб қолишидан чўчир эди.

Тонг отди.

Фаррух, Жавод ва Ҳамида Қумга жўнаб кетдилар. Уша куни кечқурун Қўшки Нусратга етдилар.

Бу ёғи ўқувчиларга ойдин.

XXI боб

ИККИ ДўСТ

Теҳроннинг шимол тарафида, Фаррухнинг уйига яқин жойда, Конт деб аталган Чорсуда кўркамгина икки қаватли бино бор. Теҳрондаги бошқа биноларнинг аксича ўлароқ, бу бинонинг деразалари кўчага қараган. Бинонинг юқори қаватида узун пешайвон бўлиб, унга қатор чиройли устунлар қўйилган. Пастки қаватда ҳам ўшандай пешайвон бор. Ёмғир ёққан вақтларда ёки кун ғоятда исиб кетган чоқларда ўткинчилар ўша ерга кириб яширинишлари мумкин. Бу бинонинг жануби-ғарбий томонига катта дарвоза қурилган. Бинога кирувчилар зинапоя орқали кўтарилиб, ўнг томонга қараб юқори чиқадилар, у ердан бир хонага кирилади, бу кийим ечадиган хона. Сўнгра юмшоқ мебеллар ва креслолар қўйилган кенг залга кирилади.

Бу бино шаҳаншоҳ клубидир. Биз бу ерни эронликларни ижтимоий турмушга ўргатадиган бир ўрин санаб, уни танқид қилиш фикрида эмасмиз. Бироқ, ҳикоямининг бир воқеаси шу ерда ўтадиган бўлгани учун, ўша жойнинг отини аташга мажбурмиз.

Маликтож хонимнинг қизи йўқолган куни кечқурун европача либос кийган, аммо қулоқларидангина эронлик эканлари сезилиб турган икки киши, бинонинг кунчиқар тарафида кичкина бир столнинг атрофида ўтириб, суҳбат қилар эдилар.

Булардан биттаси новча, қорачадан келган, сермўйлов, катта кўзли бир киши эди. Бошида низомий деб

аталган кулоқ, эгнида жужунчадан калта кийим, оёқларида оқ туфли, буйнига оқ гулли қора галстук таққан эди. Иккинчиси бўлса, пакана, оппоқ юзди, сийрак мўйловли, қисик кўзли бир киши эди. Унинг ҳам эгнидаги кийими европача бўлиб, буйнига бинафша рангли бир галстук боғлаган эди. Ҳар икковлари ҳам қирқ саккиз-эллик ёшларда эдилар. Булар сўз орасида, кўчадан ўтган баъзи чиройли хотинларни ҳам кўздан қочирмай, бир-бирларига кўрсатиб кулишар эдилар. Иккинчиси, яъни, ўша пакана киши, биринчисига қараб деди:

— Уй ичларини Қум зиёратига юбориб яхши қилиб-сиз, улар Қумни зиёрат қилганларида, сиз ҳам бу ерда баъзиларни зиёрат қиласиз-да!

Биринчиси оғойи Ф... уссалтана эди, у бу сўзни эшитиб қаҳ-қаҳ уриб кулди-да, деди:

— Қандай қилайлик, дунё деганнинг ишларини бир амаллаб ўринлатмаса бўлмайди-да. Келинингиз бўлса, аллақачон она бўлиб қолган. Ортиқ у киши билан ул-фатчиликнинг мазаси қочган. Менинг табиатимни ўзингиз яхши биласиз. Сўнги нафасимгача (хиёбондан ўтиб кетаётган бир чет эллик хонимни кўрсатиб) мана шундай нозанинлардан кўнгил узгим келмайди.

Бу сўзга ҳар икковлари ҳам хохолаб кулдилар. Сўнг-ра иккинчиси, яъни Сиёвуш Мирзонинг отаси шаҳзода Қ. сўзга бошлаб деди:

— Тўғри, тўғри! Бу беш кунлик умрни хурсандчилик билан ўтказиш керак. Мен бу сўзларни кўпинча ўғлимга ҳам айтаман. Бироқ, шу замоннинг ёшлари бундай насихатларга кулоқ солади дейсизми? Бечора ўғлим, тирикликни ўзига ҳаром деб билганми, билмайман, доим атрофига китобларни йиғиб, ўқигани-ўқиган. Энди мени, бир химия лабораторияси очиб берасан, деб қис-таб юрибди. Гоҳо, яна «эй» дейман. Шунчалик ахлоқ, шунчалик маълумот эгаси бўлган йигит менинг ўғлим эмасдир, дегим келиб қолади. Ахир менинг ақалли одат қилган бирталай ишларимдан ҳам у доим четда ўзини тутати. Жирканади-я, жирканади. Масалан, бундан бир неча кун аввал: «Ўғлим, ҳадеб ишлай беришнинг фойдаси йўқ, ахир, касал бўлиб қоласан-ку» деган эдим, барибир, йўлга сололмадим. У дарров менга қараб: «Йўқ, отажон, мен ичкилик ичишни ўзига одат қилиб олган, ярамас ерларга борадиган йигитлардан эмас-

ман. Мен ўз ватанимга сақлаган, тоза ва соф фикрлар юзасидан доим ишлашга мажбурман. Мен шу меҳнатларнинг натижасида қимматли ватандошларимни бир тангаллик дорини ўн беш тангага сотадиган дорифурушларнинг қўлидан қутқазиб оламан: Бутун жамият учун зарур бўлган дори-дармон ишляяжагимга ишонаман», деб жавоб берди.

Шу пайтда шаҳзода ёнидан папирос олиб, бир тортди-да, илова қилди:

— Шундай ахлоқли ва илмга шу қадар чанқоқ ўғил билан мендай илмсиз, қариб қуюмлаган, ичкилик ичиб, чиройли хотинларнинг суҳбатидан бир дақиқа ҳам тортинмайдиган бир отанинг, ахир, ўзингиз айтинг, қанчалик бир-бировидан фарқи бор?

Оғойи Ф... уссалтана дарров унинг сўзини кесиб деди,

— Вой, вой, вой, худо кўрсатмасин, шунақа ишлай берса саломатлигини йўқотади-я. Бундай аҳвол яна мени қайиноталикдан маҳрум қилмагай.

— Айтганингизча ҳам бор. Бечора ўғлимнинг бундан уч кеча илгари бутига каттакон бир чипқон чиқибди. Бу тўғрида мен ҳам жуда қаттиқ ташвишга тушдим. Лекин доктор келиб қарагандан кейин: «Қўрқинчли эмас, кўп ишлай берганлигидан, қони кўпайиб кетиб, бутидан тешиб чиқмоқчи», деди.

«Каттакон чипқон» сўзидан ташвишга тушиб қолган оғойи Ф... уссалтана, докторнинг «қўрқинчли эмас», деган сўзини эшитгандан кейин, бир оз ўзига келиб:

— Уни шу хилда қўя бериш керак эмас. Зўрлаб бўлса ҳам саломатлигига зиён етказмаслик учун, юришга, саёҳатга чиқариш керак,— деди.

— Мен ҳам шу хаёлдаман. Бир неча ҳафта ҳавосини ўзгартиш учун, яйловдаги ер-мулкларимдан биттасига юборсам, деб ўйлаб турибман,— деб жавоб берди шаҳзода К.

Шу пайт оғойи Ф... уссалтана столдаги вискидан бир қадаҳ тўлдириб деди:

— Сиз мени жуда ташвишга солиб қўйдингиз, менга тез-тез унинг аҳволидан хабар бериб туришингизни сўрайман.

— Яхши, уйга боргандан кейин унинг аҳволини билиб, сизга хабар бераман.

Шу вақт қадди-қомати келишган, шахло кўзли, но-

зик бурунли, лаблари қип-қизил бир европалик хотин икки улфатнинг ёнидан ўтиб, бир уйга кирмоқчи бўлди. Уни кўриши билан оғойи Ф... уссалтана улфатини тирсаги билан туртиб:

— Кеча кечаси танишган хотиним мана шу,— деди ва хотиннинг яқинлашганини кўриб, ўрнидан турди. Таъзим қилиб, қўлини ўпди.

— Хоним, агар ижозат берсангиз, сизни таништирмақчиман: бу киши ҳазрати шаҳзода К. бўладилар. Менинг энг яқин дўстим,— деди. Шаҳзода ҳам ўрнидан турди, хотиннинг узатган қўлини лабларига олиб борди ва айрича бир имо билан қўлини сиқиб қўйди.

Хотин ҳали тоза ўрганиб ололмаган форс тили билан жавоб берди:

— Бу танишликдан гоётда мамнуиман.

Хотиннинг гапиришидан рус эканлиги сезилар эди. У залнинг охиридаги бир хонага кириб кетди.

Шаҳзода К. столнинг остидан дўстининг қўлини маҳкам қисиб:

— Жуда ҳам дўндик нарса экан-да!— дейишдан ўзини тута олмади.

Оғойи Ф... уссалтана тушунтириб кетди:

— Уни кеча кечаси европалик яқинларимдан бири мен билан таништириб қўйди. Оти хоним А. Уша соатдан буён унинг шайдоси бўлиб қолдим. У қимор ўйналадиган стол ёнида ўтирган экан. Мен ҳам ўз мардлигимни кўрсатиш учун унга яқинлашиб, қимор ўйнашга киришдим. Бир минг саккиз юз туман ютқаздим ҳам. Уйин тамом бўлгандан кейин унинг менга қараб қулмсирагани, кўз қорачиғларида мен санаб берган пулларнинг таъсирини ва мени ёқтириб қолганлигини фаҳмладим. Демак, бу табассум ва майл кўрсатиши билан ҳеч пул ютқазмадим.

Шаҳзода К. ўз кўнглида ғашлик билан: «Бечора кўр, қандай аҳмоқ, ўз-ўзига ишонган бир кишики, шундай чиройли хотин бунга ёқтириб қолган эмиш», деб миёнида кулиб қўйди.

Хотин тўғрисида бундан бошқа сўз бўлмади. Бироқ, жинояткор деб атаганимиз бу икки дўст ҳали ҳам шу ерда ўтирар эдилар.

Бирданига оғойи Ф... уссалтана яна сўз бошлади:

— Жуда яхши, ҳазратимнинг илтифотлари билан

мен ўз ишимга муваффақ бўлишимга ишонсам бўлади-ми?— деб сўради.

— Албатта, албатта. Сизга боя айтдим-ку, тасарруфимда бўлган ерлардаги одамлардан тўрт минг кишининг овозини тайёрлаб қўйдим. Бошқа мулкимдаги ижарадорнинг ваъдасига кўра, сиз учун яна икки минг овоз тўшлайман. Шу билан, шубҳасиздирки, олти минг овоз билан эрон парламентининг ҳақиқий депутатларидан биттаси бўлиб сайланасиз. Бунга ким бир нима дея олади? Агар у ҳам бўлмаса, бошқа тадбирлар билан ишни ўринлатамиз. Соққа солинган қутини айирбошлаб қўямиз ёки ёндириб юборамиз, нима қилар эди? Лекин, менимча, бу ишларнинг ҳеч қайсиси керак бўлмайди. Менга қарашли раият шу даражада содда, ҳеч нима тушунмайдиган қора халқки, ҳалигача депутат сўзининг маъносига ҳам тушунмайди, нима эканлигини билмайди. Дурустроқ одамни депутат қилиш уларнинг етти ухлаб тушларига ҳам кирмайди. «Дурустроқ одамни депутат қилиш» деган калима оғойи Ф... уссалтанага оғирроқ ботганини сезган шаҳзода К. дарров сийпалай бошлади:

— Охирги калимани ўринсиз айтганим учун кечиринг, чунки, алҳамдулилло, сизнинг меҳнаткашлар тарафдори, яхши бир одам эканлигингизга имоним комил. Баъзи одамларга ўхшаб депутат бўлиш учун у ерга-бу ерга бориб юрмаслигингиз ҳам менга маълум.

Бу сўзларни эшитган оғойи Ф... уссалтана гердайиб кетди:

— Албатта, мен депутат бўлиш учун эшикма-эшик юриб, ялиниб-ёлворадиганлардан эмасман. Мен депутат креслоларидан бирини эгалламоқчи бўлганимнинг сабаби шу мамлакатимизга ишонганлигим ва шу мамлакатга хизмат қилиш фикрида бўлганим учун. Шундай қилиб, ўзимга топширилган ўша юксак ва муқаддас вазифани ерига етказмоқчи бўламан. Шу билан бирга, бирмунча қишлоқларнинг хўжайини бўлганим сабабли фуқаронинг аҳволидан ҳам яхши хабардорман. Уларга қандай қонунлар кераклигини яхши биламан. Масалан, менинг фикримча, фуқаро катта ер эгасининг олдига келиб, бирор сўз айтмаслиги керак. Чунки, тарбия кўрмаган одамлар, баъзида кўриб қоламан, тамоман одобдан ва ахлоқдан ташқари гапларни айтиб, кишининг аччиғини чиқарадилар. Ҳар бир отни ҳам минмасдан, ишлат-

масдан, бирмунча вақт отхонага боғлаб боқсангиз, семириб кетиб, эгасига шикаст етказиши маълум. Буни жанобингиз ҳам тасдиқларсиз деб ўйлайман. Райят ҳам шундай. Деҳқонлар фақат ўз ишлари билан машғул бўлишлари, бошқа ишга аралашмасликлари керак. Мен ўйлайманки, деҳқонларга чор Россиясидай бугдой ўрнига курмак берса, янада яхшироқ ва фойдалироқ бўларди. Умуман, уларни ҳеч қачон тўйдириш керак эмас. Чунки, оч одам доим қорнининг қайгусида бўлиб, ўз ишига қаттиқроқ ёпишади. Кейинги вақтларда бошланган партия тузиш ва шунга ўхшаш ишлар билан шуғулланмайдилар. Шундай бўлгандан кейин, бугдойнинг ҳосили кўпайиб, сиз билан менга ўхшаганларнинг давлати ортади. Бу бўлса, мамлакатнинг тараққиётига сабаб бўлади ва мамлакатнинг фаровонлиги ортади.

Шаҳзода К. оғойи Ф... уссалтананинг гапларини боши билан тасдиқлар эди ва давом қилишга ундар эди.

— Бундан бир неча кун илгари бир йиғинда бўлгандим. У ерда бир неча янги таҳсил кўрган йигитлар бор экан. Улар бир ерга йиғилиб, шундай сўзларни гапиршидиларки, у ерда атиги мен, яъни менинг улар даражасида маълумотим бўлмаганлигидан баҳслашишга аралашмасдан бақрайиб ўтирар эдим. Улардан биттаси айтдики, Англияда Дарвин деган бир олим янги ва асосли назарияларни майдонга чиқарибди.

Шаҳзода К. гўё, бу назарияларни тушунадиган, қизиқадиган бир одам каби шошиб сўради:

— У қайси назария экан? Қани айтинг, эшитайлик.

— Унинг назарияси шундай эканки, агар битта бечоранинг очликдан девор остида жой бераётганини кўрсангиз, ҳеч қачон унга раҳм қилманг. Чунки, унинг ортиқ яшашга қобилияти йўқ. Демак, ҳар ким қандай даражага етишса ва қандайин фалокатларга дучор бўлса, буларнинг ҳаммаси кишининг қобилиятидан экан, яъни қобилият деган нарса бировни бирданига кўтарар экан, иккинчисини ҳалокатга олиб бораркан. Бу назария чиндан ҳам менинг фикрларимга тўғри келади. Бу назария менга жуда маъқул тушди. Чунки, ўзингиз ўйлаб кўринг, Саъдий алайҳи раҳма айтганларки: «Оқибат гургзода гург шавад», яъни «бўрининг боласи охири бориб бўри бўлади». Кишиларга ачиниш, шафқат қилиш керак эмас. Чунки, кўпинча одам ҳалокатига ўзи сабаб бўлади. Ҳозирча булар бир тарафда турсин, шунини эсдан

чиқармаслик керакки, афт-ангор, ташқи қиёфанинг ҳам аҳамияти катта. Билмадим, тушунасизми, йўқми, насл-насабининг тайини йўқ бир одам бирор идорага раис бўлиб қолгудай бўлса, ҳеч ким унинг сўзига қулоқ осмайди, уни назарписанд ҳам қилмайди. Чунки, Мирзо Хусайн Мирзо Алиакбар ўғли то охиратгача Мирзо Хусайн Мирзо Алиакбар ўғли бўлиб қолаверади, қанча ўқиса ҳам ишга ярамайди, сизнинг ва сиздайларнинг ўғиллари хусусига келганда, иш тамоман бошқача. Нима учун дейсизми? Шунинг учунки, асл аслигига, паст пастлигига тортади. У, илмсиз бўлса ҳам, кресло эгалласа, унинг дағдағасининг ўзиёқ қўл остидагиларни идора қилишга етади. Чунки, таги кўрган одам. Олий насаб одамнинг ўғли бўлгани учун, ҳукмронлик либоси ҳам унга яраша қолади.

Оғойи Ф... уссалтананинг дўстига айтган сўзлари шулардан иборат эди. Шу билан эрон халқининг бир ҳовуч саводсиз пулдорларидан ташқари бўлган ҳаммасининг ҳуқуқини поймол қилиш билан баравар аслзода эмасликларни сабабли қобилиятлари ҳам йўқлигини исбот қилмоқчи бўлар эди. Ҳатто фуқарони ўз ҳолига қўйсангиз, тўқликка шўхлик қилиб, боёнларга азият беришларини ҳам исботлашга уринарди.

Соат тўрт бўлди. Бир хизматкор кичкина патнисчада телеграмма келтириб, оғойи Ф... уссалтанага узатди.

— Телеграмма,— деди оғойи Ф... уссалтана, телеграммани олар экан.— Хоним Қумга етиб борганини хабар қилган бўлса керак.

Телеграмманинг тарихига кўзи тушиши билан ҳайрон бўлиб қолди. Чунки, телграмма берилган вақт билан олиб келинган вақт ўртасида тўрт соатдан ортиқ фурсат ўтмаган эди.

Эронда бу ҳол чиндан ҳам ҳайрон бўладиган нарса. Чунки, кўпинча телеграмма тўрт-беш кунсиз олинмас эди.

Бир воқеа сира эсимдан чиқмайди. 1329 йил ёзда Занжонга жўнаш олдимида, жума кунни кечқурун телеграмма бердим. Шанба кунни эрталаб йўлга чиқдим. Занжонга пайшанба кунни тонгда етиб бордим. Тушки овқатдан кейин, ечиниб, дам олаётганимда йўлга чиққанлигим тўғрисидаги телеграммани келтириб бердилар.

Оғойи Ф... уссалтана, телеграфчига инъом йўсинида берилсин деб, хизматкорга бир қирон берди, бу инъом

деган нарса ҳам бечора эронликларнинг бошига битган бир бало эди. Дунёда инъом бериш йўқ эмас, бор, тўғри, лекин зўр билан, ҳатто уришиб, ёқалашиб инъом олиш бу эронликларга хосдир.

Сўнгра, парвосиз бир ҳолатда, телеграммани очиб, кўздан кечира бошлаганида, ранги бирданига оқариб кетди, қўллари қалтираб, телеграмма ерга тушди: «Уҳ, қизимни ўғирлаб кетибдилар», деди-ю, беҳол тортиб кетди.

Шаҳзода, нима гаплигини билмай, ҳайрон эди. Ердан қоғозни олиб ўқий бошлади:

«Техрон... хиёбон, оғойи Ф... уссалтана ҳазратларига.

Фалокат юз берди. Қўшки Нусратда Маҳин ғойиб бўлди. Унинг ўрнида бошқа бир хотин қолган экан. Қум чопархонасида у ҳам ғойиб бўлди. Полициянинг қўлидан ҳеч иш келмаяпти. Хоним касал, доктор йўқ. Сизнинг ёрдамингизга муҳтожмиз.

Феруза».

Шаҳзода ҳанг-манг бўлиб қолди. Маҳиннинг йўқолиши унинг ҳам режаларини барбод этар, ўғли Сиёвушнинг уйланишини кечиктирар ва бунинг натижасида оғойи Ф... уссалтанадан кўзланган давлатлар кўкка со-вурилар эди.

Оғойи Ф... уссалтананинг ҳам юраги ёрилар даражага етган эди. У севикли қизи Маҳинни йўқотиш билан депутат бўлиш орзусидан маҳрум бўлишидан қўрқар эди.

Беш дақиқа чамаси сукут қилдилар.

Оғойи Ф... уссалтананинг пешонасидан секин-секин тер чиқа бошлади. У Маҳинни қандай ахтариб топиш ҳақида бош қотирар ва «ким олиб қочди экан?» деб ўйларди. Бирданига уйқудан уйғонгандай, сесканди-да: «**Фаррух!**» деб юборди.

XXII 606

КОЧҚИН ҚИЗ

Биз Маҳинни Қўшки Нусратда: «Мен бориб аравада ўтираман, сизлар орқамдан борасизлар», деб аравага томон кетган жойида қолдирган эдик.

Кеча бўлгани учун ҳамма ёқ қоронғи эди. Икки қадамдаги нарсани илғаш мумкин эмас. Меҳмон меҳ-

монхонанинг айвонига чиқиб турди. Араваларни бир-биревидан айира олмаганлиги учун қайсисига тушишни билмас эди.

Бечора қизнинг юраги япроқдай қалтирар, чунки, у, бу иши билан отасининг раъйига қарши борар ва шу ҳаракати билан отасини кўрқитишни истар эди. Бироқ, шу билан бирга, онасининг ҳам раъйига қарши борар эди. У онасини ҳаддан зиёда яхши кўрарди.

«Бечора онам йиғлайди, қийналади. Онам ҳам менинг айтганларимга кирмаса, мен нима қилай?» дер эди.

Шу фикрларда экан, бирданига, ўттиз қадам нарида, кичкина бир электр ёруғини кўрди. Бу ёруғ йўл устида турган араваларни кўришга ёрдам берди. Аравалар бирин-кетини турар эди. Биринчи араванинг ёнида Ҳасанқули билан аравакаш отларни аравага қўшар эди.

Иккинчи араванинг ичкарасида бўлса, Фаррух Маҳиннинг бутун ҳаракатларини кузатиб турарди.

Маҳин энди тўхтамасдан ёруғ келган аравага қараб кетди. Араванинг эшиги очилди. Икки бақувват қўл уни ердан кўтариб олиб, аравага чиқариб қўйди ва Фаррухнинг секингина:

— Жоним Маҳин, мен сендан шунчалик жасоратни кутмаган эдим. Уҳ, энди ҳамма иш жойида. Мен қандай бахтли йигитман!— дегани эшитилди.

Маҳин секингина изтиробли товуш билан деди:

— Фаррух, ҳозир ҳеч нима дема, тезроқ шу ердан узоқлашиб кетишнинг корини қил!

— Улар жўнамасдан, бизнинг кетишимиз яхши эмас, шубҳаланиб қолмасинлар учун улардан кейин йўлга тушамиз.

Маҳин ортиқ ҳеч нима демади, бироқ юраги тинчмай, жуда қаттиқ урмоқда эди. Улар қоп-қоронғи кечада, юраклари гурс-гурс урган ҳолда, биринчи араванинг жўнашини кутар эдилар.

Беш дақиқадан кейин Маликтож хоним ва Феруза келиб, аравага тушдилар. Тез орада арава Қумга жўнаб кетди. Худди шу пайтда, Фаррухнинг ёрдамчиси Жавод ҳам аравакашнинг ёнига чиққач, буларнинг араваси ҳам тезлик билан Техронга жўнади. Арава Қўшки Нусратдан юз қадам ҳам узоқлашмаган эдики, Фаррух Маҳиннинг йиғлаётганлигини сизди ва унинг қўлларини ушлаб сўради:

— Маҳин, Маҳин, нимага йиғлаяпсан? Агар менинг

юрагимни ээишни истамасанг, йиғлама. Биз тездан соф-саломат, хавф-хатарсиз жойда эканингни онангга маълум қиламиз. Яхшилик билан ота-онангдан тўйимиз учун ижозат оламиз.

Фаррухнинг бу сўзларидан кейин Маҳин йиғидан тўхтамаसा ҳам унинг юрагига анча далда бўлган эди. Маҳин йиғи аралаш деди:

— Бечора онам, бечора онам бахтсиз экан. У онгсиз. Унинг бу ишда ҳеч қандай гуноҳи, айби йўқ. Аравасида менинг йўқлигимни билиб қолиш билан юраги ёрилиб ўлади. Мен бир умр онамнинг юзини кўра олмайман. Фаррух... қайтайик... Фаррух! Қумга қайтайик. Онамнинг орқасидан етиб, иккаламиз ҳам унга йиғлаб-ёлворайлик. Уни бир-бировимиз билан қовушишимизга рози қилайлик. Тўйимиз ўша ерда бўла қолсин.

Фаррух Маҳиннинг онасини яхши билар эди. У ўз аммасининг ахлоқини тушунар, у фақат Маҳиннигина севар эди. Фаррух, қандай бўлса ҳам, Маҳиннинг кўнглини олиб, уни кўндиришни истар эди. У Маҳиннинг йиғисига бардош бера олмасди. Қайғудан юрагини парчаламоқ истар эди. Фаррух бирданига араванинг олд төмонидаги деворга қаттиқ бир мушт урди. Жавод билан аравакаш бу ишдан ҳайрон қолдилар ва сўнгра Фаррухнинг, «Тўхтаг!» деган овозини эшитиб, дарров аравани тўхтатдилар. Фаррух юзини Маҳинга ўгириб деди:

— Маҳин, йиғлама, агар йиғлай берсанг, шу ердаёқ ўзимни ўлдираман. Ҳозир орқага қайтамиз. Шу ондаёқ қайтиб, сени онангга, сенинг саодатингни ҳеч қачон кўзига илмаган онангнинг ёнига олиб бориб, ўзим бўлса, шу чўлларда йиғлаб бўлса ҳам сўққабош бўлиб юраман.

Маҳин ортиқ йиғламас эди. Бу сўзлар уни шу қадар ҳаяжонга келтирган эдики, аравани орқасига қайтариш учун пастга тушмоқчи бўлган Фаррухни ҳам ушлаб қола олмади. Фаррух аравадан тушиб, аравакашга:

— Орқага қайт!— деб буйруқ берди. Жавод ҳайрон эди. Аравакаш бўлса, ноибдан Фаррухнинг раис билан яқин дўст эканлигини эшитганлиги учун, ҳеч нима демасдан, отларни орқага қараб бура бошлади. Шу пайтда араванинг эшиги очилди ва Маҳиннинг:

— Фаррух, нима қиляпсан? Қайтарма, Фаррух! Сенга айтаман, қайтарма! Мана, кўриб турибсан-ку, йиғла-

ётганим йўқ, қаерни истасанг, ўша ерга борамиз,— дегани эшитилди.

Фаррух ишқининг зўрлигидан ўзини йўқотиб қўйган, нима қилаётганини ўзи ҳам билмас эди. Эшитган сўзларига ва севгилисининг ялиниб-ёлворишларига ҳеч эътибор бермасдан аравани қайтарар экан, аравакашга:

— Қайт, Қўшки Нусратга қараб ҳайда!— деб буюрди.

Маҳин, бу сўзларни эшитар экан, баланд овоз билан:

— Фаррух, нима қиляпсан! Менинг сўзимга қулоқ солишни истамайсанми? Демак, мени ортиқ севмайсанми?— деди.

Бечора Фаррух мутлақо ўзини унутиб қўйган эди. Сўнгра секин ўзини босиб олиб, аравакашга қайта бошдан Тезронга қараб ҳайдашни буюрди-да аравага чиқиб Маҳиннинг ёнига ўтирди. Энди бечора Маҳин на йиғлар, на бир сўз гапирар эди. Фаррух ҳам ҳеч нима сўзламасдан, ишнинг келажагини ўйлар эди. Бир оздан кейин Маҳин жимликни бузиб, деди;

— Онамга хабар юборишга ваъда бердинг-а, қачон, қандай йўл билан хабар юборасан, Фаррух?

Фаррух, Маҳиннинг бир оз тинчланганини кўриб, унинг қўлини олиб ўпгандан кейин:

— Маҳин, шунчалик ташвиш нимага керак? Азиз севгилим, дастлабки бекатда тушамиз. Ўзинг ўз қўлинг билан онангга хат ёзасан. Қачон бизнинг тўйимизга унасалар, кўра олишларини биддирасан. Мен бўлсам, хатингни чопархона ноибига топшириб, иложи борича тезлик билан Қумга — онангга етказиб беришларини илтимос қиламан,— деди.

Маҳин анча тинчланди. Унинг қўли Фаррух қўлида эди. У Маҳиннинг қўлини лабларига босиб, ўпар эди.

Жавод билан аравакаш ҳам ўзаро у ёқ-бу ёқдан сўзлашиб кетар эдилар. Кечаси соат иккида қалъайи Мухаммадалихон бекатига етишлари билан, Фаррух дарров аравадан тушиб, Маҳинни ҳам туширди. Икковлари меҳмонхона уйларидан биттасига кирдилар. Иттифоқо, бу уй кеча Маҳиннинг онаси билан кечки овқат еган уйлари экан. Бунни кўриб Маҳиннинг тусида бир оз ўзгариш сезилган бўлса ҳам, ўзини тутиб, овозини чиқармади. Фаррух ноибдан қалам-қоғоз сўраб, Маҳинга олиб келди. Маҳин онасига қўйидаги хатни ёзишга бошлади:

«Меҳрибон азиз онажонимга.

Бир неча марталаб ўз нуқтаи назарингиздан мен учун танлаганингиз эрни рад этиб, шунинг натижасида ёмон оқибатлар вужудга келишини сизга ва муҳтарам отамга айтган эдим. Лекин яна сиз гапимга қулоқ солмасдан, ўзингизча менга эр танлаб, зўр билан бўлса ҳам мени унга бермоқчи бўлдингиз. Агар мен тушунчасиз бир қиз бўлсам эдим, сизга итоат қилишни вожиб билиб, бир сўз айтмаган бўлардим. Бахтга қарши, сиз танлаган эрни танимайман. Унинг ахлоқи билан ошно эмасман. Энди бундан сўнги турмушимни таҳликага солиб қўйиш учун, сизга кўзи боғлиқ кўрдай бўйин эгиб кета беришни ўзимга эп кўрмадим ва бу шига рози эмаслигимни рўй-рост сизга ва отамга олдиндан айтдим. Бироқ сиз ҳеч хафа бўлмадингиз-да, бошқа йўллар қидирмоққа бошладингиз. Сиз, менинг бу ишларимдан хафа бўлмаганингиз каби, мен ҳам умидимни узмадим. Мени ҳалокат чуқурига итариб юборадиган бу буйруқларингизга бош эгмаслик учун, бошқа йўллар қидиришга мажбур бўлдим. Сиз, Фаррухни эсимдан чиқариш ва сиз танлаган эрга тегушга зўр билан унаттирмақ учун, мени, отини зиёрат қўйиб, Қумга олиб бормоқчи бўлдингиз. Мен бўлсам, Фаррухга хабар юбориб, йўлда келиб мени олиб қочишни сўрадим.

Онажон, энди бўлса биз,— мен ва Фаррух,— эркин ҳавода нафас олиб яшамоқдамиз. Бир-биримизни жуда севамиз. На у менинг истагимга қарши чиқади ва на мен унинг раъйига қарши ҳаракат қиламан. У менинг саодатимга, мен бўлсам унинг чинакам ўртоғи бўлиш учун ҳаракат қилмоқдаман.

Менинг бирданига йўқолиб қолишим сизнинг учун анча оғир бўлган бўлса керак, албатта. Биламан, жуда кўп йиғлаб, мени қарғаб нафсингиз койигандир. Қандай қилай, сиз бунини ночор бўлганингиз учун қиласиз. Чунки отам мени зўрлик билан шаҳзодага бермоқ учун, шунчалик қийнамаса эди, сиз ҳам, онажон, шунчалик бу иш учун қаттиқлик кўрсатмас эдингиз.

Энди агар менинг тез орада қайтиб келишимни истасангиз, Фаррух иккаламиз кечирадиган саодатли кунларимизга қўшилмоқчи бўлсангиз, отамга хабар берингки, мен билан Фаррухнинг турмуш қуришимизга рози бўлмагунча, мени кўра олмайди.

Жон она, яхши йўлаб, сўнгра жавоб беринг.

Фаррухга камбағал, тоғасининг ўғли деб қарамасдан, менинг кўзим билан, севгилим, жоним каби қарашингизни сўрайман.

Сизни севгувчи ва эҳтиром этувчи канизагингиз».

Маҳин».

Маҳин хатни тугатиб Фаррухга берди. Фаррух ўн, дақиқадан сўнг хатни чопорхона ноибига топшириб, тезлик билан Қумга етказилишини илтимос қилди. Шу пайтда Техрон тарафидан бир арава келди. Ноиб хатни аравакашга бериб, Қўшки Нусратда Қумга кетаётган бир бошқа аравакашга топширишни илтимос қилди.

Отлар алмаштирилгач, арава йўлга тушди. Аравакаш катта инъом ваъдасини олгани учун отларни савалаб ҳайдар эди. Уч соатдан кейин Ҳасанободга, яъни Техрондан саккиз тош узоқликда бўлган беқатга етаёздилар.

Хатни ёзгандан кейин Маҳиннинг аҳволи-руҳияси тамоман ўзгариб кетди. У ҳозир бундан икки соат аввалги Маҳин эмас эди. У энди йиғламасди, кулар эди. Бу кулгилар Фаррухнинг севинчини ҳаддан зиёда оширарди. Фаррух қўлида ушлаган Маҳиннинг қўлларини маҳкам-маҳкам сиқиб, юзини унинг юзига яқинлаштиради, кўзлар кўзларга тикилар, баъзан лаблар лаблар билан бирлашиб кетар эди. Майин кулги овози араваининг ичидаги жимликни бузиб, ҳавода учар, Фаррух хурсандчилигидан ўзини йўқотиб қўя ёзган эди. У жонидан ҳам севган Маҳинини ўз қучоғида кўриб, орзуларини рўёбга чиққан деб ҳисоблар эди. Шу ерда, шу кичкина манзилда уларни қийнайдиган, уларнинг ширин яшашларига тўсқин бўладиган ҳеч ким йўқ. Иккиси ҳам бутун борлигини қурбон қилиб, чин умр ўтказишни истардилар.

Маҳин севинч билан чақнаган кўзларини Фаррухга тикиб, ўйларди:

«Онам, албатта, отамга хабар юбориб, ундан тўйимизга ижозат олса керак. Отам бўлса мени жуда яхши кўради, менинг йўқолганлигимдан қайғуга тушиб, бу ишга ноилож кўнади. Сен билан мени ёруғ бир келажак кутиб турибди. Биз бахтли бўламиз!» деяди.

Фаррух ҳам ўз орзуларини Маҳинга айтарди:

— Биз ҳозир Шимронга борамиз. Шимроннинг кунботар тарафида бир деҳқоннинг уйини ижарага олиб, ўша ерда яшаймиз. Уша ердан отангга бир хат ёзиб юборасан. У ернинг ҳавоси жуда ажойиб, мусаффо, бир неча вақт ўша жойда яшаймиз. Қишлоқдаги софдил кишилар билан танишамиз. Худо хоҳласа, отангинг розилигини олган заҳотимиз шаҳарга қайтамиз.

Бу ошиқ-маъшуқлар ҳеч нарсадан хабарсиз, ўзлари учун яратиб ўтирган ҳаёлий бахт-саодатлари шундан иборат эди. Лекин ҳаётнинг қақшатқич зарбалари саодатли яшашнинг илдизини суғуриб ташлашга моҳирдир ва қодирдир!

Эрта билан соат беш яримда Ҳасанободга етдилар. Қўклямнинг охиригга ойи. Қуёш аста-секин кўтарилиб келмоқда. Фаррух бу ерда туришини ўринсиз топиб, ноибдан от беришни илтимос қилди. Ноиб, кеча Фаррухни кўрган, ҳам раиснинг ёзиб юборган хатини ўқиганлиги учун дарров отларни айирбошлашни буюрди. Орадан уч дақиқа ўтмасдан янги отлар қўшилиб, арава йўлга тушди.

Фаррух шу ергача ҳеч қандай монеликка учрамагани учун, бундан бу ёқда хавф йўқ, деб умид қилар эди. Шундай ҳам бўлиб чиқди. Чунки, уч соатдан кейин Қаҳрезак, ундан чошгоҳ пайтларда Шоҳ Абдулазимга етдилар. Шоҳ Абдулазим қишлоғига етар-етмас, шубҳа уйғотмаслик учун, Фаррух аравани тўхтатди. Пиёда юриб, шу ердаги тор кўчадан ўтиб, бозор тарафга кетдилар. Бозордан ўтиб, станцияга келдилар. Поезд кундузи соат ўн иккида жўнар эди. Фаррух билан Жавод эрлар вагонига, Маҳин бўлса аёллар вагонига ўтирди. Ун беш дақиқадан кейин поезд жўнади. Бир соатдан кейин Техронга етди. Йўловчи оз эди. Тахминан ўттиз кишига етар-етмас эди. Булар ҳам вокзал атрофидаги Муҳаммадия маҳалласида тушиб, ҳар қайсиси ҳар ёққа тарқалиб кетди. Фаррух ҳам тушиб, Жаводни извош чақиришга юборди. Маҳин Фаррухнинг орқасидан секин-секин эргашиб борар эди. Кун қиёмдан оғди. Хиёбонда одам унча ҳам кўп эмас эди. Жавод 120- ва 301-иккита извош келтирди. Маҳин 120-номерли, Фаррух билан Жавод 301-номерли извошга тушдилар-да: «Эвинга элтиб ташлайсиз!» деб, жўнаб кетдилар.

АТИГИ БИР КЕЧА

Эвин Техроннинг шимоли-ғарбий тарафидаги бир қишлоқ. Эвиннинг кунботар томони Шимрон, Тажриш ва бошқа қишлоқларга ёпишган бўлиб, бу қишлоқларнинг ҳаммаси Албурз тоғи этагига жойлашган. Эвин қишлоғининг ўртасидан кичкина бир сой оқади. Бу қишлоқнинг уйлари пастаккина, кесак деворлидир. Уйлари кичкина-кичкина, лекин ҳавоси ғоятда мусаффо. Сой бўйларида ўсган баланд дарахтлар узоқдан кичикроқ ўрмон каби кўринади, қишлоқнинг бир ҳуснига ўн ҳусн қўшиб туради.

Фаррух Маҳинни ана шу қишлоққа олиб келди, чунки, биринчидан, бу жойда шаҳар халқи кам бўларди, иккинчидан эса, бу ерда Фаррухнинг бир таниши бор эди. У одам бултур Фаррухларнинг уйида икки ҳафта яшаган эди.

Фаррух Маҳинни сойнинг кунботар тарафидаги ўша танишининг боғига олиб бормоқчи эди. Танишининг қўрғончаси учта кичкина-кичкина хонадан иборат бўлиб, қўрғончанинг олд томонида ҳалиги сойга қадар борадиган боғчаси ҳам бор эди. Кўклам фасли бўлганидан, боғ ям-яшил кўкатлар билан қопланган, дарахтларнинг япроқлари эса бамисоли зумраддай эди.

Икки соат юрганларидан кейин извош Юсуфобод ҳамда Танг қишлоқларидан ўтиб, Эвинга келиб тўхтади.

Фаррух извошчиларга кира пулидан ташқари, қўшимча қилиб, мўмай инъом ҳам бериб, улардан, биров буларни сўраса, ҳеч нима демасликларини ўтинди. Извошчилар ҳеч кимга чурқ этиб огиз очмаслик тўғрисида онт ичдилар. Фаррух бўлса, уларнинг оңтига ишонди. Фаррух ва Маҳин, керак-яроқларни кўтариб келган Жавод билан бирга бояги қўрғончага йўл олдилар. Йўлда ҳеч кимга дуч келмадилар. Бориб эшикни қоқдилар. Уй эгаси эшикни очди. У Фаррухни кўриши билан салом бериб:

— Қани, ичкарига марҳамат қилинглар,— деди.

Меҳмонлар муъжазгина бир хонага кирдилар. Бу хонанинг сой тарафга очиладиган иккита эшиги бор эди. Деворлари оқланган. Икки тоқчасида бўлса, кичкина ойна ва лампа қўйилган. Ерга қизил гилам солинган.

Жавод қўлидаги нарсаларини бир чеккага қўйиб, ташқарига чиқди. Фаррух эшик олдида турган уй эгасига қараб деди:

— Карим амаки, мен бир неча кун шу ерда истиқомат қилмоқчиман. Лекин, менинг бу ердалигимни ҳеч кимса билмаслиги керак.

Карим амаки кулиб деди:

— Истаганингизча бу ерда қолишингиз мумкин. Мен билан хотиним бўлса, ҳамиша сизнинг хизматингизга тайёрмиз. Сизнинг бу ерда эканлигингиздан ҳеч ким хабардор бўлмаслигига ишонаберинг.

Фаррух Карим амакини яхши танигани учун ундан хотиржам бўлди.

— Раҳмат, саломат бўлинг! Жуда хурсанд бўлдим. Ундай бўлса, бизга бир чой қўйдириб берсангиз,— деди у.

— Жоғим билан,— деб чиқиб кетди Карим амаки.

Маҳин ҳалигача юзини яшириб ўтирган эди. Жавод билан Карим амаки чиқиб кетгандан кейин, юзини очиб, баҳор булутлари орасидан чиққан ойдек юзини кўрсатди.

Фаррух ортиқ ташвишда эмас, у бундан буёнги турмуш режаларини ўйлар эди. У Маҳинга ўгирилиб деди:

— Ота-онангдан бирор дарак келгунча шу ерда қоламиз. Жума ва шанба кунлари шаҳардан бу ерга кўпгина саҳнатчилар келади. Шунинг учун ташқарига чиқиш маъқул эмас. Лекин бошқа кунларда эртаю кеч сой бўйига бориб, тоза ҳавода кезиб, осуда ҳаёт кечирамиз.

Лекин Маҳин бундай эмас эди. У чуқур хаёлга ботган эди. Маҳин ақлли ва ўзини сақлайдиган бир қиз. У юрагида бирталай бошқа туйғулар сезарди. У хотин киши дунёда қанчалик қичқирса ҳам ҳар нарсадан тубан саналганлигини тушунар эди. У агар бир эркак бир неча хотин билан учрашиб турса ҳам, ҳозирги замондаги қонунлар бўйича, эркак ҳеч қачон ўзининг обрўсини йўқотмайди, бунинг аксича ўлароқ, шўрлик хотиннинг номи дарҳол ёмонга ёйилиб, бадном бўлиб қолишини билар эди. Ёмонликни эркак қилса ҳам, лекин хотин бечора балога қолар ва бу жоҳил халқнинг Фаррухга ҳеч нима демасдан, лекин ўзини қандай ёмонотлиқ қилиши ҳақида ўйларди.

Фаррух шу ерда қолишдан гапирганда, Маҳиннинг

юраги ва бутун вужуди титрар, гўёки у бундай яшашнинг узоққа бормасдан, тезликда тамом бўлишини олдиндан сезгандай бўлур эди.

Ярим соатдан кейин Жавод чой келтирди, биргалашиб чой ичдилар. Лекин Маҳин қаршисида Фаррухни кўриб, юраги таскин топаркан, ўз-ўзига айтар эди:

«Буларнинг ҳаммаси бўлмағур хаёллар, Фаррух мени севади, у ҳаётининг сўнгги дақиқасига қадар мени ҳимоя қилади. Шундай бўлар экан, у билан бирга ўтказган ҳар бир соатимга нега ачинайин? Ростини айтганда, мен уни севмайманми? Албатта, севаман! Нима десалар десинлар, у менинг жоним, қалбим борлигим. Бизнинг шундай бирга осойишта умр ўтказишимизга ҳеч ким тўсиқ бўла олмайди. Отамми, онамми ё бошқа бир кучли қўлми...

Уҳ... Агар мени ундан айирсалар, мен унинг яна бир карра юзини кўра оламанми? Қийин, балки қиёматда кўрарман... Йўқ бу мумкин эмас. Мени ундан айирсалар, мени ҳам ўлди деяверинглар.

Намоз аср пайти — соат бешлар. Куннинг дами анча қайтди. Сойдаги тошларга урилиб, шовқин билан оқаётган сувнинг майин овози етимларнинг юраклари каби инграрди. Шу маҳал Фаррух билан Маҳин қўл ушлашиб уйдая чиқдилар. Боғчанинг ўртасидаги кичикроқ ҳовуз ёнидан ўтиб, сой тарафга кетдилар. У ерда бир тош устига ўтириб, бир-бирларига телмуришдан севинар ва бир-бирларининг овозларини эшитишдан лаззат олардилар. Қуёш бўлса рўбарўдаги тоғнинг ортига аста-аста ботар эди. Атроф борган сари қоронғилашар, Маҳиннинг юраги сиқилар эди. Худди шу юрак сиқилкишининг устига, борлиққа қоронғилик чўкишини истамас эди. Худди умрининг охириг кечасини яшамоқда бўлгандай, ғариб бир боқиш билан қуёшга қараркан, гўё қуёшнинг худди ўша ерда бир умр тўхтаб қолишини ва ботмаслигини истар ва шуни ўтиниб сўраётгандай бўлар эди. Лекин табиат унинг бу илтимосини қабул этармиди? У ўз одатдаги ҳукмини ижро қилмоқда эди. Орадан икки соат ўтгандан кейин қуёш тамомила ботиб кетди. Теваракни қоронғилик ўз қучоғига олди.

Фаррух ҳар дақиқа сайин Маҳинга томон силжирди. Маҳин бўлса, оҳанрабодай уни ўзига тортмоқда эди. Энг охири у бирданига юракланиб, Маҳиннинг ёнига келиб ўтирди. Теваракда ҳеч ким кўринмас эди. Қарим

амаки даладан қайтмаган, хотини ошхонада куйманиб юрарди, Жавод эса, чарчаганлиги учун кўрғончанинг кичкина айвонида чўзилиб ётар эди.

Фаррух Маҳинни ўпиб эркалар, тўзғиб кетган сочларини қўллари билан силар, Маҳин бўлса ҳеч сўз айтмасдан, ҳар нафас пастга тикиб турган кўм-кўк кўзларини кўтариб, яширин ишоратлар билан Фаррухни кузатар ва ўз севгилисини қутлагандай бўлар эди.

Кўк юзига кетма-кет юлдузлар чиқарди. Бироқ, бу икки қалб ҳали ҳам ширин суҳбатга машғул эди. Соат тўққиздан ошди, яъни бу икки ҳароратли вужуд тўрт соатдан буён шу ерда ўтирган бўлсалар ҳам, яна шу ерни тарк этишни истамас эдилар.

Шу ўртада Фаррух Жаводнинг: «Қани, ҳой, овқатга келинлар!» деган овозини эшитди.

Бориш керак, Фаррух истар-истамас, ўрнидан турди. Маҳинни ҳам қўлидан ушлаб турғизиб, кўрғонча тарафига қараб кета бошладилар. Карим амакининг хотини улар учун жуда лаззатли овқатлар тайёрлаган эди. Ҳаммалари ҳам иштаҳа билан овқатландилар ва ниҳоятда чарчаганлари сабабли овқатдан кейин тезроқ ётиб, истироҳат қилмоқчи бўлар эдилар.

Кўрғончада уч уй бор деган эдик. Шулардан биттасида, яъни энг охириги уйда, Карим амаки хотини билан яшар эди. Ўртадаги уй омбор эди. Фаррух билан Маҳин, ортиқча уй бўлмаганлиги учун, фақат бир уйдагина ётишлари мумкин. Жавод учун бўлса, ошхонадан бошқа жой йўқ эди.

Фаррух Маҳинни турли вақтда турлича синовлардан ўтказган эди. У Фаррух учун жонини ҳам аямасдан, минг турли қийинчиликларга йўлиққан эди. Фаррух бўлса, Маҳиннинг ёш бир севгилиси ва истакли эри эди. Маҳин ҳам Фаррухнинг Теҳрондаги Сиёвуш Мирзо, ёхуд бошқа биргалай бойваччалар, шахзодалар сингари шаҳват учун мингларча хотинларнинг пардасини йиртган беҳаёлардан эмаслигини билар эди. Маҳин шуларнинг ҳаммасини ўйлар ва тушунар эди. Булардан ҳам ташқари, бахтга қарши, Карим амакининг атиги бир сидра кўрпа-ёстиғи бўлиб, уни ҳам Фаррух билан Маҳинга бериб, ўзи гилам устида ётмоқчи бўлди. Бироқ, Маҳин бунга қабул қилмаганлиги учун ёстиқдан биттасини ўзи олиб, биттасини Фаррух билан Маҳинга берди.

Фаррух маъшуқасининг хафиф нафасидан баҳраманд бўлажигидан ниҳоятда хурсанд эди.

Ҳаво совуқ эди. Фаррух Қумга кетар экан, яланг қават чакмонидан бўлак иссиқроқ кийим олмаганди. У эртага Жаводни шаҳарга юбориб, керакли нарсаларни олиб келишни буюраман, деб ўйларди. Лекин, кечаси баданини жунжиктирадиган совуқ бўлди, Фаррух қанчалик ўзини тутишга уринмасин, бутун вужуди қалтираб, гапирганида овозидан титраётгани сезилиб қолди. Бу ҳолатга Маҳин бефарқ қарай олармиди? Ўзи иссиқ ўринда ётиб, Фаррухнинг шамоллаб касал бўлиб қолишини кўз олдига келтириб, бепарво қола олармиди, дейсиз?

Йўқ, Маҳиннинг қалби бунга рози бўлолмасди. У ҳам хотин киши-ю ҳам маъшуқа эди. У отаси ёки бошқа текинхўр бой ва мансабдорларга ўхшаб қишда қор устида дилдираб ўтирган етим болалар ёнидан бепарво ўтиб кетадиган, ўзининг лоқайдлигини «Дарвин назарияси» билан исбот этадиган одамлар сирасидан эмасди.

Маҳин Фаррухнинг касал бўлишини эмас, балки саломат юришини истарди. Маҳин Фаррухни қандай зору таваллолар билан ўз ёнига кириб ётишга рози қилганидан беҳабармиз, лекин шуниси бизга маълумки, чорак соатдан кейин бу яшашга лойиқ икки вужуд бир-бирларининг оғушида ётар эдилар.

Нима учун «яшашга лойиқ» деганимиз сизга англашилдимми? Бундай дейишимизнинг сабаби шуки, умрида ўзидан бошқа кимсани севмаган одамдан жамият учун ҳеч қандай наф йўқ, балки зараргина бор, холос. Бошқа одамни деб ўзини унутадиган одамларгина бошқаларга фойдали бўла оладилар. Ҳақиқий ошиқ қалбларгина ҳаётнинг қадрига етади, табиат ва санъат асарлари бахш этадиган лаззатдан баҳраманд бўлади.

Севгилингиз рояль чалганида бошқа машҳур музикачининг чалганидан кўра ёқимлироқ эшитилмайдими?

Маҳин яна маъюс бўлиб қолди. У тагин йиғлай бошлади. Шунда Фаррух Маҳиннинг кўз ёшларини бами-соли шарбатдай сипқарди.

Маҳин яна ва яна ота-онаси ҳақида ўйларди. Лекин ёнида севиқли Фаррухни кўриб ўзини босиб олар, кўнгли таскин топарди.

Соат эрталаб тўрт яримлар чамаси, тонг ёришар-

кан, теварак-атроф аста-секин ёримоқда эди. Маҳин, шунча чарчаган бўлишига қарамасдан, бу кечаси тонг отгунча ухламаган эди. Ширин уйқуда ётган Фаррухни уйғотмасдан, тоза ҳаво олиш учун боғчага чиқмоқчи бўлди. Кўрпани очиб, секингина ўрнидан турди. Маҳиннинг ранги бир оз синиққан, сочлари тўзғиган эди.

У эшикни очди. Аввал ҳовлига, сўнгра рўбарўдаги деворга қаради-ю, бутун вужуди қалтираб кетди. Қай кўзи билан кўрсин, деворда икки милтиқнинг мили чиқиб турар эди. Маҳин ўзини йўқотиб қўйган эди. Нима қилишини билмас эди. Фаррухни уйғотиш учун уйга қайтиб кетар экан, кўзи рўбарўсида турган иккита милтиқли полициячига тушди. Маҳин югуриб Фаррухнинг ёнига борди-да, севгилисини, «Бизни полициячилар ўраб-олибди», деб ҳовлиқиб уйғотди.

Фаррух ирғиб ўрнидан туриб, ташқари чиқди. Аввал деворга, сўнгра сой тарафига қаради, кейин:

— Қочишнинг иложи йўқ, энди нима бўлса бўлди, қаршилик кўрсатишимиз керак!— деди.

XXIV б о б

ФАРРУХ БИЛАН МАҲИННИ ЭВИНДА ҚАНДАЙ ҚИЛИБ УРАБ ОЛДИЛАР

Оғойи Ф... уссалтана ўзича «бу Фаррухнинг иши» деб тўғри ўйлаган ва бир дақиқа ҳам кутиб туришнинг вақти эмаслигини тушунган эди. Қандай йўл билан бўлсин, вақтни ўтказмай, Маҳинни қутқазиб чорасини топиш керак. Оғойи Ф... уссалтананинг фикрига бир нарса келди-да, ўрнидан туриб, қаршидаги телефон ҳужрасига кирди. У ўзининг яқин дўсти, яъни ҳамқиморларидан бири бўлган назмия раиси билан сўзлашмоқчи, йўлдаги полиция постларидан бирортаси мабодо бир эркак билан бир хотин тушган извошга дуч келган вақтда, дарров ушлашлари учун буйруқ беришни илтимос қилмоқчи эди.

Оғойи Ф... уссалтананинг омади келиб, назмия раиси идорасида экан. Бутун гапни раисга айтгандан кейин, раис унга: шу соатдаёқ телефон билан ҳар тарафга хабар юборишини, агар Техронга келмаган бўлсалар, йўлда албатта қўлга туширишини ваъда қилди.

Оғойи Ф... уссалтана ҳам қўшимча ўлароқ, ўзи ҳам ҳозир автомобилда Қумга кетмоқчи эканини, йўлда мабодо керак бўлиб қолган вақтда, полициячиларнинг ёрдам беришларини буюришни илтимос қилди. Раиқ бунга ҳам сўз берди.

Оғойи Ф... уссалтананинг ғазаб ва ҳаяжони сўнги чекига етган эди. У қизини ҳаддан зиёда севар, Маҳин онасидан айрилиб, Фаррухга ўхшаган саргузашт ахтарувчи бир йигит билан қочишни хаёлига ҳам келтира олмас эди. У қанча пул кетса-да, Маҳинни топишга жазм қилди.

Оғойи Ф... уссалтана шаҳзода Қ. билан хайрлашиб, шошилганича клубдан чиқди-да, ташқарида кутиб турган извошга ўтириб, тез ҳайдашни буюрди. Извош ўн дақиқадан кейин оғойи Ф... уссалтананинг эшигига бориб тўхтади. Оғойи Ф... уссалтана извошдан шошилиб тушди-да, уйга кириб кетди. Махсус хизматкорини чақириб, унга қандай бўлса ҳам ярим соат ичида бир киракаш автомобиль топиб келтиришни буюрди. Ризоқули (хизматкорнинг номи), оғосининг юзидаги ташвиш ва изтиробни кўриб, дарров йўлга тушди. Бу замонларда Техронда автомобиль жуда оз эди. Фақат бир неча ерда, шу жумладан, Алоуддавла хиёбонининг бошида киракаш автомобилларни топиш мумкин бўлар эди. Ризоқули извошга миниб, Алоуддавла хиёбонига борди. Унинг бахтига битта киракаш автомобиль турган эди. Ризоқули шофёрдан: «Қумга жўнаш учун ярим соат ичида тайёр бўла оласанми?» деб сўради. Шофёр бельгиялик эди. Техронда уни «Соҳиб» деб атар эдилар. Ризоқулига жавоб бериб деди: «Ҳа, ҳамма нарса тайёр. Фақат кира пулидан қочмасангиз, ярим соатдан кейин жўнайвераман». «Гап пулда эмас, истаган пулингни оласан».

Шофёр ҳам инсофсизлик қилмасдан, бориб-келиш учун икки юз эллик туман сўради.

Ризоқули жавобгарликни бўйнидан соқит қилиш, ҳамда оғосининг ғазабига дучор бўлмаслик учун, ўша ердан телефон билан оғойи Ф... уссалтанага хабар берди.

У бўлса:

— Қандай қиламиз, иложи йўқ. Бир амаллаб кирасини камайтир-да, ўзинг билан олиб кел,— деб буюрди.

Ярим соатдан кейин автомобиль оғойи Ф... уссалтананинг эшигига келиб тўхтади.

Ўн беш дақиқадан кейин оғойи Ф... уссалтана хизматкори Ризоқули билан автомобилга тушиб, Қумга қараб жўнадилар.

Ҳазрати Абдулазим дарвозасида полиция пости бор эди. Оғойи Ф... уссалтана автомобилда полиция пости яқинига бориб: «шу ердан бирорта арава ўтдим, уни тўхтатдиларингми?» мазмунида гап сўради. Полициячилар унга: «Марказдан шундай бир буйруқ келди. Биз ҳам шуни тўхтатиш учун бу ерда кутиб турибмиз. Лекин ҳозиргача арава ўтгани йўқ», деб жавоб бердилар.

Автомобиль Қаҳрезакдан ўтиб, Ҳасанободга жўнади. У ерга етгач, оғойи Ф... уссалтана Ҳасанободда бекат ноибидан:

— Тушки овқатдан кейин бирор арава жўнадими?— деб сўради.

Ноиб Фаррухнинг олдида ичган қасами ёлгон чиқмасин учун: «Йўқ, тушки овқатдан тўрт соат бурун бир арава кетган эди», деди. Оғойи Ф... уссалтана бу жойдан ҳам жўяли бир хабар топа олмади. Бир оз дам олгандан кейин, Ҳасанободдан қўзғалиб, бир соат чамаси йўл юриб, Қалъайи Муҳаммадалихонга етиб бордилар. Бу ердан ҳам бир дарак топилмади.

Оғойи Ф... уссалтана: «Балки Фаррух ҳам Ферузларнинг орқасидан Қумга жўнагандир», деб ўйлади. Оғойи Ф... уссалтана то Қумгача боришга қасд қилди. Агар Фаррух Қумга кетган бўлса, албатта, қамалган. Ундай деса, Ферузанинг бу кунги телеграммасида полициядан хайрли бир гап эшитилмагани ёзилган эди.

Вақт ярим кечадан ўтган, гоятда қоронғи эди. Оғойи Ф... уссалтананинг газабидан тиззалари титрар, нима қилишини билмас эди. Қўшки Нусратга қараб юриш керакми, шаҳарга қайтиш керакми, шуларни ўйлаб турган эди, бирданига елкасига бир қўл текканини ҳис қилди. Оғойи Ф... уссалтана чўчиб, орқасига ўгирилиб қаради ва рўбарўсида катта телпак кийган бир кишининг турганини кўрди. У киши, қўлини оғзига қўйиб, оғойи Ф... уссалтанага жим бўлиш ишорасини бермоқда эди.

Оғойи Ф... уссалтана бирданига қўрқиб кетди, бу одам яқинлашиб унга пичирлади:

— Сиз ахтарган кишиларнингиздан менинг хабарим

бор. Аммо бу ерда айтолмайман, чунки, ноиб билиб қолса, менга жазо беради, ҳатто нишдан ҳам ҳайдайди,— деди.

Огойи Ф... уссалтана жуда ҳам қувониб кетиб, сўради:

— Сен ўзинг кимсан? Ноиб деганинг ким? Улар қаерга кетдилар?

У киши жуда секин:

— Мен почта аравакашиман, ноиб бўлса, чопархона ноиби. Агар сизга буни айтганимни билса, мен нонимдан ажраб қоламан.

Огойи Ф... уссалтана дарров қўлини чўнтагига солиб, бир лиралик олтин чиқариб, унга берди. Лиранинг ялтираши аравакашнинг юрагига куч бергани учун муддаони очиб солди.

— Сиз ахтарганингиз икки киши кеча кечқурун соат олти пайтларида Қум тарафидан келиб, Теҳронга жўнаб кетдилар,— деди.

Огойи Ф... уссалтана вақтни ўтказмасдан дарров қайтиб келди-да, автомобилга тушди.

Бироқ, шофёр қанчалик уринса ҳам машинани юргиза олмас эди. У автомобилнинг бузилиб қолгани ва тузатмагунча йўлга тушиш мумкин эмаслигини маълум қилди. Шофёрнинг гапига қараганда, тузатишга бир соатча вақт қетар эди.

Огойи Ф... уссалтана аччиғидан ер-кўкни тўс-тўполон қилмоқчи бўлар эди. Машинани тузатиш бир ярим соатларга чўзилди. Бу муддатда огойи Ф... уссалтана «ўзи юрар» машинани ўйлаб чиқарган европаликлар шаънига ишлатмаган сўкиши қолмади. Европаликларнинг ярим кечада саҳрода бузилиб қоладиган машина чиқарганликлари учун оғзига келганини қайтармасдан ҳақорат қилар эди.

Кечаси соат иккида огойи Ф... уссалтана Ризоқули билан бирликда Қалъайи Муҳаммадалихондан жўнаб кетдилар. Бу дафъа йўлдаги чопархона ноиблари, ишнинг очилиб қолганлигини, энди яширишнинг фойдасиз бўлганлигини билиб ва Фаррух билан Маҳин хавфсиз ерга етиб олгандирлар, деб ўйлаб, аравани кўрганликларини айтдилар.

Яна йўлга тушдилар. Қаҳрезак бекатининг ноиби ҳам кундузи соат учларда арава Теҳрон томонга ўтганини айтди.

Кечаси соат уч яримда автомобиль ҳазрати Абдул-азимга етиб келди. Лекин бу ерда шундай бир аравани кўрган киши топилмади. Оғойи Ф... уссалтана ҳайрон бўлди. Шу пайтда полициячилардан бири унга яқинлашиб, ўша йигитнинг белгиларини сўради.

Оғойи Ф... уссалтана Фаррухнинг қиёфасини, нишонини айтгандан кейин полициячи унинг сўзини бўлиб, чошгоҳ пайтларида худди шундай бир йигитнинг ёнида ёш бир хизматкор билан поездга тушиб, шаҳар тарафга кетганини айтди.

Оғойи Ф... уссалтана:

— Уларнинг ёнида хотин киши ҳам бормиди?— деб сўради.

Полициячи бир оз ўйлангандан кейин:

— Бор эди, чунки улар кетар экан, ёш бир қиз ҳам хотинлар вагонига тушиб кетди. Ундан ташқари, ўша хизматкорда сафар учун зарур бўлган бирталай керак-яроқлар ҳам бор эди,— деб жавоб берди.

Оғойи Ф... уссалтана учун шубҳа қиладиган ҳеч нарса қолмаган эди. У полиция офицерига юзланиб:

— Вақт алламаҳал бўлиб қолди, ҳозир полиция бошқармасига бориш мумкин бўлмагани учун менга тўртта полициячи қўшиб беришингизни илтимос қилар эдим,— деди.

Офицер ҳам раиснинг топшириғи бўйича унга тўртта полициячи берди.

Оғойи Ф... уссалтана полициячиларни автомобилга ўтқазиб, шаҳарга қараб кетди.

Автомобиль шаҳар вокзалига етган вақтда соат тўрт бўлган эди. Техрон ҳали ухлар, ора-чора, онда-сонда хўрозларнинг қичқиришларидан бўлак овоз эшитилмас, кўчаларда битта ҳам одам кўринмас эди.

Оғойи Ф... уссалтана яна шубҳага тушди. Техрон катта, маҳаллалари кўп, улар қаерга, қайси тарафга кетган эканлиқларини кимдан сўрашлигини билмас эди. Ундан ташқари, Фаррух ўтиб кетган вақт билан ҳозиргача ўн олти соат тафовут қилар эди.

Бирданига жиёбоннинг бир бурчагига қўйилган скамейкада бир гадой ётганлигини кўриб, ундайлар кечакундуз шу ерда бўлади-ку, балки унинг хабари бор бўлса, деб гадойга яқинлашди.

Қичқириб, уни ширин уйқусидан уйғотди-да:

— Амакижон, сен донм шу ерда бўлиб турасанми?— деб сўради.

Чол гадоё кўзларини уқалаб, «ёпирай, мен ҳам керак бўлар эканман-а», деб таажжубланган бир аҳволда:

— Ҳа, доим шу ердаман,— деди.

Кўзи автомобиль билан полициячиларга тушгандан кейин у қўрқиб кетди-да, ўз-ўзига:

«Ия, мен нима қилиб қўйган эканман? Мени қамамоқчи бўлсалар керак. Мендай бир шўрликни қамаш учун шунча тайёргарликнинг нима кераги бор эди?» деб, жуда ҳам диққат билан автомобилга ва одамларга қарай бошлади.

Оғойи Ф... уссалтана гадоёнинг қўрққанини сезиб, кулимсиради ва яқинроқ келиб:

— Амакижон, кечадан буён бу ердан иккита ёш йигит билан бир хотин поезддан тушиб, бирор тарафга кетганларини эслай оласанми?— деб сўради. Бу саволни эшитган гадоё гапнинг тагига тушунди.

— Мабодо кўрган бўлсам-у, қаерга кетганларини айтиб берсам, менга нима берасиз?— деб сўради.

Оғойи Ф... уссалтана ҳеч нима демасдан чўнтагига қўлни солиб, тўртта беш қиронлик кумуш пул чиқариб, гадоёнинг этагига ташлади. Бечора гадоё суюнганидан ўзини йўқотди-да, бир оздан кейин:

— Кеча соат бир яримларда келиб, поезддан тушдилар-да, икки извошни кира қилдилар. Извошчиларга: «Эвинга ҳайда!» деганларини эшитиб қолдим.

Оғойи Ф... уссалтана ўз-ўзича:

«Балки, бу ерда извошчиларни алдаш учун шундай деган бўлиб, сўнгра борадиган ерларини бошқа ёққа бурган бўлсалар керак, қандай бўлса ҳам, таъқиб қиламан», деб автомобилга тушиб жўнаб кетди. Машина Низомия, Шоҳобод, Исломбул ва Нодирий хиёбонларидан ўтиб, Юсуфобод дарвозасига яқинлашди. Бу пайтда полиция ва йўл маъмурлари уйқудан турган эдилар. Оғойи Ф... уссалтана улардан кеча шу ердан иккита извош ўтдим, деб сўради. Йўл маъмурларидан биттаси:

— Кеча пешиндан кейин, биттасида битта хотин, иккинчисида иккита йигит ўтирган икки извош шу ердан ўтиб кетди,— деб жавоб берди.

Оғойи Ф... уссалтана учун энди шубҳа қиладиган

ҳеч нарса қолмаганлигидан автомобилни Эвин тарафига қараб ҳайдашга буюрди.

Ун беш дақиқадан кейин Эвинга етиб бордилар.

Автомобиль қишлоқнинг бошида тўхтади. Шофёр билан Ризоқули шу ерда қолдилар. Кун ёриша бошлаган эди. У ер-бу ерда иш билан кетувчи қишлоқ халқи кўринар, шуларнинг орасидан ўн икки ёшларда бўлган бир бола ҳам келарди. Оғойи Ф... уссалтана «алдагани бола яхши», деб унга яқинлашди.

— Уғлим, кеча шаҳардан бири хотин билан икки йигитнинг бу ерга келганини кўрдингми?— деб сўраган эди, бола дарров жавоб берди:

— Ҳа, амаки, кеча икки йигит билан бир хотин келган эди, Карим амакимникига қўнишди,— деди.

Оғойи Ф... уссалтана дарров Карим амакининг уйини билиб олди. Бола бошлаб боришга кўниб, олдинга тушди. Оғойи Ф... уссалтана полициячилар билан бирликда унинг орқасидан кета бошлади. Қишлоқнинг учтўрт кўчасидан ўтгандан кейин Карим амакининг эшигига етдилар. Оғойи Ф... уссалтана болани бу ердан узоқлаштирмоқчи бўлди. Чўнтагидан икки қирон пул чиқариб, болага берди-да, деди:

— Уғлим, сен ҳу қишлоқнинг бошида тўхтаб турган автомобилчига бориб айт, бизни кутиб турсин,— деди.

Пулни кўриб, автомобилнинг отини эшитган бола чопганича кетди. Оғойи Ф... уссалтана полициячиларга қараб деди:

— Эҳтиёт бўлинг, овозингизни баланд чиқарманг, иш жанжалга айланмасин. Шу икки йигитдан биттаси Фаррух, унга озор берманг. Қолган бир йигитни тутиб, қамаш керак.

Шу пайтда полициячидан бири секингина деворга тирмашиб, ҳовлига қарар экан, кўзи сой томонга тушди. У девордан тушиб:

— Қўрғончанинг ҳовлиси сойга бориб тақалар экан. У ерда битта қоровул қўйиш лозим бўладики, қочиш мумкин бўлмасин,— деди.

Полициячилардан иккитаси пастга тушиб, сой бўйида тўхтади. Иккитаси бўлса, деворга чиқди. Оғойи Ф... уссалтана бор кучи билан эшикни қоқа бошлади.

Худди шу пайтда Фаррух Маҳинга:

— Энди нима бўлса бўлди, қаршилиқ кўрсатишимиз керак!— деди-да, Жаводни ёрдамга чақирди.

Бечора Жавод бу овозни эшитиши билан шошиб бошини ошхонадан чиқарган вақтда, сой томондан:

— Урнингдан қўзғалма!— деб қичқирган овозни эшитди.

Жавод овоз келган тарафга қаради, у ерда бир полициячи милтиқ ўқталаб турганини кўриб, турган жойида қотиб қолди.

— Жавод, қўзғалма, сени отиб ташлайдилар!— деб огоҳлантирди Фаррух. Эшик қаттиқ тақилламоқда эди. Бориб эшикни очишга ҳеч кимнинг юраги дов бермасди.

Ниҳоят, сой тарафда турган полициячилардан бири секин-секин келиб, эшикни очди. Оғойи Ф... уссалтана югуриб ҳовлига кирди.

Оғойи Ф... уссалтананинг тутқун ва паришон аҳволи Фаррух билан Маҳинга қаттиқ таъсир қилди. Маҳин отасининг ўтакетган аччиғига, ғазабига учраш билан бирликда, бундан сўнг бир умр Фаррухнинг юзини кўрмаслигини сезган эди. Жанжал хаёлдан кўтарилиб кетган Фаррух ҳам жуда ботирлик билан олдинга, оғойи Ф... уссалтананинг рўбарўсига келиб деди:

— Оғо, аччиғингиз чиқмасин, қизингиз бу ерга ўз истаги билан келган. Биз бир-биримизни севамиз. Унашиб қўйганингиз шаҳзодани Маҳин ёқтирмагани учун мен билан бу ерга келди. Мен ҳам уни севаман. Мен усиз яшаёлмайман.

Оғойи Ф... уссалтана Фаррухга жавоб бермади. Фаррух ичида: «Бизга раҳми келди, шекилли», деб ўйлади.

Лекин, шундай бўлиши мумкинми? Ундан шуни кутса бўлармиди?

Оғойи Ф... уссалтана мағзи-мағзига сингиб кетган очкўзлик ва тама ҳисларини ўлдиришга ботирлик қила олармиди?

Албатта, йўқ. Чунки, у очкўзлик ва тамадан кўр бўлган, тўғри йўлни йўқотган ва севги деган сўзни бекорчи гап, деб ҳисоб қилган одам эди. У фақат Фаррухнинг шижоати ва қочиб кетиш ўрнига рўбарўсида туриб шундай очиқдан-очиқ гапиришаётганига таажжубланганидан тили тутилиб, ҳеч нима дея олмас эди.

Энг охирда, бирданига ғазаб қайнаб, полициячиларга қаради-да:

— Энг аввал мана бу ҳаромини ушланг!— деб Жаводни кўрсатди.

Кейин юзини Фаррухга ўгириб:

— Қани, жўна, кўз олдимдан йўқол! Йўқса, кўргилигингни кўрасан!— деди.

«Кетиш? Маҳинни тарк этиш?»

Маҳин кўз тагидан бир қараш билан Фаррухнинг эсини жойига келтирди. Ҳозирча бу ишдан қўл тортиб, нтоат қилиш кераклигини тушунтирди.

Фаррух севгилисининг бўйруғига бўйин эгиб, уни энг сўнгги ва умидсиз боқиш билан бир мартаба кўздан кечиргандан кейин секин-секин эшикка қараб кетди ва у ерда икки полициячи Жаводнинг қўллари пи боғлаётганларини кўриб, ўзини йўқотиб қўйди. У ўзининг шундай мағлуб бўлишига қарамасдан, бечора Жаводнинг гуноҳсиз-несиз қамалишига рози бўлмасдан, полициячилар билан жанжаллашмоқчи бўлар эди. Шу пайтда гўё юрагида биров: «Зарари йўқ, Жаводни қамасалар, сен уни қутқариб оласан», дегандай бўлди. Фаррух эшикдан чиқди. Лекин, жондан ҳам ортиқ севгани шу ерда экан, Фаррух қаерга кета олар эди?

XXV боб

ШАҒҚАТСИЗЛИК

Фаррух жўнаб кетгандан кейин, отаси Маҳинга:

— Шу қилигиндан кейин мен сени қизим деб атай олмайман,— деди.

Маҳин бошини қуйи солиб, ҳеч нима демади. Оғойи Ф... уссалтана сўзини давом эттирди:

— Сен ўзининг шу қилғилигинг билан онангни қандай аҳволга солиб қўйганлигингни биласанми?— деб, чўнтагидан хат ва телеграммани чиқариб, Маҳиннинг юзига иргитди.

Маҳин дадиллик билан телеграммани ердан олиб ўқиди. Сўнгга бир оз титроқ овоз билан деди:

— Отажон, мен буларнинг ҳаммасидан хабардорман. Мендан кейин онамнинг қийналишини ҳам билардим. Бироқ, нима қилишим керак эди? Мен унга йўл-йўлакай юборган хатимда, бу ишга мажбур бўлганимни билдирдим. Менда гуноҳ йўқ. Бу ерда онамнинг ҳам гуноҳи йўқ. Эшитдингизми, отажон, онамнинг ҳам гуно-

ҳи йўқ! Бу ишларга сабаб, фақат сизнинг тушунчасиз-
ланингиздир. Сиз мени танимаганим, ҳаттоки қандай
иш билан машгул эканини билмаганим бир шаҳзодага
мажбуран эрга бермоқчи бўлдингиз. Сиз менинг қал-
бимдаги севги туйғуларини поймол қилиш пиятида бўл-
масангиз эди, мен бу ишга қадам қўймас эдим. Бу ишда
Фаррухнинг ҳам ҳеч гуноҳи йўқ. У фақат менга йўл
кўрсатди. Мен ҳам уни қабул қилдим.

Бу сўзларни эшитгандан кейин ғазаби яна-да бат-
тароқ жўш уриб кетган оғойи Ф... уссалтана бирданига
жуда қаттиқ қизишиб кетди.

— Ҳали сен мени айбдор санайдиган ҳам бўлдинг-
ми? Отанга таъна-маломат қиляпсанми?! Хўп, майли,
зарари йўқ. Билиб қўйгинки, энди Фаррухни умрбод
кўрмайсан. Агар мен сени фарзандликдан чиқариб,
«оқ» қилишимни истамасанг, мен кўрсатган одамни эрим
деб қабул қиласан.

— Бу мумкин эмас!— деди Маҳин совуққонлик би-
лан.

Оғойи Ф... уссалтана, ортиқ чидаёлмай, қизини тутиб
олиб уриш хаёли билан ўрнидан турган эди, бироқ,
унинг воситасида депутат бўлмоқчи экани эсига тушиб,
уришдан ўзини тийди. Лекин, бақириб-чақириб деди:

— Сиз, ақли қисқа хотинлар, қачондан бери бундай
гап қайтарадиган бўлиб қолдингиз?! «Мумкин эмас!»
ҳам деясан-а! Бу сўзларни сўзламоққа сизларга ким
ижозат берган? Бу ишда мен ўзим аҳмоқман. Агар аҳ-
моқ бўлмасам, алданиб, сени ўша мактабларга ўқишга
юборармидим? Шундай қилмаганимда, бундай фало-
катларга йўлиқмаган ҳам бўлар эдим. Қошки, сени
мактабда ўқитмаган бўлсам эди.

Оғойи Ф... уссалтана чин кўнгилдан гапирар эди. У
бу мактабларни, уларда ўқиган киши ўз ҳуқуқларини
таниб олади, деб «хавфли» билар эди. (Унинг фикрича,
ўзи ва ўзига ўхшаганлардан бошқа ҳеч кимнинг, айниқ-
са, хотин-қизларнинг ҳуқуқлари бўлмаслиги керак эди).
Унинг фикрича, болаларга ҳар хил бўлмағур, хаёлий
нарсаларни ўқитадиган мактаблар — ҳақиқий заҳар
эди. Йигит ва айниқса қиз билан учрашганда ва улар:
«Нима учун эрлар аёлларни урадилар, нима сабабдан
хотин кишини таёқ билан уриш мумкин? деган пайтда
оғойи Ф... уссалтана каби кишилар ўлгудай сўкинади-
лар, уларни даҳрий, кофир деб атайдилар. Оғойи Ф...

уссалтана, асбоб-ускуналарга қандай кўз билан қараса, хотин қизларга ҳам шундай қарайдиган ва уларнинг **иркян** томонидан ҳар дамда айирбошланиб турилишини **тўғри** деб тонушилардан эди.

Оғойи Ф... уссалтана, бу ерда сўзлашиб ўтиришдан бир натижади чиқмаслигини тушуниб, шаҳарга боргандан кейин тезлик билан онасига хабар юборишни лозим билди ва қизига:

— Қани, тайёрлан, кетдик!— деди.

Маҳин ҳеч нима демасдан уйга кириб, чодрасини ёпишиб чиқди.

Қарим амаки далада бўлганлиги учун бу воқеалардан хабарсиз эди. Хотини бўлса, ҳовлида юрар, томоша қилар, полициячилардан қўрққанидан гапиришга ҳам юраги бетламас эди.

Маҳин отасига:

— Сиз Фаррухни уйдан қувиб солдингиз. Бироқ у ҳали уйнинг ижара ҳақисини тўламаган эди,— деди.

Оғайи Ф... уссалтана унинг мақсадини дарҳол тушуниб, чўнтагидан битта уч туманлик пул чиқариб, Қарим амакининг хотини олдига ташлади. Сўнгра Жаводни тўрт тарафдан қуршаб олган полициячиларга қараб:

— Сиз бу аблаҳни шу ерда тутиб туринг. Мен шаҳарга жўнаяпман. Автомобиль келиб, сизларни ҳам олиб кетади,— деди-да, битта ўн туманлик пул чиқариб, инъом юзасидан уларга берди. Маҳинни қўлидан судраб ҳовлидан чиқди.

Бечора қиз қанчалик теваракка кўз югуртса ҳам Фаррухдан бир нишон кўрмасдан, маъюс бўлди. Қишлоқнинг чеккасида турган автомобилга тушиб, жўнаб кетдилар.

Соат олти бўлган эди. Автомобиль бир соатдан кейин шаҳар дарвозасига етди. **Оғойи Ф...** уссалтана билан Ризоқули автомобилдан тушиб, извошга миндилар. Извош ҳам автомобилнинг орқасидан **оғойи Ф...** уссалтананинг ҳовлисига қараб йўл олди.

Ўн минутдан кейин **оғойи Ф...** уссалтана билан Маҳин ўз ҳовлиларида эдилар. Маҳин бу кунги ҳодисалардан жуда ранжиган, қаттиқ таъсирланган бўлгани учун ўз ётоғига кириб кетди. Каравотга ўзини ташлаб:

«Оҳ, яна бир карра уни кўра оламанми!»— деб юмюм йиғламоққа бошлади.

Бу күз ёшлари оғойи Ф... уссалтананинг юрагига таъсир қила олармиди?

Йўқ. Чунки, унинг қалби бундай олмослар билан чишиладиган ойналардан эмас эди.

Оғойи Ф... уссалтана ўн беш дақиқадан кейин шундай бир телеграмма ёзиб юборди:

«Кум. Дорушишифо. Маликтож хонимга.

Қидириш натижасида Маҳинни Фаррух билан Эвиндан топдим. Маҳин уйга келтирилди. Соғ-саломат, ташвиш тортманг. Зиёрат тугаган бўлса, дарров қайтинг.

Ф... уссалтана».

Автомобиль қайтиб бориб, тўрт полициячи билан бечора Жаводни оғойи Ф... уссалтананинг ҳовлисиغا келтиридилар.

Оғойи Ф... уссалтана телефон орқали назмия раисини чақирди. Фаррухнинг хизматкори бўлишдан бошқа гуноҳи бўлмаган бечора Жаводни ўғри ва жинояткор деб тушунтирди. Уни авахтага юборилиши учун иккита қуроли полициячи юборилишини илтимос қилиш билан баравар Жаводнинг бутун гуноҳини ўзи ёзиб юборишини айтди.

Ёзиб юбормаса ҳам бўлаверар эди. Чунки, оғойи Ф... уссалтана пулдор ва юқори мартабали кишилардан бўлганлиги учун унинг айтган сўзи бузилмайдиган қонун эди.

Ярим соатдан кейин назмиядан иккита қуроли полициячи келиб, оғойи Ф... уссалтананинг уйига кирди.

Маҳин бу ишдан хабардор бўлгани учун уйдан чиқди. Отасининг оёқларига йиқилиб, бечора Жаводни ўғри ва жиноятчилар жойи бўлган авахтага юбормаслик учун ялиниб-ёлворса ҳам натижа чиқмади. Оғойи Ф... уссалтана Фаррухнинг аламини бечора Жаводдан олмоқчи бўлар эди.

Фаррух ўтқир ва чиройли сўзлар билан маҳкамадан қутулиб кетишидан қўрққани учун оғойи Ф... уссалтана Фаррухдан қўл тортган эди. Агар Фаррухда шундай хислат бўлмаса эди, у Фаррухни Жаводдан ҳам баттаррон кунларга солган бўлар эди.

Маҳин жуда ҳам қайғуриб, отасининг хонасидан чиқди, бу ҳодисаларнинг алаmidан оёқлари титрар, ҳаракат қилишга ҳам мадори етмас эди. Бир амаллаб ўз хонасига кириб олди-да, кейин ўзидан кетди.

Чақирилган полициячилар Жаводни бир жинояткор-

дай олдиларига солиб, олиб кетмоқда эдилар. Улар серқантов хиёбонлардан ўтар эканлар:

— Қочиш фикрини хаёлингга ҳам келтира кўрма, бекорга жондан жудо бўласан. Агар қочадиган бўлсанг, қонун бўйича сени отиб ўлдиришга мажбурмиз,— деб пўписа қилар эдилар.

«Қонун» — қандай улуғвор бир сўз! Бироқ, унинг хаётга татбиқ этилишида қандай хиёнатлар бўлмайди? Шу қонунми? Текинхўр бир юқори табақали кишининг сўзи билан, ҳар бир кишидай озод, эркин яшашга ҳаққи бўлган бечора бу камбағал йигит билан шундай муоамалада бўлиш — бу қонунми? Ахир, «қонун» ва «маданният» деган нарса шуми?

Ярим соатдан кейин Жаводни назмияга келтирдилар. Полиция раисининг буйруғи билан уни темир панжарали, темир эшкли авахтага қамадилар.

Шўрлик Жавод қамоқхонада бир кишилик камерага қамалди.

Нимага? Нима учун? Фақат битта юқори табақали кишининг ундан шикоят қилгани учунми!

Шу етарли эмасми?!

* * *

Биз Маликтож хонимни ўз боши ва кўкракларига уриб: «Қизимни ўғирлаб кетдилар, бечора қизгинамнинг бошига қандай фалокатлар келтирган эканлар?» деб бақириб турган жойида, Ферузани бўлса: «Полицияга хабар бердим, йўлда уларни қандай бўлса ҳам тутадилар», деб унга тасалли бермоқчи бўлган жойида қолдирган эдик.

Ферузанинг бу гапи ҳақиқатга яқин бўлса ҳам бироқ она туйғуси бундай ҳақиқатни тушуниб ета олармиди?

Маликтож хоним йиғлар эди. Феруза полиция илорасига бориб, бутун бўлган аҳволотни, қўлини орқасига қилиб ҳовлида айланиб юрган полиция раисига айтди. Пул унмайдиган ишларни унчалик ёқтирмайдиган раис юзаки равишда бу тўғрида текшириш ва қўлга туширишга ваъда берган бўлса ҳам, лекин сув бошидан лойқа дегандай, вазирларнинг доим охирига етмайдиган ҳаракатларидай, бу ҳам эшитиб эшитмасликка солиб, ҳатто бу тўғрида йўллардаги қоровулларга ҳам хабар бермади.

Уша куни кечқурун Маликтож хоним беҳуш бўлиб қолган эди. Бахтга қарши, шаҳарда бирорта ҳам тиббий ёрдам берувчи киши топилмади. Полиция идорасининг доктори ҳам бошқа ерга кетиб қолган бўлиб, фақат мол доктори бор эди.

Бечора Феруза жуда ҳам ўзини йўқотиб қўйган, нима қилишини билмас, хоним бўлса, беҳуш, ҳеч ўзига келмас эди.

Телеграммадан бошқа тез таъсир этадиган бирорта чора ўйлаб топа олмади. Чодрасини ёпиниб, кўчага чиқди, сўрай-сўрай телеграфхонани топиб кирди. Телеграфчидан: «Мен айтадиган гапларни ёзиб, дарров симга боғлаб, Техронга юборинг», деб илтимос қилди.

Телеграфчи бир оз бечора хотиннинг жоҳиллигидан кулгандан кейин юқорида ўқиганимиз телеграммани ёзиб юборди. Феруза ҳам чўнтагидан пул чиқариб, телеграфчига берганидан кейин уйга қайтди.

Маликтож хонимнинг аҳволи бир оз яхшиланган эди. Феруза қайтиб келиб, оғойи Ф... уссалтанага телеграмма юборганини, бутун ишдан уни хабардор қилганини хонимга билдирди.

Кеч бўлди. Маликтож хоним астагина йиғлаб ўтираркан, бирданига эшик қаттиқ тақиллади, Ҳасанқули ташқарига чиқиб, хонимга бир хат келганлигини айтди. Маликтож хоним дарров хатни олди. Дуо китобларидан бошқа ҳеч нарсани ўқиёлмаслиги учун, Ҳасанқулини бир саводли одам топиб келтириш учун юборди.

Ҳасанқули бориб, бир оздан кейин, ўн олти ёшларда бўлган бир боққолнинг шогирдини бошлаб келди.

Успирин бола хатни ўқиб берди.

Маликтож хоним хатнинг мазмунини тушунгандан кейин кўнгли тинчиди. Чунки Фаррух унинг ҳеч қачон хаёлига ҳам келмаган эди. Қизини Фаррух билан birlikда қочганлигини билиб, бир оз ўзини юпатди ва ўз ўзига айтди:

«Зарари йўқ, эртага эримга хабар юбораман. Барибир бизнинг қўлимиздан қочиб қутула олмайдилар. Қарерга кетган бўлсалар ҳам эрим уларни излаб топади».

Маликтож хоним тинчланган сари ўйларди.

«Бизнинг зиёратга чиққанимизни Фаррух қаёқдан билган экан-а? Биз бу сафаримизни ҳеч кимга айтмаган эдик-ку? Ажабо, бу қандай ҳодиса бўлди?»

Ниҳоят, ўйлаб-ўйлаб, бу сафарни Фаррухга Маҳиннинг ўзи етказган бўлса керак, деган қарорга келди.

Шундан кейин, Маликтож хоним Маҳиннинг йўлда мени кимга бёрмоқчисизлар деб сўрайверганини эслади.

Эртасига қиёмга яқин Маликтож хоним Ферузā билан бирга зиёрат қилиб қайтганида қўлига бир телеграмма бердилар. Телеграммани ўқиш учун яна ўша боққолнинг шогирдини чақириб келтирдилар. Телеграмманинг мазмуни Маликтож хонимни жуда севинтирди. Севишиб кетганидан дарров чўнтагидан битта беш қиронлик тилла чиқариб, боққолнинг шогирдига берди ва Ҳасанқулини Техронга кетиш учун арава топиб, кира қилишга чопархонага юборди. Ҳасанқули қайтиб келиб, кун ботиш олдида жўнаб кетишларини айтди.

Маликтож хоним Маҳинни кўришга ошиқар эди. У Маҳинни бир меҳрибон она юраги билан севар, бироқ бу она ўз севгили фарзандининг эндиги бахтини, бахтли ҳаётини ўйлармиди, ўйлаб кўрармиди? Бу саволнинг жавоби жуда ҳам очиқ ва равшан. У ўз қизи Маҳиннинг бахтли бўлишини шахзодага эрга беришда кўрар эди. Яна тўғриси, у бахт-саодат нима эканлигини тушунмас эди. У ўз қизини девона деб ўйлаб, уни бу касалликдан қутқаришга ҳаракат қилар эди. У қизининг ўжарлигини ёшлигидан деб ўйлар: «Қатта бўлса, ақл кирар», деб ўзини юлатар эди. У, «кимнинг ёши улуғ, гавдаси катта бўлса, ақли ҳам кўп бўлади», дер эди. У, «эр деганинг давлатли бўлса, бас», деб қарарди ва бошқа сифатларига унчалик аҳамият бермас эди.

Кун ботар-ботмас Маликтож хоним, Феруза ва Ҳасанқули Техронга жўнаб кетдилар.

Эртасига кеч соат саккизда арава оғойи Ф... уссалтананинг иморати рўбарўсига келиб тўхтади. Ризоқули араванинг эшигини очиб, хонимга таъзим қилди. Хоним аравадан тушди, Ҳасанқулига бўлса аравакашга инъом беришни буюриб, ҳовлига кирди.

Оғойи Ф... уссалтана унинг истиқболига чиқиб, аҳвол сўрашгандан кейин деди:

— Маҳин кечадан буён қаттиқ касал. Ҳалигача уч марта докторларни чақириб маслаҳат қилдим.

Маликтож хоним шошиб Маҳиннинг ётоғига кирди. Маҳин каравот билан битта бўлиб ётар, оқсоч хотин юзини елпиб ўтирарди. Маҳин онасини кўриши билан бошини кўтариб:

— Тез келганинг яхши бўлибди! Қани айт-чи, Фаррухни дафн эттингларми?— деб сўради ва қаҳ-қаҳ уриб кула бошлади.

Бечора Маҳин ақлдан озиб қолган эди.

XXVI боб

БАНГИХОНА

Икки катта бозор — яъни базозлик бозори билан пойафзал бозори ўртасидаги кўчанинг охирида бир «Тўрт раста» деган бўш муюлиш бўлиб, унинг охирида, бир неча боққол, қаҳвачи ва сартарошлик дўконлари жойлашган.

Бу кўча эгри-бугри. Бу икки бозорнинг ўртасидаги муюлишда, чап тарафда эски бир иморат бор. Бу иморатнинг эшиги кўча сатҳидан пастда бўлгани учун ичкари кирмоқчи бўлган одам аввал пастга тушиши керак. Эшикдан киргач, тўрт-беш метр узунликдаги бир йўлакдан ўтиб, ҳовлига чиқилади.

Ҳовлининг шимол тарафидаги иморатлар эски бўлиб, «Урусий» номланган бир зал ва иккита кичкина-кичкина уйдан иборат эди. «Урусий» уйининг ён тарафларида бўлса, ердан бир оз юқори кўтариб солинган икки пешайвони бор эди.

Эрта куз. Астагина эсиб турган шабада ҳар нафасда бир кучайиб, сарғайган дарахт япроқларини ерга тўкарди.

Кеч соат тўртлар чамаси. Баланд бўйли ва чиройли бир йигит шу кўчанинг ўртасида туриб, ўткинчилар кўзини шамғалат қилиб, шу уйга киришга пайт пойлар эди. Бу йигитнинг уст-боши, сиртдан қараганда, бир оз эски кўринса ҳам, лекин ичидаги кийимнинг ёқасига диққат қилинса, ундаги олтин тугмаларни кўриб, Техроннинг бойвачча йигитларидан биттаси эканига шубҳа қилинмас эди.

Ҳозирги вақтда барчага баравар бўлган уйга кириш номусми?

Бу «Тўрт раста» муюлишидаги уй ҳам кириш номус ҳисобланган уйлардан бири эди.

Бу уй шира (банги) хона эди. Яна тўғриси, эронликлар ўз ғайрат ва шижоатларини тутунга айлантириб, кўкка соурадиган жойлардан бири эди.

Уша пайтларда ҳозиргидай дориламон эмас эди. Халқдан уялиб, ҳар ким у ерларга яшириниб борарди. Бироқ, такяхоналардан мўмайроқ солиқ олиш учун бангиликни ривожлантиришга тарафдор бўлган ҳукумат уялиш-тортинишлар барҳам топишини истарди.

Бояги йигит гиёҳванд бўлиб қолганлигидан шира чекмоқ учун бу ерга келишга мажбур эди.

Чунки, ширани баъзи бадавлатлардан бошқа кишилар учун уйга олиб бориб берилмасди. Уша йигитнинг бахти ва эронликларнинг бахтсизликларига кўра, бу кўча анчагина хилват эди. Йигит дарров ўзини ичкарига олди. Унинг орқасидан бошига намат кулоҳ, эгнига нимдош пальто кийган, йигирма ёшлар чамали бошқа бир йигит ҳам муюлишдан чиқиб, ўша уйга кирди. Биринчи йигит саҳнга кирар-кирмас самовар қўйилган тарафга бориб, қаҳвачига деди:

— Мени ҳеч ким кўрмасин! Агар иложи бўлса, бирор хилватроқ уй кўрсатинг.

Телпагини олиб, тепакал бошини қашиётган қаҳвачи ишнинг тагини дарров тушуниб:

— Марҳамат қилингиз,— деди-да, йигитни бинонинг чап тарафига бошлаб бориб, бир эшикни очиб берди. Йигит ичкарига кирди. Бу хона жуда ҳам кичкина эди. Деворлари кўкимтир, токчалари рапли бўлиб, ерга эски, ирkit палос солинган эди.

Токчаларнинг биттасига шира чекиш учун ишлатиладиган чироқ қўйилган эди. Йигит ичкарига кирар-кирмас палосга чордона қуриб ўтирди. Қаҳвачига икки бўлак ярим мисқоллик шира келтиришни буюрди. Қаҳвачи чиқиб кетгандан кейин ўз-ўзича ўйлар эди:

«Номардлар мени жуда ҳам ёмон ўргатиб қўйдиларда, энди сира ҳам ташлаёлмайдиган бўлиб қолдим. Дарҳақиқат, ўзимда ҳам гуноҳ кўп. Шу қадар кашанда бўлиб қолдимки, бир кун чекмасам, ўлаёзаман».

Бирданига эшик очилиб, бир нотаниш йигит ичкари кирди. Аввалги йигит кейинги йигитнинг уйга сўрамасдан кирганини кўриб, ҳайрон бўлди. Кейинги йигит ичкари кириши биланоқ, салом бериб деди:

— Оғойи Али Ашрафхон, сизда зарур бир ишим бор. Сиз билан сўзлашиш учун бу ердан қулай бирорта жой топа олмаганимдан, қаҳвачига сизга келтирадиган ширани бир оз кечикиброқ олиб келишини буюрдим.

Али Ашрафхон ҳайронликда қолди. Бу ким? У мени қаёқдан танийди? Нега одобсизлик қилиб, рухсат сўрамасдан кириб келди? Шу топда, «бу бангихона, кўпчилик келадиган жой; бу ер Техрон, қолаверса Эрон, бу одам ҳали одоб ва тавозе нималигини тушунмаса керак», деб сал ҳовуридан тушди. Лекин шундай бўлса ҳам жеркиб деди:

— Ўзинг кўриб турибсанки, мен бу ерга шира чекиш учун келдим. Чиқ бу ердан, мени бир оз тинч қўй, мен сени танимайман, сен билан ишим ҳам йўқ.

Кейин келган йигит бу гапларга эътибор бермай, лоқайдлик билан деди:

— Ого, сиз мени кўрмагансиз, тўғри. Лекин, мен сизни жуда яхши танийман. Отингизни ҳам айтдим. Агар ижозат берсангиз, сизнинг тўғрингизда билган нарсаларимни ҳам айтаман: сиз Исфаҳонда молия бўлимнинг раиси эдингиз, Техронга келганингизга икки ой бўлди. Илгари Техронда ...вазирлигининг молия бўлимида раис эдингиз. Ҳатто шундай қисқа муддат ичида қандай йўл, қайси воситалар билан муовинликдан раисликка ўтганингизни ҳам биламан.

Али Ашрафхон аввалгидан бешбаттар ҳайрон бўлди. «Бу йигит ким, менинг ишларимни қаёқдан билади?» деб ўз-ўзига саволлар берди.

— Бу ким ўзи, менинг ишларимни қаёқдан билади, деб ҳайрон бўляпсиз, албатта. Қизиқиб қолганлигингиз учун сизга ҳаммасини айтиб бераман. Менинг отим Фаррух. Номусини ўз манфаатингиз учун ёрдамчи бир қурол қилиш, обрўсини бадавлат бўлишингиз учун оёқ остида топтаганингиз хотин бир кеча менга дуч келиб қолди. Мен қайси хотин тўғрисида сўзлаётганимни тушунгандирсиз?

Али Ашрафхоннинг ранги ўчиб, бадани титрамоққа бошлади. У Фаррухга нима дейишини билмай қолди. Фаррух бутун воқеани яхши билгани учун бундан тониш мумкин эмас эди. Али Ашрафхон ўзини сал дадил тутиб деди:

— Ого, гапларингиздан мен сизнинг мақсадингизни ҳали ҳам тушуна олмадим. Боя мен сизга айтдимки, мен шира чекмоқчиман, кайфим йўқ, сиздан илтимос қилар эдим, шу суҳбатни бошқа вақтга тайин қилсангиз. Ушанда бу тўғрида ҳар қанча бўлса, сўзлашамиз.

Фаррух хохолаб кулиб деди:

— Йўқ, ого, ундай эмас, бир оз бўлса ҳам менга зақтингизни сарф қилиб, айтганларимни эшитишингиз керак.

Ҳозирча Фаррухнинг Али Ашрафхонга айтган гапларини шу ерда қолдириб, бу учрашувнинг қандай юз берганини баён этайлик.

* * *

Ширахонадаги бу ҳодиса юз берган кундан ўн ой муқаддам Али Ашрафхоннинг юқори бобларда айтганимиздай, виждонсизлик ва разиллик билан бечора Иффатни уйдан қувлаганлигини биламиз.

Али Ашрафхон ёлғиз қолиб, сўққабош турмуш ўтказиб, ахлоқсиз хотинлар билан суҳбат қилишни ҳар нарсадан аъло билган саёқ йигитлардан бири эди. Узи ўлгунча хасис бўлгани учун чиқимни ёмон кўрар, фақат хасислик билан нафсини қондириб, ҳар ҳафта, ҳар ойда хотин янгилаб турар эди. Бечора Иффатни Шоҳбожи кампирнинг уйига қўйиб келган кун кечаси, Исфаҳондаги ўртоқларининг бир нечасини йиғиб, айш қилмоқчи эди. Ўртоқларидан ҳар қайсиси ҳар қаёққа боришни маслаҳат кўрар эдилар. Сўнгида кўпчилик билан Исфаҳоннинг Жулфа деган мавзуга боришга қарор қилдилар.

Эронда саёқ, бузуқ бир кишининг бора-бора гиёҳванд бўлиб қолиши табиий. Энг аввал бир қадах ичкиликдан бешланади. Ундан кейин икки-уч ва шундай қилиб ортиб боради. Энг охири бир шишага етади. Сўнгра бир шиша ичкилик ҳам кайф бермай қолади. Ичкиликка ружу қилаётган одам Англияда бўлса, виски, Эронда бўлса, узум ароғини ичишга киришади.

Кунлар ўтади, бирданига қандай бўлади-ю, бир кечаси май топилмай қолади. Бу вақтда ўртоқларидан бириси хумор тарқатиш учун жиндек наяки қилиб беради. Еки нўхатдеккина қорадори таклиф қилиш билан баробар бу қорадорининг қай даражада фойдали эканини, фалон кишини ўлимдан қутқазиб қолганини, ённки қанчалик кайф берганини қатор қасамлар билан исбот қилади.

Қорадори ейилади.

Лекин, унинг таъсири, кайфи унутилмайди. Эртаси-

га яна давом этади. Бир кун келадики, мисқоллаб қорадори ҳам таъсир қилмайдиган бўлиб қолади.

Шу пайтда яна бояги яқин ўртоқларидан биттаси ширани олдинга суради. Шира — қорадори.

Дод бундай ўртоқларнинг дастидан!

Али Ашрафхон ҳам шундай бўлган эди. Олти ойдан кейин жуда росмана қорадори бангиси бўлиб қолган, тўрт мисқолдан қами кифоя қилмасди. Бир кун уйига чақирган дўстларидан биттаси ширани унга мақтади. Нодон йигит унинг мақтовини мамнуният билан қабул қилиб, шира чекишга ўтди. Икки ойдан кейин Али Ашрафхон «бинойи»дек шира бангиси ҳам бўлди.

Исфаҳондалигида молия бўлими раиси бўлгани учун ширахонага бормасдан уйда тайёрлатар эди.

Қандай бўлди-ю, бир куни у Исфаҳонда ҳаммага белгили бўлган зотдан биттасининг илтимосини қабул қилмади. Уша куни кечқурун Исфаҳоннинг ифвогар ва мунофиқларидан бир тўдаси... идорасининг рўбарўсида йиғилиб, у ерга ҳужум қилишиб, тўс-тўполонини чиқариш билан қўрқитдилар. Бу тўданинг бошида салласининг пешини кифтига туширган ва белбоғини ёғочга боғлаб, байроқ сингари кўтарган бир шайх баланд овоз билан қичқирар эди:

— Дод бу теҳронликларнинг дастидан! Ҳар куни бир динсизни бизнинг устимизга раис қилиб юбориб, биз бечораларни диндан чиқармоқчи бўладилар!

Сўнгра йиғилган оломонни бир ерга тўплаб, нутқ сўзлашга киришди:

— Полиция ёки жандармлар сизга қарши чиқсалар, уларни ўлдиришдан тойманг, улар бизга, яъни динга қарши чиққанлари учун кофир бўладилар!— деб бақирди.

Нодон халқ ишнинг тагини тушунмасдан, яъни шайхнинг ўз манфаати учун дин ва диёнатни қурол қилиб, ҳеч нима тушунмайдиган халқ қўли билан идораларга ўт қўйиш истаганининг фаҳмига бормай, унга итоат қилар эди.

Чорак соатдан кейин жандарма идораси бу сохта ваҳимадан хабардор бўлиб, дарров бир тўда отличларни у ерга юборди. Жандармлар келиб, оломонни тарқатишга қанчалик уринсалар ҳам ҳеч нима қила олмадилар. Халқ шунчалик жоҳил эдики, чиндан ҳам

шаҳар идорасининг динсиз идора эканига ва уни халқни диндан чиқариш учун очиб қўйилганига ишониб, қаршшликларида давом қилар эдилар.

Бояғи шайх ҳам баланд бир ерга чиқиб олиб, ҳар дақиқада халққа хитоб қилиб, идорани бузишга, ёндиришга, жандармларни ўлдиришга ташвиқ қилар эди.

Жандарма раиси халқнинг нодолигини эътиборга олиб, ўқ отишни ман қилганди. Жандармлар ҳам жамоатни дўқ-пўписа билан тарқатишга уринарди.

Дин йўлида ўлишни шаҳидлик ва бахт санаган чапанилардан биттаси илгари чиқиб, қўлидаги белбоғини жандармлардан биттасининг бўйнига солди. Бир неча нодонлар ҳам унга қўшилиб, бечора жандармни торта-торта отдан йиқитдилар-да, оломоннинг орасига олиб кирдилар.

Бечора жандарм мунофиқ, пулпараст шайхнинг қурбони бўлди.

Жандармлар ортиқ чидаб тура олмадилар. Милтиқларини халққа ўгириб, осмонга қараб ўқ уза бошладилар. Беш дақиқадан кейин ўртада ўша нодон халқдан биттаси ҳам кўринмай қолди. Лекин улар қилар ишларини аллақачон қилиб кетган эдилар.

Шайхнинг шайтонларча алдови ва ташвиқоти билан жандарм бўғиб ўлдирилган эди.

Шундай ваҳший ҳаракатларга ким жавобгар? Ушалар! Яъни, ўз манфаатлари учун илм-маърифатни динга қарши деб отлантирган, бахтсиз миллатни жаҳолатда сақлайдиган текинхўр шайхлар, охундлар ва мужтаҳидлар.

Жанжал ҳали бу билан ҳам тинчиб кетмади. Бояғи шайх қўрққанидан чорак соат югура-югура бориб, шаҳар оғоларидан биттасининг уйида яширинди-да, бошқа йўллар қидиришга киришди. Ўз муридларини тўдаларга ажратди. Бир тўдани шаҳар оғосининг уйида ўзи билан бирга сақлаб, иккинчи тўдани марказий идорадан Али Ашрафхонни ўрнидан бекор қилишни сўраш учун телеграфхонага юборди.

Марказий идора ҳам ишнинг ўнгу терисини суриштирмай, дарҳол Али Ашрафхонга қуйидаги мазмунда телеграмма юборди:

«Исфаҳон, Али Ашрафхонга, баъзи зарур ишлар

юзасидан кенгашда иштирок этишингиз ва изоҳлар беришингиз керак бўлганлиги учун дарров ишларни ёрдамчингизга топшириб, Теҳронга келингиз».

Али Ашрафхон телеграммани олган куни кечкуруноқ йўлга чиқди. Йигирма тўрт соатдан кейин Теҳронга етиб, идорага борди. Лекин, у ерда ҳеч қандай кенгаш йўқ экани маълум бўлди. Бош идорада «Вазифасидан бўшатилгани учун чақириб олинганлиги»ни билди. Бироқ, раис унга: «Марказ сизнинг ўтмишдаги хизматларингизни назарда тутиб, келажакда сизга юқори бир лавозим таклиф этади», деб умидвор қилгандан кейин идорадан чиқиб кетди.

Шундай қилиб, Али Ашрафхон бир ойдан буён Теҳронда ишсиз лақиллаб юриб, янги мансаб кутар эди. Идорага қанча қатнаса ҳам ҳали ишга тайин этмаганлари учун қайтарди. Али Ашрафхоннинг бахтига қарши, ҳазрат ишдан олинган, ёш вазир Францияга жўнаган, Иффат бўлса, албатта, аллақачон қўлдан чиққан эди. Лекин, унинг учун янги Иффат топиш осон бир иш бўлганидай, иффатлар орқали иш берувчилар ҳам оз эмасди.

Али Ашрафхон Теҳронда раислик лавозимида бўлмагани учун ширани уйда эмас, ҳар куни шаҳарнинг бошқа ширахонасида чекишга мажбур эди.

Бу кун ҳам шира чекиш учун мазкур уйга келган эди.

XXVII боб

ДУСТЛАРНИНГ ЕРДАМИ

Энди Фаррухнинг бу ифлос ерга нима учун келганлигининг сабабини қидирайлик. Биз Фаррухни Эвинда, қўрғончадан чиқиб кетган ерда қўйиб кетган эдик. Айтганимиздай, Фаррух ўша жойдан кўнгил узиб кета олармиди? Қандай қилиб ўзининг бахти порлаб турган муқаддас қишлоқдан қўл силтаб кета олар эди? У ўз севгилисини, бахтини тездан эсидан чиқариб юбориш қобилиятига эгамиди?

Фаррух қўрғондан чиққандан кейин қишлоқ ичкарисига қараб кетди. Юз қадамлар чамаси юргач, унинг оёқлари юришдан беихтиёр тўхтади. Қишлоқ-

нинг сўқмоқ йўлларида юриб, тепага қараб йўл олди. Бир дарахт тагида турган тошнинг устига чиқди. У жойдан Карим амакининг боғи ва у ерда бўлаётган бутун ҳодиса яққол кўринар, лекин унинг ўзини ҳеч ким кўрмас эди.

У Маҳин отаси билан бир неча дақиқа сўзлашгандан кейин чодрасини олиб ҳовлига чиққанлигини кўрди. Фаррух ақлли йигит эди. У аввалбошда полициячилар билан талашиб-тортишиб, Жаводни қутқазмоқчи бўлса ҳам кейин бу фикрдан қайтди. У «Искандарнома» ва «Хусайн Курд» китобларида ёзилган, француз адабиётида Огюстин ва Кабестанларга нисбат бериладиган афсонавий муболағаларга ишонадиганлардан эмас эди. Бир кишининг тўртта қуроли одамдан устун кела олишига ишонмасди.

У яна ўзига далда бериб: «Барибир Жаводни халос этаман», дер эди. Юқорида баён этганимиздай, ярим соатдан кейин полициячилар Жаводни олиб жўнадилар.

У севгилисини қўлдан чиқарди. Бегуноҳ шўрлик Жаводни ишқ ишига ёрдамга чақириб, балога гирифтор қилди. Фаррух шундан кейин йиғламоққа бошлади.

Тоза ва мусавффо бир юракни йиғлатмоқ учун шуларнинг ўзи кифоя эмасми?

Фаррух бир сониялик шаҳват учун юз мингларча кишиларнинг қонини тўкувчи одамлардан эмасди. У тоза, софдил йигит эди. Жаводнинг бу балога гирифтор бўлганлигига сабабчи деб ўзини билгани учун ҳеч тинчиёлмас эди. Уни нима қилар эканлар, деб ўйларди. Фаррух Карим амакининг уйига қайтди. Карим амакининг хотини унга таскин бера бошлади. Фаррух ёлғиз ўзи уйга кирди. Кўзларини жавдиратиб, Маҳинни қидираркан, ўз-ўзича: «Нима учун менинг минг қийинчиликлар билан қўлга киргизган севгилимдан ажратдилар?» деб ўйлар эди. Бошини кафтлари орасига олиб, бу саволнинг жавобини миясидан ситиб олмоқчи бўлган каби, уни зўр бериб қисар эди. Орасира «Жавод! сўзи оғзидан чиқиб: «Ҳаммадан аввал уни қутқазишим керак», деяр эди.

Фаррух қандай бўлса ҳамки, Маҳин билан қайта кўришишга ишонар эди. Уни ҳаммадан кўп ўйлатган нарса — оғойи Ф... уссалтананинг газабига дучор бўл-

ган Жавод эди. Уни қайси йўл билан қутқазиб олишни билмасди.

Фаррух ёш. Унинг ёш фикри ё эрки олдида бундай қийинчиликлар унга ҳеч нарсадай кўринар эди. Жаводни қутқазиб учун, аввало, уни нима қилганларини билиш керак.

Вақт чошгоҳга яқинлашиб қолди. Қарим амакининг хотини овқат келтирган бўлса ҳам Фаррух иштаҳаси бўғилганлиги учун емади.

Кечқурун Фаррух яна сой бўйига тушди. Қуни кеча Маҳин билан бирга ўтиргани тош ёнига борди. У йиғидан қизарган кўзларини кеча Маҳиннинг ўтирган ерига тикиб, ҳар дамда Маҳинни у ерда ўтирган деб ўйлар ва бориб ўша тошни эҳтирос билан ўпарди. Лекин лаблари Маҳиннинг юмшоқ юзига эмас, қаттиқ ва совуқ нарсага текканини сезиб, қайғуси ошарди.

Фаррух тош устига ўтириб: «Маҳин ҳозир қаёқда? У нима қилаётир? Шу чоқда у нималарни ўйлаётган экан?» деб ўйларди.

Фаррух агар бирор фавқулодда ҳодиса юз бериб қолмаса, албатта Маҳинни кўражагига ишонарди. Лекин оғойи Ф... уссалтананинг ғазабига дучор бўлган Жавод бечорани қандай қутқариш керак?

Кеч кирди. Фаррух ўн саккиз соатдан буён оч бўлишига қарамасдан, сой бўйидан кетгиси келмас эди.

Айқириб оқмоқда бўлган сувнинг овози Фаррухнинг қайғусини яна-да оширар эди. Гўё сув ҳам одамлардаги тубанликни сезгандай ва бу тубанликнинг аччиқлигидан фарёдга бошлагандай эди. Йўқ, унинг бу ғазаби ким учун? Бу ерда-ку, на оғойи Ф... уссалтана ва на пул учун қонун яратувчилар бор! Фаррух кишиларда кўрилган бу виждонсизлик ва беҳаёликдан шундай юраги сиқилган эдики, агар олам бир уюм пахта бўлса эди, уни бир гугурт чақиб, ёндириб юборишга тайёр эди. Бироқ, не қилсинки, ўзи якка, ожиз. Дунёда ҳали мол, бойлик бўлар экан, куч ва қудратнинг ҳам виждонсиз ва разолат қўлида қул бўлажигини билар эди.

Доим шундай бўлиб қоладими ёки бу чигал қачон бўлса ҳам ечиладими?

Кечаси соат ўн иккилар чамаси эди. Фаррух ҳали ҳам сой бўйида, кўзидан булоқдай ёш оқизиб ўтирар,

у Маҳин билан қандай қилиб учрашиш ҳақида ўйлар эди. Лекин, биттагина масалани ҳал қила олмасдан, ўз-ўзича ўйлар эди: «Уни мендан нимага айирдилар? Биз бир-биримизни севсак, бизнинг саодатимизга нима учун тўсқин бўладилар? Фақат унинг давлати, бойлиги меникидан ортиқ бўлгани учунми? Бу муҳим сабаб бўла оладими? Бу бир тўсқинми, ёинки шундай никоҳ билан бирлашувни самовий китоблар тақиқлаганмилар?»

Шу он қалбининг ич-ичидан чиққан бир овоз:

«Йўқ! Йўқ! Фақат қон!!! Қон! Шу сой сувича қон! Бир дарёдай қон! Энг катта бир денгиздай қон керак!» дерди.

Тўғри! Кишиларнинг заифларга қилаётган зулмларини ва унинг натижасида ифлосланган, бузилган дунёни тозалаш учун катта бир денгизча қон тўкилиши керак.

Вақт алламаҳал бўлди. Карим амаки келиб, ҳеч қўймагандан кейин Фаррух унинг юзидан ўтолмай, туриб қўрғончага қайтди ва ҳеч нима емасдан ётди.

Ухлаёлармиди? Йўқ. Эрта билан барвақт ўрнидан туриб, Карим амакига беш туманлик пул бердида, миннатдорчилик билдиргандан кейин, шаҳарга жўнади. Эвинда извош бўлмаганлиги учун Фаррух кирага битта от олди. Икки соатдан кейин Юсуфобод дарвозасига етди. У ердан извошга тушиб, уйига келди. Дарров касал бўлиб ётган отасининг ёнига кириб, унинг аҳволини сўради. Отаси: «Шунча кундан бери қаёқда эдинг, сенга нима бўлди?» деди. Фаррух бу сўроққа:

— Уртоқларим билан Шимронга кетган эдик,— деб жавоб берди.

Фаррух ҳаммадан аввал Иффат ва унинг ота-онасига ваъда берганлиги учун уларнинг уйига бориб кўришмоқчи эди. Юз-қўлини ювиб, кийим-бошларини алмаштиргандан кейин уйдан чиқди. Хиёбон бошида бир извошга тушиб, оғойи Р... уддавлатининг уйига жўнади. Хизматкор уни ичкарига бошлаб кирди. Ичкари уйда ҳеч ким йўқ эди. Фаррух стуллардан бирига ўтирди. Бир оздан кейин Иффат эғнида Техроннинг энг кейинги модаси бўйича тикилган лиму рангли шойидан кўйлак, оёғида нозик ва тиниқ рангли туфли, сочлари бўлса европача қилиб орқасига турмаклан-

гани ҳолда кириб келди. Юзининг саргайгани кетиб, бир оз қизиллик югурган эди. Илгариги гўзаллиги ўзига қайтган, юриш-туришидан, оёғининг яраси ҳам тузалиб қолганлиги маълум эди. Уятдан қизариб, Фаррухга яқинлашди. Саломлашгандан кейин:

— Оғо, бизларни жуда ҳам унутиб юбордингизку. Уйингизга беш мартаба одам юбордим. Лекин, қаерга кетганлигингизни ҳеч ким билмас экан,— деди.

— Тўғри, уйда эмас эдим. Сизга аввал кунни айтганимдай, кичкина бир сафарга жўнаган эдим,— деди ва сўзни бошқа ёққа буриш учун:— Муҳтарам ота-онангиз қаердалар, саломатларми?— сўзларини қўшди.

Иффат Фаррухнинг паришонлигини кўриб, ундан бу «кичкинагина» деб айтган сафарда тилагига ета олмаганлигини тушунди-да:

— Отам мулкимиз даромад дафтарларини текшириб ўтирибдилар, онам уй ишлари билан бандлар. Улар бўшагунларича сизни ёлғиз қолдирмаслик учун мени юбордилар,— деди.

Иффат бир оз тургандан кейин, яна сўзлай бошлади:

— Оғо! Мен сизни ҳар галгидай эмас, бир оз хафaroқ кўриб турибман. Мендан яширманг. Шу икки-уч кун ичида сизга қандай ҳодиса йўлиқа қолди, нега бунчалик ўзгариб кетдингиз?

Фаррух бўлса, юрагидаги дардини бўшатиш учун ҳасраткаш бир одам қидирар эди. Иффатдан яхши бир ҳамдардни қаердан топа оларди? Иффат — унинг синглиси. Аканинг дардини сингилдай яхши тинглайдиган киши топиладими?

Фаррух аммасининг қизини севганини, қизнинг ота-онаси уни куёв қилишни истамаганликларини қисқагина баён қилиб, кейинги юз берган ҳодисаларни ҳам айтиб берди.

Фаррух сўзлар экан, Иффат гоҳ қизарарди, гоҳ бўзарарди. Сўнгида Иффат чуқур ўйга ботди. У нимани ўйларди? Бечора Иффат ҳам Фаррухни севиб қолган, у Али Ашрафхондан тортган бутун мусибатларини, қайғуларини Фаррух билан бирга кечирадиган масъуд кунлар билан алмаштирмақчи эди. Фаррухнинг бу

ҳикоясини эшитгандан кейин бутун орзулари юрагидагина сақланиб қолажагини англаб, ўйлар эди.

Фаррух Маҳиннинг асири эди. Иффатга эса, акагина бўла оларди, холос. С ф кўнгилли Иффат шу билан ўз-ўзини юпатди-да, ўйлади: «Мен унга сингилман. У мени ўша азоб-уқубатли қамоқдан қутқазди. Мен ҳам унинг бу ишларида унга кўмак бериб, севгилисига етиш учун бир сингил қатори ҳаракат қилишим керак», деб Фаррухга юзланиб деди:

— Ого! Энди билсам, ҳар иккимиз ҳам бечора, бахтсиз кишилар эканмиз. Лекин, ҳар қандай бўлганда ҳам қайғуриш керак эмас. Олам ҳамиша бир хилда турмайди. Лекин, шу билан бирга, сиздан илтимос қилар эдимки, мени ҳам эсингиздан чиқарманг. Мабодо, менинг қўлимдан келадиган иш чиқиб қолса, албатта, менга топширинг.

— Ҳозирча ундай топшириқ йўқ. Ҳаммадан олдин бечора Жаводни қутқазиш чорасини кўрмоқчиман. Ундан кейин бўлса, Маҳиндан хабар олишим керак.

Иффат бир оз ўйлаб олгач, деди:

— Бўлмаса, бу вазифани менга топширинг. Маҳиндан мен хабар оламан.

— Жуда соз. Бўлмаса, бугун мен Исфаҳондаги дўстларимдан бирига хат ёзиб, Али Ашрафхоннинг кейинги вақтларда қандай ишлар билан машғул экани ҳақида хабар беришини илтимос қиламан.

Иффат Али Ашрафхоннинг отини эшитар экан, уятдан қизариб, секингина деди:

— Жуда яхши, лекин аввал Жаводни халос этиш учун ҳаракат қилиш керак.

— Зарари йўқ, ҳар иккала ишни барабар бошлайман.

Пешинга яқин Фаррух кетишга қўзғалди. Лекин Иффат ҳали ота-онам келиб, сизни кўрганлари йўқ, деб қўймади. Бир оздан кейин, оғойи Р... уддавла хотини билан бирга кириб, Фаррух билан кўришди. Бир оз сўзлашиб ўтирганларидан кейин Фаррух яна кетишга чоғланса ҳам, Иффат ва онаси қўярда-қўймай овқат қилиб кетишини сўрадилар. Уртага чол ҳам қўшилиб:

— Бизнинг кексалигимизга қараб, турмушимизнинг европача бўлмаганлигини хаёл қила кўрманг. Сиз бу ерда, уйингизда бўлгандай, стулга ўтириб, қо-

шиқ, вилкалар билан бемалол овқат ейишингиз мумкин. Шу билан баравар суҳбат ҳам қилишингиз мумкин,— деб кулиб қўйди.

Фаррух ноилож овқатга қолди. Овқат қилдилар. Сунгра Фаррух Иффат билан ваъдалашиб, мумкин қадар у ишни тезлатишни ва эртага Маҳиннинг аҳволини Иффатдан билишни умид этди.

Хайрлашиб чиқди-да, чопархона идорасидаги Аҳмадалихоннинг ёнига борди. У идорада экан.

Аҳмадалихон Фаррухнинг Техронга қайтиб келганини биларди. Лекин, қандай ҳодиса рўй бериб қолдики, Фаррух севгилисидан қўл силтаб, бу ерга келди, деб таажжубланди. Фаррухнинг юзидаги паришонликни кўриб, унинг аҳволини сўради.

Фаррух Аҳмадалихонга кўрсатган хизматлари учун миннатдорчилик билдиргандан кейин оғойи Ф... уссалтана тўрт полициячи билан келиб, Маҳинни олиб кетганликларини, Жаводнинг ҳам қўлини орқасига боғлаб, Техронга ҳайдаб кетганликларини айтиб берди.

— Оғойи Ф... уссалтана Жаводни нима қилар экан? Ё уни ўз уйида ушлаб, турса керак, ёинки назмияга юбориб, қаматтирса керак. Тўхта, мен ҳозир назмиядан телефон орқали унинг бор-йўқлигини сенга билиб бераман,— деди. Аҳмадалихон телефонни олиб, назмияни сўради. Полициянинг дафтар, мудирдан: Жавод номли бир йигитни ўша ерга келтирилган-келтирилмаганлигини айтиб беришларини сўради. Жавобни олгандан кейин, «раҳмат сизга» деб трубкани қўйди-да, Фаррухга қаради.

— Бечора Жаводни яккахонага қамабдилар. Ҳали бошланғич тергов ҳам бўлмабди,— деди.

Бир «яккахона» сўзи Фаррухнинг қулоқларига жуда қаттиқ ботди. У ҳайрон бўлди.

— Жаводни яккахонага қамаш? У нима қилибди, ҳаётда қароқчилик билан шуғулланибдими, ёки бировни ўлдирибдими?!— деб бақирди. Бу шундай бир мамлакатки, ҳурриятпарвар кишиларни ҳам яккахонага қамаб, минг турли қийноқ ва азоблар билан маҳв этмоқдалар.

Фаррух дарҳол ўртоғи билан хайрлашиб, уйига қайтди, булар тўғрисида чуқур ўйлаш керак эди.

ЯРАМАС ОДАМ

Фаррух тўрт соатдан буён ўйлаб кўrsa ҳам бир натижага кела олмади. У бу мамлакатда қонун йўли билан Жаводнинг гуноҳсиз эканлигини исбот этишдан умидини утган эди. Чунки, бу донрада қонун сўзининг маъносиз бир нарсa эканлигини биларди.

Бу кеча Жаводни қутқазиш учун ҳеч қандай йўл топа олмаздан ётди. Эрта билан яна уйда ўтириб ўйлади. Бирдан эшик очилиб, қора чодра ёпинган бир хотиннинг ичкарига кириб, ўзига томон келаётганини кўрди. Фаррух бу хотинни танимас эди. Лекин, хотин унга яқинлашган вақт ўзини таниттириб деди:

— Мени Иффат хоним юбордилар. Иффат хоним айтган кишингиздан хабар олибдилар, сиз сўраган киши ўз уйида, лекин бир оз бетоб экан.

Келган хотин бу жумлаларни шундай тутилиб, оғир гапирар эдики, гўё узоқ вақт қийналиб ўйлаганга ўхшарди.

Бечора Фаррух Маҳиннинг касаллигини эшитиб, худди юраги ёрилгандай бўлиб кетди. Маҳин касал, Жавод эса, қамоқда. Бирининг касаллигига, бошқасининг қамалишига ким сабабчи?

Фаррух!

Фаррух шошганича уйдан чиқиб, назмияга кетди. Тўғрилиқ ва қонун ҳақида ҳеч қандай тушунчага эга бўлмаган, жиноят ва фожиаларнинг маркази бўлган назмия Теҳроннинг ўрта бир еридаги Тўпхона майдонига жойлашган эди.

Фаррух ўзининг назмия қамоқхонасига кира олмастлигини хаёлига ҳам келтирмай, Конт, Саъдий ва Лолазор хиёбонларидан ўтиб, шошилганича кетар эди.

Назмиянинг эшигига етар-етмас иккита қуролли полициячи бир маҳбусни ўраб, майдон томонга кетаётганини кўрди.

Фаррух яқин бориб қаради. Маҳбус Жавод эди. Фаррух ўзини йўқотиб қўйди ва бирдан қичқирмоқчи бўлди. Лекин, полициячилар ўзини ҳам Жаводнинг ёнига қўшиб ҳайдаб кетишларидан қўрқиб, овозини чиқармади. Жавод ҳам уни кўрди, лекин ҳеч нима демади. Бечора Жаводни тергов қилиш учун судга олиб борар эдилар.

Бечора Жаводни оғойи Ф... уссалтанани ўлдиршга қасд қилишда айблар эдилар.

Бадбахтликни қарангки, Эронда то шу вақтгача халқ суд мажлисларида иштирок қила олмайди! Фаррух хафа бўлган ҳолда қайтиб келди.

Бир неча кун ўтди. Фаррух Жаводни қутқазмиш учун ҳеч қандай бир йўл, бир чора топа олмади. Жаводни бўлса, ҳар ҳафтанинг уч кунинда тергов учун адлияга олиб борар эдилар.

Бир кун Фаррух газеталарнинг биттасида «*Жавод номли бир йигит бошқа бир номаълум одам билан қиз олиб қочмоқчи бўлгани учун суд тарафидан олти ой қamoқ жазосига ва юз даррага ҳукм қилинди. Суднинг ҳукми уч кундан кейин халқ олдида ижро этилади*» деган хабарни ўқиди. Фаррух бунчалик золимлик билан ҳукм чиқарувчи судьяни қаерда учратиб қолса, ўша ерда ўлдиршга қарор бериб қўйди. Ўша кунни жуда кўп қилди. Сўнгида, Жаводнинг олтинчи бўлимда тергов қилинганини ва терговчи Али Ашрафхоннинг акаси эканини аниқлади.

Энди Фаррух учун ҳеч қандай шубҳа қиладиган ер қолмаган эди. У ўз-ўзига дерди:

«Бу икки оға-ини тубанлик ва виждонсизликнинг энг учинга чиқиш учиб бир-бирлари билан баслашибдилар».

Фаррух Исфаҳондан олган хати орқали Али Ашрафхоннинг Техронда эканлигини билди. Бироқ, Фаррухнинг хаёли Жавод билан банд бўлгани учун уни ахтаришга қўли тегмас эди. Бундан ташқари, Исфаҳондан келган хатда Али Ашрафхоннинг ўрта даражада шира чекадиган бўлиб қолганлиги ҳам айрим кўрсатиб ўтилган эди.

«Аввал Иффатга учрашиб, ундан сўрайки, агар Али Ашрафхон ўз биродарини Жаводни қутқазмиш учун рози қила олса, ундан ўч олишдан қўл тортамиз», деб ўша кун оғойи Р... уддавлянинг уйига бориб, Иффат билан кўришди ва унга воқеани айтди.

Иффат Фаррухнинг гапидан бўйин товлаб, унинг истагини қайтара олармиди?

Унинг айтганларини мамнуният билан қабул қилди. Фаррух ҳам Иффатни шундай яхши ахлоқли ва покиза қалб эгаси бўлиши билан табрик қилди ва салимият билан қўлини ўпиб, миннатдорчилик қилгандан кейин у ердан чиқиб, уйига қайтди.

Фаррух Али Ашрафхоннинг ҳар куни Техрон ширахоналаридан бирига боришини билган эди. «Яхши-си шуки, уни ширахонада учратиб, шартларимни айтаман. У бўлса, ширахонага қатнаши очилиб қолишидан қўрқиб, айтганларимни зўрма-зўраки қабул қилади», деб ўйлади. Дарров кийим-бошларини ўзгартиб, уйдан чиқди.

Али Ашрафхоннинг Жалолобод хиёбонидаги уйига қараб кетди. Бир оз муддат уйнинг теварагида айлангандан кейин Али Ашрафхон кийим-бошларини ўзгартиб, уйдан чиқиб кетаётганини кўрди. Унинг изидан тушди. Сўнгра юқорида айтиб ўтганимиз ширахонанинг тор уйида у билан учрашди.

* * *

Ҳалигача тикка турган Фаррух бирданига бояги ифлос палос устига тиз чўкиб ўтирди ва деди:

— Муҳтарам оғойи Али Ашрафхон! Сиз онгсизликдан бошқа гуноҳи бўлмаган бечора бир қизнинг пардасини йиртдингиз. Шунинг орқасида, бир неча йиллар ўқиган йигитлар ета олмайдиган юқори даражаларга эга бўлдингиз. Вужудингизда бўлган тубанликни яна ойдинроқ кўрсатиш учун бир бечора хотинни Исфаҳонда уйингиздан қувиб, кўчага ҳайдадингиз. Энди у хотин сизнинг эсингиздан чиққан. Ота-онаси билан бирлашиб туриб, сиздан ўч олмоқчи бўладилар. Мен бўлсам, уларга бу ишда ёрдам бермоқчи бўлиб, ваъда бердим. Бор кучим билан ўша ўчни олиш учун тиришаман.

Фаррухнинг сўзларига диққат билан қулоқ солган Али Ашрафхон бирдан кулиб юбориб деди:

— Ого, гапингизга қараганда, қайси мамлакатнинг фуқароси эканлигингизни унутиб қўйибсиз. Бу мамлакатда, бу ўлкада беномуслик ва орсизликка эътибор берадиган бирор одам бормики, сиз шуни рўбарў қилиб, мени қўрқитсангиз. Мен шу ишни қилган бўлсам, аввало бизнинг муҳитни, яъни бошқа одамларда кўрганим ишларнинг таъсирини ўлчаб қилганман. Иккинчиси бўлса, мен на сизнинг ва на бошқасининг қўлида шундай бир ҳужжат қолдирганманки, мени ўша ҳужжат воситаси-ла гуноҳкор қила олсангиз ва қўрқита олсангиз. Менинг бахтим ҳам шу ерда.

Фаррух кулиб деди:

— Гапингизнинг аввалги қисми ўринсиз эмаслигини мен ҳам тан оламан. Албатта, шундай бир муҳитки, ялқовлик, ғайратсизлик, ўғрилик, амалдорларнинг баччаси бўлишлик, шарлатонлик — кишининг пешонасига раислик ҳукмини ёзади. Бу гапингиз тўғри. Сиз ҳақсиз. Лекин бир кун, қазо тасодиף улардан ўчини олади. Бироқ, иккинчи сўзда янглишасиз. Чунки, сизнинг қўлёмангиз бўлган катта бир ҳужжат бизда. Сиз Шоҳбожи деган кампирнинг уйида Иффатнинг ёстиғи тагига қўйиб кетган хатингиз ҳали Иффатнинг қўлида.

Али Ашрафхон «қўйиб кетганингиз ҳали Иффатнинг қўлида», деган жумладан бир оз ташвишга тушган бўлса ҳам, бироқ ўзини босиб олиб, лоқайдлик билан деди:

— Оғо! Сиз бир оз атрофингизга қаранг, яхшилаб ўйлаб кўринг. Сиз ўзингизни гўё Англия ёки Францияда деб ўйлаб сўзлаётганга ўхшайсиз! Гўёки, бу ҳужжат билан мени судга бермоқчисиз. Қўлингизда шундай ҳужжатлардан юз мингтаси бўлганда ҳам бу шароитда мени ҳеч бало қила олмайсиз. Чунки, аввало, биродарим менга ёрдам беради. У бўлмаса, баъзи дўстларимга суянаман.

Фаррух чуқур ўйлаб, Али Ашрафхоннинг айтганлари тўла ҳақиқат эканини англади. У фақат бу фикрнинг бир жойи билан келиша олмас эди.

Фаррух:

— Мамлакат қанчалик бузғунликда бўлса ҳам бу чегарага бориб етган эмас. Сиз бир хотинни восита қилиб, юқори мартабаларга етишгандан кейин ўша бечорани шундай беномуслик билан уйдан қувласангиз, у ота-онасиз бўлса эди, сўзларимга парво қилмасангиз ҳам бўлар эди. Лекин, унинг отаси таниғлик одам эканлиги, бундан ташқари, катта амалдорлардан биртадай ошна-оғайнилари бор эканлигини ҳам биласиз.

Бу гал Али Ашрафхоннинг бетини чинакам нотинчлик аломати босди.

— Ҳа, яхши! Сизнинг тилагингиз нима? Нима демоқчи бўласиз?

— Менинг яқин бир кишимни оғойи Ф... уссалтананинг ўринсиз шикоятни билан назмияга қамаб кўйибдилар. У ердан тергов учун судга юборилган. Терговчи сизнинг акангиз.

Али Ашрафхон, «терговчи сизнинг акангиз» сўзи-

дан ишни тушунди. У Фаррухнинг сўзини шартта кесиб деди:

— Оғо, нима демоқчи эканлигингиз англашилди. Мен акамдан бундай илтимосни қилолмайман. Чунки, даъвогарнинг розилигисиз ишни бошқа терговчига оширса, акамнинг ўзини қамаб қўядилар.

— Мен ҳам буларнинг ҳаммасини —биламан. Лекин, биродарингиз оғойи Ф... уссалтанага хушомадгўйлик қилиб, менинг ошнам бечорани олти ой қамоқ жазосига ва юз дарра уришга ҳукм қилибди. Энди сиздан илтимос қилар эдим, акангизга бориб, гуноҳсиз бечора Жавод устидан чиқарган ҳукмни ўзгартириб, уни озод қилиб юборишини сўрангиз. Мен ҳам сизга ваъда бераманки, Иффатнинг ота-онаси ва менинг сиз билан ҳеч бошқа даъво-жанжалимиз бўлмайди.

Али Ашрафхон бир оз ўйлаб олгандан кейин бошини кўтариб, деди:

— Бу айтганларингизнинг ҳеч қайсиси мумкин эмас. Мен бундай ишнинг уддасидан чиқа олмайман ҳам, зиммамга ололмайман ҳам.

Фаррух умрида бунчалик тубан яратилган одамга дуч келмаган эди. У шундай одамга илтимос қилишдан кўра ўлишни ортиқроқ биларди.

У муштини тугиб, ўт сочиб турган кўзларини Али Ашрафхонга тикиб, деди:

— Бу кун дунё сизники, қўлингиздан келганини қиласиз. Бир кун бизга ҳам навбат етишар, сиз билан шунда гаплашамиз!— деб югуриб чиқиб кетди.

Али Ашрафхон унинг устидан кулиб:

— Аҳмоқ, дунёда ким бадавлат одамнинг қаршисига чиқа оларди?— деди.

Фаррух бўшашган ҳолда уйига қайтди. У бутунлай ақлсиз эди. У энди тамоман гангиб қолди, чунки бутун умид узилган.

* * *

Бу уч ой ичида Фаррух Маҳиндан хабарсиз эмас эди. Докторларнинг ҳаракати натижасида Маҳин телбаликдан даволанган бўлса ҳам, ҳали тамоман ссгайиб кетмаган эди. Маҳин унга бундан сўнг бир умр учраша олмасликларини айтган бўлишига қарамай, Шукуфа ҳар гал хат олиб бориб қайтарди, Фаррух шу уч ой ичида Жаводнинг иши билан шунчалик овора

бўлиб қолган эдики, ҳатто қисман Маҳинни ҳам унут-
ёзган эди. Фаррухнинг бахтига қарши, қайси йўлга
ёпишса ҳам натижасиз қолмоқда эди.

Уч ойдан буён Жавод яккахонада қамоқда эди. У
нима қилган эди, гуноҳи нима эди? Бу саволларга жа-
воб йўқ.

Фаррух Али Ашрафхон олдидан қайтиб келганда
Шукуфани ҳовлида энагаси билан гаплашиб тургани-
ни кўрди. Шукуфа уни кўриши билан югуриб олдига
борди. Фаррухнинг устида эски кийим-бошларни кўриб,
таажжубланди, Фаррух уни уйга бошлаб кирди:

— Кийимларимга қараб ҳайрон бўляпсанми? Буни
бир мақсад билан мажбуран кийдим. Қани, энди Ма-
ҳиннинг аҳволи қалай, бошқа бирор ҳодиса юз берга-
ни йўқми?

— Яхшики, тез қайтдингиз. Маҳин сизга бир хат
бериб юборди. Сизни анчадан буён кутиб турган эдим,—
деб Шукуфа бир хат чиқариб, Фаррухга узатди.

Фаррух шошиб-пишиб хатни ўқиди:

*«Азизим Фаррух! Мулоҳазасиз ота-онанинг қамо-
ғида кечирмоқда бўлганим мушкул дамларни сенга
айтиш билан пок қалбингни қайғуга солмоқчи эмас-
дим. Лекин қандай қилай, энг сўнги дафъа бўлгани
учун, қўлимга қалам олиб, юрагимни парчалаб юбор-
ган бир янги ҳодисани сенга билдираман. Севгилим
Фаррух, бугун эрта билан отам, ҳар галгидай хўмрай-
гани ҳолда уйга кирди-да, менга: «Ҳа, яхши бўлиб
қолибсан. Демак, тез орада тўйингизни бошлаймиз!
Эртага ё келаси кун кечқурун патир келади. Худо
хоҳласа, бир-икки ойдан кейин тўйни қилиб юбора-
миз», деди. Мен шундай бир отага нима деяйин? Ме-
нинг илтижоларим, илтимосларим унинг тош юрагига
таъсир қилмаслигини билиб, жавоб бермадим. У ме-
нинг жим қолганлигимни: «Сукут — аломати ризо»
деб билди-да, хохолаб кулмоққа бошлади ва деди:
«Балли, қизим, балли! Маълум бўлдики, ақлинг жо-
йига келиб қолибди. Агар бу касаллик сени шунчалик
ақлли қилиб қўйишини билсам эди, илгарироқ шундай
касалга дучор бўлгин деб дуо қилган бўлар эдим».*

*Азизим Фаррух! Отам шу сўзларни айтиб, мени
ҳайрат ва ташвишга солган ҳолда уйдан чиқиб кетди.
Бир оздан кейин қарасам, хизматкорларимиз битта-
битта келиб: «Тўй муборак! Худо хоҳласа, сарупо кияр.*

эканмиз-да», деб хурсандчилик изҳор қилмоққа бошладилар. Мен уларни нодон деб таниганим учун ҳеч қайсисига ҳеч нарса демадим.

Севгилим Фаррух! Нима қилай! Юрагимдаги яраларни сенга очиб кўрсатиш учун бир соатгина бўлса ҳам сени кўрсам эдим! Лекин бу мумкинми? Йўқ! Сени кўриб, юрагингни ўтга солмоқчи эмасман. Бу ҳодиса бутун тилакларимни тағи-томиридан емирди. Рўбарўмда ҳеч бир нажот йўли қолмади. Мен сендан бошқасига тегмайман. Улар бўлса, бунга тўсиқ, кунларимни, соатларимни қирқиб, шошилтириб, мени ўлимга судрамоқдалар.

Фаррухим! Бу дунёдан бутун умидларим узилди. Сен билан кўришишим эса охиратга қолди...

Фаррухим! Мени унут, бундан кейин бошқалар билан яша! Чунки, мен ўламан. Лекин юрагим энг сўнги тегишни сенинг севгинг билан урмоқда! Мен сенинг ишқинг билан жом бериман.

Уҳ, отам-онам нақадар бешафқат ва инсофсиз одамлар! Лекин, мен уларни ҳам айблай олмайман. Уларни жоҳил ва ночор деб билганим учун кечираман.

Сени энг сўнги нафасига қадар севган ва унутмайдиган Маҳин».

Фаррух чуқур фикрларга чўмди. Бахтсизлик уни ҳар тарафдан чулғаб олганди. «Жавод қамоқда, у дарра кутиб ётади. Маҳин бўлса, ўзини ўлдирмоқчи. Ортиқ мен нега қолай, мен ҳам ўзимни маҳв этаман!» деди-да, яна анчагина хаёл суриб кетди. Юрагининг энг чуқур еридан келган бир овоз:

«Сен яша ва бу тубан кишилардан ўч ол!» дегандай бўлди.

Фаррух бу сўзларни яна бир қайта такрор қилди:

«Уч, ўч!»

Қандай ширин бир сўз!

Кейин Фаррух ўзини босиб олиб, Шукуфага деди:

— Маҳинга бориб айт! Жуда қаттиқ ташвиш ва изтиробда бўлганим сабабли ҳозир унга жавоб қайтара олмайман. Лекин, бунчалик умидсиз бўлмасин. Балки, тақдир бир йўл билан бизга кўмак берар.

Шукуфа эрта билан хатнинг жавоби учун келишини айтиб, чиқиб кетди.

Фаррух уйга кириб, эски кийим-бошларини ечиб, расмий кийим-бошларини кийиб, яна чиқиб кетди.

Кеч соат олти, кезмоқ вақти эди. Техрон йигитларининг кўпи Лолазор, бир қисми бўлса Алоуддавла хиёбонида кезар эди. Фаррух ҳам Алоуддавла хиёбонига бориб, ерга қарагани ҳолда ўйлай-ўйлай кетмоқда эди. Қанча ўйласа ҳам бир натижага кела олмас эди. Ҳар тарафда умидсизлик.

«Нима учун бу ишга Жаводни ундадим? Энди уни қандай қутқазिश мумкин?»

Бирданига елкасига бировнинг юмшоққина қўли текканини сизди. Фаррух бошини кўтарди. Рўбарўсида озода, башанг кийимлар кийган бир йигит турар эди.

XXIX БОБ

УЧИНЧИ УЧРАШУВ

Муҳтарам ўқувчиларимиз ижозати билан ҳикоямининг муҳим бир қисмида роль ўйновчи икки кишини эслатиб ўтамиз. Бу икки киши Сиёвуш Мирзо билан Муҳаммад Тақидир.

Биз Муҳаммад Тақини, оғоси Сиёвуш Мирзони кечаси елкасига ортмоқлаб уйига олиб кетган бир ҳолда қўйиб кетган эдик. Муҳаммад Тақи, Иффатни елкасида олиб кетувчи Фаррухга ўхшаб, полицияга дуч келиб қолишидан қўрқмас эди, чунки шундай ҳодиса юз берган тақдирда, оғом тошга қоқилиб оёқларини шикастлантирдилар, деб ўтиб кетиши мумкин эди.

Кўчаларда извош кўринмасди. Муҳаммад Тақи бир соатлардан кейин Сиёвуш Мирзони уйига олиб борди. Астагина эшикни қоқди. Уша куни кечаси кетишаётганда эшикни очиб чиқариб юборган чол, эшикни очди. Лекин, оғосини бу ҳолатда кўриб, таажжубдан бақириб юбориш даражасига етган бўлса ҳам, Муҳаммад Тақи унга:

— Ҳайдалиб кетишни истамасанг, овозингни чиқарма, ҳам ҳеч кимга бу тўғрида бир нарса гапирма!— деди.

Чол Муҳаммад Тақининг ҳазил қилмаётганини тунди. Чунки, Сиёвуш Мирзо уни отаси олдида айбласа, ишдан қувланиши турган гап эди. Бечора чолнинг дами ичига тушиб кетди ва бундан кейин ҳам ҳеч кимга ҳеч нима демасликка сўз берди. Муҳаммад Тақи чолга:

— Бор, дарров уйингдаги чироғингни ёқ,— деди ва

Сиёвушни ўша чолнинг кичкина, қишлоқнинг уйларига ўхшаш ҳужрасига олиб кирди.

Чол чироқни ёқди, Муҳаммад Тақининг буйруғи бўйича бир оз совуқ сув олиб келди. Сиёвуш Мирзонинг яраси у қадар қўрқинчли эмасди. Бироқ, қоннинг кўп оқиши уни ҳолдан кетказиб қўйган эди.

Муҳаммад Тақи Сиёвуш Мирзонинг ярасини ювиб, чўнтагидан олган оқ рўймолча билан боғлади. Сиёвушнинг аҳволи аста-секин яхшилана бошлади. У бирдан кўзларини очиб, боши устида Муҳаммад Тақини ва дарвозабон чолни кўрди. Ўтган воқеаларни бир-бир эслаб, Муҳаммад Тақиға:

— Нега мени бу ерга келтирдинг?— деб пичирлади.

— Уйдагилар билиб қолмасин деб ярангизни шу ерда ювиб боғладим. Энди уйга кирмоқчи бўлсангиз, қани, юринг, керамиз.

— Балли, раҳмат, яхши қилибсан.

Муҳаммад Тақи Сиёвушни қўлтиғидан суяб олди. Ичкарига кира туриб:

— Секин бориб ўз ётоғингизга кириг. Эрта билан турганда, оёғимга чипқон чиқибди дейсиз,— деб маслаҳат берди-да, ўз уйига қайтиб кетди.

Сиёвуш Мирзо индамади. Ичкарига кириб, деворларни ушлаб-ушлаб, ўз уйига бориб ётиб олди. Эртасига Сиёвуш Мирзо бир оз иситма чиқарди. Ота-онаси уни синглицидан юзларча дафъа ортиқ севганлари учун ташвишга тушиб қолган эдилар. Лекин, Сиёвуш уларни тинчлантириб:

— Ҳеч нима қилгани йўқ. Унг сонимга чипқон чиқибди. Шунинг иситмаси бўлса керак,— деди.

Ҳар бир касалликка Гулсум парихоннинг тажрибалари билан дори-дармон қилувчи ва унга чиндан ҳам ишонувчи бечора онаси:

— Ўғилгинамнинг иситмаси кўтарилибди, чипқон чиққан эмиш,— деб хизматкорга аттордан бир оз малҳам, бир неча дона лиму олиб келишни буюрди.

Сиёвуш Мирзо ҳам мажбуран, ҳеч нима демасдан, лимули чойни ичди, малҳамни қўйган бўлди. Ўқувчига Шаҳзода Қ.нинг клубда оғойи Ф. уссалтанага «чипқон чиқиб қаттиқ касал бўлиб ётибди», дегани ҳам шу юзадан эканлиги маълум.

Икки кундан кейин Сиёвуш Мирзонинг яраси тамо-

ман тузалган эди. Унинг яна саёқлик фикрлари бошини айлантирди.

Муҳаммад Тақини чақиртириб келиб:

— Анча кундан бери тунов кунги ерга бора олмай қолдик. Иффатхонни жуда ҳам соғиндим-ку!— деди.

Муҳаммад Тақи оғосидаги шунчалик қизиқишни таажжуб билан томоша қилди-да, ўз-ўзича: «Орадан ҳали икки кун ҳам ўтгани йўқ-ку, анча кундан бери борганимиз йўқ дейди-я. Бахтимизга ўша йигит келиб қолмаганида, бу аллақачон ўлиб кетган бўларди», деб ўйлади. Лекин, у худодан кеча-кундуз оғосининг бешбаттар аҳмоқ бўлишини сўрайди, чунки шундай бўлсагина унинг пулидан бемалол фойдаланиб юра олади.

Шу бугуноқ бориб, Ноҳид хонимдан хабар олиб келишни ваъда қилди.

Кечқурун Муҳаммад Тақи оғосининг олдига келиб деди:

— Оғо, у ерда сизнинг ярадор бўлишингиздан бошқа ҳам анча можаролар бўлибди. Чунончи, Иффат қочибди. Мен ичкари киришим билан Ноҳид хоним гирибонимдан тутиб олди.

«Энди мен сени қўйиб юбормайман, қани, дарров айт, менинг энг яхши қизимни қаерга олиб қочдинг? Мен уни Арус Мажурдан етмиш туманга олган эдим. Дарров айт, дарров, қани айт, кўрай!» деб мени, шубҳали одамдай, диққат билан текширмоққа бошлади. Мен ҳайронлигимдан тошдай қотиб қолдим. Ноҳид хоним, менинг ҳайронлигимни кўриб, бу ишдан беҳабар эканимни билди-да, деди:

— Сиз кетгандан кейин бир полиция офицери билан бир полициячи келиб, Ҳасан Ризони уйдан чиқариб юбордилар. Лекин, Иффат қочиб кетган эди. Шу кундан буён бутун ҳамкасбларнинг уйини қидира бериб, оёғимда оёқ қолмади. Ҳеч кимнинг хабари йўқ.

Мен унга жавобан:

— Бу ишда бизни қотишган деб ўйлаб, бекорчи хаёлларга борманг. Мен бошқа киши билан боғланишим бўлмагандай, бундай одамларни уйимда сақлай олмайман,— дедим.

Ноҳид хоним менинг гапларимнинг тўғрилигини англаб, лом-мим демади. Мен унинг кўнглини кўтариш учун:

— Оғом сиздан шунчалик хурсанд бўлдиларки, ўша кундаги ишнинг хижолатидан чиқиш учун яна бир мар-

таба келиб, ўша кунгидай бир катта ўтириш қилмоқчилар. Иффат йўқ-ку, энди қандай қилиб келади, деб кўнглингизга келтирманг. Йўқ, оғом сизнинг кўнглингизни кўтариш учун бошқа хотинлар билан ҳам хурсандчилик қилаверадилар, дедим. Ноҳид хоним ҳам сизнинг хурсандчилигингизни истагани учун бошқа бир ердан яхшисини топиб, тайёр қилиб қўйишга ваъда берди.

— Бўлмаса, у ерга нимага борамиз? Менга фақат Иффатгина маъқул тушган эди. Иффат қочган бўлса, нима қилай у ерда?

— Тўғри, у ерда сизнинг дидингизга ёқаётган ҳеч нима қолмаганлигини мен ҳам биламан. Лекин, бу гаплар, боя айтганимдай, Ноҳид хонимнинг кўнглини кўтариб қўйиш учун айтилган гаплар. «Уни қўйинг, буни қўйинг, ҳатто бугун кечаси оғом шу ерга келадилар», деб уларни алдаб келганимга нима дейсиз?

Сиёвуш Мирзо бир оз кулгандан кейин сая шашти қайтиб деди:

— Жуда яхши. Демак, Муҳаммад Тақи, у ерда ўқимиз тошга тегибди, энди нима қиламиз? Бошқа бирор дуруст ерни топсанг-чи!

— Жоним билан, оғо. Бир маҳалда бизга қўшни бўлиб яшаган бир хотин бор эди, ҳозир бориб ўшани ахтараман.

Муҳаммад Тақи чиқиб кетди. Уша кун кечқурун қайтиб, яраси тамоман соғайган Сиёвуш Мирзо билан бирга Мухторуссалтана хиёбонидаги ҳовлилардан биттасига бордилар. Уларнинг бахти ёр бўлиб, у ерда Ҳасан Ризо ёки Ҳусайин Дошта сингари кишилар йўқлиги учун кўнглисиз воқеалар бўлмади. Сиёвуш ҳафтанинг тўрт кечасини шундай ерларда хурсандчилик билан ўтказар эди. Оқсуяклар наслидан бўлгани учун тез-тез йўли Лозазор хиёбонидаги докторга ҳам тушиб турар эди. Бироқ, ўз-ўзининг йигитлигига ишониб:

«Менга бунақа касаллар писандми?» деб касаллиги учун қайғурмас ҳам эди. Отаси шаҳдоза К. нинг оғойи Ф... уссалтана билан суҳбатда мақтаниб айтгани кимё лабораторияси бўлса, ўгли Сиёвушнинг ичидан ва тишидан ишлатадиган дори-дармонлари ва ўзини ювмоқ учун ҳозирланадиган ҳар хил суюқликлар эди.

Шу зайлда уч ой ўтди.

Бу ўртада отаси неча мартаба уни олдига чақириб, тўй тўғрисида гап очса ҳам Сиёвуш отасининг сўзларига

парво қилмасдан чиқиб кетар эди. Отасининг панд-насиҳатларини эшитмаслик учун Ноҳид хонимнинг уйига ўхшаш ерларга жўнаб қолар эди. Бир кун шаҳзода К. Сиёвуш Мирзога деди:

— Маҳинни Қум йўлида олиб қочибдилар. Маҳин қўлдан чиқса, тўйнинг бўлмай қолади. Демак, оғойи Ф... уссалтананинг бутун давлатидан маҳрум бўламиз.

Иккинчи кун шаҳзода К. хурсандчилик билан Сиёвушга хабар берди:

— Худога шукур, худо лутфу карамини биздан дариг тутмаган экан. Маҳинни топибдилар. Қайтариб олиб келибдилар. Лекин, бечора қиз қўрққанидан касал бўлиб қолган эмиш.

Сиёвуш Мирзонинг боши Мухторуссалтана, Шаний ва Қожор хиёбонларидаги гўзаллар билан шунчалик банд эдики, Маҳин тўғрисида ўйлаб ўтиришга ҳам фурсати бўлмасди. Шунинг учун ҳам отасининг бу сўзларига тариқча эътибор бермас ва аҳволини ўзгартмас — қизни ким олиб қочибди, нима учун олиб қочган экан, мақсадлари нима экан, деган саволлар билан ҳам қизиқмас эди.

Охири бир кун шаҳзода К. Сиёвушни чақириб:

— Уч кундан кейин Маҳин билан сени унаштириб қўямиз,— деди.

Сиёвуш бу хабарни ҳам жуда бепарволик билан эшитиб:

— Жуда яхши,— деди-да, чиқиб кетди. Бир оз сайр қилиш хаёли билан секин-секин Дарвозайи Қазвандан ўтиб, Маризхона кўчасига етди. У ердан Тўпхона майдонига келаркан, Алоудавла хиёбонига қараб кета бошлади. Бурж Нўш хиёбонига етар-етмас, сайрга чиққан иккита армани қизи унинг диққатини тортди. Сиёвуш ўз-ўзича:

— Қани, шуларнинг орқасидан эргашиб борай-чи,— деб уларни таъқиб қилмоққа бошлади ва уларга яқинлашди. Отаси Сиёвушни мажбуран Сан-Луи мактабига юборган вақтда ўрганган бир-икки оғиз французча сўзни ишга солиб, уларга тегиша бошлади. Лекин, қизларнинг унга қатъиян эътибор қилмаганликларини кўриб, ҳайрон қолди ва ўзича:

— Булар мени танимаган бўлса керак, менинг насл-насабимдан беҳабар бўлсалар керак. Бўлмаса, нима учун менга жавоб бермадилар?— деб буларнинг орқаси-

дан Бурж Нўш хиёбонининг охиригача борган бўлса ҳам, ҳеч иш чиқара олмади. Хафа ва ачкиқланган бир ҳолда қайтди.

— Бу арманлар қандай ярамас одамлар! Мен то шу кунгача юзи очиқ бўлганлар шундай ишларга дарров кўниб қўя қолади, деб ўйлаб юрар эдим. Бироқ, иш аксинча экан. Ҳеч бўлмаса, бир оғиз жавоб ҳам қайтармадилар-а,— деб қўйди.

Сиёвуш Мирзо майда қадамлар билан Алоуддавла хиёбонига қараб кетди. Шу хиёбоннинг охирига етар-етмас бирданига хаёл сурган одамлардай бошини қуйи солган ҳолда келаётган Фаррухни кўрди.

Сиёвуш уни анча вақтдан буён кўрмоқчи бўлиб юрар эди. Лекин шу уч ойнинг ичида унга ҳеч дуч келмаган, уйининг қаерда эканлигини билмас эди. Шунинг учун у бундай тасодифий учрашувдан жуда ҳам хурсанд бўлиб кетди ва Фаррухга яқинлашиб, қўлини секингина унинг елкасига қўйди. Фаррух бошини кўтариб, қарши-сида Сиёвуш Мирзони кўрди. У бу тўсатдан бўлган учрашувдан анчагина шошиб қолди. Сиёвуш салом берди.

— Саломалайкум! Қалай, саломатмисиз? Жаноби-нгизни бир неча вақтдан буён кўришга шунчалик ишти-ёқманд бўлсам ҳам, ҳеч учратиб бўлмади. Сиз бўлса, илтифот кўрсатмай, бизни тамоман унутиб юбордингиз. Бахтга қарши, уйингизни ҳам билмайман. Қайси идора-да хизмат қилишингизни ҳам билмайманки, олдингизга бориб, сизни зиёрат қилсам.

— Бир тўда ўғриларнинг маркази бўлган идора-ларнинг ҳеч қайсисида хизмат қилмайман. Шунинг учун ҳам ўзимни бахтли деб ҳисоблайман. Уйим бўлса, ... хиёбонида, қай вақт истасангиз, марҳамат қиласиз,— деди Фаррух.

— Мен бўлса, ўша кечаги ваҳимадан жуда ҳам кўр-қиб кетган эканман, сизга уйимнинг адресини беришни ҳам унутиб қўйибман. Уйимиз Дарвозайи Қазвин хиё-бонининг ...қисмида. Отам бўлса, шаҳзода К. бўлади. Қачон истасангиз, бизникига марҳамат қилишингиз мум-кин. Қани, юринг, «Лолазор» қаҳвахонасига бориб, бир оз гаплашиб ўтирамыз.

Фаррух бу хилдаги йигитлар билан бирга айланиб юришдан безор бўлса ҳам, лекин бир соат фикр-хаёл-дан тинчланиш учун Сиёвушнинг таклифини қабул қил-

ди. Ҳар икковлари Лолазор хиёбонининг бошида бўлган қаҳвахонага бордилар.

Соат олти ярим бўлганди. Баладия (шаҳар бошқармаси) минг машаққатлар билан бўлса ҳам, Лолазор хиёбонига сув септиргани учун кўчанинг чанг-тўзони сал босилган эди. Фейл-атворлари бир-бирига ўхшамаган бу икки йигит Алоуддавла хиёбонидан ўтиб, Аминусултон кўчасига етдилар. У ердан ўтиб, Лолазор хиёбонидаги қаҳвахонага кирдилар.

Қаҳвахона боқчасининг ҳар ер-ҳар ерида бирталай одамлар иккита-иккита, учта-учта ўтириб, мороженое ва бошқа шундай нарсалар емоққа машғул эдилар. Сиёвуш Мирзо билан Фаррух ҳам бир бурчакка, ток остидаги оқ рангга бўялган стол ёнига ўтирдилар.

Сиёвуш Мирзо қаҳвахона хизматчисига мороженое келтиришни буюрди.

Фаррух бизга маълум бўлгани каби, ғоятда ғамгин эди.

Сиёвуш буни сезиб, Фаррухдан хафагарчиликнинг сабабини сўради. Лекин Фаррух Сиёвуш Мирзодай дуч келган одамга сирини айтиб юришни ёқтирмагани учун:

— Ҳеч гап йўқ,— деб гапни калта қилиб қўя қолди.

Сиёвуш Мирзо бошқа давлатмандлар ва амалдорларнинг ўғиллари каби ўзини мақтаб кетди. Баъзида бобосидан қолган мерос-мулклардан, бир оз ажойиб фойтонлари, извошчиларидан, бир қадар боқувда ётган отларидан, унча-мунча ўзини муҳаррир, композитор, шоир қилиб кўрсатган ёлғончи шоирга ўхшаб ўз маълумотидан гапириб, табиийёт, ижтимоий фанлардан баҳс втарди.

Газеталарда фақат номларинигина ўқигани Кант, Дарвин, Карл Маркс назарияларидан гапирар эди.

Ора-чора отасининг беҳисоб бойликларидан гап очиб, А. деган бир фоҳишага ошиқ бўлгани, миллат ва давлат ҳазинасидан ўғирлаган пул билан машҳур бир фоҳишанинг бир кечасига эллик туман сарф қилганидан, бир неча кун ичида уч юз туман совурганини ҳикоя қилиб, бундай бемаъни гаплар билан Фаррухнинг миясини қоқиб қўлига бермоқда эди.

Фаррух бу гапларга чурқ этиб жавоб бермас, Сиёвушнинг гапларини фақат бош қимирлатибгина тасдиқ этгандай бўлар эди. Унинг гапларини эшитишдан тамом чарчаган Фаррух Сиёвуш Мирзодан сўради:

— Шунчалик давлат билан ҳалигача уйланмаганми-
сиз?

Сиёвуш шу дақиқадаёқ:

— Уйланишнинг нима кераги бор? Битта хотин деб
оёғимга кишан солайми? Мен бу давлат билан бутун
Техрон хотинларини қўлга ололаман. Ҳатто бу ишда ан-
чагина муваффақиятим ҳам йўқ эмас,— деб жавоб берди.

Фаррух бу сўзни эшитиб, чидаёлмади. Шундай бир
паст ва уятсиз бир кишидан узоқлашиш учун туриб кет-
моқчи бўлса ҳам Сиёвуш Мирзонинг ялпизиб-ёлвориб
ёпишганига қараб, мажбуран яна ўтирди. Сиёвуш Мир-
зо қайта бошдан сўзида давом қилиб, деди:

— Лекин, отам уйланасан деб шунчалик қистаётиб-
диларки, ҳеч нима деёлмай қолдим. Мени зўр билан
уйлантирмоқчилар. Уч кундан кейин унашмоқчимиз.
Сизнинг ҳам унашув тўйига марҳамат қилмоғингизни
сўрар эдим.

«Уч кундан кейин» сўзини эшитгач, Фаррухнинг кўн-
гида шубҳа туғилди.

«Маҳинни шу йнгитга бераётган бўлсалар-а», деб аҳ-
волини ўзгартмасдан туриб сўради:

— Жуда яхши, кимнинг қизини олмоқчи бўласиз?

— Оғойи Ф...уссалтананинг қизини. Отамнинг гапига
қараганда, бу уйланиш орқасида ҳад-ҳисобсиз давлатга
эга бўламан. Истаганимдай яйраб, умр ўтказишим мум-
кин.

Фаррух ўзини зўрға тутиб ўтирар эди. Маҳиннинг
атиғи давлати учун олиб, унинг давлати орқали бошқа-
лар билан кайф-сафо сурмоқчи бўлган бу аҳмоқни худ-
ди шу ердаёқ бўғмоқчи бўлар эди. Лекин: «Бу тентак-
нинг сўзини эшитиб, бутун фикрларини билиб олай», деб
совуққонлик билан айтди:

— Жуда яхши, ҳақиқатан ҳам жуда ўринли унашиш.

— Демак, ҳар икки томонни ҳам танийсиз. Уйлай-
манки, унашадиган куни албатта, оғойи Ф... уссалтана-
нинг уйига марҳамат қилиш билан бизни хурсанд қи-
ласиз.

— Афсуски, унашув куни кела олмайман, катта уз-
рим бор. Лекин, худо хоҳласа, тўйингизда хизмат қи-
либ, сизга самимий табрикларимни изҳор этаман.

Сиёвуш Мирзо қанчалик қистаса ҳам Фаррух уна-
шиш куни кела олмаслигини айтиб, гапни бошқа ёққа
бурди.

Яна Шаний хиёбонндаги бир хотиннинг ҳусну жамолидан, Шаҳри Навдаги бир таннознинг қадди-қоматидан, ниҳоят, ҳозир Техронда бир тўда ахлоқсизлар тарафидан кенгайиб бормокда бўлган ярамас қилиқлардан (опера ёзувчи шоир айтгандай: «ўғил болага ошиқ бўлиш»дан сўзлаб), бир вақтда баъзи ўртоқларига нималар қилган ва улар бунинг ўзига нима қилганларини ҳикоя қилмоққа бошлади.

Фаррух чарчаган эди. Ортиқ бу сўзларни эшитиб ўтиришга тоқати чидамай ўрнидан турди:

— Афв этасиз, мен кетаман. Соат саккизда биров билан учрашишим зарур эди,— деб Сиёвушдан узр сўради.

Сиёвуш ҳам:

— Иншоолло, тез орада кўришиб қолармиз-а?— деб ўрнидан турди.

Фаррух боши билан маъқуллаб, ундан узоқлашди. Қаҳвахонадан чиқиб, ёлғиз уйига кетди.

Фаррух кўп фикр юритгандан кейин янги бир йўл топган эди.

XXX б о б

АМАЛДОР ВА ПУЛДОРЛАРНИНГ ҲАҚШУНОСЛИКЛАРИДАН НАМУНА

Фаррух ҳовлисига боргандан кейин хонасига кириб, креслога ўтирди. Бир оз ўйлагач, тортмадан оқ қоғоз олиб, ёза бошлади.

У Сиёвуш Мирзога хат ёзишга жазм қилди. Фаррух Сиёвушни ўлимдан қутқазганида Сиёвушнинг «қай вақт, қандай буйруғингиз бўлса, бажо келтиришга тайёрман», деган сўзини назарда тутиб, ундан бир илтимос қилмоқчи бўлди.

Қалам бир неча минут қоғоз устида юриб турди. Фаррух ёзган хатини бир-икки мартаба кўздан кечириб, янглишларини тузатди. Кейин уни овоз чиқариб ўқи-моққа бошлади:

«Янги дўстим!

Янги вужудга келган дўстликда бундай илтимослар ўринсиздай кўринса ҳам, аммо у кўрқинчли кечада: «қай вақт, қандай буйруғингиз бўлса, бажо келтиришга тайёрман», деган сўзингизни эслаб, айниқса шахсан ме-

нинг учун жуда ҳам муҳим бўлган тубандаги илтимосни ерига етказишингизни сиздан сўрар эдим:

Авалло, оғойи Ф... уссалтананинг қизи Маҳин менинг аммамнинг қизи, яна тўғриси, менинг севгилим бўлгани учун унга уйланишдан воз кечасиз. Иккинчидан, дарҳол унга уйланишга рози эмаслигингизни ва бу ишнинг имкониятдан ташқари бўлганлигини ўз отангизга ва Маҳиннинг отасига билдирасиз.

Менинг бу илтимосларим биринчи қараганда, жуда қизиқ ва ғайритабиий бўлиб кўринса ҳам, бироқ мен билан Маҳинни текшириб кўргангиздан кейин ишнинг табиғати тушунасиз, ҳам сизга шу хатни ёзишга журъат этганимни ноҳўя деб ҳисобламайсиз.

Сизни чинакам дўст деб билган Фаррух Дақиқ».

Фаррух хатни конвертга солиб «эрта билан юборман» деб қўйди. Шу пайтда Шукуфанинг ҳам эрта билан келишини, Маҳиннинг хатига жавоб олиб кетмоқчи бўлганини эслади-да, янгидан қаламни қўлига олиб, қуйидаги хатни ёзмоққа киришди:

«Севгилим Маҳин!

Кеча энг сўнги юборган хатингни олиб ўқидим. Бир неча йиллардан буён талай қийинчиликка учраган нозик бир виждоннинг шундай оғир турмушдан чарчаб, тинкаси толганлигини тасдиқ қилсам ҳам, бироқ ҳаётга аччиқ қилиб, ярамас фикрга боришни ожизликдан бошқа ҳеч бир нарса деб айта олмайман.

Азизим, агар ижозат берсанг, бундан уч ой илгари юз берган ва балки бизнинг бундан сўнги ҳаётимизга боғлиқ бўлган кичкина бир воқеани сенга ҳикоя қилиб бераман.

Бундан уч ой муқаддам кечаси, фоҳишахоналардан бирида, бир маст казак қўлидаги тўппончани бир йигитнинг чаккасига тираб, уни ўлим билан қўрқитиб турар экан, ўша пайтда ўтиб кетаётган бошқа бир йигит ҳалиги уйга кириб, ҳаёти хавф остида қолган йигитни фожиали ўлимдан қутқазиб қолади.

Азиз Маҳиним! Казак қўрқитиб турган йигит сенинг бўлажак эринг Сиёвуш Мирзо эди, уни қутқазиб олган йигит бўлса, сенинг ҳақиқий севгилинг, яъни мен эдим.

Энди менинг нима демоқчи эканимни билган бўлсанг керак. Яъни, Сиёвуш Мирзо менинг олдимда анчагина қарздор. Бахтим ёр бўлиб, кеча ёзган хатингнинг таъси-

ри билан хиёбонга чиқиб, хаёл суриб юрганимда, тўсатдан унга дуч келдим. У менга ўзини жуда яқин тутди. Ҳозир унга бир хат ёздим. Шу қилган яхшилигим эвазига сенга уйланишдан воз кечиб, шу ишни ўз отасига, ҳам сенинг отанга хабар беришини илтимос қилдим. Севгилим! Демак, яна бир умид бор! У сенга уйланишдан воз кечса, отанг бошқа бир куёвни топши учун шарт-шароит қидиргунча бирталай вақт ўтади. Балки, шу ўртада бизга бир йўл очилиб қолар.

Азизим! Умидсизланма! Муҳаббат тангриси бўлган Чўлпди юлдузи, яъни ишқ тангриси бизни унутмас.

Сени узоқдан ўйиб қолувчи Фаррух Дақиқ».

Бу икки хатни ёзиб бўлгандан кейин Фаррухнинг аҳволи бир оз енгиллашгандай бўлди. Жиндаккина овқат еб, ётоғига кириб чўзилди.

Бу кун биринчи кеча эдики, Фаррух бир томондан умидвор бўлганлиги учун, Жаводни унутаёзган, у тўғрида кам ўйлар эди.

Эрта билан соат олтида, Фаррух чой ичиб ўтирган вақтда, Шукуфа кириб келди. Фаррух уни очиқ юз билан қабул қилиб, Маҳин учун ёзиб қўйган хатни топширди ва Маҳиннинг аҳволини сўради. Шукуфа ҳам Маҳиннинг аҳволи аввалгидан яхши эканлигини ва бошқа бир ҳодиса юз бермаганини айтди. Фаррух бу хабардан жуда севиниб, хатни Маҳинга дарров етказишни буюрди. Шукуфа хатни олиб чиқиб кетди.

Фаррух чол хизматкорини чақириб, Сиёвуш Мирзонинг адресини бергандан кейин, ёзган хатини топшириб, дарров жавоб олиб келишини буюрди. Бобоҳайдар деган бу хизматкор чол латта кавушини кийиб, оғосига:

— Оғо, мени қариб қолган деб ўйламанг, бир соатга қолмай етиб келаман,— деб уйдан жадал чиқиб кетди.

Кейин Фаррух ҳам кезиб келгани хиёбонга чиқди.

Фаррух ўзича: «Агар Сиёвуш Мирзо хўп деса, Маҳин тарафидан тинчиб қоламану, бечора Жаводни қутқазинш ҳақида ўйлайман. Қандай бўлса ҳам, уни ўша қўрқинчли ердан халос этишим керак», деб ўйлар эди.

Чиндан ҳам, бечора Жавод, уч ой — тўқсон кундан буён назмия қамоқхонасида азоб чекар эди.

Фаррух Жаводнинг тўқсон кундан буён тириклай қабр ичида қолганини ва уни қутқаза олмаганлигини ўйлаганда, шундай асабийлашар эдики, аччиғидан ер

тепиниб, гўёки одамлардаги виждонсизликни ер билан баравар қилиб, устидан топтамоқчи бўлар эди.

Жавод! Тўқсон кун қоронғи қамоқ! Юз дарра! Яна олти ой қўшимча қамоқ! Чиндан ҳам бу виждонли бир йигитнинг ғазабини қайнатадиган, юрак уришини кучайтирадиган масала эди.

Фаррух шундай хаёллар билан икки соатча хиёбонларда кезмоқда эди. Фаррухнинг бахтига, бу хиёбонлар камқатнов эди. Серқатнов кўчалар шаҳарнинг жануб тарафида. Бу ерларда аспжаллобларнинг от савдоси устида «бор барака»лари, олди-берди ишларидаги жанжал суҳбатлари, туя карвонларнинг келиб-кетиши, доим катта бир тўполон, шов-шув кўтариб турарди. Техроннинг шимолий қисмида эса ҳаминша жимжитлик ҳукм сураб эди. Кечқурунларигина «ҳаво олиш учун» ёхуд ахлоқсизлик қилиш учун бир тўда француз тақлидчилари бўлган йигитлар бу ерда кезар эдилар.

Фаррух юришдан чарчади. Секин-секин уйига қайтди. Бироқ, Бобоҳайдар ҳали Сиёвуш Мирзодан жавоб келтирмаган эди. Фаррух яна бир соатча уни кутди.

Сўнгра Бобоҳайдар терлаб-пишиб, ҳарсиллаб-гурсиллаб ичкарига кирди-да, қўлидаги хатни оғосига узатиб деди:

— Оғо, сиздан илтимос қиламан, аввало шуки, бундай одамларга хат ёзмам. Ёзсангиз ҳам, мен олиб бормайин.

Фаррух хатни очмасдан бурун Бобоҳайдардан бунинг сабабини сўради. Бобоҳайдар бошига келган воқеаларни ҳикоя қилиб кетди:

— Мен Сиёвуш Мирзонинг ҳовлисига борганимда, эшик олдида хизматкори бир одам билан гапиришиб ўтирган экан. Салом бердим. Қўлимдаги хатни бериб, оғоси Сиёвуш Мирзога топширишини сўрадим. Хизматкор мени бошдан-оёқ қараб чиққандан кейин, шу хат орқали оғомдан хизмат сўраб келган бўлса керак деган хаёлда ғайирлик қилди, менга жиндай ҳам эътибор қилмасдан, яна бояги киши билан сўзлашувда давом қила берди. Ярим соат шундай ўтди. Ахири, жаҳлим чиқиб кетиб: «Хатни оғонга олиб бориб бермайдиган бўлсанг, мен ўз оғомга қайтариб олиб бораёман», дедим. Хизматкор бошини кўтариб: «Ия, ҳали бу хатни бошқа одам юборганми?» деб сўради. «Ҳа, хатни менинг оғом Сиё-

вуш Мирзога юборган», дедим. Хизматкор, балки бу хат шошилиндир, кечикиб қолгани учун оғомга зарар келару, натижада мени жазога дучор қилар, деб қўрқиб, дарров хатни олиб кириб кетди. Ун дақиқадан кейин қайтиб чиқиб: «Оғом ҳозир ваннада эканлар. Ярим соатлардан кейин чиқиб хатни ўқийдилар. Жавоби керак бўлса, ярим соат кутиб турингиз», деди.

— Оғо, сиздан яширадиган гап йўқ. Мен бунақа ишларга тоқат қила олмайман. Ахир, қадимгиларда бошқа бир қоида-ю, бошқа бир муомала бор эди. Шундай вақтларда ҳамкасблар бир-бировига ҳеч бўлмаганда, бир пиёла чой қуйиб ёки чилим солиб берар эди. У ноинсоф шуни ҳам билмайди. Менинг ҳам жаҳлим чиқиб, ўз-ўзимча оғзимга келганини қайтармай, шундай ишларни юзага чиқарган маршрутага ва маршрутчиларга лаънатлар ёғдирдим. «Жуда яхши, мана шу яқин ўртадаги қаҳвахонага кириб, бир оз дам олиб тураман» деб... хиёбонидаги қаҳвахонага бордим. Тўрт стакан чой ичиб, уч мартаба хумор тарқатиб, соатни аранг ўтказдим-да, қайтиб келдим. Хизматчи мени кўриши билан:

— Оғом ваннадан чиқдилар. Ҳозир хатни ўқиб, жавобини ёзаётирлар,— деди. Ярим соат яна кутиб ўтирдим. Уч мартаба хумор тарқатиб олдим. Энг охири ичкаридан хизматчини чақириб қолишди. У ҳам югуриб кириб кетди-да, оғоси ёзган хатни чиқариб, менга берди. Хизматчи хатни менга берар экан, ичкаридан қаҳ-қаҳ уриб кулаётган бир одамнинг: «Аҳмоқ одам мендан қанчалик бўлмаган илтимосларни қилибдир», деганини эшитдим. Ахир, нима ҳам деяйки, замон бузилган, замон!

Фаррух бу сўзларни эшитиб бўлгандан кейин, хатни очиб ўқиди. Яна бир қайта ўқиди. Пешонасида совуқ тер томчилари кўрина бошлади. Ҳазрат Сиёвуш Мирзо Фаррухнинг хатига шундай деб жавоб қайтарган эди:

«Муҳтарам оғо!

Бўлмағур ва бўш сўзлар билан тўлган хатингизни ўқидим. Сизнинг шу қадар тушунчасиз бўлганингизни, яъни тез орада мендан шунчалик ўринсиз илтимослар қилиб юборганингизни кўриб, тўғриси шуки, жуда ҳайрон бўлдим.

Муҳтарам оғо! Бизларни шахзода дейдилар. Менга ўхшаган йигитлар бир кишидан фойда қилишимизни билсак, сиртдан қараганда, ўзимизни унга яқин кўрсатамиз. Аммо ундан фойда чиқмаслигини сезган онимиз-

даёқ уни ташлаб, юзимиз эмас, орқамизни ўирамиз. Мени сизга ўзимни яқин кўрсатишим атиги, балки яна бир ўрни келиб қолган вақтда менга хизмат қила оларсиз, масалан, яна бирор тасодиф бўлса-ю, шундай бир фожиаали ҳалокатдан қутқазиб қоларсиз нияти билан эди.

Менинг тарафимдан сизга бирорта ёрдам бўлади, деб хомхаёлга, ўринсиз фикрларга тушган бўлсангиз, янглишасиз. Маҳин аммангизнинг қизи бўлишининг менга ҳеч қандай алоқаси йўқ. Ҳатто, у сизнинг севгилингиз ё махфий жазманингиз бўлса ҳам, менинг манфаатимга путур етказа олмайди. Отам уни менинг учун олмоқчи. Мен ҳам қабул қилганман.

Сиздай бир одамнинг истаги учун беш юз минг туманлик катта бир давлатдан воз кечсам, мени аҳмоқ деб атайдилар. Илтмосингиз ноўрин эканини ўзингиз ҳам тасдиқ қилсангиз керак. Менинг сизга устингиздан кулиш ва масхаралашдан бошқа жавобим йўқ.

Муҳтарам ого! Хафа бўлманг, қайғурманг, орқамдан ёмоқотлиқ қилиб сўкманг. Чунки, биз, шаҳзодаларнинг луғатида инсоф, диёнат ва ҳақиқатдай сўзларнинг ҳеч қачон маъноси бўлмаган ва бўлмайди.

Хатингизни ўқиб, сизни масхаралаб кулувчи шаҳзода Сиёвуш Мирзо».

Фаррух хатни ўқир экан, аламига чидолмасдан, Сиёвуш Мирзони тубан деб атаса ҳақли бўлармиди?

Фаррух уни ўлимдан қутқазган эди. Фаррух ўша кунни кечаси постда турган полициячи каби, эшитган фарёдига эътибор бермасдан ўтиб кета берса, Ҳасан Ризо дунёни шундай виждонсиз ва тубан кишиларнинг биридан тозаллаган бўларди. Бироқ, у қалбидаги одамгарчилик ва ожизларга ёрдам бериш сезгисининг аксича ўлароқ, мазлумларнинг фарёдига қулоқ осмай кета олармиди?

Фаррух бошдан-оёғигача ҳақорат билан тўлган бу хатни ўқигандан кейин ҳеч бир нарса сўзмаган, кўрмаган каби, ҳушидан кетиб қолди. Бирданига ўз кўкрагига қаттиқ бир мушт урди-да: «Агар сен ўша кечаси шундай тубанларни ўлимдан қутқазиб мени мажбур қилмасанг эди, у бу кун менинг рақибим бўлиб, мени ҳақорат қилмас эди», деди.

Бечора Фаррух сўнгги кунларда шунчалик қийналган эдики, тик туришга ҳам мажоли қолмаганди. Айниқса, бу хат унинг асабини бузган, ҳолдан тойдирган эди.

Ортиқ чидай олмасдан ўз уйига кириб кетди-да, каравотга ташланди.

Бир соатдан кейин уни иситма олиб, аста-секин иситмаси зўраймоққа бошлади. Кўп ўтмасдан теваракдаги кишиларни таний олмайдиган бир ҳолатга тушди. Онаси ўрнига она бўлиб қолган энагаси каравотнинг бош тарафда ўтириб, юзини елиб, пиқ-пиқ йиғлар эди.

Ҳар тарафдан умиди кесилган бечора йигитнинг касал бўлишга ҳаққи бор эди. Икки кундан кейин Маҳинининг унаштириш ва Жаводнинг дарралаш маросими бўлар эди.

XXXI боб

БАХТСИЗЛАРНИНГ КЎЗ ЕШЛАРИ ОҚҚАН ЖОЙДА

Эрталаб қуёш аллақачон жұтарилган, ҳаво тонгла ёққан салгина ёмғирдан кейин жуда мусаффо, ора-сира киши руҳини эркалайдиган майин шабада эсмоқда эди.

Техрон аҳолисининг кўпчилиги уйқудан уйғонган, баъзиси уйғонмоқда, бир қисми бўлса, ҳали ширин уйқуда.

Биринчилар, яъни уйқуни ўзига ҳаром қилиб, каллайи саҳарлаб турадиганлар, кечгача қўлидаги икки-уч қиронли дастмоя билан кундалик тирикчилик харажати чiqаришга уринган кишилардир. Булар аҳолининг учинчи табақасидан саналган кишилар бўлиб, кўплари қўрга кўмган лавлаги, сут, нўхатшўрак ва шундай нарсаларни тоғораси билан бошларига қўйиб, айланиб юриб сотувчилардир.

Иккинчилар, яъни эндигина уйқудан уйғониб ўрnidан турмоқчи бўлганлар, ўз маишатларини таъмин этган ва бир оз роҳатда яшашга бошлаган кишилар. Булар кўпинча ўз кунларини сиёсат сўқиш билан ўтказувчи, баъзан инсоннинг отаси маймун, бобоси дев каби олди-қочди сўзларга қойил қолувчи кишилардир. Булардан бир қисми Фарбий Европа тақлидчилари, бир қисми араблашган оғолар. Буларнинг бир қисми сўзлашганда, мумкин қадар европа терминларини қўшиб сўзлашни яхши кўрадилар. Қолган бир тўдаси эса, ўз сўзларини арабий иборалар билан безатишни диннинг асосларидан санайдилар. Биринчилар маданият номидан аҳолининг бир қисмини ўз теваракларига йиғиб,

қурол қилганларидай, иккинчилари ҳам дин номидан қалқни аҳмоқ қиладилар.

Ғарбий Европа тақлидчилари мустақкам бир эътиқодга эга бўлмаганлари сингари, араб тақлидчилари ҳам интизом ва қонун аслида диннинг аксига ишлайди деб ҳисоблайдилар. Бир озгина пул биринчисининг эътиқодини ўзгартгани каби, иккинчиси ҳам аввалгисининг йўлидан боради.

Булар алдоқчи ва жанжалкаш бўлганлари учун, унчалик тез туриб, уйқуни ўзларига ҳаром қилишни истамайдилар. Бир қарасанг, соатсоз, бир маҳал сиёсатчи, бир кўрсанг, муҳаррир, баъзида ваҳимали хабарлар босиб чиқарувчи, дам ўтмай митинглар чақириб турувчи мана шуларнинг ўзи. Булар сувга ташланган бир варақ қоғозга ўхшайдилар, сув қаёққа оқса, улар ҳам ўша тарафга қараб оқадилар. Аслига қарасанг, булар — ҳар нима бўлса ҳам яхши деган жумлани ёлғондан қабул қилувчилардир.

Ҳали ҳам ноз уйқудан уйғонмаган учинчи тоифа баъзи одамларнинг фикрича, шундай бахтиёрлик ва шунча мол-дунё тақдири азалда пешоналарига ёзилган кишилардир. Булар икки шаклдадирлар: ё пайпоқли, шопмўйловли, ёхуд салла, чопонли. Булар, текинхўрларни боқувчи текинхўрлар, ўғрилар устидан ҳукм чиқарувчи ўғрилар, ақлли кўринган аҳмоқлар, онгсиз халқни алдовчи гумроҳлар, ислом либосига ўралиб ҳар турли қабихликлар қилувчи бешарм «табаррук» кишилардир. Булар кучсизларни ўлдирувчи, ўз қўл остидаги халқларни оёқ ости қиладиган, инсон болалари ҳар қандай қонуний ҳуқуққа эга эканини қабул қилмайдиган, ўғрилик билан топган молларни «худо берган» деб, онгсиз халқнинг кўзини бўяйдиган беҳаёлардир. Агар камбағаллар қўлни қўлга берсалар, уларнинг барча бойликлари бир соатнинг ичида қўлларидан кетишини хаёлларига ҳам келтирмайдиган кўр, ғофиллардир.

Булар — амалдорлар, аъёнлар, давлатмандлар, депутатлар ҳамда вазирлардир. Буларнинг отлари миллатнинг йўлбошчилари. Аммо ўзлари бўлса, одам гўштини егувчи, одам баданига тушган қуртлардир.

Бўлар — тўғри ва доимий бир иш билан шуғулланмайдиган кишилар. Илм ва озодликка душман, кўпчиликнинг, айниқса хотин-қизларнинг нодон қолишидан манфаатдор кишилардир.

Булар пул кучи билан қўлга туширилган бир тан-
нозин то пешингача қучоқлаб ётиб, пешинда минг ма-
шаққат билан ўринларидан туриб, чой, қаҳва, какао,
сут, ҳар хил ширинликлар билан нонушта қилиб, бир
онлашинг бир ҳафталик чиқимини бир соат ичида мешдай
қоринларига жойлайдиган кишилардир. Нима учун?
— Чунки, бир тўда ҳушомадгўй ва ювиндихўрлар,
уларнинг теварагига тўпланиб, ўғрилик қилиб топган
мол-мулкларини «худо берган» деб ишонувчилар, булар-
нинг муриди ва қуллари бўлиб қолгандирлар.

Қандай бўлса ҳам асосий мақсаддан узоқлашмайлик.

Шундай бир кунда, ўлгудай тор ва сассиқ бир ерда,
тўқимга ўхшаш ифлос эски бир парча нарса устида
тинка-мадори қуриган бир киши узала тушиб ётар эди.
Лекин бир маромда эшитилиб турган нафасининг овози-
дан тирик эканлиги маълум эди. Бу ер зах ва сассиқ бў-
лишидан ташқари, жуда қоронғи эди. Тез-тез сичқон
ва каламуш сингари махлуқларнинг гивирлаб чиқиб ту-
ришлари бу заиф гавдани ногинч қилиб, ҳаракатга кел-
тирар эди.

Бу ер Теҳрон назмияси қамоқхонасининг бир киши-
лик камераси — яккахонаси ва у одам эса, ҳеч гуноҳи
бўлмасдан, тўқсон кундан ортиқ шундай қийноқларга
учраб ётган бечора Жавод эди.

Бечора йигит, бу ердан қутулиб, тўрт ой бундан ав-
валги каби, гарчи эҳтиёжлар, қийналишлар билан бўлса
ҳам, яшамоқни ич-ичидан ҳар соатда орзу қиларди. Баъ-
зида онасининг, баъзида етим жиянларининг аҳволини
кўз олдига келтириб, ўз-ўзича: «Фаррух менинг аҳво-
лимни назарга олиб, ўша бечора етимларга ёрдам қила-
ётганмикин?» дер эди.

Бечора йигит бу қийинчиликларнинг таъсиридан шу
даражада шошган, шу даражада ақлини йўқотган эди-
ки, оғойи Ф... уссалтананинг кўнгли кўтарилсин учун, бу-
тун олам унга озор беришга тайёр каби эди.

Шунчалик ўринсиз қийинчиликларга бардош берган
бир йигитнинг телбаларча хаёлга шўнғиб, умидсизликка
тушишга, бутун дунёдаги покизалик ва адолатни инкор
қилишга ҳаққи йўқмиди? Нима учун? У нима қилибди?
Одам ўлдирибдими? Бировнинг номусига тажовуз қи-
либдими? Ёки у ердаги афсона ва хурофотлар сўзлаб
турган бир жоҳилнинг зиддига гапирибдими, давлат-
мандларнинг кирдикорини фош қилмоқчи бўлибдими, юз

мингларча хиёнатлардан бирортасини очибдими, амалдорларнинг виждонсизлигини очиб ташламоқчи бўлибдими, чет элдан келган бир кишининг зарарига бир иш қилибдими? Ахир, нима гуноҳ қилибдики, шунча азобуқубатларга дучор бўлиб қолибди?

Йўқ, ҳеч қайсисини қилмаган, бечора Жаводнинг энг катта гуноҳи — онласининг тирикчилиги учун, рўзгорини таъминлаши учун Фаррухга хизматга кириши эди.

Жавод қишлоқнинг қўрғончасида тутилган вақтда шунчалик қийноқларга учрашини сира хаёлига келтирмаган эди. У оғойи Ф... уссалтананинг номини ҳам эшитмаган эди. «Ҳозир жаҳл билан мени қўлга тушириб бермоқчи, балки бир неча кун ёки бир неча соатдан кейин қўйиб юборар», деб ўйлаган эди.

Бечора Жавод бундай жазоларга гирифтор бўлишини хаёлига ҳам келтирмасди. Чунки, ўзида бир гуноҳ сезмас ва атрофидагиларнинг ҳам бу даражада золимликларини билмас эди. Уни назмияга олиб борган вақтларида, у ўз-ўзига: «Минбаъд бунақа ишларни қилма, деб қўрқитмоқ учун бу ерга олиб келяптилар. Насиҳат қилиб, қамоқxonани кўрсатганларидан кейин, қўйиб юборадилар» деб ўйлаган эди. Лекин, полициячилар билан бирга назмияга кирар-кирмас қамоқxона раисининг:

— Оғойи Ф... уссалтана топширган одам шуми?— деб сўзлаганини эшитиб, фақатгина қамоқxonани кўрсатиш билан қўйиб юбормасликларини англади.

Полициячилардан бири дарров олдинга ўтиб қўлини чаккасига қўйиб:

— Балли, оғойи раис, худди шунинг ўзи,— деди.

Раис юзини ёнидаги ўзига тобе бўлган бир офицерга ўгириб:

— Ого, қайси камералар бўш?— деб сўради. Офицер бўлса:

— Умумий камерада бўш ўрин йўқ. Икки кишилик жойларнинг ҳам ҳаммаси банд. Фақат яккаxоналардан учтаси бўш,— деди. Қамоқxона раиси бу уч даража ўртасидаги фарққа эътибор бермасдан:

— Жуда яхши, бўлмаса олиб боғиб яккаxонага қаманг,— деб буйруқ берди. Шундан кейин шарақлаб кулиб деди:

— Жавод жуда фирибгар одамга ўхшайди.

Жавод бу гапни эшитгандан кейин полициячилар ҳазиллашмаётганларини англади.

Қамоқхона ўлгудай қоронғи эди. Жавод у ерга пешин вақтда қамалган бўлса-да, лекин у ер кечасидан ҳам қоронғироқ эди. Шунчалик қоронғиликка ўрганмаган кўзлар, ўн беш дақиқа чамаси косасидан чиққудай бўлиб, ҳар тарафни ахтаргандан кейингина қамоқхонани илғай олди.

Жавод чарчоқ ва уйқусиз эди. «Ҳеч бўлмаса ётиб бир оз ҳордиқ олай», деб ўша чиркин бир парча нарсанинг устига ётди. Кўзларини юмди. Ухламоқчи бўлди. Бироқ ёта олармиди?

Йўқ! Чунки, кишининг дунёга ва ҳаётга қанчалик боғланиши бўлмаса ҳам, одам боласидаги виждон, инсоф ва ор-номуснинг шу даражага етгандигини кўра туриб ҳамда важсиз ва далилсиз шундай қийноқларга учраб қолишга чидаёлмас эди.

Жавод ҳар қанча ўйласа ҳам, қайси гуноҳининг жазосини тортаётганини тушуна олмасди.

Ҳар ҳолда уйқу голиб келди. Соатлар ўтди, бечора йигит бирдан кўзларини очди. Лекин кундузи очилишга ўрганган бу кўзлар қаерда ва қандай аҳволда эканлигини унутиб, «ҳали тонг ёришмабди» деб, яна юмилди. Яна бир соат ўтди. Жавод яна уйқусидан уйғонди. Лекин, ортиқ уйқу уни зериктирган эди. Ёта олмаслигини тушунди. Бир овоз эшитди. Шу пайт қамоқхонанинг кичкина дарчасидан заиф ва сарғич бир нурнинг ичкари қараб кириб келаётганини кўрди. «Эҳа, энди кеч бўлган экан», деб ўйлади. Бу ёруғ қамоқхона йўлагига ёқиб қўйилган жинчироқ нури эди.

Жавод қамоқхонага пешин пайтларда келтирилгани учун унга овқат олиб келмаган эдилар. Усиз ҳам Жаводнинг шундай ҳодисалардан кейин иштаҳаси бўғилган эди. Жавод майда, лекин ўткир тишлари билан оёғини тишламоқда бўлган бир сичқондан ўзини қўриқламоқчи бўлган чоғида эшик очилди. Жавод чала қоронғи йўлакда, бўйнига оқ рўмолча ўраган бир полициячининг ичкарига кирганини кўрди. Полициячи қўлида олиб келган кичик бир тунука тоғорачани, бир парча нон, бир пиёла сув билан унинг ёнига қўйиб, дарров чиқиб кетди. Эшик яна аввалгидай бекилди. Орқа томондан қулф урилганлигининг ҳам овози эшитилди.

Жавод оч эди. Дарров қўлини тоғорачадаги овқатга узатди. Овқат совуқ эди. Озгина татиб кўрган эди, қуртоба экан. Жавод: «Йилнинг шу фаслида ҳам қуртоба

қилинар эканми?» деб ҳайрон бўлган бўлса ҳам, лекин шундай бир ерда бу ҳам ғанимат, деб ичмоққа бошлади. Нон ҳам арпа нон бўлиб, еб бўладиган эмасди. Лекин қуртобага қараганда ҳар ҳолда еса бўладиган нарса эди. Қуртоба худди ўтган йили қишда пиширилганга ўхшарди. Жавод бу кечаси фақат арпа нони билангина қорнини тўйдириб, қуртобага қўл ҳам урмади. Жавод кечаси билан хаёл сурди. Онаси, онаси ва унинг икки етимчаси ҳақида ўйлар эди.

Фаррух гарчи уларнинг бир ойлик харажатларига етарли пул берган бўлса ҳам, лекин: «Балки, бу ерда кўпроқ ётиб қоладиган бўлсам, уларнинг аҳволи нима кечади?» деб ўйламоқда эди.

Жавод шу қисқа муддат ичида Фаррухни жуда яхши таниб олгани учун унинг софдил ҳам ахлоқли йигит эканини билгани учун: «Фаррух бир амаллаб уриниб, мени бу ердан қутқазиб олар, бу ҳам мумкин бўлмаса, онланинг харажатини бериб турар, оч қолдирмас», деб ўз-ўзига таскин берар эди.

У кеча ҳам ўтди. Эртасига эрта билан ҳеч қандай янги воқеа юз бермади. Яна кеч бўлди. Лекин, чошгоҳга яқин кечаги полициячи яна келиб, кечагидай бир оз арпа нон билан жиндак пишлоқ қўйиб кетди. Жавод бу кечаси ҳам сичқон ва каламушлар билан умр ўтказиб, бадбўй ҳаво ютиб чиқди. Сониялар ўтган сари Жавод ишнинг чинакам эканлигини ва оғойи Ф... уссалтана у билан ҳазиллашмаганлигини, тўғридан-тўғри қамоқда унинг йўқ бўлишига ҳаракат қилаётганлигини сезмоқда эди. Учинчи кун, эрталаб соат ўнлар чамасида камеранинг эшиги очилиб, иккита қуролли полициячи ичкари кирди. Улардан бири:

— Қани, чиқ! — деди.

Жавод ўз-ўзича: «Овойи Ф... уссалтана менинг аҳволимга ачинган бўлса керак, ёинки Фаррух бир йўл топиб, мени қутқазиб олиш учун буйруқ олган бўлса керак», деб ўйлаб, дарров ўрнидан турди-да: «Худоё худовандо, бу ерни ҳеч кимга кўрсатма!» деб эшикдан чиқди.

Лекин полициячилар уни ўртага олиб, қамоқхона ҳовлисидан ўтиб, эшикка томон олиб келаётганларига ҳайрон бўлди.

Эшикка етар-етмас куннинг нуридан қамашган кўзлари рўбарўдаги майдонда уларга қараб келмоқда бўлган бир йигитга тушди. Жавод кўзларига яна бир

оз қийинчилик бериб бўлса ҳам Фаррухни таниди. Фаррух қўлини оғзига олиб бориб, уни гапирмасликка ишорат қилганлиги учун ҳеч нима демади.

У икки полициячи ҳам уни қамоқхона эшигидан чиқариб олиб кетмоқда эдилар. Жавод қаерга олиб бораётганликларини билмаган бўлса ҳам, лекин шаҳарнинг жануб тарафига қараб кетмоқда эканларини тушунди. Уни Долони беҳишт хиёбонидан ўтказиб, бир оз ўнгга ва уч тарафга қараб айрилиб кетадиган уч кўчанинг ўртасида яна чапга, энг сўнгида Дарбор кўчасига кириб, уч юз қадамча юргандан кейин, оқ эшиклик катта қадимий бир иморатга олиб кирдилар.

Бечора Жавод суд маҳкамасига келганини англади.

Жаводни руҳонийлар ва крахмал ёқали европа тақлидчилари билан лик тўлган бир ҳовлидан ўтказиб, сўнгга кўк эшикли бир хонага олиб кирдилар. Жавод бу уйда пакана бўйли, шопмўйловли бир кишининг катта бир ёзув столи ёнида ўтирганлигини кўрди. Полициячиларнинг бири дарров унга яқинлашиб:

— Оғойи раис ярим соат бурун телефон орқали сиз ҳазратимга хабар қилган маҳбуслари мана шу одам,— деди.

У киши бу сўзни эшитар-эшитмас қулоғига қистириб қўйган қаламини қўлига олиб, бир варақ қоғозга ёза бошлади.

— Отингиз нима?

Жавод отини айтди. У одам терговга бошлаб, уни бир соатча тергади. Лекин ҳеч нарса тушуна олмади. Чунки Жавод:

— Мен Чаламайдон маҳалласидан бўламан. Фаррух деган йнгитнинг хизматкориман. Унинг билан Кўшки Нусратга бориб келганимдан бошқа бир сўзни билмайман,— деди. Шунинг учун ҳам терговчи берган саволларнинг кўпи жавобсиз қолган эди.

Терговчи:

— Билиб қўй, айбингга иқроор бўлмасанг, сени ўтда ёндираман, суяқларингни синдираман, қопга солиб, Шамсул-иморанинг¹ тепасидан ташлатиб юбораман!— деб дўқ уриб, саволларини тугатди-да, Жаводни қамоққа қайтариб юборди.

¹ «Шамсул-имора» — «Қасрлар қуёши» — Техрон шаҳридаги энг юксак биноларидан бири. (Ред.)

Жаводнинг иқрор бўладиган бирор айби бормиди?

Кунлар ўтди. Ҳафтанинг икки кунда бечора Жаводни икки соатга қамоқдан чиқариб, тергов учун шу ерга олиб келар эдилар. Жавод ҳам бир неча соат қамоқхонанинг сассиқ ҳавосидан халос бўлиб, тоза ҳаводан фойдалангани учун ўзини бахтиёр санар эди.

Икки ярим ой ўтди. Жавод кундан-кунга ориқлаб, заифлашар эди. Энг сўнгида бир кун терговчининг: «Энди сизнинг терговингиз тугади», деганини эшитди.

«Қамоқдан қутуламан, шекилли», деб терговчини дуо ҳам қилиб қўйди.

Яна бир ҳафта ўтди. Ҳеч кимса уни қутқаргани келмади. Жавод тамоман касал бўлиб қолган эди. У одам ва нарсаларни ажрата олмайдиган ҳолга келди.

Бечора кимдан ҳам паноҳ қидирсин?

«Фаррух ҳам мени унутиб юборган, онамни, опамнинг етимларини ҳам унутиб юборган бўлса. Оҳ, балки бечоралар очдан ўлгандирлар», деб ўз-ўзи билан сўзлашар эди. Бечора Жавод ақлдан озиш даражасига етган эди.

Бир кунги эрта билан бирданига қамоқхонанинг эшиги очилди. Жавод эшикда ўнта қуролли полициячи туриб, уни ташқарига чақираётганларини кўрди.

Жавод яна бир қайта ўз-ўзини юпатиб, тергов натижасида гуноҳсизлигим аниқланибди, мени қутқазгани келибдилар, деган хаёл билан ирғиб ўрнидан турмоқчи бўлди. Лекин тура олмай, боши айланиб, йиқилди. Полициячилар келиб, уни ердан кўтариб олган бўлсалар ҳам Жаводнинг қимирлашга дармони етмас эди. Қўлтиғига кириб, уни қамоқхона ҳовлисида ўтказиб, назмиянинг қаршисидаги майдончага олиб бордилар.

Жавод заиф тортиб қолган кўзлари билан теваракка қарар эди. Майдонда йигирмага яқин полициячи давра қуриб турар эдилар. Ана шу давранинг ўртасида сепоя (уч оқли курси) турарди.

Полициячилардан иккитасининг қўлида симдан тўқилган дарра бор эди. Полициячилар даврасининг ташқарисида бўлган Техроннинг бекорчи, томошабин эркак ва хотин-қизларидан бир тўдаси йиғилиб, Жаводнинг дарраланишини томоша қилгани келган эдилар. Бечора Жавод юз даррага ҳукм қилинган эди.

Жаводнинг кўз олдлари қоронғилашиб кетди. У ноинсофлик ва виждонсизликнинг бу даражага етганини тасаввур эта олмасди.

Албатта бу дарралар, бу кун бўлмаса, бошқа бир кун буларнинг қўлидан тортиб олинади ва шундай бадбахтликларга сабаб бўлганлар дор остида мазлумларга таъзим қилишга мажбур этиладилар.

Жавод тамоман ҳаракатсиз қолди. Полициялар уни судраб майдоннинг ўртасига олиб келдилар. Жаводнинг ҳатто қўлини қимирлатишга ҳам мажоли етмасди. Уни сепояга маҳкам боғлаб, кўйлагини ечдилар. Сепоянинг икки тарафида турган икки полициячининг дарраси Жаводга навбатма-навбат ёғила бошлади. Дастлабки дарралар Жаводнинг елкасига тушди. Жавод қичқирмас эди. Чунки, у аллақачон ўзидан кетиб қолганди. Ўтгиз тўққизинчи дарра тушганда томошабинлар ўртасидан бир хотин баланд овоз билан:

— Оҳ, войдод, бу менинг ўғлим-ку! Кечаги ҳафта кўрган тушим тўғри экан!— деб, майдоннинг ўртасига қараб югура бошлади. Давра олиб турган полициялардан бири югуриб бориб, ўғлини қутқазиш учун жон фидо қилиб келаётган онаи милтиқ қўндоғи билан бир уриб, ерга ағдарди. Бечора хотин оғриқнинг зўридан нафаси ичига тушиб кетиб, чўзилиб қолди. Томошабинлардан бир тўдаси кула бошладилар. Улар полициячининг жасоратини олқишлардилар. Аммо, бошқа бир тўда шундай разолатни кўрмаслик учун уятдан бошларини қуйи солиб, кўзларини юмган эдилар.

Ярим соатдан кейин Жаводни яна судрай-судрай назмияга олиб бордилар. У аъзойи бадани титилиб, қопқора қонга буланиб ётар эди. Назмиядан уни замбилга солиб, касалхонага олиб кетдилар-да, хонага киритиб ташладилар. Жавод хонага кирар-кирмас қусди...

Қусуқ қон эди!!!

Ана шу қонун ва одамгарчиликдан бир намуна!!!

XXXII 606

УНАШИШ

Жавод ваҳшиёна дарраланган кун кечқурун, оғойи Ф... уссалтананинг ҳовлисида бирталай эркак ва хотинхалажлар чақчақлашмоқда эдилар. Хотинларнинг мажлиси ички ҳовлида, эркакларники эса ташқарида эди. Лекин эски танишларимиздан бўлган Ҳасанқули билан Ризоқули бу икки тўда ўртасидаги боғланишни ўз уст-

ларига олиб, гоҳ ичкарига, гоҳ ташқарига қатнамоқда эдилар.

Ичкарининг катта залидаги столлар ажойиб қилиб безалган, Европа ва Эроннинг ранг-баранг ширинликлари билан тўлган. Эшик ва дарчаларнинг ҳаммаси бўлиб, турли-туман кийинган хотинлар креслоларда ўтирар эдилар. Хотинлар ҳеч бир рангни унутмаган эдилар. Бирисининг кўйлаги лиму рангли, бирисиники осмоний, бирисиники яшил, бирисиники бинафша ва ҳоказо. Ёш жувонларнинг бирталайи бошларига тўр солган, ўрта ёшлилари бўлса, шол дакана ўраганлар-да, геометрия ҳаваскорлари учун махсус бир шакл яратганлар.

Булар учта-учта, бешта-бешта бўлиб, суҳбатга машғул эдилар. Бири эрининг янги ҳунаридан, бириси Мулла Иброҳим азайимхон дуосининг таъсиридан, яна бошқа бири эрининг ахлоқсизлигидан, яъни хотинлар ўрнига... сингари паст ишларга боғланиб қолганидан, яна бир ўзгаси эри ҳар кун ичун бири мартаба дўппослашидан, эрининг иккита жувон ҳамда янги армани ва европалик ўйнашларидан гапириб, уларнинг яшаганига афсус қилмоқда эди. Яқинда ўтирган бир қиз, ўз ёнида ўтирган ўртоғига севганига ёзган ошиқона хатидан суҳбат қилиб:

— Шундай сўзларни териб ёздимки, бутун сезгиларим титраб кетган эди,— дер эди.

Кўзга бир оз ёши ўтгандай кўринмоқда бўлган, эгнида эски бичиқда, бўйнидан то камаригача тугма қадалган, парча гулли читдан кўйлак кийган, бошига оқ дока рўмолдан дакана боғлаган бир хотин ўтган кунларини орзу қилиб, кажава билан Қарбало зиёратига борганини ҳикоя қилар, темир йўлни чиқарган қофирларга лаънатлар ўқир эди.

Шу ўртада Маликтож хоним мажлисининг ҳар тарафида ўзини кўрсатиб турар, у келиннинг онаси бўлгани учун ҳаворанг чодрасини белига боғлаб, ҳар нафас уйга кириб-чиқиб, меҳмонларни кўздан ўтказиб турар, ходимлардан бирини ширин-шарбатга ва бошқасини меҳмонлар учун чилим солиб келишга буюрар эди. Хотинларнинг ҳаммалари ҳам хурсанд ва шод кўринар эдилар. Баъзиси чиндан ҳам хурсанд бўлганлиги учун, баъзиси бўлса, бундай тўй мажлисида хушчақчақ бўлиш шарт бўлгани учун мажбуран уларга қўшилиб кулар эди.

Ора-сира ёшгина бир жувон, ёнидаги ўртоғининг тиз-
васини чимчилаб:

— Эшикдан кирган отин буви бизга қараяптилар,
сал ўзининг тутиб, одоб билан ўтирсанг-чи,— дерди.

Айниқса, бу ерда ҳамманинг диққатини ўзига тортган
нарса уйнинг ўртасида дутор-танбур билан ашула айтиб
ўтирган яллачилар тўдаси эди. Бу тўда беш кишидан
иборат бўлиб, улардан бири нағма, иккинчиси тор ча-
лар, учинчиси чилдирма, иккитаси бўлса, ўйнар эди.
Уйинчи қизларнинг бири новчагина, иккинчиси пакана-
гина эди. Қора кўз, қора сочли новчаси уйнинг тўрида
эроний ўйинлар билан машғул; қорачадан келган, семиз,
калтабақай, иккинчи қиз эса, уйнинг пастида муаллақ
ошмоқда эди. Демак, шундай ўйин-кулгилар билан
онгсизликлари орқасида, ҳар бир лаззатдан маҳрум
бўлиб қолган бахтсиз хотинларни хурсанд қилмоқда
эди.

* * *

Яна ўша ҳовлининг бошқа бир уйида, яъни ўтганда
бир неча мартаба муҳтарам ўқувчилар билан бирга
кирганимиз Маҳиннинг йиғлаганига гувоҳ бўлган, энг
охирда телба бўлиб қолганидан хабар топганимиз уйда
Маҳин ўтирар эди.

Маҳиннинг олдига оқ ва энг қимматбаҳо ипак товар-
лардан, Техроннинг энг сўнгги модаларида тикилган
янги кийим-бошлар қўйилган эди.

Маҳин аввалги Маҳин эмас. Унинг ранги сарғайган,
чуқур тушиб кетган кўзлари қизарган, ориқлигидан қўл-
ларининг томирлари бўртиб чиққан эди.

Бу кун Маҳин зўрма-зўраки Сиёвуш Мирзога унаш-
тирилар ва никоҳи ҳам ўқилар эди. (Эронда унашиш
куни никоҳ ҳам ўқилади).

У рози эдими? Бу тўйни у чин кўнглидан истар
эдими?

Йўқ, у бошда ҳам рози эмас эди. У бир неча мартаба
Сиёвушга тегмаслигини отасига арз қилган. Сўнггида
ота-онасининг ўжарлиги ва ўзининг чорасизлигини кў-
риб, ўз-ўзини ўлдиришга қарор берган эди. Маҳин ўша
куни эрта билан бутун уйдагиларни катта ташвишга
солди; онаси «сени оқ қилдик, кўк қилдик» деб минг
марта охират азоби билан қўрқитди. Лекин, бундай
қўрқитишлар Маҳиннинг қулоғига кирмас, янги ки-

Йим-бошларини кийиб, ясаниб-безаниш фикрида эмас эди.

Чиндан ҳам никоҳ деган шундай бўладими, эрга тегишнинг қоидаси шуми? Ехуд, динга ишонувчилар шундай зўрлик билан эрга беришни жоиз кўрадиларми?

Маҳин ўзини йўқотиб қўйган эди. У оғзидан боди кириб, шоди чиқиб, бутун оламни ярамас сўзлар билан ҳақорат қиларди. Маҳин телба бўлиб қолган эди.

Маликтож хоним, гўё обрў сақлаш учун, унинг гапларига жавоб бермасдан ялиниб-ёлворар, баъзида бир-талай зийнат асбобларни, баъзида ўзига тегадиган бутун мулкни унга ҳадя қилиш билан алдамоқчи бўлар эди. Онаси шунча меҳмонларнинг ўртасида ўзини ҳам, ерини ҳам расво қилиб, обрўларини тўкмаслиги учун тиришар эди.

Маҳин бундай сўзларга алданувчи ва мол-мулкпараст қизлардан эмасди. У ниҳоят чорасиз қолиб, ўзини ўлдиришга кескин қарб бериб деди:

— Хўп, яхши, мен кийинаман.

Кеч бўлди, Маҳин ўз ётоғида ёлғиз ўтириб ўйлар, юм-юм йиғлар эди.

Бирданига эшик очилиб, бошига дакана ўраган ҳандалакдай бўқоғи бор бир кампир ичкарига кирди. Маҳин унинг янга эканлигини билса ҳам ҳеч нима демади. Янга иш бошлаб, бир соатча вақт сарф этиб, Маҳинни зийнатлар билан безади. Ўриб, орқасига ташланган сочларининг устига кичкина тож қўйди. Устидан қизил гулли заррин бир тўр ташлади. Қизга оппоқ ипак кийим ва оёғига ҳам оқ туфли кийдирилди.

Охири вақт етиб, Маҳин эса, никоҳ сўроғига чақирилган эди.

Маҳиннинг оёқлари титрар, у никоҳ ўқиладиган уйга эмас, мазорга кетар эди. Маҳин ўз кўзи олдида тўйни эмас, ўлимни кўрарди.

Хотинлардан иккитаси Маҳиннинг қўлтиғига кириб, уни никоҳ ўқиладиган уй деворига суяб қўйилган катта бир тошойна қаршисига ўтқазди.

* * *

Ташқари ҳовлидаги ранг-баранг гуллар очилган гулворда ҳам бир гуруҳ меҳмонлар, тўғрироғи, оғолар ўти-

рарди. Бу ердаги столлар ҳам нози-неъматлар билан тўла эди. Одамлар ҳам турлича эдилар. Бир қисми ёшлар, бир нечаси ўрта яшар кишилар, баъзилари эса, кексалар эди. Табиий, булар ҳам ҳар қайсилари ўз тўплари билан, йигитлар ўз улфатлари билан, ўрта яшарлар ўз тенгқурлари билан, кексалар ҳам ўз тенгдошлари билан суҳбат қилмоқда эдилар.

Ёшларнинг баъзилари шаҳар янгиликлари ҳақида суҳбатлашар, ҳозирги давлат кабинетини ёмонлаб, аввалги кабинетни мақтар эди. Бир нечалари бўлса, сиёсатни қоралаб, кейинги вақтларда қилган кайф-сафолари, айш-ишратларидан сўзлар эдилар. Масалан, улардан бири визит карточкаси нашр эттирганини, уни Лолазор хиёбонидан, яъни уйи олдидан ўтадиган ҳар бир гўзал хотинга биттадан улашиб ўтириши ҳақида гапирарди.

Шунда бир дўсти карточкага нима деб ёздирганини сўраганида бояги йигит чўнтагидан бир карточка чиқариб, қуйидагиларни ўқиб берди:

«Муҳтарам гўзалхоним!

Сешанба кун кечқурун, соат бешда, Лолазор хиёбонининг чап тарафидаги С... уддавла кўчасида бўлган каминангизнинг уйига марҳамат қилиб, бир коса шарбат ичиб, битта папирос чекиш билан бизни шодон этмоғингизни илтимос қиламан... (Имзо... уддавла)».

Ўқиб бўлгач, ҳар иккалалари ҳам шарақлаб кулмоқча бошладилар.

Аввалги йигит деди:

— Кўпгина нодон хонимлар алданишиб, у ерга ёлғиз ўзим чақирилганман, деб ўйлайдилар-да, айни тайин қилинган вақтда етиб келадилар.

«Баракалла, қойилман», деб иккинчи йигит ўртоғининг хонимларни алдаш учун ишлатган ҳийласини рўй-рост табрик қилар эди.

Қизил юзли, қалин лабли, эгри бурунли, юзидан шаҳватпараст аҳмоқ эканлиги яққол сезилиб турган бир шаҳзода ҳам бир артисткага ошиқ бўлгани, ҳатто газеталардан бири ўша хотин тўғрисида ёзган мақоласини босиб чиқаргани хусусида гапириб, ўзининг тубан ва ҳаёсизлигини очикдан-очик айтиб ўтирар эди. Бошқа бир ўрта бўйли йигит (уни машҳур драматург деб атардилар) Эронда театр бозорининг касодлигидан шикоят қилиб: «Театр эгаси яҳудий Мунший, олтмиш туманни нақд олмагунча чироқни ҳам ёқмайди», деб завқсиз

халқнинг театрдай бир муҳим мактабга эътибор бермаганлигига жуда ҳам таассуф қилмоқда эди.

Ўрға ёшлилардан баъзилари ўз тасарруфида бўлган ерлардан олинган бу йилги ҳосил тўғрисида, айримлари пакти сийдоси хусусида, қолган бир нечалари эса, ҳукумат идораларининг ёмонлиги ҳақида суҳбатлашар эдилар. Мисалан, биттаси:

— Ўнги молия вазирини ўғрилиқ қилмайди, лекин пора олади. Унинг яхшилиги шу ердаки, ҳеч бўлмаса, олган пораси учун пора берувчи одамга жиндай хизмат қилиб қўяди,— дерди.

Яна бошқа бири бўлса, ҳадсиз-ҳисобсиз низомномалар ёзиб, уйига босиб қўйган собиқ молия вазирини мақтарди:

— У меҳнатқашларнинг ва миллатнинг фойдасини кўзламаса эди, шунча низомномалар ёзмас эди,— дер эди.

Яна биттаси собиқ молия вазирининг бельгияликларнинг фойдаси учун эронликларни сотгани, ҳатто ўн икки йил Германияда ўқиб келган бир эронлик йигитнинг бельгияликларнинг ўғрилигини очиб қўйгани учун ишдан кетишга ё ўз ҳисобидан уч ойлик отпускаи олишга мажбур қилганлигини айтар эди.

Бир нечалари келажакда бир-бирларидан манфаатдор бўлиш учун, болаларидан, яъни биттаси ўғлининг дарсадаги муваффақиятларидан, бошқа бири бўлса, қизининг зийраклигидан ва «Насими Шимол» газетасининг саволларига берган жавоблари босилиб чиққанидан сўзлашиб, бўладиган қудачиликка замин тайёрламоқда эдилар. Дам ўтмай чилим чекиб, оғизларидан паға-паға тутун чиқариб ўтирган чоллар бўлса, намоз-рўзадан сўзлашарди. Биттаси бу йил рўзанинг узун кунларда келгани учун савобининг кўплигидан, баъзилари эндиги йилларда кунлар қисқа бўлишини айтиб, ўзларига таскин бермоқда эдилар. Бир бошқаси бўлса, ўтган замонларнинг ширин ҳикояларидан сўзлаб, бир кун аъло ҳазрат, шоҳи Шаҳиднинг бўй-басти ҳам кийим-бошини мақтаб, уни қуёшга ўхшатганлиги учун шоҳи Шаҳид дарров хотинларидан биттасини талоқ қўйиб, беш юз туман пул билан совға қилиб юборганини завқ-шавққа тўлиб ҳикоя қилмоқда эди.

Ҳамма меҳмонлар чой ичиб, ширинликларни еб, қизгин суҳбатга машғул эдилар.

Шу пайтда бир усти берк арава оғойи Ф... уссалтананинг эшигига келиб тўхтади. Хизматкөр дарров югуриб бориб; араванинг эшигини очди. Никоҳ ўқигани чақирилган ҳазрат ого ... аравадан тушиб, мажлисга қараб кела бошлади.

Оғонинг ташриф буюрганини кўрган меҳмонлар ҳурмат юзасидан ўринларидан турдилар. Оғо ҳам мажлисининг тўрига чиқиб ўтирди.

Ун беш дақиқадан кейин оғо ичкарига чақирилди. Шу пайтда яна бир извош келиб, дарвоза олдида тўхтади.

Сиёвуш Мирзо эғнида қимматбаҳо костюм, оёғида қора амиркон туфли, қўлида калта ҳасса билан извошдан тушди. Извошчининг ёнида ўтириб келган Муҳаммад Тақи извошдан сакраб тушиб, оғоси билан бирга меҳмонларга қараб кела бошладилар. Сиёвуш Мирзо меҳмонларга эътибор бериш эмас, ҳатто салом ҳам бермасдан, шаҳзодаларга хос кеккайиш билан, мажлисда ўтирганларни босиб юқорига ўтиб, «фахрий ўрин»га ўтирди.

Ҳасанқули билан Ризоқули бўлса, ўзларини кўрсатиш учун ҳар қайсиси бир чиннидан шарбат олиб келиб, Сиёвушга тақдим қилдилар.

Шу пайтда чоллар даврасида ўтирган отаси шаҳзода К. ўрнидан туриб унга яқинлашди. Меҳмонларга салом бермасдан ўтиб кетганлиги учун бир оз уни койган бўлди. Бир оз одоб билан ҳаракат қилишни буюрган бўлса ҳам Сиёвуш Мирзо отасига жавоб ўрнига сал илжайиб чаккасини қашиб қўя қолди. Отаси ҳам ҳеч нима демасдан қайтиб ўрнига келиб ўтирди.

Сиёвуш Мирзо у ердаги одамларни ҳеч менсимасдан ўртоқларидан биттасини ўз ёнига чақириб, овозини барала қўйиб, аввалги кунни ўтказган кайфли кеча ҳақида ҳикояга бошлади. Уртоғи унга:

— Қўй энди, ҳозир унақа гапнинг ўрни эмас,— деса ҳам қулоқ солмасдан қўярда-қўймай, яна ҳикоясида давом этди. Ярим соат шундай аҳвол билан ўтди. Бирданига Ризоқули шошган ҳолда ичкаридан чиқиб, оғойи Ф... уссалтанинг қулоғига бир нарса деб шивирлади. Чоллар даврасида ўтирган оғойи Ф... уссалтана ташвиш билан ўрнидан туриб, ичкарига кириб кетди. У ерга етар-етмас хотинларнинг қий-чувидан қулоғи батанг бўлди. Куннинг иссиқлигига қарамасдан, ҳамма хотин-

лар гуж бўлиб бақрайганча бир томонга қараб турганларини кўрди. Қандай ҳодиса рўй берди экан?

Биз Маҳинни никоҳ ўқиладиган уйда, катта тошойна қаршисида қўйиб кетган эдик. Маҳиннинг аҳволи борган сари ёмонлашарди. Ранги сарғайган ва бадани тол баргидай титрарди. У чуқур фикрга кетган эди. Ўзини ўлдиришни эплай олмаса, Фаррухдан бошқа йигит билан қандай яшашни ўйлар эди. Ўйлаган сари аҳволи янада паришонроқ бўлар эди. Бирданига:

«Ҳазрати оғо ... ташриф буюрдилар, никоҳ ўқимоқчилар», деб хабар қилдилар. Шу пайтда Маҳин икки кишининг дуо ўқиб, бир-бирларига арабчалаб жавоб берганларини ва бир оздан кейин улардан бирининг яна арабча бир неча калима ўқиб, эшик рўбарўсидан Маҳинга хитобан:

— Қабул қилдингизми, қизим?— деб сўраганини эшитди.

Маҳиннинг жавоб бергиси йўқ эди. Шу билан бирга, жавоб беришга ҳам кучи етмасди. Бечора қизнинг тишлари гириҳ бўлиб, тили тутилиб қолганди.

Шу пайтда бир одам астагина унинг қулоғига шивирлади:

— Айланай қизим! Ургилай қизим! Одам деган ҳар бир нарсани ўз обрўси учун қурбон қилиши керак. Эрингиз дев бўлса ҳам ҳазрати оғони куттириб қўйманг, қабул қилдим, денг! Тезроқ жавоб беринг!

Маҳин жавоб беришга қодир эмас эди. Оғонинг овози яна бир мартаба баландроқ кўтарилиб, янгидан:

«Қабул қилдингизми?» саволи сўралган эди, Маҳин яна аввалгидай сукут қилиб, теваракка қараб, ҳеч қандай жавоб бермади. Бирдан париги уйда бўлган онаси: «Маҳин жавоб бермаяпти» деган хабарни эшитиб, қизининг ёнига югуриб келди-да, уни қаттиқ чимчилаб:

— Жувонмарг бўлгур, жавоб бер!— деди.

Бу чимчилаш Маҳинга бошқача таъсир қилди. У баланд овоз билан бир қичқирди-да, йиқилиб ўзидан кетди. У шайтонлаб қолган эди. Йиқилган ерида типирчилаб, рўбарўсида турган пардоз қутини тепиб, ичидаги ҳамма нарсаларни сочиб юборди. Шу ердаги хотинлар бир-бирларини туртиб, дарров Маҳинни ўртага олдилар. Улар Маҳиннинг шайтонлаб қолганини англаб, бит-

таси қўлидан, бошқалари оёқларидан маҳкам ушлаб тинчитмоқчи бўлишлар.

Маҳин қичқирар, бақирар, қарғар эди, гўё яна тўрт ой бундан илгариги телбалиги қайтадан қўзиган эди.

Ҳазрати ого ҳам Маҳиннинг овозини эшитиб, ишнинг тагини тушунди, лекин бундай ишларни кўп кўргани учун бунга сира ажабланмади.

Улар бундай ҳодисалардан таъсирланмас, бу ишни бузишга тиришмас ва буни хоҳламас эдилар, чунки уларнинг истаклари бир неча қадоқ новвот, икки калла қант, йигирма беш туман пулдан бошқа бир нарса бўлмаганидек, ўзларини ҳам бу ишларда ҳеч қачон жавобгар деб ҳисобламас эдилар.

Маҳиннинг юзига совуқ сув сепиш, бурнига сомонли кесак ҳидлатиш каби дастлабки чоралар ҳеч қандай натижа бермади. Маҳин ўзига келмас эди, юрак уриши борган сари шиддатланар эди. Хотинлардан бир нечаси минг мashaқатлар билан Маҳинни кўтариб, типирчилатиб, ўз ётоқхонасига олиб бориб ётқиздилар. Никоҳ мажлиси бузилди. Муддаога эришилмади. Куёвнинг онаси эридан бу қудалик катта манфаат келтиришини эшитгани учун бу кунги унашиш мажлисининг бузилганидан жуда қаттиқ қайғурди. Маликтож хоним ҳам жондан азиз кўрган қизининг бирданига шундай касал бўлиб қолганини кўриб, ниҳоятда қўрқиб кетди.

Оғойи Ф... уссалтананинг хафагарчилиги ҳаддан зиёда эди. У ҳеч нима демасдан, ташқарига чиқди. Меҳмонлар орасидаги эски дўстларидан бир докторни ўзи билан бирга ичкарига олиб кирди. Йўлда юз берган воқеани қисқагина қилиб тушунтирди. Ичкарига киришда оғойи Ф... уссалтана хотинлар орасидан ўтар экан, вақтни қочирмасдан, кўз қири билан уларга қараб, ўз хотини билан таққослаб борарди.

Маҳин ётган уйга кирдилар. Доктор ўн дақиқалик текширишдан кейин деди:

— Юрак уриши жуда қаттиқ. Никоҳ мажлисини кечиктириш керак. Бу кун никоҳ тўғрисида гап ҳам бўлиши мумкин эмас.

Сўнгра доктор оғзини оғойи Ф... уссалтананинг қулоғига яқинлаштириб, секингина бир нима деб шивирлади.

Оғойи Ф... уссалтананинг ранги бўздай оқариб кетди:

— Мумкин эмас. Янглишмаётибсизми? Шунга чиндан ишонтирасизми?

— Ҳа, қизингиз ҳақиқатан ҳам ҳомиладор,— деди доктор.

XXXIII боб

ТАДБИР

Биз Фаррухни иситманинг шиддатидан алаҳлаб ётган ҳолатда қўйиб кетган эдик. Бечора Фаррух ўзини билмас эди. Унинг бошида турган энагаси бу аҳволга чидаёлмасдан ўкраб-ўкраб йиғлагандан кейин Бобоҳайдарни чақириб, уни Фаррухнинг эски дўстларидан, ўтган бобларда Иффат учун олиб келган докторга юборди. Ярим соатдан кейин доктор келди, Фаррухни бу аҳволда кўриб, ҳайрон қолди. Энагадан унинг қачондан буён касаллигини сўраганида Бобоҳайдар олдинга чиқиб айтди:

— Бугун эрта билан бир кишига хат ёздилар-да, менга бериб, жавобини келтиришимни тайинладилар. Мен хатни айтган одамларига элтиб, жавобини олиб келдим. Оғом ўша кишининг хатини ўқигандан кейин ғазабланиб, шу аҳволга тушдилар.

Доктор касалликнинг вақтинча иситма эканлигини айтиб, касал ётган уйга ҳеч ким кирмасин, теварагида шовқин-сурон бўлмасин деб, озор топса ёмон бўлишини айтди-да, сўнгра дори ёзиб берди ва унинг еб-ичадиган овқатларини айтиб кетди.

Кечқурун доктор яна келди. Бу пайтда Фаррухнинг иситмаси бир оз пасайган, аҳволи яхшиланган эди. Энди алаҳламасди. Докторни кўриб, таниди. Доктор унинг аҳволини сўраганида, Фаррух ўзини анча енгил ҳис этаётганини, лекин бошининг қаттиқ оғриб турганини айтди.

Доктор эртасига эрта билан яна келди. Бугун энди Фаррухнинг иситмаси тамоман босилган эди. Доктор ундан бу тўсатдан бўлган касалликнинг сабабини суриштириб:

— Бундай иситмалар мия чарчаганлигидан, ёки машъум хабар эшитиш натижасида бўлгувчи эди, сизга нима бўлди?— деб сўради.

Фаррух докторнинг қўлини қўлига олиб, бўғиқ бир овоз билан деди:

— Доктор, сиздан нимасини яширай, менинг бир ёш

хизматчим бор эди. Ҳеч бир гуноҳи бўлмаса ҳам, катталардан биттасининг газабига дучор бўлиб, назмияда қамалиб ётибди. Мен қанчалик ҳаракат қилсам ҳам, уни қутқаза олмадим. Эшитишимга қараганда, уч ой зиндонда ётгандан кейин, яна қўшимча олти ой қамоқ билан юз даррага ҳукм қилинибди. Бугун уни дарраласалар керак.

Бу сўзларни эшитган доктор жуда ҳам ҳайрон қолиб:

— Шунчалик ҳам виждонсизлик бўладими?— деди.

Бир оз ўйлагандан кейин, яна сўзлай кетди:

— Мен бир тадбирни биламан. Буни ўтган вақтларда ўртоқларимдан биттаси тажриба ҳам қилиб кўрган эди. Натижаси чиқса яхши-я,— деди.

Фаррух шошилиб сўради:

— У қандай тадбир?

— Бундан бирмунча вақт илгари, дўстим Муҳаммад Ҳасанхоннинг хизматкорини, қўшниларидан ўғирланган бир гиламча устида шубҳаланиб, назмияга олиб бориб қамаган эдилар. Лекин терговдан ҳеч натижа чиқмади. Хизматкор гиламча ўғирлаганини бўйнига олмади. Даъвогар кошонлик ўжар, очкўз одам бўлиб, гиламчага америкалик бир доктор уч юз туманга харидор эканлиги, гиламча бўлса, антиқа бир нарса эканлигини айтиб маъқуллар эди. Бечора хизматкорни иқрор қилдириш учун зиндонга ташладилар. Муҳаммад Ҳасанхон хизматкорини жуда севганидан (чунки у энагасининг ўғли эди) уни қутқазмоқчи бўларди. Бечора қанча ҳаракат қилса ҳам ҳеч бир иш чиқара олмади. Уч ой ўтди. Кунлардан бир кун хизматкорнинг онасининг эсига қаердан бир фикр келиб, маҳалла эшонининг уйи эшигига бориб ўтириб олибди ва ўғлини назмиядан қутқизишни ҳазрати эшондан илтимос қилибди. Ҳазрати эшоннинг ҳам юраги бечора кампирнинг аҳволига бир оз ачиниб, илтимосини қабул қилиб, ўз котибига, назмия раисига тезда хизматкор зиндондан озод қилиб юборилсин деб илтимоснома ёзишни буюрибди. Котиб ёзибди.

Ҳазрати эшон хатни муҳрлаб, ўзи ҳам икки-уч калима сўз қўшиб, уни назмияга юборибди. Назмия раиси хатни ўқир-ўқимас ўзини йўқотиб қўйибди. Чунки, ҳазрати эшоннинг хатига эътиборсиз қараб, ўртада ихтилоф туғдириш натижасида ишдан ҳайдалишидан қўр-

қиб, ўша заҳотиёқ хизматкорини бўшатиб юборибди. Қошонлик даъвогарга бўлса: «У бечоранинг хабари йўқ, ахтариб кўрамиз, топилганда сизга хабар берамиз», деб жўнатиб юборибди. Энди сиз ҳам худди шунга ўхшаган бир ишга киришинг, балки у бечорани ҳам қийноқдан қутқазиб оларсиз.

— Сиз мени Муҳаммад Ҳасанхоннинг энагасига ўхшаган шундай эшонларнинг уйи эшигига бориб ўтириб оладиганлардан деб ўйлаяпсизми?

— Йўқ, сизнинг шахсан у ерга боришингиз шарт эмас. Ҳазрати эшоннинг котибини кўриб, у билан гаплашингиз керак.

Фаррух бу фикрни қабул қилиб, ўша заҳотиёқ Бобоҳайдарни чақириб:

— Ҳазрати эшоннинг котибини топинг, зарур бир иш учун чақираётганимни айтинг ва шу ерга келишини илтимос қилинг, — деб буюрди.

Бобоҳайдар чиқиб кетиши билан доктор ҳам бошқа касалларни кўриш учун бориши кераклигидан Фаррух билан хайрлашиб, чиқиб кетди.

Бир қанча вақтдан кейин Бобоҳайдар қайтиб келиб, котибнинг кечқурун келишини айтди.

Фаррух уйда кутар эди. Кун ботишга икки соатча қолганда оғойи шайх Муҳаммадкарим номланган котиб ташриф буюрдилар. Фаррух, оғойи шайхнинг ҳурмати учун, ерда ўтиришга мажбур эди. Уни ҳурмат билан уйнинг тўрига ўтқазиб, ўзи бўлса пойгоҳда тиз чўкиб ўтирди. Оғойи шайх бир чилим, икки стакан ширин чой, бир чиннида шарбат ичиб, роҳат қилгандан кейин, Фаррух сўзга бошлади:

— Сизни овора қилганим учун узр. Ҳазрати эшоннинг ҳақиқий муридларидан (буни мажбуран айтар эди) ва каминанинг хизматкори бўлган Жаводни бир мушкулотдан қутқазиб учун жанобингизни чақиртирган эдим. Бечора уч ойдан буён шу динсизларнинг зулми остида қийналмоқда. Энди сиздан ўтиниб сўрайманки, мумкин бўлса, лутфан ҳазрати эшонга бир илтимоснома ёздириб берсангиз-да, назмияга юбортирсангиз. Зора жанобингизнинг марҳаматлари билан у бечора андон азобидан халос бўлса.

Оғойи шайх бир оз бошини қуйи солиб, муроқаблага боргандан кейин сохта йўтал билан томоғини қириб олиб деди:

— Жанобларига маълум бўлсинким, мен камина фақирларининг қўлидан бундай илтимосномаларни ёзиш келмас. Билъакс, бу ҳақда ҳазрати эшоннинг ўзлари назмияга бирор нарса ёзиб юбормасалар, асло бўлмас деб ўйлайман. Камина фақирларининг қўлидан келадиган иш фақат ҳазрати эшондан назмияга қоғоз ёзишга ваъда олишдир. Бундан ортиқ қўлимдан бирор нарса келмас деб ўйлайман.

Фаррух бўлса, оғойи шайхнинг сўзларини қабул қилиб, деди:

— Ундай бўлса, сиздан илтимос қилар эдимки, худди шу бугун кечаси у баланд даражали ҳазрати эшон билан сўзлашиб, натижасини эртага эрта билан менга билдирсангиз.

Оғойи шайх яна бир оз ўтириб, икки стакан чой ичганган сўнг ўрнидан турди. Фаррухни умидвор қилмоқ учун эрта билан келишга ваъда бериб:

— Алтофукўм мазид (лутфингиз бундан ҳам зиёда бўлсин), — деб уйдан чиқди.

Фаррух ўша кечани тарқоқ ўй-хаёллар билан ўтказди. Гоҳ Маҳиннинг эртага бўладиган унашув тўйи, гоҳ Жаводнинг эртага ейдиган юз дарраси кўз олдидан ўтар эди. «Ҳозирча, фақат Жавод тўғрисида ўйлаш керак. Борди-ю, уни қамоқдан қутқаза олсам, ундан хотиржам бўлиб олиб, бор кучим билан Маҳин масаласига киришаман. Уни никоҳ қилсалар ҳам, барибир, ўзим оламан», деб ўйларди.

Кечки овқатни егандан кейин Фаррух ўринга чўзилди, лекин уйқуси келмади. Энди у оғойи котиб ва ҳазратн эшон ҳақида ўйларди.

Эрта билан соат ўнларга яқин эшик қаттиқ қоқилди. Бобоҳайдар бориб эшикни очди ва оғойи шайх Муҳаммадкарим ҳассасини дўқиллатиб кириб келди. Кеча келган хонасига кирар экан, бир неча марта «ё олло» деди.

Оғойи шайх Муҳаммадкарим буғдой ранг, новча, сийрак соқол бир одам эди.

Оғойи шайх Муҳаммадкарим кириши билан Фаррух ўқиб турган китобини ёпди. Шайх ҳол-аҳвол сўрашмоққа киришди. Гўё Фаррухнинг бутун қавм-қариндошларини танийдиган одамдай, етти пуштидан тортиб суриштирмоққа бошлади. Орадан бир оз фурсат ўтказиб, Фаррух сўради:

— Ого, кеча қилган илтимосим тўғрисида ҳеч нима сўзлашдингизми, ҳазрати эшон тавсия ёзиб бермоқчи бўлдиларми?

Оғойи шайх Муҳаммадқарим бир томоқ қириб олгандан кейин гап бошлади:

— Албатта, ҳазрати эшоннинг фуқаропарварлик, ҳаммага хайрихоҳ экаликлари офтобдан ҳам равшандир. Авбаски, ўзлари роҳат-озод бўлганлари ҳолда бир нафар бечоранинг динсизлар уйи бўлган назмия қамоқхонасида азият чекишига асло ва асло розиликлари бўлмайди. Ҳазрати эшон бу ҳолдан олдинроқ хабардор бўлмаганларига чандон-чандон таассуфлар қилдилар. Қандай бўлса ҳам маҳкумни озод қилишни буюрдилар. Айниқса, ота-ишк билан у кишининг қадимдан дўст бўлганлари учун, у менинг ўғлим, мендан нимаики хоҳиш қилса, ўз ўғлим истагандай санайман, деб сизга катта марҳамат қилдилар,— деди.

Фаррух бу гаплардан севиниб, ич-ичидан ҳазрати эшонни минг мартабалаб дуо қилмоққа бошлади, оғойи шайх гапини давом эттирди.

— Аммо, ҳазрати эшоннинг беш хотин ва ўн тўрт фарзанддан иборат катта бир оилаларининг маишати учун бирор даромадга эга бўлмаганликларини айтиб ўтиришнинг ҳожати бўлмаса керак. Ерлардан, дўконлардан келадиган даромад бўлса, рўзгор дегандай, у кишининг кундалик сарф-харажатларига етмайди. Ҳазрати эшон кўпинча қарз кўтаришга мажбур бўладилар. Айниқса, шу кеча-кундузда, яъни ўғилларидан (садақалари кетай) биттаси учун тўй қилиб, яна биттасини шу яқин ўртада унаштирмоқчи бўлиб турганларидан бир оз танглик тортиб турибдилар. Ҳазрати эшоннинг қаламлари қоғоз устида бир мартаба юриши билан, эшонзодалар-да, ким бўлса бўлсин, ҳатто саводи бўлмаса ҳам, мамлакатнинг катта мансабларидан бирортасини эгаллай олади. Масалан, битталари Озарбайжон вилоят банкасининг раислигига, яна бошқалари бўлса, Қирмон... идорасида раис муовинлигига тайин бўла оладилар...

Фаррух оғойи шайхнинг муддаосини тушунмай, савол бермоқчи бўлган бўлса ҳам, бироқ оғойи шайх унга навбат бермай, яна сўзида давом қилди:

— Хулласи калом, ҳазрати эшон сизни фарзандларидай ҳисоб қилганлари учун унчалик қийинчиликка солмоқчи эмаслар. Ҳали айтилгандай, ўша ўғилчалар-

нинг тўйига кетадиган харажатдан бир қисмини сизнинг устингизга қўймоқчилар.

Фаррух ўрнидан туриб, ҳайронлик билан:

— Қандай тўй харажати?— деб сўради, лекин дарров ўзини тутиб олиб, сўзни бошқа ёққа бурди:

— Ҳазрати эшоннинг ўғилчаларининг тўй харажати қанча бўлар экан?

— Унча кўп эмас. Олмос кўзли узук олиш учун юз туман, бир шол рўмол, ҳазрати эшоннинг обрўларига пуртур етказмайдиган бўлиши учун бир оз яхшироғини олсак ҳам, саксон тумандан ортиқ бўлмайди. Хўш, яна бир ойна. Уни бўлса, қирқ-эллик туманга олса бўлади. Булардан ташқари, икки юз эллик туман мева-чева харажати. Мана шунинг ўзи бўлса, бас. Демак, юз, саксон, бир юз саксон, яна эллик, жами икки юз ўттиз, яна икки юз эллик, хулласи, жами беш юз туман, холос. Албатта, энди ўртада каминанинг қалла ҳақлари ҳам эсдан чиқмайди, ўғлим!— деди оғойи шайх.

— Оғо, афв этасиз, менинг бундай ишлардан хабарим йўқ. Сиздан илтимос, гапнинг бўладиганини айтинг, сизга неча пул керак?

— Унча кўп эмас, атиги ҳаммом ва сартарош пули берсангиз қорнимиз тўқ, устимиз бут бўлади-ю, болаларнинг онаси билан ёш ўғилча хурсанд бўлиб, дуойи жонингизни қилиб юрамиз.

Фаррух ўз-ўзича: «Ҳаммом ва сартарош пули нарисси билан бир қирондан ортиқ бўлмайди. Лекин онаси, икки ёш ўғилчанинг бу ерда нима дахли бор», деб ўйлагандан кейин, оғойи шайхга деди:

— Оғойи шайх, мен боя сизга айтдим-ку, мен бундай жумбоқ гапларга тушунмайман. Очикроқ айтинг.

Оғойи шайх бу йигитнинг ғўрлигига таажжубланди. Чунки, у ҳар қаерларга бориб, бундай ишлардан бирталайини ўринлатганда ҳар ким унинг ҳақини билиб қўлига тутқазарди. Масалан, эллик тумандан юз тумангача; ҳаммом-сартарош пули, икки қирондан икки туманга қадар чой пули номи билан олар эди.

Ҳар қандай бўлса ҳам Фаррухнинг иш кўрмаган, хом эканлигини англади-да, сўзини тўхтатди. Соқолини бир оз силаб, салласини тузатиб олгандан кейин қўлидаги йирик донали тасбеҳини ўгирган бўлиб, дуо қилгандай, кўзларини кўкка тиккан ҳолда деди:

— Сизга айтдим-ку, бизнинг ҳақимиз атиги бир ҳаммом, бир сартарош пули, холос.

Фаррух ортиқ чидаёлмади, зардаси қайнаб, сўкиб юбориш даражасига етди, лекин оғойи шайх дарров сўзининг охирини айтиб қўя қолди:

— Яъни, юз тумандан ошмайди!

Фаррух ўтирган ерида бир ирғиб тушиб деди:

— Демак, олти юз туман. Мен шунча пулни қаердан топаман? Оғойи шайх, бечора Жаводни қутқазиб учун сиз сўраган бу олти юз туман пулни топиб беришга қодир эмасман. Мен бу олди-бердини қила олмайман.

Оғойи шайх шу замоноқ уни сўздан тўхтатди:

— Уғлим, шундай бир кор-хайрнинг отипи олди-берди деб атаманг. Бу ерда яхшиликдан бошқа нарса йўқ. Ҳазрати эшон сизга ўхшаган пул, молга эътибор берувчи кишилардан эмаслар. У кишининг бутун ҳаракатлари охират учун, яна тўғрироғи, жаннатдан жой олиш учун.

— Менинг бунақа нарсалар билан ишим йўқ. Такрор айтаманки, мен шунча пул беришга қодир эмасман. Агар шунча пул сарфлайдиган бўлсам, Жаводни аллақачон қутқазиб олган бўлардим, сизни ҳам овора қилиб юрмас эдим.

Оғойи шайх Муҳаммадкарим бир нафас соқолини таради, белбоғига қаради ва хиналанган тирноқларини томоша қилди-да, деди:

— Чиндан ҳам, мен сизга ачинаман. Жуда яхши, қани айтинг-чи, бу кор-хайр учун неча пул сарф қилмоқчисиз?

Фаррух шу кунларда пулсиз эди; атиги эллик туман беш қиронлик билан бир неча қадоқ новвотни ҳазрати эшоннинг хизматига юбора олар эди. Шунинг учун оғойи шайхга деди.

— Оғо, мен бор-йўғи эллик туман бера оламан. Ундан ортиққа қурбим етмайди.

Оғойи шайх «эллик туман» деган сўзни эшитар-эшитмас дарров ҳассасига таяниб, ўрнидан турди. Даргазаб бўлиб, деди:

— Жуда яхши, ҳазрати эшон бундай ишларга арашмайдилар. У ҳазратнинг назмия билан ҳам ҳеч қандай алоқалари йўқ. Назмия бўлса, динсизлар идораси эмас, балки ҳар бир динсизни тутиб қамайдиган, дарралайдиган бир қонуний идора.

Фаррух ўз сўзидан дарров тонадиган бу одамга, яъни бундан ўн дақиқа бурун динсизлар уйи деб атагани бир

идорани энди муқаддас санаб турган оғойи шайхга ҳайрат билан тикилди. Лекин, аслида, ҳеч қандай эътиқодга эга бўлмаган оғойи шайхга таажжуб билан қараш мумкинмиди? Фаррух оғойи шайхнинг кетишга отланганини кўриб, Жаводни қутқариш учун бундан бошқа бир йўл йўқлигини ўйлади-да:

— Оғо, марҳамат қилинг, ўтиринг, ҳар бир гапга дарров жаҳлингиз чиқмасин,— деди ва оғонинг жаҳлини бир чилим ва бир чинни шарбат билан босиш мумкин эканини билганидан Бобоҳайдарни чақириб бир чинни шарбат ва чилим келтиришни буюрди. «Шарбат» ва «чилим» сўзларини эшитгандан кейин оғойи шайх қайтадан ўтириб, деди:

— Ўғлим, мен сизга ҳайрон қолдим. Тағин менга жаҳлингиз чиқмасин дейсиз-а! Мен юз тумандан гапирсам, сиз ҳар ишга тамаъ кўзи билан қарайдиган фалон савдогар, ё бирор соатсознинг қуроли бўлган онгсиз, ахлоқсиз чаканафурушларга ўхшаб, мен билан савдолашмоққа бошлайсиз. Олти юз туманни сиз ўзимизники бўлганингиз учун суяброқ айтган эдим. Сиз бўлсангиз эллик туман дейсиз.

— Оғо, ахир қандай қилай, бундан ортиқ пулим йўқ-да.

— Бу — ҳисоб-китоб нималигини билмайдиган одамнинг гапи. Шундай катта бир шаҳарда «пулим йўқ» деб ўтириш уят эмасми? Қўйинг! Ҳозирдан бундай деманг, яна шундай гапларни гапирсангиз, мен қаттиқ хафа бўламан. Истаган судхўрга бориб илтимос қилсангиз, сиз учун бир шоҳийдан тортиб, юз минг тумангача пул топиб бера олади.

— Оғо, бундай иш учун бирор нарсани гаров қўйиш керак бўлади, менда бўлса гаровга қўядиган ҳеч нарса йўқ.

— Шундай гапираётисизки, гўё ҳовли-жойингиз Чаламайдон маҳалласида, қабристонга яқин жойда, ҳовлингизнинг баҳоси ҳам эллик тумандан ортиқ эмас. Яна шундай бир чиройли иморатингиз бўла туриб-а, худо ўзи уй-жойингизни ёмон кўздан асрасин.

Фаррух оғойи шайхнинг тилагини тушунди. Лекин, иложи йўқ эди. Жавод қамоқда. Жавод, яна олти ой қўшимча ўлароқ, ўша қоронғи қамоқхонада қолиши керак эди. У, албатта, ўлади.

Фаррух ўз-ўзига қатъий қарор бериб, деди:

— Оғо, сиздан илтимос қиламан. Қани, бўладиганини айтинг, неча пул оласиз?

— Хўп, зарари йўқ. На биз айтган олти юз туман-у, на сиз айтган эллик туман. Хўш, бир юз эллик туман ҳазрати эшонга берасиз, эллик туман каминага. Аммо, энди ўртага ортиқча гап сизмайди. Бир тийин нари-бериси йўқ,— деди оғойи шайх.

Бечора Фаррух ноилож бўлганлиги учун қабул қилди.

— Мабодо ҳовлингизни гаров қўймоқчи ёки сотмоқчи бўлсангиз, ҳазрати эшоннинг ҳузурларига боринг, у ҳазрат сизни гувоҳлик ҳақидан халос қилишлари мумкин,— деб қўшимча қилди оғойи шайх.

Фаррух мийиғида кулиб қўйди.

Оғойи, шайх Муҳаммадкарим сўз охирида деди:

— Мен эрта билан назмияга юбориладиган хатни ёздириб қўяман. Албатта, сиз пулни тайёрлаб бориб, хатни олиб келасиз. Лекин, пулнинг ярмиси берилмагунча қоғоз назмияга юборилмайди.

Таажжуб, оғойи шайх пулнинг ярмисини кейин олишга қандай ишона олди экан, маълум эмас эди. Чунки, Фаррух хатни олиб, пулнинг иккинчи ярмисини бермаслиги ҳам мумкин-ку, ҳар ҳолда бунинг маъноси кўп қоронғи эди.

XXXIV боб

МУНОФИҚЛИҚ АВЖ ОЛГАН ЕР

Бечора Фаррух нима қилишини билмас эди. У Жаводни қутқазмоқчи бўларди. Бироқ, у ўз-ўзича: «Оғойи шайхнинг Жаводга раҳми келиб, ҳазрати эшонни илтимос қоғози ёзишга мажбур қилади», деб ўйлаган эди. Шу битта илтимос қоғози учун ҳазрати эшонга икки юз туман пул керак бўлишини хаёлига ҳам келтирмаган эди.

Фаррух ҳалигача бундай ишларга аралашмаган, ҳалигача у ўзи ҳам отаси топган пуллар билан яшаб, ҳеч қачон ўйини гаров қўйишга зарурият кўрмаган эди. Шунинг учун Фаррух бу тўғрида кимлар билан сўзлашиш кераклигини билмас, висотида ҳеч нимаси бўлмагани сабабли ҳовлини гаровга қўйишга мажбур эди. Ҳовли бўлса ўзиники эди. Чунки, отаси тирик бўла туриб, бошқа меросхўрлари бўлмаганидан, ҳовлини унга хат қилиб берган эди.

Фаррух Бобоҳайдарни чақириб:

— Маҳалламизда бирорта даллол борми?— деб сўради.

— Маҳалламизда Мирзаризо деган даллол бор.

Фаррух Бобоҳайдарга дарров уни топиб келишни буюрди.

Бобоҳайдар чиқиб кетди. Бир оздан кейин қайтиб келиб:

— Ўлгудай ахтариб зўрға топиб келдим. Эшикда турибди, кираверсинми?— деб сўради.

Фаррух, чақиринг, деб буюрди. Орадан икки дақиқа ўтар-ўтмас Мирзаризо даллол ичкари кириб, салом берди.

Бу киши баланд бўйли, сариқ ва ориқ юзли, кичкина кўзли бир одам эди. Фаррух унга жой кўрсатди-да:

— Менга бир оз пул керак бўлиб қолди. Агар пулдор одам ваъдага ишонмаса, ҳовлимнинг бир бўлагини гаров қўйишга ҳам тайёрман,— деди.

Даллол ҳовлидаги иморатларнинг чиройли ва қимматбаҳо эканини кўриб, ёқтирди ва ичида:

«Бу депутатбоп ҳовли экан, албатта, олиш керак. Бундан анча фойда қиламан», деб ўйлади. Ушундай деб ўйлаганида, аввалда жуда қашшоқ бўлган, кейин олти йил газета чиқариб, зўр-базўр депутат ва давлатманд бўлиб олган бир муттаҳамни назарда тутарди.

Даллол Фаррухнинг гапини аниқлаб олмоқ учун сўради:

— Сиз ҳовлининг бир бўлагини гаров қўяман дедигиз чоғи, бунни қандай тушунса бўлади? Қанақа бўлак? Тушуна олмадим.

— Менга икки юз туман керак, холос. Шунинг учун, фақат бир бўлагини гаровга қўяман.

Икки юз туман арзимаган пул бўлгани учун даллолга унча маъқул тушмади. Чунки, Фаррух мишг туман сўраса, у ҳовлини кўзда тутиб, дарров санаб берган бўларди. Лекин, фойдадан қуруқ қолмаслик учун дарҳол ишга киришди:

— Ростини айтсам, шаҳарда, шундай ишлар билан шуғулланадиган давлатмандлар бор-у, лекин улар бундай арзимаган муомалаларга қатнашмайдилар. Чунки, икки юз туман деган нарса жуда оз. Агар бундан ортиқ пул керак бўлмаса, у вақтда каттароқ фойда тўлашга тўғри келади.

— Яъни, қандай, ҳозир, масалан, икки юз туман олмоқчиман. Шунга ойига қанча фойда тўлашим керак?

— Савдогарчиликда шундай таомиллар борки, улар дунё турганча барқарор. Юз тумандан беш юз туманга қадар пул учун ойига ҳар туманга уч юз динордан¹, беш юз тумандан минг туманга қадар пул учун ҳар туманга бир аббосийдан², минг тумандан ўн минг туманга қадар бўлган пул учун ҳар туманга уч шоҳийдан³, ундан юқори бўлган олди-бердиларда бизлар қатнаша олмаймиз, чунки кучимиз етмайди. Бундай олди-бердилар хорижий мамлакатлар билан иш кўрадиган савдогарларга ва лирани⁴ яхши кўрадиган улуғларимизга муяссар бўлади.

— Демак, мен ҳар ойда бир туман учун уч юз динордан тўлашим керак экан-да? Йўқ, бу жуда ҳам кўп.

— Ого, азбаройи худо, ёлғон гапирганим йўқ. Ишонмасангиз бошқалардан сўранг. Тағин мен сизнинг хотирангиз учун юзингиздан ўта олмасдан, ҳар туманига уч юз динор дедим. Бўлмаса, ҳар туманига икки аббосийдан кам сўрамас эдим.

Икки аббосийни эшитган Фаррух ўтирган ерида бир ирғиб тушди. Чиндан ҳам бир туман пулга икки аббосий, ёхуд ўн шоҳий фойда олиш ниҳоятда инсофсизлик ва виждонсизлик эди. Дунёнинг ҳеч бир мамлакатада беш-беш ярим фойиздан ортиқ фойда олинмайди. Лекин, Эронда бўлса, баб-баравар, яъни бир туманга бир туман фойда олинарди. Кўпчиликнинг фойдасини кўзлайдиган улуғ мартабали ҳазрат бўлса, кўпчилик халқни алдаб ишлатувчи катта амалдорлар ва бойларнинг нозик юракларига тўқинмаслик учун, ҳалигача хонавайрон қилувчи бундай гаров муассасаларига, бир оғиз бўлсин, сўз айтмайди. Лекин, Фаррухнинг чораси йўқ эди. Бу инсофсизлик фақат шу даллолга махсус эмаслигини билар ва даллолнинг бир қадар тўғри айтаётганини тушуниб:

— Шундай бўлса, ҳар туманига беш шоҳий бераман, ундан ортиқ бера олмайман,— деди.

Мирзаризо даллол бир оз ўйлагандан кейин:

— Ҳовлининг қанчасини гаровга қўясиз?— деб сўради.

¹ Динор — майда пул — 0,01 риёл.

² Аббосий — тўрт шоҳий.

³ Шоҳий — $\frac{1}{20}$ қирон ёки эллик динор.

⁴ Лира — олтин танга.

— Ҳовли уч минг тумандан ортиқ туради. Икки юз туман учун ярим донг¹ етарли бўлса керак, деб ўйлайман.

— Йўқ,— деди даллол,— бир донг учун сизга ҳеч ким эллик тумандан ортиқ бермайди. Ҳеч бўлмаса ҳовлининг бир донгини гаровга қўйишингиз керак.

Фаррух мажбур бўлганлиги учун бу талабни қабул этди. Бироқ бу муомаланинг тезроқ бартараф бўлишини даллолдан илтимос қилди.

Даллол чиқиб кетди.

Кечқурун келиб, ўша маҳалла аҳлидан каллапаз Ҳожи оғо деганни бошлаб келди. Ҳожи оғо то шартга рози бўлгунгача даллол эшикда турди. Фаррух бу муомалани битказиш учун Ҳожи оғо ва Мирзаризо билан бирга ҳазрати эшоннинг уйига жўнадилар. У ерда Фаррух котибни учратиб, гаров шартномасини тузиш учун келганларини айтди. Котиб ҳам дарров Фаррухни ҳазрати эшоннинг олдига олиб кириб таништирди. Ҳазрати эшон Фаррухни кўриши билан кулимсираб, меҳрибонлик билан деди:

— Раҳматлик отанг менинг энг яқин дўстларимдан бири эди. Марҳумни жуда ҳам яхши кўрардим. Унга алоҳида бир муҳаббатим бор эди. Худо раҳмат қилсин уни. Омин, оллоҳу акбар!

Аммо, қандай муҳаббат? Ҳазрати эшон унинг отаси тирикми, ўлганми, билмасди. Уғлидан бўлса, битта илтимос қоғози ёзиб бериш учун икки юз туман пул сўради. Сўнггида бўлса, унга муҳаббатим бор эди, дейди. Шундай ҳам беҳаёлик бўладими?

Ҳазрати эшон ўзини билиб-билмасликка уриб, Фаррухдан пул сўраганини юзига ҳам келтирмасдан яна сўзида давом қилди:

— Бетавфиқлар, хизматчингизни олиб бориб қамаб қўйганлигини-эшитиб, қазабим қайнаб кетди-да, дарҳол шайх Муҳаммадкаримга бир қоғоз ёзиб, назмнига юборишни буюрдим. Бироқ, бахтга қарши, бугун шайхнинг қўли оғриб тургани учун ёза олмади.

Шу пайтда ҳазрат эшон кўз қири билан шайх Муҳаммадкаримга қаради. У ҳам ишорат билан Фаррухнинг қандай иш учун келганини тушунтиргандан кейин яна сўзида давом қилиб деди:

¹ Ҳар бир буюмнинг олтидан бир қисми. Ҳар бир қисм ўз навбатида яна олтига тақсим қилинаверади. (Ред.)

— Ҳар ҳолда эрта билан ёзиб юборамиз. Эсингдан чиқмасинки, ўғлим, агар хатни олган заҳоти уни бўшатиб юбормасалар, ўша идорани вайрон-талқон қилиш, ёндириб юборишга буйруқ бераман.

Шу пайт оғойи шайх Муҳаммадкарим юзини ҳазрати эшонга ўгириб:

— Бу кишиларнинг ҳозир хизматингизга келишларидан бошқа ишлари бор экан, тақсир,— деди.

Ҳалигача миқ этмай ўтирган Мирзаризо аста букилиб таъзим қилди-да:

— Балли, ҳазратим, (Фаррухни кўрсатиб) бу кишига икки юз туман пул керак бўлган экан. Шунинг учун Ҳожи оғо билан гаров шартномаси тузмоқчилар,— деди.

Бу орада ҳазрати эшон билан шайх Муҳаммадкарим ўртасида им-қўқ бўлиб ўтди. Сўнгра ҳазрати эшон, Фаррухга ўгирилиб, деди:

— Ўғлим, бу пулларни нима қилмоқчисан? Тағин ҳар хил шайтоний ишлар учун сарф қилиб, ўзингни ҳам бу дунё, ҳам у дунё азобига гирифтор қилиб қўймагин!

Фаррух ҳазрат эшоннинг бу мунофиқона сўзидан қаттиқ аччиқланиб, қайтадан оғриб қолаёзди. У ўзини зўр-базўр тутиб:

— Эй, тақсир, бу пул бир зарур иш учун керак бўлиб қолди,— деди.

Ҳазрати эшон ортиқ ҳеч нима демади. Шу маҳал ҳамма давра қуриб ўтирди, ҳазрати эшон тўрдан жой олди.

Булар кириб ўтирган жой қадимий уй бўлиб, шифти тоқилик, деворларида рапли токчалар, ерга бўлса, ранги айниб кетган бир гилам солинган эди. Тўрга бир пўстак ташланган бўлиб, ҳазрати эшон ўшанга ўтирди.

Уйнинг қўйи тарафига хонтахта қўйилган, хонтахтанинг ёнига кичкина бир кўрпача тўшалган эди. Хонтахта устидан дафтар-қаламларга қараганда, бу ер котибнинг ўтирадиган жойи эканлиги маълум эди.

Фаррух билан каллапаз Ҳожи оғо ҳазрати эшоннинг ёнида, Мирзаризо бўлса, котибнинг рўбарўсида тиз чўкиб ўтирдилар.

Ҳазрати эшон ҳар икки тарафдан савол-жавобларни қилиб бўлгандан кейин, яъни васиқаларга қараб, шартларни билгандан кейин шартномани ёзишни буюрди ва ҳар туманга беш шоҳий фойда олишнинг ҳалоллиги тўғрисида бу ҳужжатнинг бошига шаръий бир кулоҳ кийгизди. Бу шартнома бўйича, гўё бир тараф беш пуд

қанд, иккинчи тараф эса, икки юз туман пул берар эди.

Гаров шартномасини ёзиш тугагандан кейин ҳазрати эшон кулиб, хизматкори Жаъфарқулини чақирди-да, чой ва чилим келтиришни буюрди. Қаллапаз Ҳожи оғога бўлса пулни шу ерда нақд бериб кетишингиз керак бўлади, деб айтди.

Қаллапаз Ҳожи оғо бир неча мартаба калта-калта йўталиб олгандан кейин, қўлини иркит гупписининг чўнтагига суқиб, бармоқлари билан чўнтагининг тагини бир неча мартаба титкилагандан кейин чўнтагидан яғри чиқиб кетган тугунча чиқариб, уни очмоққа бошлади. Тугунча ичида шоҳи Шаҳид замонидан қолган, дабдаласи чиқиб кетган бир неча қирондан бошқа ҳеч нима йўқ эди.

Фаррух бу чурик пулларни кўриб, таъби тирриқ бўлди. Лекин, котиб Фаррухнинг хаёлини тушуниб, дарҳол унга деди:

— Оғо, зарари йўқ, зарари йўқ, эски бўлса ҳам олаверинг. Қаёқдан биласиз, балки шу пулларни бермоқчи бўлган кишингиз қабул қилар.

Фаррух гапнинг тагини тушуниб, дарров олди. Яъни ҳазрати эшоннинг шундай пулларга одат қилганлигини тушуниб, ҳеч нима демади. Қаллапаз Ҳожи оғо пулларни санаб, Мирзаризога бера бошлади. Рўмолдаги пуллар қирқ туман, саккиз қирон, етти шоҳий эди. Ҳожи бу пулларнинг устига ўттиз уч шоҳий чақа пул қўйиб:

— Қирқ беш туман бўлди,— деди. Сўнгра қўлини иккинчи қўлтигига суқиб, яна шундай муомалалар учун атаб юрган бирталай эски пулларни чиқарди. Тўғриси, Ҳожи оғонинг бундай майда ишга унча рағбати йўқ эди. Чунки, у ўн минг туманлар билан муомала қилишни ўрганган, ҳам ўрнига қўяр эди. Хитой қоғоз билан ёпиштирилган йиртиқ бу пуллар билан жами саналган пул бир юз олти туман бўлди. Ҳожи оғо яна бир чўнтагига қўл солиб, кичкина бир тери кармонни чиқарди. Уни ҳам очиб, ичидан ўн дона Туркия лираси олиб деди:

— Ҳозирги кунда бозорда лиранинг қиммати икки қирони кам беш туман туради,— дегандан кейин санай бошлади.

Сўнгра бу ранг-баранг пуллардан икки юз туманни тўлдириб, Фаррухнинг олдига қўйди. Чой келтирилди, ҳамма чой ичишга бошлади.

Сўнгра ҳазрати эшон каллапаз Ҳожи оғога:

— Жуда яхши, сизнинг ҳужжатингиз эрта билан тайёр бўлади, келиб, олиб кетинг,— деди.

Ҳожи оғо букилиб таъзим қилгандан кейин:

— Дўкон ёлғиз эди, боришим керак,— деб узр айтиб, чиқиб кетди. Фаррух ҳам кетмоқчи бўлгани учун чўнтагидан икки туманлик пул чиқариб, Мирзаризо даллолга берди. Бироқ, Мирзаризо, «пулни чўнтагингизга солиб қўйверинг», деганидан жуда ҳайрон бўлиб сўради:

— Сиз нима демоқчисиз? Сизнинг ҳақингиз қанча бўлади?

Мирзаризо Фаррухнинг соддалигига ҳайрон бўлиб, ҳар икковлари уйдан чиқмоқчи бўлишган вақтларида деди:

— Оғо, гўё шу маҳалгача ҳеч бир муомала кўрмаганга ўхшайсиз-а. Сиз бераётган пулингиз жуда ҳам кам.

Фаррух ўз-ўзича: «Тавба, мен учун бутун қилган хизмати икки соатга боргани йўқ, яна икки туман берсам оғринади-я...» деб ўйлади.

Сўнгра овозини барала қўйиб даллолдан:

— Сизнинг ҳақингиз қанча бўлади, ахир?— деб сўради.

Шу маҳал оғойи шайх Муҳаммадкарим ҳам Фаррухнинг ёнига келиб секингина ундан:

— Ҳақимизнинг биринчи қисмини бериб кетасизми?— деб сўради.

Фаррух унга жавобан:

— Нариги уйда бераман,— деб жавоб берди. Сўнгра яна Мирзаризога қайрилиб, унинг жавобини кутди. Мирзаризо айтди:

— Менинг даллоллик ҳақим ҳар туманга ўн шохийдан бўлади. Икки юз туманлик муомала учун менга ўн туман беришингиз керак. Менинг ҳақим шу.

Фаррух ноилож қолди. У на муомалани буза оларди, на буни кўндира оларди. Энг сўнгида, бирталай талашиб-тортишгандан кейин, даллолни беш туманга рози қилиб, жўнатиб юборди. Сўнгра қоғоз билан бирга бошқа уйга кириб, ўша пулдан юз туманини санаб берди. Дарров илтимосномани ёзиб, ҳазрати эшоннинг имзоси билан назмияга юборилишини илтимос қилди.

Оғойи шайх Муҳаммадкарим бўлса, икки соатдан кейин илтимосномани ёзиб, Фаррухнинг уйига олиб бо-

ришга, унга кўрсатгач, назмияга юборишга ваъда қилди. Фаррух хайрлашиб чиқиб кетди.

Икки соатдан кейин оғойи шайх Муҳаммадкарим Фаррухнинг уйига келди. Ёзилиб, тайёр бўлган илтимосномани Фаррухга топширди. Конверт очиқ эди. Фаррух хатни олиб ўқиди:

«Назмия идорасига, эшитишимга қараганда, хизматчиларимиздан биттасини қайси бир динсизнинг туҳмати билан уч ойдан буён қамаб қўйган эмишсиз. Ҳатто ўша ақлсиз терговчи ҳам, шарият ва қонунга хилоф ўлароқ, яна ўша бечорани олти ой қамоқ ва юз даррага ҳукм қилибдир.

Шариати ислом жорий бўлган мамлакатимизда, дарра уриш ҳукмини чиқаришга журъат этиш сизнинг, ёинки аллақандай беному насаб терговчининг қўлидан келиши шаръий-шарифга иснод келтиради, аслида гуноҳ сизда эмас, балки сизни шунчалик ботир қилиб қўйган ҳукуматдадир.

Қандай бўлса ҳам, сизни огоҳлантириб қўялەнки, қанча тез бўлса шунча яхши, яъни ғзабим оловини алангалантириб, бир тўда тажрибасиз аҳмоқларни ёндирмасидан илгари, бояги айтганим йигитни тезлик билан бўшатиб юборинг!

Менинг буйруғимга бўйсунишни вожиб билиб, уни тезлик билан бўшатиб, акс ҳолда мусулмонларни зўрлаб, динсизлик асосига қурилган ва ислом оламининг юзига доғ бўлиб тушадиган, бошқа миллатлар олдида бизнинг бетимизни шувит қиладиган бундай идоранинг тарқатиб юборилишини давлат бошлиқларидан талаб қиламан.

Бу бир неча калималик хатни сизга ўз покиза ва табаррук қўлим билан ёзамай. Бояги йигитни албатта-албатта озод қилингиз. Бизнинг розилигимиз ҳар нарсадан юксакдир

Дуоғўйингиз... (имзо)»

Фаррухга хат маъқул тушди. Агар шу хат орқали Жаводни қутқариб ололса, қолган юз туманни эртага тўлашни ваъда қилди.

Оғойи шайх Муҳаммадкарим чиқиб кетар экан:

— Бу хат ҳозир назмияга юборилади. Фикримча, ҳатто шу бугун кечкуруноқ уни чиқариб юборадилар,— деди.

Фаррух энди ўзини бир оз хотиржам сезарди, шу йўл билан Жаводнинг қутулишига ишонар эди. Чунки, назмия-идораси мазкур хатни олиши билан қўрққанидан, оғойи Ф... уссалтананинг Жаводга қилган туҳматларини бир пул қилиб, уни дарров қўйиб юборарди.

Фаррух Жаводнинг ишидан тинчланиб, энди Маҳин тўғрисида ўйлай бошлади:

«Бечора, у қандай аҳволда экан? Унашиш тўйи бўлдимикан, шуни билиш керак эди. Лекин кимдан, қаердан биламан?» деб хаёл суриб кетди. Бир нарса эсига келиб қолгандай, яна ўз-ўзича:

«Шукуфани топиб, ундан ҳол-аҳволни сурштиришим керак», деб энагасини чақирди.

— Мен бир жойга бориб келаман, дарров қайтаман. Ким келса мени кутиб турсин,— деди.

Отасининг ҳузурига кириб, у билан бир оз сўзлашиб ўтирди. Ун беш дақиқалардан кейин уйдан чиқиб, Шукуфаларнинг оғойи Ф... уссалтананинг қасри яқинидаги Шайхҳодий чорсусидаги уйларига жўнади.

Оғойи Ф... уссалтананинг махсус хизматчиси Ризоқули Фаррухнинг изига тушиб, уни кузатиб борар эди. Бироқ, кун кеч бўлиб қолганлиги учунми, қандай бўлди-ю, Фаррух ўз ҳовлисининг рўбарўсидаги кавушдўзининг дўқонида уни кутиб ўтирган Ризоқулини кўрмай қолди.

Фаррух секин-секин кетар, Ризоқули ҳам у билан изма-из борарди. Ярим соатдан кейин Фаррух Шукуфаларнинг эшигига етди. Эшикни қоқди. Шукуфанинг ўзи эшикни очди. Фаррух уни кўриб, секин:

— Ичкарига кириб, Маҳин тўғрисида сендан баъзи нарсаларни сўрасам бўладими?— деб сўради.

Маҳиннинг отини эшитган Шукуфа, бошини қайғули бир аҳволда ҳаракатлантириб, Фаррухни ичкарига олди.

Фаррух эшикдан кириб, усти берк йўлакда тўхтади.

Шукуфанинг энг аввалги гапи Маҳиннинг ҳомиладор бўлиб қолгани ва никоҳ мажлисининг бузилиши эди. Фаррухнинг юраги бир оз таскин топгандай бўлди. Бироқ, Маҳиннинг қаттиқ касаллиги ва ҳозир Шимронга юборилганлигини эшитгандан кейин унинг бир оз секинлашган юраги яна қаттиқ ҳаяжон билан урмоққа бошлади.

ХИЕНАТҚОР ҚАНЧАЛИҚ БОТИР БЎЛСА ҲАМ ВАҲИМАГА ТУШАДИ

Муҳтарам ўқувчиларимизнинг эсларидан чиқмаган бўлса керак, биз Али Ашрафхонни Фаррухнинг: «Бир кун бизга ҳам навбат келиб қолар, шунда сиз билан сўзлашармиз», деб айтган аччиқ сўзини кулиб қарши олгани, «аҳмоқ одам, дунёда пулдорларга қарши ким бир иш қилиб уддасидан чиқа олган?» деб жавоб бергани ҳолда қўйиб кетган эдик.

Али Ашрафхон Фаррух кетгандан кейин ҳам ўз-ўзи-ча кулар эди. У чиндан ҳам Фаррухни масхара қиларди. Чунки, Али Ашрафхон каби ахлоқ эгаси бўлган киши учун тўғрилиқ, инсоф, виждон каби сўзлар аллақандай янги бир нарса эди. У ҳалигача биргалашиб юрган, суҳбат қилгани йигитлардан: «фалон хотин ундай, ё фалон бесоқол бундай», дегандан бошқа сўз эшитмаган эди. Ҳозир бўлса, қандайдир бир йигитнинг шундай бекорчи гаплар билан уни қўрқитганини кўриб, таажжубланарди.

Али Ашрафхон ўз-ўзича ўйлаб ўтирар эди. Бирданига эшик очилди. Қаҳвахоначи, ҳукумат идораси тарафидан муҳрданган иккита ярим мисқоллик ширани олиб кириб берди. Сўнгра, чўнтагидан гугурт чиқариб, тоқчадаги чироқни ёқиб, ерга қўйди. Али Ашрафхон қаҳвахоначига чой келтиришни буюрди. Қаҳвахоначи чиқиб кетди. Али Ашрафхон ўз уйида кечалари атлас ва бахмалларнинг устига қўйган кўкрагини ўша ҳужрадаги бит босган, ифлос ва сассиқ ёстиққа тираб, остидаги эски ва иркит палосга узанди. Кичкина темир куракчани чироққа яқинлаштиради-да, шира қўйгандан кейин чекмакка бошлади.

Биринчи ярим мисқоллик шира тамом бўлмасдан қаҳвачи эшикни очди. Аччиқ чойни келтириб, унинг рўбарўсига қўйди. Али Ашрафхон чойни ичди. Кўзларидан узлуксиз ёш тўкиб, иккинчи мисқолни ҳам темир куракчанинг устига ёпиштиради.

Ярим соатдан кейин Али Ашрафхоннинг хумориси тамом ёзилган, тўла нашъанинг ичида эди. Иккита ярим мисқоллик ширани чекиб бўлгунча беш стакан чой ичган эди.

Кейин ўрнидан турди. Қаҳвачига икки қирон пул бериб, у ердан чиқди.

Саҳндан ўтиб, долоннинг рўбарўсида турган бир боладан кўчада ўткинчилар борми-йўқлигини қараб бишлишга буюрди.

Кўчада ўткинчилар йўқ эди. Али Ашрафхон эшикдан тезлик билан чиқиб, бозор тарафга қараб кета бошлади. Бозор бошига етгандан кейин Лолазор хиёбонига борадиган бир кўнкага тушди.

Бутун дунёда «вақт ақчадир, ғофил бўлма, қочадир» деб ҳар киши ишнинг тез бўлишига ҳаракат қилганлиги маълум. Эронда бўлса, бу тамоман тескарисича, чунки бизнинг шаҳар кўнкаси ҳеч қачон йўловчиларнинг борадиган ерларига тезроқ етказишга шошилмайди. Кўнка ҳайдовчи билан чиптафуруш ярим йўлда чой ичиш, ёинки табиий заруриятлар учун, ёхуд ҳар қадамда кўнканинг издан чиқиб тургани учун халқни соатларча куттириб қўядилар.

Теҳроннинг Чароғи барқ хиёбони тупроғига ботишни, ё бўлмаса, Машин (яъни Темир йўл) хиёбонидаги қуёшда терлаб-пишишни хоҳласа ёки бирор романни бошлаб қўйиб, ўқиб битирмоқчи бўлса, ўша кўнкага туша берсин. Эрон халқининг фикрларини ва аҳволи-руҳиясини атрофлича ўрганмоқчи бўлган, ўрганишни истаган ҳар бир киши, албатта, кўнкага тушиши керак. Кўнкада қурама оломон бўлади. Қандай бўлса ҳам кўнка, икки мартаба издан чиқишига қарамасдан, ахири Лолазор хиёбонига келиб етди.

Али Ашрафхон кўнкадан тушди. Мухбириуддавла майдонини ўтиб, Шоҳобод хиёбонига, яъни ўз уйига қараб кетди.

Бундан икки соат илгари Фаррухнинг унга айтган ҳақоратли сўзларини парвосизлик билан эшитган Али Ашрафхон борган сари ташвишга тушиб, ҳадиксирамоқда эди.

У ўзига қарши кўтарилган ҳар бир кишининг устидан ғолиб келиб, ўша кишини енгизишга ишонар эди. Бироқ, овозадан қўрқар эди. У Ифбатга қилган разиллиги ошкор бўлиб қолиб, халқ нафратига дучор бўлишидан қўрқар эди. Ҳеч кимса уни куёв қилмас, бу эса унинг кслажак ҳаёти учун хавф солар, ўзича чизиб қўйган режаларини барбод урарди. Чунки, Али Ашрафхон янги хотин олишим ва илгари қилган ишларимни қайта бош-

дан яна бир мартаба такрорлашим лозим деб биларди.

Али Ашрафхон Фаррухнинг сўзлари, ўнинг таҳдидларига унчалик эътибор бермасди. Бироқ, Ифбатнинг отаси оғойи Р... уддавла улуғларнинг мажлисида Али Ашрафхон тўғрисида бир гап гапирса, бутун умидини кесиб, чиройли бир қиздан ҳам, баланд мартабадан ҳам бебаҳра бўлажигидан қўрқарди. Шу билан баравар лекин у катталардан биттасига Али Ашрафхон тўғрисида шикоят қилса, на Али Ашрафхоннинг пули ва на биродарининг обрўси бу ерда асқатарди, ҳатто уни қамаш ёхуд сургун қилишлари ҳам муҳаққақ экани тўғрисида ўйларди.

Али Ашрафхон шундай фикрлар билан банд экан, уйга келиб етди. Ўз хонасига кириб, эғнидаги эски кийим-бошларини ечди. Пешайвонда бўлган чинни чаноқнинг олдига бориб ювингандан кейин бошқа хонадаги телефон ёнига борди. Терговчи акасини телефонга чақириб, у билан анча вақтгача сўзлашди.

Ярим соатдан кейин Али Ашрафхон уйдан чиқди. Зарур бир иши бўлмаганлиги, шошмаганлиги учун янги ва озода кийим-бошларини кийиб, хотинларни йўлдан уриш учун аста-аста қадам босиб, олифта йигитлар билан тўла бўлган Шоҳобод, Лолазор хиёбонларидан ўтиб, Тўпхона майдонига келиб етди. Гўзаллар билан тўла бўлган Лолазор хиёбонидан ўтиб кетганига бир оз ачиниб, Маризхона хиёбонига қараб кетди. Ҳасанобод чорсусидан пастга бурилиб, Дарвозайи Қазвин хиёбонига ўтди. Сўнгра Қарбалойи Аббосали бозорчасига ва бозорчадан икки юз қадам чап тарафда бўлган кўчага бурилиб, катта ва кўк рангга бўялган бир эшикнинг рўбарўсига бориб тўхтади. Эшикни қоқди. Кўп ўтмасдан эшик очилиб, Али Ашрафхон катта ҳовлига кирди. Иморатнинг пешайвони рўбарўсида, ҳовуз бўйида акаси билан бир неча кишиларнинг ўтирганини кўрди. Улар гапларини бошқа ёққа бурмай, у билан саломлашдилар ва акаси Али Ризохон укасини меҳмонлари билан таништирди.

Али Ашрафхон бўш стуллардан бирига ўтирди. Бошқа ўтирганлардан биттаси Али Ашрафхоннинг қулоғига секингина бир нарсани айтди. Али Ашрафхон бўлса, баланд овоз билан жавоб берди:

— Йўқ, бемалол, хотиржам гапириша беринг.

Ўтирганлардан бири ёши йигирма иккиларда бўлган,

лекин узун соқол қўйган, гапига қараганда шаҳарда ҳар кун ваҳимали варақалар босиб тарқатадиган бир йигит эди. У деди:

— Бу ерга йиғилишимиздан мақсад, чой ичиб, нон ейишнинг ўзигина эмас.

Али Ашрафхон: «Сал илгарироқ келсам, чой-ноннинг устидан чиқар эканман», деб ачинди. Бироқ, шу пайтда хизматкор бир стаканда чой келтириб қўйди. Соқол қўйган йигит сўзида давом қилди:

— Бизлар бу гўзал мамлакатнинг порлоқ фикрли йигитлари ва шу бечора ўлканинг зиёлиларимиз. Мамлакатимизнинг ҳозирги аянч аҳволини кўриб туриб, лоқайдлик билан бепарво қараш бизларга ярашмайди. Бу ватанга хиёнат демакдир. Биз бор кучимиз билан курашишимиз ва зарурий ислоҳот ўтказишимиз керак.

Бу йигит шундай қизғинлик билан сўзлар эдики, гўё унинг алангаланган юрагини бир-икки челақ сув билан ўчириш қийин эди. Гапларига қараганда, ойига қирқ-эллик туман маош уни қаноатлантирмасди. Лекин, Қазвин ёки Занжоннинг молия раиси бўлишгина уни бир нав қониқтирар эди.

Бу вақт ўттиз беш ёшга кирган, бадбашара, аввалги йигитдай серсоқол, ўз газетасида оилавий ўқишлар учун бемаза ҳикоялар босиб чиқарадиган ношир ўрнидан туриб деди:

— Мен ҳам муҳтарам йўлдошим оғойи Б. нинг сўзларига тамоман қўшиламан. Чинакам ислоҳот ўтказиш учун бир йўл, бир сабаб қидириш керак эканлигини тасдиқлайман. Бу ислоҳот, қўп одам айтгани каби, янгиликка асосланиши керак. Менинг фикримча, ислоҳот, ҳаммадан бурун хотин янгилашдан бошланиши керак. Эркак ўз ёстиқдошини ҳар соатда ўзгартириб, зарур бўлган тақдирда, янгисини олиш ҳуқуқига эга бўлиши керак. Акс ҳолда биз, бобо-бобокалонларимиз ва Шайх Саъдий алайҳираҳма каби донишмандимиз ўртага ташлаган барча масалаларни барбод этиб, ўзимиздан янги бир усул киритсак, аждодларимизнинг лаънат ва нафратларидан бошқа бир нарсага сазовор бўлмаймиз. Кишининг отаси дарахтга эътиқод қилган бўлса, фарзанд ҳам тасининг йўлидан бориб, дарахтга эътиқод қилиши керак. Чунки, ҳар нима бўлса ҳам у биздан кекса ва тажрибалироқ эди. Менинча, ҳар бир қалта кийимли одамга қаттиқ танбеҳ бериш керак, ҳатто зарур бўлса, қопга

солиб, Шамсул-иморанинг тепасидан ташлаш керак. Чунки, у одам калга кийим кийиш билан ўзини фарангларга ўхшатиб, ғайри дин бўлиб қолади. Киши ҳар қандай иш қилган вақтда ҳам ўзгаларни ўша ишдан огоҳ қилмаслик учун, албатта, узун кийим-бош кийиши керак. Менинча, бир одам ўзини қуёшнинг иссиғидан сақлаш учун бўлса ҳамки, кулоҳнинг олдига ё орқасига бир соябонча қўйса, ўша кулоҳни йиртиб ташлаш керак, уни кийган бошни бўлса мажақлаш керак, чунки миллатимизнинг бирдан-бир нишонаси, у ҳам кулоҳдир. Кулоҳ йўқолса, миллатимиз ҳам барбод бўлади. Айниқса, мўйловини қирдирадиган аҳмоқларнинг нима демоқчи эканликларини ҳеч тушуна олмайман. Ўзини хотинга ўхшатишнинг нима маъноси бор? Шундай ифлос ҳаракатлар билан эрликдан тонмоқчи бўлган бу хотинчалиш одамларга нима дейиш керак? Йўқ! Бундай нарсаларни йўқотиш керак. Бундай ўзгаришларни илдизи билан суғуриб ташлаш лозим. Шундай қилиқлар ўртдан кўтарилса, иқтисодий вазиятимиз яхшиланади, тўқчилик бўлади.

Бу гаплардан кейин Техрон руҳонийларидан бирининг ўғли бўлган шайх ўрнидан туриб деди:

— Мен оғойи Ҳ. айтган гапларини батамом қабул қилиш билан баробар шуни ҳам айтаманки, аввало бизнинг жамиятимиз шундай нозик масалаларни қўйиш қудратига эга бўлган бир аъзоси билан фахрланишга ҳақли деб биламан. Иккинчидан бўлса, мажлис раисининг (юзини Али Ризохонга ўгириб) ижозатлари билан, муҳтарам оғойи Ҳ. нинг ёстиқдошни янгилаш хусусидаги таклифларини овозга қўйишни илтимос қиламан.

Али Ризохон бу таклифнинг овозга қўйилишига ижозат берди. Али Ашрафхон ҳам бунга бутунлай қўшилди. Мажлис аҳлидан бири мажлисдагиларга овоз бериш учун кичкина варақачаларни тарқатди. Ун беш дақиқадан кейин натижа маълум бўлди. Ҳаммалари бир оғиздан хотин янгилашга тарафдор ва бошқа нарсалардаги ҳар бир янгиликнинг қаршисига овоз берган эдилар.

Али Ризохон ўрнидан туриб:

— Шу ерда ҳозир бўлган оғоларнинг ижозатлари билан мен ҳам жамиятимизнинг аъзолари ўртасида бўлган самимият тўғрисида бир неча оғиз сўз айтмоқчиман,— деди.

Ҳамма жим бўлди. Али Ризохон сўзида давом этди:

— Мен Техрондаги жамиятларнинг кўпларига аъзо бўлганман. Ҳатто, бир жамиятнинг буйруғи билан Қумнинг адлия раислигига, иккинчи бир жамиятнинг топшириғи бўйича хусусий бир топшириқ орқасида тўрт минг туман даромад қилган бўлсам ҳам, бироқ ҳеч қайси жамиятда маъна шу жамиятимиздаги самимиятни кўрмаганман. Кўпинча менга ўхшаш йигитларнинг таклифларига аҳамият бермас эдилар. Улар айтар эдиларки: «Саводсиз бир кишининг фикри тўғри бўлмайди, унинг газета чиқаришга ҳаққи йўқ, ундай одам халққа йўлбошчи бўлишга ва унинг тақдирини ҳал қилишга муносиб эмас», деб кўпчидик билан менинг сўзимни қайтарар эдилар. Ҳолбуки, бу тамоман янглиш. Менингча, таҳсил кўрган, ўқиган йигитларда динсизликдан бошқа ҳеч нима йўқ. Аммо саводсиз ёшларнинг бўлса, ҳеч нималари бўлмагани ҳолда, динлари мустаҳкам.

Биз шу билан хурсанд бўла оламизки, жамиятимизда бўлган кишиларда хурофот ҳам, зиддият ҳам йўқ. Бу бўлиши ҳам мумкин эмас. Чунки, алҳамдулилло, ҳаммамиз саводсизмиз. Масалан, сиз (юзини шайхга ўгириб), бир неча кун бўлса ҳам хусусий «Сан-Луи» ҳунар мактабида ўқигансиз, кейин чиқиб кетгансиз.— Кейин юзини узун соқолли ноширга ўгириб деди:— Сизнинг саводингиз ҳам «Ҳафтияк»ни ҳижжалаб ўқишдан нарига ўтмайди.— Энг охирида узун соқолли йигитга қараб айтди:— Сиз бўлсангиз, «хомсиз нонга ўхшаш нарсасиз», ҳали немис мактабига, ҳали ҳарбий мактабга қатнаб, ҳеч қандай илм ўрганмагансиз, ҳозир бўлса, ваҳимали хабарлар чиқариб юрибсиз.— Мажлисдагилар «хомсиз нонга ўхшаш нарсасиз» сўзини эшитиб, хоҳлаб кулиб юбордилар. Али Ризохон сўзида давом қилиб, бошига кичкинагина салла ўраган «давлат кабинетини ларзага келтирувчи» деб исм қўйганлари бир аҳли растага қараб деди:

— Сиз эса гоҳ даллол, гоҳ сиёсатчи, дам ўтмай соатсоз бўлиб қоласиз.

Кичкина саллачани бошига қўндирган аҳли раста бу гапларни эшитгач, кўзларини пириллатиб деди:

— Оғойи раис, мен Ироққа сургун қилинганимдан кейин ашрофлар қаторига қўшилганимни эсингиздан чиқарманг.

Али Ризохон сўнги сўзида айтди:

— Мен жамиятимиз аъзоларининг фикрини бир нарсага жалб этмоқчиман. У ҳам бўлса, шундай муҳим бир масалани яқдиллик билан маъқуллашимиздир, жамиятимиз аъзолари ўртасида бўлган бу бирликни чин қалбимдан олқишлайман.

Ҳаммалари кулиб, шундай бир жамиятнинг аъзоси бўлганликлари учун бир-бирларини табрик қилдилар.

Сўнггида мажлис котиби шайх ўрнидан туриб деди:

— Мажлисимиз ёпиқ. Эндиги мажлисимиз келаси, чоршанба куни кечқурун соат бешда, кавушдўзлик бозорида, оғойи Б. нинг уйларида бўлади. Аъзоларнинг вақтида етиб келишларини илтимос қиламан.

Шундан кейин жамият аъзолари битта-битта туриб тарқалдилар. Ахири ака-ука қолди. Шу пайт ака, яъни Жаводнинг терговчиси Али Ризохон Али Ашрафхонга деди:

— Телефонда менга нима демоқчи бўлдинг, ҳеч нарса тушуна олмадим. Нима бўлди, ўзи нима гап?

Али Ашрафхон Ифбатнинг бошига келтирган бутун можараларни акасига гапириб берди. Шундан кейин:

— Энди қандайдир бир йигит келиб мендан ўч оламан, деб кўрқитяпти,— деди.

Али Ризохон укасининг гапларида унча ҳам таъсирланмасдан сўради:

— Жуда яхши, у одам нима деяпти? Сени нима билан кўрқитмоқчи бўлади?

— Билмадим, қандайдир Жавод деган кишини сиз олти ой қамоқ ва юз даррага ҳукм қилган экансиз, «шунини озод қилдирсанг, ўч олишдан кечаман, акс ҳолда юқори идораларга шикоят қилиб, расвойингни чиқарман», дейди.

— Ҳа, бўлди, тушундим. Бу Жаводнинг шериги. Жуда яхши, мен энди унга Жаводга берганимга ўхшаш бир жазо берар эканман. Кўрқма, у сени ҳеч нима қила олмайди. Чунки, унга қарши сендан каттароқ, яъни оғойи Ф... уссалтанайда катта бир душман турибди, хавотир бўлма, сенга қарши минг мартаба шундай гапларни айтса ҳам, ҳеч бир натижа чиқмайди.

Али Ашрафхон оғойи Ф... уссалтанани шахсан танимагани учун акасидан унинг ким эканлигини сўради.

Али Ризохон оғойи Ф... уссалтананинг ким эканлигини, Жаводни бўлса, оғойи Ф... уссалтананинг сўзи билан олти ой қамоқ, юз даррага ҳукм қилинганлигини сўзлаб бергандан кейин сўзининг охирида деди:

— Оғойи Ф... уссалтанани кўриб, Фаррухнинг сенга қилган дуқларини, ҳам Жаводни қутқазиш учун уриниб юрганлигини айтиш керак. Қани, у бирор ерга каттароқ бир илтимос қоғози ёзиб, уни ҳам авахтага солсинки, ўша ерда йўқолиб кетсин.

Али Ашрафхон акасининг маслаҳатин маъқул кўрди ва оғойи Ф... уссалтана билан қай вақт учрашишларини сўради.

— Уч кундан кейин кўришамиз... Чунки, мен ҳозир Шимронга кетаётиман. Икки кундан кейин қайтаман.

Али Ашрафхон ҳеч нима демади. Уч кундан кейин кечқурун акаси билан бирга оғойи Ф... уссалтананинг ҳовлисига бормоқчи бўлдилар.

Али Ашрафхон яна ўн беш дақиқа чамаси акасиникида ўтиргач, акасидан ҳозирги мажлис қандай жамиятнинг мажлиси эканини сўради ва бу жамият қанақа жамият, деди. Али Ризохон жамият тўғрисида укасига тушунтира бошлади:

— Орада хусусий манфаатдан бошқа ҳеч нарса йўқ. Бу кўрган одамларинг Техронда жуда катта нуфузга эгалар. Биттаси газета муҳаррири, вақти келганда мени ҳимоя қилади. Бири бўлса, ҳозир ишсиз ҳам пулсиз бўлганлиги учун вақтинча ваҳимали хабарлар босиб тарқатади. У бўлса, менинг яхшиликларимни таърифлаш билан халқни лақиллатади. Учтинчиси ҳам нотик, ҳам сиёсатчи. Лекин, икки кунда бир соатсозлик ҳам қилиб қўяди. Керак бўлган вақтда менинг депутат бўлишим учун эшикма-эшик югуради. Тўртинчиси бўлса, бозорда даллоллик қилади. Бешинчиси шайх ва чапани. Бу ерда энг қизиғи шундаки, булар ҳам ҳар қайси-си ўз манфаатини кўриш учун менинг атрофимга тўпланишган.

Али Ашрафхон шундай олий мақсадлар учун кураша бошлаган акасини табриклаб деди:

— Чиндан ҳам бизга нима қилибди, юксак мансабларни эгаллаш учун бизнинг нимамиз кам?

Бир оздан кейин Али Ашрафхон акаси билан хайрлашиб, уйдага қайтди.

ФАРРУХНИНГ ЖИННИЛИГИ АНИҚЛАНГАН ЖОЙ

Биз Сиёвуш Мирзони унашиш тўйи куни оғойи Ф... уссалтананинг боғида ошнаси билан сўзлашиб ўтирган-да қўйиб кетган эдик. Оғойи Ф... уссалтана ичкарига нима учун чақирганлигининг сабабини, ўн дақиқадан кейин ташқарига чиқиб, докторни ҳам ичкарига олиб кириб кетганлигини биламиз. Бироқ, мажлисдагилар докторнинг нима сабадан ичкарига чақирилганини билмаган эдилар.

Баланд овоз билан, аллақайси бир фоҳиша хотиннинг ўзига ошиқ бўлиб қолганлигини ўртоғига исбот қилиб ўтирган Сиёвуш Мирзо ҳам буни билмай қолган эди. Шу он Ризоқули келиб, секингина шаҳзода К.нинг қулоғига бир нарса деб шивирлади. Шаҳзоданинг ранги бўздай оқариб кетди. Аста-секин бу шивирлаш бошқа кишиларнинг ўртасига ҳам тарқалди. «Келин касал бўлиб қолибди, беҳуш бўлиб қолибди» деган сўзлар юра бошлади. Ахири бу сўз Сиёвуш Мирзонинг ҳам қулоғига етди. Ризоқулини чақириб, аҳволни сўради. Ризоқули, қизнинг касал бўлиб қолганлигини, докторнинг гапига қараганда, бугун никоҳ ўқишни қолдириш лозим эканлигини айтди.

Сиёвуш Мирзо пинагини бузмасдан, ўзича гўнғиллаб қўйди:

— Аттанг, яхши бўлмабди-да, икки қуённи қувиб, бирини ҳам тута олмадим. Алининг ошига ишониб, Валиникидан ҳам қуруқ қолдим,— деди-да, секингина ўрнидан турди, мажлисдагилар билан хайрлашиб, отасига яқинлашди:

— Менинг бу ерда ҳеч қандай ишим қолмади, кетаман,— деб йўлга тушмоқчи бўлди.

Бу тўсатдан бўлган ҳодисадан жуда ҳайронликда қолган отаси:

— Йўқ, ҳозир бу ердан кетишинг яхши эмас, бир оз тур! Қизнинг саломатлигидан хотиржам бўлгандан кейин кетасан,— деди.

Сиёвуш Мирзо отасига қараб илжайиб, пешонасини тириштирди-да, жавоб берди:

— Нима қилар эди дейсиз, шамоллагандир, яхши бўлиб қолади. Менинг жуда ишим кўп. Бекорга вақт ўтказиб, бу ерда ўтиришим яхши эмас.

Отаси ҳеч нима демади. Бироқ, ичида ўглининг Теҳронда ҳеч қандай иши бўлмаганлигини, текин овқат еб, бекор юрвчи «саёҳатчилар»дан эканлигини яхши билгани учун уни гапга тутди. Сиёвуш Мирзо ўн дақиқадан кейин чиқиб извошга минди. Муҳаммад Тақи ҳам извошчининг ёнига ўтириб, жўнаб кетдилар.

Сиёвуш Мирзо ҳозиргина ўтган воқеага ҳеч парво қилмай, унинг ўзи учун қай даражада аҳамиятли эканини ўйлаб кўрмасдан, юзини Муҳаммад Тақиға ўгириб, кула-кула деди:

— Муҳаммад Тақи, бугун бу ерда ишимиз ўринламади. Уқимиз тошга тегди. Сен нима дейсан, бу кунги вақтни бекорга ўтказмасдан, бир ўша тарафларга борсак яхши бўлмасмикин-а?

Муҳаммад Тақи орқасига ўгирилиб жавоб берди:

— Извош билан у ерга бориш жуда қимматга тушиб кетади. Чунки, ўн туман ўрнига ўттиз туман сўраб қолади.

— Биз у ерга етмасдан извошдан тушамиз-да, яёв борамиз,— деди Сиёвуш Мирзо.

Муҳаммад Тақи извошни Маризхона хиёбонидан Тўпхона майдонига, у ердан бояги Чароғи барқ хиёбонига, энг сўнгида Амин-ҳузур муюлишидан ўтказиб, Қожория кўчасида тўхтатди.

Извошдан тушдилар. Муҳаммад Тақи валинеъматини Ноибуссалтана сарбозхонасининг яқинида бўлган кичкина бир уйга олиб кирди. Уйнинг деворлари жуда ифлос эди. Рўбарўсидаги ҳовузнинг лаблари ўпирилиб кетган, ичида суви йўқ эди. Бундан ўн беш дақиқа чамаси илгари оғойи Ф... уссалтананинг чиройли боғчасида ўтирган Сиёвуш Мирзога бу уй ҳеч ёқмади. Муҳаммад Тақиға:

— Бу ер жуда ёмон ва ифлос-ку!— деди.

Муҳаммад Тақи дарров:

— Дўндиқчалари шунақа ерларда бўлади-да,— деб жавоб берди. Сиёвуш Мирзо билан Муҳаммад Тақи бу кечаси шу ерда қолди. Улар эрта билан уйга қайтдилар.

Сиёвуш Мирзонинг отаси уйнинг эшигида извошга тушмоқчи бўлиб турар эди. У ўглининг бу кун кечаси уйга келмаганлигидан ҳамда никоҳ мажлисининг бузилганлигидан жуда ҳам ташвишга тушган эди. Уғлини кўриш билан хурсанд бўлиб кетиб, сўради:

— Қаерда қолдинг?

Сиёвуш Мирзо ҳеч нима дея олмай қолди, жавоб топиб бера олмади. Бироқ, оғосининг гап топиб бера олмаганини кўрган Муҳаммад Тақи олдинга ўтиб жавоб бера бошлади:

— Кечаги воқеадан кейин оғомнинг аҳволлари бир оз паришон бўлганини кўрганимдан кейин шаҳар атрофидаги боғлардан бирига олиб бориб айлантириб келдим.

Шаҳзода К. ҳеч нима демади. Яна Сиёвуш Мирзога қараб айтди:

— Мен Маҳиннинг аҳволидан хабар олиш учун оғойи Ф... уссалтананикига кетаётирман. Агар истасанг юр, бирга бориб келамиз. Яхши бўлади,— деди.

Сиёвуш Мирзо:

— Бир оз тобим қочиб турибди,— деб узр айтди ва сўзида давом қилиб деди:

— Балки, вақтим бўлса, кечқурун ўзим бир ров бориб, аҳволини сўраб келарман.

Шаҳзода К. кетди. Сиёвуш Мирзо бўлса, ичкарига кириб, бугун кечасидаги «тоби қочганлик»нинг ҳордигини ола бошлади.

Икки соатдан кейин отаси қайтиб, Маҳиннинг аҳволи кечадан буён ўзгармаганини, докторнинг гапига қараганда, бу яқин ўртада тузалиб кетиши қийин эканини айтди. Сиёвуш Мирзо ҳеч нима демагани каби, ташвишга ҳам тушмади... Лекин, ичидан бир оз севиниб ҳам қўйди. Чунки, у хотин оёқнинг кишани деб билар эди. Оёқ боғлиқ бўлмаганидан кейин киши ҳар хил тубаён ишларни яна эркинлик билан қилиши мумкин деб ўйларди. Отаси Сиёвуш Мирзога:

— Сен, ахир, куёвсан, бориб қайнатангдан Маҳиннинг аҳволини сўрашинг керак, бугун кечқурун, албатта боргин,— деб тайинлади.

Сиёвуш Мирзо ҳам кечқурун боришга сўз берди. Кечга томон Сиёвуш Мирзо Муҳаммад Тақи билан бирга извош ёллаб, оғойи Ф... уссалтананикига жўнади. Улар кирганларида оғойи Ф... уссалтана боғчада хаёл суриб айланиб юрар эди. Куёвни кўриш билан у кулимсираб:

— Ия-ия! Сиз ўзингизми, баракалла! Қани, марҳамат! Нечук худо ёрлақади?— деди.

Сиёвуш Мирзо одоб билан салом берди. Оғойи Ф... уссалтана билан бирга ичкари ҳовлига кирдилар, Шу

пайтда Сиёвуш Мирзо тортинибгина Маҳиннинг аҳволини сўради. Оғойи Ф... уссалтана:

— Аҳволи унчалик ёмон эмас эди, лекин доктор бир оз ҳавони ўзгартиришни лозим топди. Шунинг учун Шимронга, Жаъфарободдаги боғимга юбордим. Бир оз ўша ерда дам олсин,— деб жавоб берди.

— Онамиз ҳам ҳамроҳ бўлиб кетган бўлсалар керак?

— Шундай. У киши ҳам бирга кетдилар. Бироқ, менинг ишларим кўп бўлгани учун улар билан бирга кетишнинг чорасини қила олмадим.

Сиёвуш Мирзо бошқа ҳеч нима демади. Чой келтирилди. Қайнота ва куёв чой ичишга машғул бўлдилар. Шу пайтда Ризоқули ичкарига кириб, оғойи Ф... уссалтайага кумуш патнисда иккита визит карточкасини узатди. Оғойи Ф... уссалтана бу икки визит карточкани балайд рвоз билан ўқиди. «Али Ашрафхон, Али Ризохон». Оғойи Ф... уссалтана Али Ризохонни танир эди. Бироқ, ҳозир бу ерга нима учун келганлигини билмас эди. Бир оз ўйлагандан кейин Ризоқулига:

— Айт, марҳамат қилсинлар!— деди.

Бир оздан кейин Али Ризохон билан Али Ашрафхон кирдилар.

Оғойи Ф... уссалтана уларнинг ҳар иккови билан кўл олишиб кўришди, Сиёвуш Мирзо ҳам улар билан кўришгандан кейин, ўтирдилар.

Оғойи Ф... уссалтана Али Ризохонга қараб деди:

— Сизлар бу оғони (Сиёвуш Мирзони кўрсатиб) танимасаларингиз керак. Менинг бўлажак куёвим, шаҳзода К. нинг ўғиллари Сиёвуш Мирзо бўладилар.

Бу сўзларни эшитган Али Ризохон билан Али Ашрафхон:

— Жуда яхши, жуда яхши, худо умрларини узун қилсин,— деб Сиёвуш Мирзони бошдан-оёқ кўздан кечириб чиқдилар.

Сўнгра оғойи Ф... уссалтана Сиёвуш Мирзога қараб, деди:

— Бу киши оғойи Али Ризохон бўладилар. Маҳкаманинг олтинчи шуббасида терговчи бўлиш билан баробар яхшигина илмли, ҳам завқли йигитларимиздан. Али Ашрафхон бўлса, бу кишининг укалари.

Али Ризохон битта папирос тутатиб сўзга бошлади:

— Бундан беш кун илгари, телефон билан жаноби-

нгизга айтганим кишини, олти ой қамоқ ва юз даррага ҳукм қилдим. Кеча дарра уриш жазоси ижро этилди.

Оғойи Ф... уссалтана деди:

— У ҳаромзоданинг дарра еганини томоша қилишни жуда ҳам истар эдим, лекин бахтга қарши, кеча бир кўнгилсиз ҳодиса юз бериб, бора олмадим. Извошда бўлса ҳам жазо майдони ёнидан ўтиб, томоша қилгим бор эди.

— Лекин мен бориб кўрдим,— деб Али Ашрафхон ҳикоя қила бошлади,— жуда ҳам қизиқ томоша бўлди. Айниқса, уни дарралаётган вақтларида оломоннинг орасидан бир хотин дод-фарёд қилиб, «бу менинг ўғлим, менинг Жаводим, бир ҳафта бундан илгари кўрган тушим тўғри экан», деб майдон ўртасига югурган вақтда бир полициячи тарафидан милтиқ қўндоғи билан ерга уриб йиқитилгани жуда ажойиб томоша бўлди-да. Мен умримда шунчалик зийрак полициячини кўрмаган эдим. Ниҳоятда маза қилдим. Хурсанд бўлганлигимдан, ростини айтсам, ўзимни тутиб ололмай, чапак чалиб юборибман.

Оғойи Ф... уссалтана бу сўздан шундай хурсанд бўлган эдики, Маҳиннинг касаллигини ҳам унутиб кулмоққа бошлади. Али Ашрафхон сўзида давом қилиб айтди:

— Ундан ҳам кулги берган жойи шу бўлдики, юз даррани уриб бўлгандан кейин қўл-оёғини ечиб қўйиб юборганда Жавод бирданига арраланган дарахтдай ерга қулади. Тўпланган оломон қайтабошдан кулиб, чапак чала бошлади. Чинини айтсам, бизнинг Эрон халқини бир хил одамлар завқсиз дейдилар. Менингча, бу тўғри эмас.

Оғойи Ф... уссалтана сўради:

— Мақсадингизни тушуна олмадим. Жаводга нима қилган эди, нима бўлди?

— Ҳеч нима қилгани йўқ. Фақат беҳуш бўлиб қолган эди, ҳолос.

Оғойи Ф... уссалтана яна баланд овоз билан кулишга бошлади, кулги орасида:

— Худо қандай ўч олади-я, худонинг ўч олишини қаранг! Одамлар гуноҳнинг жазосини у дунёда олади дейдилар, ҳолбуки, бу дунёда яна тезроқ жазога гирифтор бўлади,— деди.

Али Ашрафхон сўзида давом қилди:

— Уни жазо майдонидан тўғри касалхонага олиб кетибдилар, кейин яна қамоққа юборилар эмиш.

Бу сўз оғойи Ф... уссалтанага унча ёқиб тушмади.

— Энди вақт ўтди. Эрта билан полиция бошлиғи билан сўзлашиб, илтимос қиламанки, уни дарров касалхонадан олиб қамоққа юборсин. Унга мумкин қадар кўпроқ азоб бердирсин.

Жавод тўғрисидаги суҳбат шу ерда тўхтади. Сиёвуш Мирзо Жаводни танимагани учун сўзга аралашмади.

Шу пайтда Али Ризохон сўзни бошқа ёққа буриб, оғойи Ф... уссалтанадан сўради:

— Жанобингиз, кеча уйимда бир кўнгилсиз ҳодиса юз берди, дегандай бўлдингиз. Худо кўрсатмасин, бирор ярамасроқ иш юз бериб қолдими?

— Шундай, кеча мана бу (Сиёвуш Мирзони кўрсатиб) оғо билан қизимнинг никоҳ мажлиси эди. Бахтга қарши, қизим бетобланиб қолди. Докторнинг маслаҳати билан никоҳ бошқа кунга қолдирилди.

Бир оздан кейин Али Ризохон ўз мақсади тўғрисида сўз очди:

— Укам билан бу ерга келишимдан мақсад, жанобингизнинг ишларига алоқадор бўлиб, укамдан ўринсиз талаблар қилган бир киши тўғрисида сизни хабардор қилиб қўйиш эди.

— Қани, марҳамат қилинг, эшитишга тайёрман,— деди оғойи Ф... уссалтана.

Шу пайтда Али Ашрафхон ўзини тузатиб, сўзлай бошлади:

— Бундан уч кун илгари бир киши бизнинг уйга келиб: «Қандай ишда эдингиз, Исфаҳонда нима қилдингиз, аввали ким эдингиз?» деб менга бирталай саволлар бера бошлади. Мен бу кишини танимаганлигим учун, «оғо, бу саволларни беришдан мақсадингиз нима?» деб сўрадим. У бўлса, ҳеч уялмасдан оғзига келган гапларни айтиб, бирталай ноҳақ, номуносиб тўхматларни менга тақиб, «сени расво қиламан» деб қўрқитмоққа бошлади.

— Нимага? Балки у одам жиннидир?— деб сўради оғойи Ф... уссалтана.

— Ақлли одам бундай гапларни гапирмаса керак эди. Аввало хизматкоримни чақириб, уни ҳайдаб чиқармоқчи бўлдим. Бироқ, унинг айтган гапларини эшитиб, менга тақиган тўхматларини тингламоқчи бўлдим. Чуңки,

гаплари жуда ҳам кулгили бўлиб, у гапларни жуда ҳам ботирлик билан айтарди. Мен унинг мақсадини батамом билиб олмоқ учун қулоқ солиб туравердим. У бўлса, ҳеч гап тортмасдан, уялмасдан, оғзинга келганини қайтармас, ҳаттоки «расво бўлишни истамасангиз, айтганларимни қабул қилишингиз керак», дер эди. Мен мийғимда кулиб, жуда яхши, қани, таклифингиз нима, мен нима қилишим керак, деб сўрадим. У бўлса, жавобан, акангиз Али Ризохон бир бечора йигитнинг терговини тезлик билан тугатиб, унинг гуноҳсиз эканлигини эълон қилиш билан баробар уни оқлаб юбориши керак, сиз акангизни шунга мажбур қилишингиз лозим, деди. Мен унга жавобан: «Жуда яхши, агар мен шу ишни қилмасам, мени нима қиласан?» деб сўрадим. У овозини барала қўйиб: «Сизнинг виждонсизлигингизни бутун шаҳарга ёйиб юбораман, сиздан ўч оламан», деди.

— Шунчалик бўлмаган гапларни эшитиб ўтиришга тоқат қилганингизга ва ҳеч нима демаганингизга ҳайронман,— деди оғойи Ф... уссалтана.

— Йўқ, мен унинг фикрини тамоман билиб олмоқ, ишнинг тагига етмоқ истар эдим. Шунинг учун уни масхара қилиб, бу ерни Лондон ё Париж деб ўйлаган бўлсанг керакки, виждонсизликдан гапириб турибсан, янглишасан, дедим. Яна айтдим: «Қани хўш, айт! Қандай ҳужжатларга асосланиб, мени шундай жиноятларда айбламоқчи бўласан?» дедим. Бу сўзларимга хохолаб кулди-да, яна бир қайта девоналигини намойиш қилгандан кейин чўнтагидан бир хат чиқариб, деди:

— Маъна бу хат сизнинг қўлингиз билан ёзилган, шу хатингиз асосида сиз жиний жавобгарликка тортиласиз,— деди. Унинг мақсадини янада яхшироқ тушунмоқ учун сохта ҳаяжон билан:

— Рост айтасан, бу хат чиндан меники, энди мен нима қилишим керак?— деб сўрадим. У бўлса дарров:

— Акангизга айтинг, ҳеч бир гуноҳи бўлмагани ҳолда олти ой қамоқ, юз даррага ҳукм қилинган Жаводни қутқариб юборсин,— деди.

«Жавод» калимасини эшитган оғойи Ф... уссалтана девона деб саналаётган йигитнинг Фаррух эканини сездиди-да, деди:

— Агар Фаррух шу сўзларни айтган бўлса, чиндан ҳам девона бўлиб қолибди.

Ҳалигача гапнинг нима тўғрисида бораётганини анг-

ламагани сабабли аралашмай ўтирган Сиёвуш Мирзо бирданига бўғиқ овоз билан айтди:

— Ижозат берсангиз, мен ҳам бу одам ҳақида бир неча оғиз гапирсам...

Оғойи Ф... уссалтана дарров:

— Қани, марҳамат қилинг, азиз куёв, марҳамати Маълум бўлишича, бу девона йигит ҳақида сиз ҳам баъзи нарсалар билар экансиз-да?— деди.

Сиёвуш Мирзо титроқ овоз билан сўзга бошлади:

— Мен бу одам билан бундан бир ҳафта бурун ўртоқларимдан бирининг воситаси билан танишган эдим. Ҳар учовимиз бир қаҳвахонада ўтириб суҳбат қилган эдик. Мен ўша ерда, жанобларининг менга қилган марҳаматларидан, менга кўрсатмоқчи бўлган яхшиликларидан ҳам сўзладим. У индамасдан қулоқ солиб ўтирди. Ярим соатдан кейин туриб ажраллидик. Эртасига эрта билан мен ҳаммомдан чиқиш вақтимда менга бир хат олиб келиб топширдилар. Хатни очдим. Қарасам, аввалги кун танишганим бояги йигит ёзган экан. Мана, ўзингиз ўқиб кўринг,— деб Фаррухнинг ёзган хатини оғойи Ф... уссалтанага узатди.

Оғойи Ф... уссалтана хатни ўқиди, қаҳ-қаҳ уриб кулиб юборди-да, хатни Али Ризохонга узатди. У ҳам ўқиб, Али Ашрафхонга тутқазди. Ҳаммалари ўқиб, кулдилар. Энг сўнгра Али Ризохон сўради:

— Сиз у девонага нима деб жавоб бердингиз?

— Мен «сиз девонасиз»дан бошқа бир жавоб ёзмадим.

Ҳамма Сиёвуш Мирзонинг шундай ўринлатиб жавоб берганига қойил бўлди, Фаррухнинг девоналигини тасдиқлади.

Фаррухнинг ўзи шу ерда бўлиб, бу мунофиқлик ва ёлғончиликни кўрса ва гапларни эшитса, балки чиндан ҳам девона бўлиб қолар эди.

XXXVII б о б

СўНГГИ УЧРАШУВ

Фаррух Шукуфадан Маҳиннинг касал бўлиб, Шимронга юборилганлигини ва унашув тўйининг бузилганлигини билгандан кейин у билан хайрлашиб, ҳовлидан чиқди. Икки қадам юрар-юрмас яна орқасига қайтди.

Шукуфани чақириб, Шимронга Маҳиннинг ким билан кетганини сўради.

Шукуфа Маликтож хонимнинг ҳам бирга кетганини, лекин у гоҳ-гоҳ шаҳарга келиб туришини айтди. Фаррух қайтди. Фикр-уй уни чулғаб олган эди. Фаррух уч ойдан бери — Маҳин билан ўша Эвинда учрашган кечадан бери кўриша олмаган эди.

Фаррух Жаводнинг ишидан хотиржам бўлгандан кейин, Маҳин билан учрашишга жазм қилиб, ўз-ўзига деди: «Қандай бўлса ҳам, эрта-индин Шимронга бориб, Жаъфарободдан бир уйни ижарага оламан. Маликтож хоним шаҳарга келган вақтда, пайт пойлаб, Маҳин билан кўришаман».

Фаррух шундай хаёллар билан ўз уйига қараб кетмоқда эди. У Ҳасанобод чорсусидан ўтар экан, конвой билан кетаётган бир тўда эски ва йиртиқ кийим-бошли кишиларни икки қаторга тизилиб, Дарвозайи Қазвиндан Тўпхона майдонига қараб келаётганларини кўрди. Уларнинг ёнида конвой полициячилардан ташқари бир отлик офицер ҳам бор эди. Фаррух буларга қизиқиб, ўткинчиларнинг биридан:

— Булар кимлар, буларни қаерга олиб кетаётибдилар?— деб сўради.

Ўткинчи бу тўғрида Фаррухдан ортиқроқ нарса билишини кўрсатмоқ учун деди:

— Оғо, газетада ўқимадингизми? Булар маҳбуслар. Шимол тарафдаги қўзғолонда асир тушган кишилар, ҳозир Келотга олиб кетаётирлар.

Буни қарангки, бечоралар кимнинг манфаати ва кимнинг орзуси, яна тўғрироғи, кимнинг суъи истифодаси учун қурбон бўлганлар. Ҳолбуки, буларнинг «бадбахтлигига» сабаб бўлган кишилар тамоман тинч ва саломат яшамоқдалар.

Чиндан ҳам, бир тўда халқнинг ҳаётини бир кишининг қўлига топширган ва у бир киши ўз мақсадига етмоқ учун, ёинки, муҳташам қасрларда роҳат-фароғатда яшамоқ учун истаган номаъқулчилигини қилишига йўл берадиган қонунга лаънатлар ўқиди.

Фаррух ортиқ ҳеч нима демасдан уйига қайтди. Кечки овқатини еб, ётди.

Эрта билан туриб, чой ичгандан кейин уйда ўтириб, Шимронга жўнаш ва Маҳин билан кўришиш ҳақида ўйлади.

Бирданига эшик тақиллади. Бобоҳайдар бориб эшикни очгандан кейин оғойи шайх Муҳаммадкарим шошилиб ичкарига кирди.

Фаррух уни деразадан кўриши билан юз туман учун келганлигини англади.

Бир нафасдан кейин оғойи шайх Муҳаммадкарим ижозат сўрамасдан Фаррухнинг хонасига кирди-да, қисқачагина салом-аликдан кейин:

— Худога минг қатла шукурлар бўлсинким, у бечора йигит динсизларнинг қўлидан халос бўлди,— деди.

— Қани? Мен ҳали уни кўрганим йўқ-ку!— деди Фаррух.

Шу пайтда оғойи шайх Муҳаммадкарим бўлган воқеани унга ҳикоя қилиб берди:

— Кеча кечқурун хатни ўзим назмия идорасига олиб бориб, раиснинг қўлига топширдим. Раис хатни ўқир-ўқимас шошиб қолди. «Қамалган йигит ҳазрати эшонга тегишли одам эканини нега ҳалигача менга хабар бермадингиз?» дегандан кейин қамоқхона бошлигини чақириб, уни койий бошлади. Қамоқхона бошлиғи бўлса: «Бу одам оғойи Ф... уссалтана жанобларининг ўзларига топширган кишиси-да», деди. Назмия раиси бўлса оғойи Ф... уссалтананинг мингта илтимоси ҳазрати эшоннинг фармонлари олдида бир пулга арзимайдми, ҳозир уни қутқазиб юборинг, деб буюрди. Бироқ, Жавод дарранинг зарбидан беҳол бўлиб қолганлиги учун касалхонада экан. Кеча кечқурун, қутулганлиги тўғрисидаги хабарни унга етказилса ҳам касалхонадан чиқиб уйга кетишга кучи етмагани учун бугун эрталаб чиқаман дебди. Мен бугун эрта билан барвақт назмияга бордим. Касалхонага кириб, Жавод билан кўришдим. Ҳазрати эшоннинг сизнинг илтимосингиз билан унинг қамоқда эканлигидан хабардор бўлганликларини унга айтиб, тасалли бердим. Ун беш дақиқалардан кейин назмия раиси ҳазрати эшондан қўрққанидан Жаводни бир извошга солиб, уйга жўнатди.

— Демак, шундай бўлса, мен энди Жаводнинг қутулиб, онасининг ёнида эканлигига хотиржам бўлсам бўладими?— деб сўради Фаррух.

— Ҳа, ҳа, шундай,— деди оғойи шайх ва Фаррухни ишонтирмақ учун қасам ичмоққа оғиз ростлади-ю, лекин ўзини тўхтатди, Фаррух дарров қолган юз туманни оғойи шайхга тутқазди.

Оғойи шайх Муҳаммадкарим олган пуллари са-
наб, юз туманлигига ишонганидан кейин чўнтагига сол-
ди. Бир оздан кейин Фаррух билан хайрлашаркан,
«ҳар вақт шунақа, ишларингиз бўлса тортинмасдан
ҳазрати эшонга тўғри бора беринг. У киши жуда
улуғ зот, садағалари кетай», дегандан кейин чиқиб
кетди.

Фаррух оғойи шайх Муҳаммадкарим юзидан ёлғон
айтмаганлигини англади. Жаводдан хотиржам бўлганли-
ги учун ўзини бир оз хотиржамдай сизди. «Жавод қутул-
ди, Маҳиннинг никоҳи бузилди. Демак, худо ҳали ҳам
мендан яхши назарини олган эмас. Тангри мен билан»,
деб ўз-ўзига тасалли берди. Лекин чиндан ҳам шундай-
миди?

Бир соатдан кейин Фаррух уйдан чиқиб, майда қа-
дамлар билан шаҳарнинг жануб тарафига қараб кета
бошлади. Бир соат юргандан кейин бир талай хиёбон-
лардан ўтиб, сўнгра ўтган бобларда кўрсатганимиз —
Жаводнинг уйига етиб, эшикни қоқди.

Фаррух шу уч ой мобайнида Жаводнинг оиласини
унутмаган эди. Жаводнинг ойлиги ҳар ой ўз вақтида
Бобоҳайдар орқали юборилиб турилган эди.

Жаводнинг опаси эшикнинг орқасидан келиб:

— Кимсиз?— деб сўради.

— Жаводга, Фаррух келибди, сен билан кўришмоқ-
чи денг,— деди Фаррух.

Хотин кетди. Бир оздан кейин қайтиб, Фаррухни ич-
карига чақирди. Фаррух каталакдай бир ҳовлига кирди.
Иморатлар худди икки қаватли каби кўринарди, чунки
пастдаги иккита уйнинг устида тепаси том билан бара-
вар иккита болохонача бор эди. Жавод билан онаси бо-
лохонада яшар эдилар. Саҳндаги кичкина бир ҳовузча-
да туриб қолган сув совун кўпиги ва ахлатлар билан
кўкариб, сасиб ётар эди.

Фаррух бошини ичкарига суқиб, Жаводнинг опаси
орқасидан бир неча синиқ-мертик зинапояларни босиб,
болохонага чиқди. Бу жуда ҳам тор, ичидаги асбоб-
рўзғори ғоятда камбағал, палоссиз хона эди.

Фаррух ичкарига кириши билан бемадор, ориқ, куч-
сиз бир гавданинг эски бир кўрпага бурканиб, ғингшиб
ётганини кўрди.

Фаррух Жаводни таниди. Жавод бундан уч ой аввал
кўргани бақувват ва абжир Жавод эмасди. Жавод-

нинг ҳатто қўзғалишга ҳам мажоли етмас эди. Бечора
лича нақт қоронги камерада ётганлиги учун кўзлари
ҳам хираланишиб қолган эди. Фаррух унга яна бир оз
яқинлашиб, диққат билан қаради. Жаводнинг ранги
сарғайгани, кўзлари ич-ичига тушиб, юзининг суяги тур-
тиб чиққан, одам кўрса қўрқадиган ҳолатда эди.

Фаррух секни уни чақирди. Жавод бошини кўтариб,
бир оз диққат билан қарагандан кейин, Фаррухни та-
ниб, бўғиқ товуш билан:

— Мени шунчалик азоб тортсин, жабр-жафо кўрсин
деб хизматингизга олган экансиз-да!— деди.

Шу пайтда онаси ичкарига кирди. Қўлидаги косада
келтирган дорини Жаводнинг олдига қўйиб, Фаррух
билан кўришди-да, деди:

— Ого, саломат бўлинг, худо хайрингизни берсин,
сиз ўғлим ҳақида ғайрат қилдингиз.

Бу икки маъноли сўз Фаррухга шундай қаттиқ таъ-
сир қилдики, юраги ёрилар даражага етди.

Фаррух йиғлаб юборди. Бечора Жаводнинг бошини
ифлос ёстиқдан олиб, тиззасига қўйди, кўзларидан дув-
дув ёш оқиб деди:

— Менда айб йўқ, мен кучимнинг борича ҳаракат
қилдим, натижа чиқмади, душман мендан кўра қувват-
лироқ экан.

Жаводнинг онаси буни англади ва ортиқ таънаю ма-
ломатлар билан Фаррухнинг юрагини азобламади. Фар-
рух у ерда икки соатча ўтирди. Гап айланиб, бошига
тушган ҳамма фалокатларни уларга айтиб берди.

Бирданига Фаррухнинг кўзлари Жаводнинг елкаси-
га тушди. Диққат билан қаради. Ҳеч бир соғ жойи қол-
маган, ҳамма ёғи яра ва кўкариб кетган эди. Фаррух-
нинг авзойи жуда ўзгариб кетди. Кўзлари даҳшатли
интиқом онларини кутган сингари ўтдай чақнар эди.
Фаррух бутунлай одамларни бир хилда яхши кўриш
сезгисини унутиб, ўз-ўзига: «Модомики, одамлар бир-
бировларини азоблашга шу қадар тайёр эканлар, мен
ва мендайларга нима қилибди, нима учун мен орқада
қолай? Биз ҳам шундай йўлни қидириб, ўша золимларни
бундан кўра баттарроқ азобга дучор этишимиз ке-
рак»,— деди.

Кейин ўрнидан турди. Яна тез орада келишга ваъда
бергандан кейин, хайрлашиб, уйига кетди.

Уйда энагасидан кичкина қўл чамадончасини олиб,

йўлга керак бўладиган сочиқ, тароқ, совун ва шунга ўхшаш нарсаларни жойлади.

У шу бугуноқ Шимронга кетмоқчи бўлди.

Куз пайти эди. Бутун ёзи Шимронда ўтказиб, тоза ҳаво олиб, покиза сувлар ичган бадавлатлар аллақачон Шимрондан шаҳарга кўчиб келган эдилар.

Фаррух ўша кунни кечқурун чопархона идорасига бориб, Аҳмадалихон билан учрашди. Жаводни қандай йўллар билан қутқазганини ва уни қутқазиш учун ишлатган тадбирларининг ҳаммасини унга айтиб берди.

— Жуда ҳам яхши йўл топибсан,— деди Аҳмадалихон,— бу мамлакатда руҳонийлардан сўзи ўткирроқ одам йўқ. Юқори мартабаларга миниш ва давлат молни ейиш руҳонийларга боғлиқ. Шундай муҳитда, шундай мамлакатда пулинг бўлмаса, мақсадга эришишдан кўра Миррих юлдузига чиқиш осонроқ.

Фаррух икки юз туман учун ҳовлининг бир бўлагини гаровга қўйишга мажбур бўлганини унга айтди. Сўнгидан Шукуфанинг хабар бергани аҳволни, ҳозир бўлса Маҳинни ахтариб, Шимронга кетмоқчи бўлганини ҳам қўшиб қўйди. Извошга тушиб, оғойи Р... уддавлянинг уйига жўнади. Беш дақиқадан кейин извош оғойи Р... уддавлянинг эшигида тўхтади. Фаррух извошдан тушиб, ичкарига кирди. Иффат Фаррухнинг ранги сарғайган, кўзлари бир оз ичига ботганини кўриб, сабабини сўради.

Фаррух:

— Бир оз тобим қочди,— деб жавоб берди.

Сўнгра Иффат, уялганиданми, ҳарқалай, юзларига билинар-билимас қизиллик югургани ҳолда Фаррухдан Маҳиннинг аҳволини сўради; Фаррух унга ҳам кейинги кунларда бўлиб ўтган воқеаларни ҳикоя қилиб берди.

— Ҳозир Маҳин билан учрашиш умидида Шимронга кетаётганим учун сизнинг олдингизга хайр-хўшлашишга келдим,— деди.

Иффат миннатдорчилик билдирди.

— Жаводнинг иши нима бўлди? Уни қутқаза олдингизми?— деб сўради.

— У киши (Али Ашрафхон) менинг айтган сўзларимни қабул қилмади. Бироқ, бунга хафа эмасман. Чунки, шундай ифлос, разил ва виждонсизлардан ўч олиши-

миз керак. Бироқ бошқа йўл билан қутқариб олдим,— деб жавоб берди.

Ун дақиқалардан кейин Фаррух хайрлашиб кетмоқчи бўлса ҳам, лекин Иффат яна иккинчи карра бу яқин ўртада кўриша олмасликларини сезгандай, яна бирор соат қолишни илтимос қилди.

— Вақт кетяпти. Ҳозир уйга бориб, майда-чуйдаларни олиб, йўлга тушишим керак,— деди Фаррух.

Фаррух узр айтиб, у ердан чиқди. Гўёки, Фаррух ўлимга кетаётгандай борарди. Иффат ташвишга тушиб, юраги жуда қаттиқ ургани ҳолда ҳовлининг эшигигача уни кузатиб қўйди-да, эшикда термулиб қолди.

Кўчада ҳеч ким кўринмаганлиги учун Иффат дарвоза олдида туриб, Фаррухга анча вақтгача қараб турди. Бечора қизнинг нима учундир юраги сиқилиб, бирданига кўзларида ёш тўлқинлари ўйнай бошлади. Ўз-ўзича: «Билмайман, бу ҳислар, бу туйғулар нима учун? Нега шундай аҳволга тушиб қолаётиман?» деб ўйлар эди.

Фаррух ўз уйига кетарди. Қош қорая бошлаганди. Йўлда одамларга рўбарў келмайин, деб Шимронга кечаси жўнамоқчи бўлар эди. Уйга бориб, чамадонни олиб, энагаси билан хайрлашиб:

— Эрта ё индинга қайтиб келаман,— деб чиқиб кетди.

Извошга тушмоқчи эди, бироқ ўз хиёбонидан чорсуга қадар яёв борган бўлса ҳам извош учрамади. Извош келиб қолар, деб бир оз тўхтади. Келмади. Яхшиси Дарвозайи Давлатга қадар бора қолай, у ердан Шимронга кетадиган бошқа извошлардан биттасига тушиб кетарман, деб дарвозага қараб кетмоққа бошлади. Дарвозайи Давлатга етди. У ерда ҳам извош кўринмади. Сўнг секин-секин юриб, Шимрон хиёбони томонга йўл олди.

Куз фасли бўлгани учун Шимрон йўлида йўловчилар жуда оз эди. Бироқ, Фаррух уйдан чиққан вақтда қўшни кавушдўз дўконига ўтирган Ризоқулини кўрмади. Ризоқули уни кўриши билан нарироқда турган иккита отлиқ полициячига ишора қилди. У икки полициячи ҳам юз қадам орқадан уни таъқиб қила бошладилар.

Фаррух Шимрон хиёбонига кирди. Юз қадамча ҳам юрмаган эдики, бирданига бояги икки полициячи

отларини чоптириб келиб, Фаррухга яқинлашдилар-да:

— Тўхта!— деб буюрдилар.

Фаррух ваҳимага тушмасдан тўхтади.

— Хизмат, менга қандай сўзингиз бор?— деб сўради.

Полициячилардан бири:

— Оғо, бугун эрталабдан буён қадду қомати ва афту башараси сизга ўхшаш одамни кўрсак, тутишга буюриб, шу ерда куттириб қўйган эдилар,— деди.

— Нима демоқчи эканлигингизни тушуна олмадим,— деди Фаррух.

— Мақсадимиз сизни қўлга тушириш эди. Энди қани, марҳамат қилиб, раиснинг олдига юринг. Нима учун эканлигини сизга у кишининг ўзи тушунтириб беради,— деди иккинчи полициячи.

— Раис ким? Мен унинг ёнига нимага бораман? Балки, сиз янглишаётган бўлсангиз керак?

— Йўқ, янглишганимиз йўқ,— деб кулди полициячи.

Полициячилардан бири дарров отдан тушиб, Фаррухнинг орқасидан келиб, маҳкам ушлади. Иккинчиси бўлса, дарров унинг бошидан кулоҳини олиб, қўйнидаң чиқарган эски бир кулоҳни унга кийгазиб қўйди.

Фаррух нима қилишини билмасди. Додласинми? Бейфойда.

Фаррух полициячиларнинг мақсадларини тушуна олмас эди. Улардан бири унинг кийим-бошларини ечиб, бошқа қалин бир кийимни зўр билан кийгизганларини кўриб, жуда ҳайрон бўлди. Мени тўнамоқчилар, булар ўғрилар бўлсалар керак. Чунки, Эронда бундай ишлар ҳайрон қоладиган бир иш эмас. Ҳатто, Техрон дарвозасининг ўзгинасида почтахонани таладилар. Балки, булар ҳам бир неча ойдан буён маош олмаганлари учун оч қолиб, шу ишга бошлаган бўлсалар керак, деб хаёл қилди. Лекин, Фаррухнинг бу фикри тўғри чиқмади. Чунки, полициячилардан биттаси милтигини Фаррухнинг кўкрагига тираб:

— Қани, юр, овозингни чиқарсанг, ўласан!— деб олдиларига тушиб юришни буюрди.

Энди тўхташ ва ҳайрон қолишнинг ўрни йўқ эди. Фақат бир нарса қолган эди, у ҳам бўлса раиснинг олдига боргандагина воқеани билиш умиди эди.

ТҮРТ-ЖИНОЯТЧИНИНГ КЕНГАШИ .

Фаррухнинг девоналиги аниқлангандан кейин, оғойи Ф... уссалтана деди:

— Албатта, у энди қанчалик беозор жинни бўлишига қарамай, бошқаларга ҳам шундай ҳазилкашлик қилиб юрмаслиги учун, чора кўриш керак.

Оғойи Ф... уссалтананинг бундай таклифдан мақсади кечаги аламини Фаррухдан олмоқ эди.

Бу ишдан унчалик манфаатдор бўлмаган Али Ризохондан бошқа ҳамма бу таклифни қабул қилди.

Оғойи Ф... уссалтана қизининг ўчини олмоқчи бўлар эди. Али Ашрафхон бўлса, ўзининг судга тушишидан қўрқарди, шунинг учун Фаррухнинг йўқ бўлишини истар эди. Сиёвуш Мирзо бўлса, бундан уч кун илгариги Фаррухнинг хатини ўқигандан кейин, унда нафратланиб, ўлиши керак, деб биларди. Чунки, Сиёвуш Мирзо кабилар шундай эрмакларни жуда кўп қилар эдилар: Масалан, шаҳзодалардан бири гадоёларнинг бошига қамчи билан уриб, ўша қамчининг шарақлаб тегишидан роҳатланаркан. Яна бошқа бир шаҳзода бўлса, бирор боланинг икки оёғини боғлаб, кейин югуришга мажбур қиларкан. Бечора бола югурмоқчи бўлиб йиқилади-да, афт-башараси ёрилади. Ҳалиги шаҳзода боланинг шу аҳволига қараб кулиб, хурсанд бўларкан. Бундай ишларни шаҳзодаларгина эмас, шоҳлар ҳам қилади. Шаҳзодаларни шундай ишларга ўргатувчи шоҳларнинг ўзларидир. Масалан, бир шоҳ сузишни билмайдиган одамни кўлга ташлатиб, унинг типирчилаб фарқ бўлишини кўриб завқланар экан. Шундай бемаъни қилиқлар ҳокимларда ҳам бор, ҳар ҳолда бизнинг шаҳзода Сиёвуш Мирзо ҳам, шу нуқтаи назардан, Фаррухнинг ўлишига рози эди. Ҳаммалари ўйлаб, йўл қидирар эдилар. Очиқ-ойдин ўлдиришдан қўрққанликлари учун бошқа йўл билан уни ҳалок этмоқчи бўлар эдилар.

Бириси назмияга қаматишни, бошқа бири сургун қилдириш кераклигини айтар эди. Бироқ, бундай жазолар оғойи Ф... уссалтананинг ғазаб ўтини сўндира олмасди. У бошқа бир йўл қидирар эди.

Бирданига Сиёвуш Мирзо бошини кўтариб деди:

— Мен бир йўл топдим. Агар шуни қилсак, хотир-

жамлик билан, шовқин-суронсиз Фаррухни ўртадан кўтариб, ўзимиз бўлса ҳеч қачон бу ишда жавобгар бўлмаймиз.

Ҳамма унинг гапига қулоқ солди. Сиёвуш айтди:

— Полицияда хизмат этувчи эски ошналаримдан биттаси кеча Қазвиндан менга бир хат юборибди. Хатига қараганда, ўзига топширилган бир тўда маҳбусларни ҳайдаб, Техронга келаётган экан. Бу ердан уларни Хуронсонгача олиб бориб, Келотга юбориш учун бошқа маъмурнинг қўлига топширар экан. Биз Фаррухни ўша ошнам орқали қўлга олдириб, Келотга кетадиган маҳбусларга қўшиш ва шулар билан бирга сургунга юборилишини илтимос қилишимиз мумкин. Ошнам, албатта, йўқ демайди. Фаррухни ўртадан кўтариш учун бундан кўра дурустроқ бир йўл бўлмаса керак, деб ўйлайман. Чунки, ё йўлда чекадиган азобларга бардош беролмай ўлади, ёинки, Келотга етган чоғида ҳам, у ердаги машҳур қалъада, овози ҳеч ерга етмасдан чириб кетади.

Сиёвуш Мирзонинг таклифини ҳамма қабул қилди. Сиёвуш яна қўшиб айтди:

— Аввало бу режани амалга ошириш учун мен ошнам билан учрашишим керак. Шундан кейин гап унинг бу ишга кўниб-кўнмаслигига боғлиқ бўлиб қолади.

— У одам, яъни ошнангиз Техронга келдими?— деб сўради оғойи Ф... уссалтана.

— Хатига қараганда, шу бугун кечаси Техронга кириб келса керак. Албатта, эрта билан мени кўргани келади. Келса, бутун гапни унга айтаман.

Али Ашрафхон Сиёвуш Мирзонинг гапига қўшимча қилди:

— Фаррухни қўлга олиб, маҳбуслар билан бирга сургунга жўнатиш учун ҳозироқ уни қамашимиз керак, яна-да тўғрироғи, таъқиб остига олишимиз керак.

— Тўғри айтяпсиз,— деди оғойи Ф... уссалтана ва дарров Ризоқулини чақирди:

— Ризоқули! Ҳозир шу соатда Фаррухларнинг уйига борасан. Уни уйдами, йўқми, аниқ биласан. Агар уйда бўлса, ўша атрофда юриб, уни кузатасан. Уйдан чиқса, изига тушиб, қаерга боришини биласан. Кечаси соат тўртгача уйдан чиқмаса, қайтиб келасан. Лекин яна эрта билан азонда туриб, ўша ерда бўлишинг керак,— деб буюрди.

Ризоқули кетди.

Бу йиғилган кишилар ҳам бугун бу ерда ортиқ бошқа ишлари бўлмаганлигидан эртага эрта билан соат ўн бирда яна шу ерга, ишнинг қатъий режасини чизиш учун йиғилишга қарор бериб, тарқалишдилар.

Оғойи Ф... уссалтана ёлғиз қолиб, аста-аста ўзига гапирар эди: «Ахлоқсиз аҳмоқ. Қаранг-а, қизимнинг бошига қандай кунларни солмади? У балки ўйлагандирки, шундай бир ахлоқсиз иш қилиш билан унга эга бўламан, деб. Йўқ, йўқ! Мен ҳали ўлганим йўқ! Сен Маҳинга эмас, қора ерга эга бўласан!»

Оғойи Ф... уссалтана бу кечани минг хил хаёллар билан ўтказди. Аллавақтларда хизматчиларидан биттаси келиб:

— Ризоқули келди. Хўжайинга жиндек арзим бор деб айтади. Сиз билан кўришмоқчи экан,— деди.

Иш кабинетида ўтирган оғойи Ф... уссалтана:

— Айт, кирсин!— деди.

Ризоқули ичкари кириши билан оғойи Ф.. уссалтана сўради:

— Қани, Фаррухдан ҳеч бир дарак топа олдингми?

— Ҳовва, Фаррухларнинг уйига етгандан кейин, ўшаларнинг яқинидаги боққолдан Фаррухнинг бундан уч соат илгари уйга кирганини, ҳалигача чиқмаганлигини билдим. Сўнгра уларнинг ҳовлиси ёнида бўлган кавушдўзнинг дўконида ўтириб, кута бошладим. Бирданига уларнинг уйидан нотаниш бир шайх чиқди. Унинг орқасидан ярим соатдан кейин Фаррух севиниб-қувониб чиқиб, Англия элчихонаси хиёбонига қараб юрди. Мен ҳам орқасидан юз қадам берироқда изига тушдим. Сўнгида у оғойи Шайхулҳодий чорсусига келиб етди. Жанобингизнинг боғингизга, махсус уйнинг эшигига яқинлашди.

Оғойи Ф... уссалтана бирданига:

— Нима дединг?! Менинг боғимнинг эшигигами?— деб сўради.

— Ҳовва, хўжайин, келиб эшикни қоқди. Эшик очилди. Эшикни очган ёш бир қиз эди...

Оғойи Ф... уссалтана:

— Ҳа, ҳа, бу Шукуфа бўлса керак,— деди.

Ризоқули ҳам оғойи Ф... уссалтананинг сўзини тасдиқлаб:

— Тўғри, Шукуфа эди. Лекин нима гапиришганлари-

ни эшита олмадим. Фаррух ичкарига кириб, ўн дақиқа-лардан кейин қайтиб чиқди,— деди.

Оғойи Ф... уссалтана ўз-ўзига: «Оҳо, демак маълум бўлдики, Қум сафарини ҳам Фаррухга хабар қилган ўша қиз экан»,— деб газабидан лабини тишлар эди. Кейин юзини Ризоқулига ўгириб, айтди:

— Жуда яхши; сен бориб ёт. Лекин эртага эрта билан яна ўша ерга бориб, Фаррухни таъқиб остига оласан.

Оғойи Ф... уссалтана ўша кечаси ҳеч ухлай олмади. Тонг отиши билан ҳар нарсадан аввал Шукуфани чақириб келиш учун одам юборди.

Шукуфа жуда қўрққани ҳолда:

«Тавба, нима бўлди экан, мени чақиртириб қолди»,— деб минг ташвиш ва минг ваҳималар билан келди.

Уни оғойи Ф... уссалтананинг иш кабинетига бошлаб кирдилар. Шукуфа эгилиб салом бергандан кейин, бир бурчакка бориб турди.

Оғойи Ф... уссалтана Шукуфани кўрар-кўрмас бақирди:

— Ҳа, бадбахт қиз, қани айт! Бу нима қилган бемазагарчилигинг? Сен нималар қилиб юрибсан?

Шукуфа қўрққанидан титрай бошлади ва дудуқла-ниб жавоб берди:

— Ого, қандай буйруғингиз бор эди?— деди. Оғойи Ф... уссалтана ғазаб билан деди:

— Қани, айт, Фаррухнинг сен билан қандай алоқаси бор, нега у сенинг уйингга келади?

Шукуфа тонмоқчи бўлса ҳам, бироқ Фаррухнинг тез-тез келганлигини кўриб, оғога чаққанликларини сезди-да, ўз-ўзича: «Ана энди балога қолдим-ку», деб ҳеч қандай жавоб бермади.

Борган сари ғазаби алангаланаётган оғойи Ф... уссалтана бўғилиб сўради:

— Фаррух кеча нима учун келган эди? Унинг нима муддаоси бор экан?

Шукуфа қўрққанидан япроқдай қалтираб жавоб берди:

— Мендан Маҳин хопимнинг аҳволини сўрагани келган экан. Мен бўлсам, бир оз касал бўлганликлари учун, Шимронга кетганларини айтдим.

— Тузук, бу сенинг кечаги савол-жавобинг эди. Лекин, орангизда шундай савол-жавоблардан неча марта ба бўлиб ўтган?

Шукуфа ўзича, оғонинг бошқа ишлардан хабари бўлмаса керак, қоронғи уйга кесак отиш қабилдан мени қўрқитиб, сирларни билиб олмоқчи, деб ўйлади-да, ўзини билиб билмасликка солиб жавоб берди.

— Мен куни кечагача Фаррухни кўрмаган эдим. Бундан ташқари, кеча ҳам уни уйга киргизмоқчи эмасдим. Чунки, мен қиз бола бўлганим учун уят. Бироқ, жуда ҳам тиқилинч қила бергани-учун мажбуран уни йўлакка киргиздим.

Оғойи Ф... уссалтана ортиқ ўзини тута олмади. Урдидан туриб, Шукуфага яқинлашди.

— Сен бадбахт ҳали менга ёлғон гапирмоқчи ҳам бўласанми?— деб бечора қизнинг юзига бир тарсаки туширди.— Хонимнинг Қум сафарини ҳам Фаррухга етказган сен эмасмисан? Энди менинг рўбарўмда туриб, уялмасдан тонаётибсан-а!

Аввалги тарсаки Шукуфани ерга ағдарган эди. У бадавлат ахлоқсиз бечора қизнинг ерга йиқилганини ғанимат билиб, унинг сийнаси-ю ёнбоши аралаш тепа бошлади. Қуввати етгунча тепди. У ўз қизига ҳам шундай ваҳшийларча танбеҳ қила олармиди? Албатта, йўқ.

Оғойи Ф... уссалтана бечора Шукуфани анча вақтгача шундай тепкилаб урди. Сўнгида қизнинг дод-фарёдини эшитган бутун ҳовлидагилар югуришиб келиб, уни золимнинг қўлидан қутқазиб олдилар.

Оғойи Ф... уссалтана қўл тортишни истамас эди:

— Қўйинг, мен уни Жавод билан бир ерда ўлиш учун назмия қамоқхонасига юборишим керак.

Уйга йиғилган хизматчи хотинлар минг машаққатлар билан қизни уйдан олиб чиқдилар. Юз-кўзи қора қонга беланган ва оғриқнинг зўридан йиғлаган Шукуфага бир чўри:

— Сен қуриб кеткур ҳам нега мунча маҳмадана бўласан?— деса, иккинчиси:

— Гап ташувчининг жазоси шундай бўлади,— дерди. Учинчиси бўлса:

— Зарари йўқ. У киши ҳаммамизнинг оғомиз. Ихтиёр ўзларида,— деса, тўртинчиси:

— Оғо бизни ўлдирсалар ҳам у кишига қарши гапиришга ҳаққимиз йўқ. Биз у кишининг тузини ичиб турибмиз-а. Тузини ичиб, тузлигини булғатиш яхшими?— деб уни тинчлантирмоқчи бўлар эди:

Бу бечоралардан ҳеч биттасининг ақлига келмад эдики, оғосининг берадиган арзимаган пул ва бир бурда нони уларнинг қилган меҳнати ва тортган азоб-уқубати учун берилиб турибди. Шундай бўлса, нега ҳар ойда бир туманни бошқаларга бекорга бермайди?

Чўрилардан биттаси Шукуфага айтар эди:

— Қайғурма, ого сени ҳар қанча урса ҳам, барибир сенга ого. Вақти келганда яхшигина бир сарупо киясан-у, ҳаммаси эсингдан чиқади-кетади. Қошки, калтак еган мен бўлсам эдим. Сарупо менга тегарди.

Шукуфа йиғлар эди. Бироқ, юрагида ҳеч бир қайғуси йўқ эди. Ҳатто ўзича, бекаси Маҳин учун шунча алам-ситам тортганига хурсанд ҳам эди.

Оғойи Ф... уссалтананинг ғазаби Шукуфани уриш билангина совумади. Йиртқич ҳайвон каби уйнинг у бошидан-бу бошига кезмоқда эди. Рўбарўсида ҳеч кимни кўрмаганлиги учун оғзига келган тубан сўзлар билан эронлик ва европалик халқни ҳақорат қилмоқда эди. Бутун жамоатни аҳмоқ, хизматкорларни бўлса ҳаромзодалар, оқсочларни эса фоҳиша деб атар эди.

Пешин вақтларида Ризоқули ичкари ҳовлига кириб келди. Бундай вақтларда ундан бошқа киши ичкарига киришга ботина олмас эди. У оғоси ўтирган хонага кирди.

— Кечаги оғолар келиб, жанобингизни сўраётибдилар,— деди.

Бу хабарни эшитган оғойи Ф... уссалтана энди Фаррухнинг керакли жазосини берамиз, деган хаёл билан бир қадар ўзини тинчлантирди ва:

— Жуда яхши, уларни уйга олиб кир! Мен ҳозир кийим-бошларимни алмаштириб чиқаман,— деди.

Ун дақиқалардан кейин оғойи Ф... уссалтана Али Ризохон ва Али Ашрафхоннинг олдига кирди. Саломлашганларидан кейин оғойи Ф... уссалтана айтди:

— Сиёвуш Мирзо ҳалигача келгани йўқ. Билмайман, ишни ўринлата оладими, йўқмикин?— деди.

У ҳали гапириб бўлмаган ҳам эдики, эшикда извош тўхтаганлиги эшитилди. Сўнгра Сиёвуш Мирзо ёнида қорачадан келган, бурни чўмичдай полиция офицери билан ичкарига кирди. Офицер поручик даражасида эди.

Аввал бошлаб Сиёвуш Мирзо офицерни Жалолхон деб таништирди. Жалолнинг Келотга кетаётган маҳбус-

лар устидан маъмур эканини билдирди. Сиёвуш Мирзо оғойи Ф... уссалтанага қараб айтди:

— Мен кечаги иш тўғрисида оғойи поручик билан сўзлашдим. Бу киши жанобингиз қандай буйруқ берсангиз, ерига етказишга тайёр эканларини айтдилар.

Оғойи Ф... уссалтана офицерга юзланиб деди:

— Албатта, шаҳзода сизга айтган бўлса керак. Бу ерда жамият учун зарарли бир кишини йўқотишдан бошқа тилагимиз йўқ. Ҳозир айтган одамимиз шундай ярамас, терс ишларга сабаб бўлгандирки, бу ишларнинг энг кичкинаси ўлим жазоси бериш учун етарли. Масалан, Али Ашрафхон оғога шаънларида бўлмаган гапларни айтиб, шундай бўҳтонлар қиладики, асло оғизга олиб бўлмайди. Ваҳоланки, Али Ашрафхон Эроннинг энг яхши аслзодаларидан биттаси. Бундан ташқари, дўстингиз, яъни менинг куёвим шаҳзодага бир хат ёзиб, менинг қизимга алоқадор шундай ўринсиз илтимослар қилибдирки, чинини айтганда, обрўли бир одам уни ўқиб, асабий бўлмасдан қолиши мумкин эмас.

Суйканчоқлиги ва лаганбардорлиги билан танилган поручик Жалолхон оғойи Ф... уссалтананинг бу неъматли дастурхонидан келасида истифода қилиш истагида сўйиб келтирилган қовундан ер экан, деди:

— Муҳтарам дўстим буларнинг ҳаммасини менга айтдилар. Мен ҳам жанобларининг буйруқларини эшитмасданоқ бундай бир ишни ўз зиммамга олишга сўз бердим. Сўз беришгина эмас, ҳатто бу ишни бажаришга қарор ҳам қилиб қўйдим. Ҳозироқ полициячилардан иккитасига унинг изига тушишни тайинлаб, шу кечасиёқ қўлга олишларини буюрамаң.

— Маҳбусларингиз ҳозир Техрондами?— деб сўради оғойи Ф... уссалтана.

— Йўқ, улар бугун жўнаб кетдилар. Мен бугун уйда қолишга жавоб олдим. Шу бугун кечаси тўртта полициячи билан бирга йўлга тушаман,— деди ноиб.

Жалолхон Фаррухни қай хилдаги маҳбуслар қаторига қўшиб қўйишини оғойи Ф... уссалтанага айтди.

Оғойи Ф... уссалтана жуда хурсанд бўлиб кетди.

Поручик Жалолхоннинг ҳурмати учун ичкаридан қовун-тарвуз келтиришга буйруқ берилди. Чорак соатчадан кейин қовун-тарвуз келтирилди. Ҳамма еб, мактамоққа бошлади. Булардан Али Ашрафхон:

— Бу қаерда битган қовун экан-а?— деб сўраганда, оғойи Ф... уссалтана:

— Техроннинг жануб тарафидаги еримдан келган,— деб жавоб берди.

Али Ризохон бўлса, ялтоқлик билан оғойи Ф... уссалтанага ёқишни кўзда тутиб, айтар эди:

— Мен ҳалигача баъзи ишларга ҳеч ишонмай юрар эдим. Энди жуда ишонадиган бўлдим. Масалан, жанобингиз айтган ўша ер илгариги эгаси бўлган савдогарнинг қўлида экан вақтда қовунидан еган эдим. Мана буни ҳам еб турибман. Қасамёд қилиб айтишим мумкинки, илгаригиси билан ҳозиргисининг ўртасида жуда катта тафовут бор. Ҳозиргиси жуда ҳам тилни ёрадиган бўлиб кетган, ширин. Ҳар бир нарса сизнинг ихтиёрингизга ўтгандан кейин ўзгариб кетар экан.

Оғойи Ф... уссалтана жуда шишиниб кетди. Қорин гадоси бўлган хушомадгўй терговчининг сўзидан кейин ўзини чиндан ҳам дунёнинг энг пок ва муқаддас кишиларидан бири деб санашига оз қолди.

XXXIX боб

ПОЛИЦИЯ ВА ЖАНДАРМЛАРНИ ДИНСИЗ ДЕБ АТАГАН ҲАЗРАТИ ЭШОННИНГ ТУҒРИ АЙТГАНЛИГИНИ ФАРРУХ ҚАЕРДАН ТУШУНДИ

Кечаси соат тўртдан ошган эди. Тонг энди-энди ёришиб келмоқда.

Йўлнинг четида, кичкина қишлоқ уйида тупроққа беланиб ётган бирталай одамларнинг хурраклари эшитилмоқда эди. Бу ер! йўл устидаги қаҳвахона бўлиб, қўй каби уймалашиб ётган одамлар бўлса, Келотга юборилмоқда бўлган маҳбуслар эди. Улардан биттаси бошини ёстиқ ўрнига тошга, биттаси қуруқ тупроқ устига қўйиб ётган эди. Бу бечораларнинг теварагида бўлса, икки қуролли полициячи айланмоқда эди. Полициячилардан биттаси маҳбусларнинг уйқуда эканларига парво қилмасдан, баланд овоз билан ўртоғига айтди:

— Ҳой, етмиш тўртинчи, нега поручик ҳалигача келмади экан-а? Билмадим, нима учун кечикдийкип?— Шериги иккинчи тарафдан бақриб жавоб берди:

— Келиб қолар. У келмагунча биз бу ердан қўзгалмаймиз.

Бу савол-жавобнинг натижасида бечора маҳбуслардан баъзилари уйғониб, баъзилари иккинчи ёнбошларига ўгирилиб ётдилар.

Секин эсмоқда бўлган изғирин шамол тобора шидатланар эди. Ҳаво совий бошлаган, бечора маҳбусларнинг устларига ёлиш учун ҳеч нималари бўлмаганидан, аёзда дилдираб ётишга мажбур эдилар. Тагин ким билади, бу шўрликларни келажакда яна қанча машаққатлар кутаётганикин?

Нима учун? Чунки, қонун уларга шу жазони раво кўрди. Бу шунинг учундирки, улар шаҳзода эмаслар, давлатлари йўқ. Шунинг учунки, бадавлатларга қарши сўзламоқчи бўлдилар. Ҳа, қонун фақатгина қонун, шу сабабларга кўра уларга шундай жазони раво кўрди.

Тонг тамоман ёришди. Бирданига усти берк араванинг овози эшитилди. Бир оздан сўнг тўрт отлиқ полициячи билан ўраб олинган бир усти берк арава маҳбуслар ётган жойга келиб тўхтади. Маҳбусларнинг деярли ҳаммаси уйғонган, фақатгина бир-иккитасигина ҳали ҳам уйқуда эди. Усти берк араванинг эшиги очилди. У ердан ёш бир офицернинг тушганини кўрган икки полициячи керакли ҳурматни ўрнига етказиш учун бутун маҳбусларни милтиқ қўндоғи билан туртиб, ўринларидан турғиздилар.

Офицер полициячиларнинг саломига жавоб бергандан кейин, маҳбуслар ёнига келди-да:

— Сизларни ўзимдан рози қилмоқ учун, ҳам вақтларингизни чоғ ўтказиб кулдириш учун, чиройли сўзлар гапирадиган, қизиқ, хуштабиат бир девонани топиб келтирдим,— деди.

Бу қисқагина нутқдан кейин полициячиларга ишора қилди. Полициячидан бири усти берк араванинг эшигини очди. Бир девонани кўрамиз деб кутиб турган маҳбуслар йигирма ёшларда бўлган чиройли, бироқ ғамгин чеҳрали бир йигитни кўрдилар. Полициячилар уни аравадан тушириб, судраб олиб келиб, маҳбусларга қўшдилар.

Йигитнинг ранги оплоқ, кўзлари бўлса, бир ўринда тўхтаб қолган, ҳаракатсиз, эгнида бошқа маҳбусларники сингари дағал, беўхшов, ола-була матодан тўқилган кўйлаги бор эди.

У ўз-ўзинча алланималарни сўзлар, юзидан жуда чуқур хаёлга толганлиги ва шу хилда кета берса кўп ўт-

масдан чиндан ҳам девона бўлиб қолишлиги кўриниб турар эди.

Бу йигит мухтарам ўқувчиларимизга таниш бўлган Фаррух эди.

* * *

Биз Фаррухни: «Қани, раисга борамиз бўлмаса...» деб ўша икки полициячи билан кетар экан, йўлда қўйиб кетган эдик. Поручик Жалолхоннинг буйруғи билан, ўша куни пешиндан кейин, Фаррухларнинг ҳовлиси атрофида айланиб, пайт пойлаган ўша икки полициячи энг охири Фаррухни тутиб, Шимрон дарвозасига қараб ҳайдадилар.

Фаррух олдинда бошини қўйи солиб, майда қадамлар билан чуқур ўйга толиб келарди. «Буларнинг менда нима ишлари бор экан? Мени тўнамоқчи бўлсалар эди, ҳали учрашган ерда тўнаб, қўйиб юборган бўлардилар. Шунча йўл юриш керак бўлмас эди. Йўқ, балки янглишгандирлар. Ехуд чиндан-да бошқа бир тилаклари бордир», деб ўз-ўзича сўзланар эди. Бироқ ҳеч қандай натижага кела олмасдан қандай ишлари борлигини ва қандай азоб-уқубатга дучор қилмоқчи эканларини билолмас эди.

Фаррух улар билан кекирдак чўзишиб жанжаллашмоқ, ёхуд қочмоқликни фойдасиз деб билар эди. Чунки, аввало, ёнида қуроли йўқ эди, иккинчидан, у яёв, полициячилар бўлса отлиқ эдилар.

Фаррух қандай хаёл билан бўлса ҳам, Шимрон дарвозасига етар-етмас тўхтади. Лекин полициячилар унга дарров:

— Хандақнинг орқа тарафидан юр!— деб буюрдилар.

Кеча жуда қоронғи, Фаррух ҳеч нимани кўра олмас эди. Бир оздан кейин Душонтёпа дарвозаси яқинига етдилар. Лекин, полициячилар у ердан узоқлашиш керак эканлигини билганлари учун Фаррухни Дўлоб дарвозасига қараб юришга мажбур қилдилар. Бир оздан кейин у ерга ҳам етдилар.

Фаррух ўз-ўзича:

«Балки, раиснинг уйи шу ердадир. Мен у билан мантиқ юзасидан гапиришиб, бундай ҳаракатларнинг сабабини сўрайман», деб ўйлади.

Бироқ, унинг бу хаёли ҳам пучга чиқди. Чунки, по-

лициячилар унга яна хандақнинг орқа тарафидан Хуросон дарвозасига қараб юришни буюрдилар.

Фаррух мажбуран яна кета бошлади. Кечанинг қоронғилигидан гоҳо тошга қоқилиб юз тубан йиқилса ҳам яна ўрнидан туриб, йўлида давом қилар эди. Энг охири Хуросон дарвозасига етдилар. Бу дарвоза Теҳроннинг жануби-шарқ тарафидадир. Бу ерда ҳеч бир ободлик асари кўринмайди. Дарвозанинг беш юз қадам нариберисида, йўлда, бир қоронғи кўланка кўринди. Отларнинг кишнаши ва қўнғироқларнинг жаранглашидан Фаррух у кўланка, усти берк арава, ённки почта араваси эканлигини ўйлаб, ўз-ўзича: «Балки булар йўловчилардир. Ушаларга етишим билан дод-фарёд қилиб, ўзимни бу полициячилар қўлидан қутқазаман», деб ўйлади. Бироқ, унга яқинлашганларидан кейин, араванинг ёнида яна икки отлиқ полициячи турганини кўриб, ҳеч бир сўз айтмасдан тўхтади. Усти берк араванинг эшиги очилиб, бир офицер чиқиб деди:

— Тагин бир оз кечикиб қолсаларингиз, умидимизни узиб кетмоқчи эдик. Яхши бўлибди, бир амаллаб тутиб олиб келибсизлар.

Фаррухни тутиб келтирган полициячилардан бири дарров отдан тушиб, офицерга честь берди-да:

— Оғойи раис, уни Шимрон дарвозаси ёнидаги хиёбонда тутиб, шаҳар дарвозасининг орқа тарафи билан айлантириб, бу ерга келтирдик,— деди.

Офицер ҳалигача ҳайронликда қотиб қолган Фаррухга қараб деди:

— Бу тўсатдан бўлган ҳаракатдан жуда ҳайрон бўлганга ўхшайсиз? Ҳозир мен сизга ўз билганим қадар бунинг сабабини тушунтириб бераман. Сизни қочқин деб қўлга олганлар. Бошлиқларимиз ҳам сизни тутиб, қамашни буюрдилар. Билганим шунинг ўзи...

— Оғо, янглишаётибсиз,— деди Фаррух.— Менинг полиция идораси билан ҳеч қандай борди-келдим бўлган эмас. На бирорта молия идорасига бошлиқ ҳам бўлган эмасман, ўғри боши ҳам эмасман, на ҳукуматнинг почта аравасини талаганман, на молия идорасининг кассасини урганман. Мен оддий бир ишсиз йигитман. Отим Фаррух. Офицер кулди.

— Худди мана шу Фаррух деган йигит қамалиб, Келотга жўнатилиши керак,— деди.

Ниҳоят, Фаррухнинг тинкаси қуриб, айтди:

— Ого, менинг гуноҳим нима? Неган мени қамай-сиз? Нима сабабдан Келотга юбориламан?

Офицер Фаррухга деди:

— Бошқа савол-жавобга ўрин йўқ. Марҳамат қилиб гапимга киринг-у, бошқа маҳбуслар билан бирга Келотга жўнайверинг. Шунисиға хурсанд бўлингки, то Хотин-ободга етгунча сизни усти берк аравада олиб борамиз. Шуни ҳам билиб қўйинг, қолган йўлни яланг оёқ-пайи пиёда босишга мажбурсиз.

Фаррух девона бўлиб қолаёзди. Офицер у билан бамисоли каллакесар ўғри ёки ашаддий жиноятчи билан гаплашаётгандай муомала қиларди.

Фаррух улардан қочиб қутулишга уринди, лекин бир полициячи дарҳол унинг кифтига аччиқ бир қамчи урди, йигит шўрлик заифлик ва қамчи зарбидан ерга ўтириб қолди.

Шундан кейин офицернинг буйруғи билан икки полициячи Фаррухни куч билан усти берк аравага киритди. Бу вақт кечаси соат тўртлар чамаси эди.

Арава Хуросон йўлидан кетди. Аввали Фаррух ҳеч нима демади, лекин орадан ярим соатча ўтгандан кейин ялиниб-ёлворишга бошлади. Чунки, зўр билан уларнинг қўлидан қутула олмаслигини англагач, ўз-ўзича: «Зора менга раҳми келиб, қўйиб юборса», деди.

Лекин бахтга қарши офицер тошюрак одам эди, Фаррухнинг нолаю зорига қулоқ солмади ва ниҳоят унга шундай деди:

— Сен ёш бошинг билан маҳмаданагарчилик қилиб, ҳаётимиз асосини ташкил этган бирталай мўътабар, олижаноб одамларимизга қарши чиқмасанг эди, ўшалардан бирининг фармонига кўра сени Техрондан сургун қилиб, Келотга юбормаган бўлар эдилар. Агарда жиннилигингни ташлаб, бундан кейин маҳбуслар билан бирга Келотга борсанг ва у ерда ўзингни яхши тутиб юрсанг, балки яқин орада сени қутқариб, Техронга қайтариб юборарлар.

Фаррух тўккан кўз ёшлари билан офицернинг тош юрагини эрита олмаслигини англади. Қутулишга умид қолмагани учун офицерга энди айтадиган сўзи ҳам қолмаган эди. Чўнтагидан рўмолчасини чиқарди-да: «Оғойи Ф... уссалтананинг менга қарши қўлламоқчи бўлган азобларига чидайман, ортиқ бундан сўнг ҳеч йиғламайман»,— деб кўз ёшларини артди.

Арава кечаси соат тўртдан ўтганда Хотинободга етди. Юқорида билганимиз каби офицер аравадан тушиб, бечора маҳбуслар учун эрмак бир девонани топиб, совга келтирдим хаёли билан маҳбусларни овунтирмоқчи эди.

Бироқ, бечора маҳбуслар Фаррухнинг ҳусини, келишган қадду қоматини, тўғрилиқ ёғилиб турган кўзларини кўриб:

— Бечора йигит, ким учун шу фалокатга дучор бўлган экан?— деб ачиндилар.

Фаррух ҳеч сўз айтмасдан уларга қараб борди. Бироқ, бирданига юраги эзилиб, ёхуд энг сўнгги кучи вужудини тарк этганидан, ерга йиқилиб, бошини тупроққа қўйди. Маҳбуслар атрофини қуршаб, унинг кўнглини кўтаришга, тасалли беришга ҳаракат қилар эдилар. Фаррух чурқ этмасди. Лекин, секин-секин йиғлар, кўзларидан оққан ёшлари билан тупроқни лой қилар эди.

Ҳа, ана шу ёш томчиларидирки, бир кун бунинг эвазига қон селлари оқиб, золимларни бўғар! Бир оздан кейин офицер аравани орқасига қайтаришга буюриб, отга минди. Полициячилар бўлса, бечора Фаррухни маҳбусларга қўшдилар. Офицер илгариди, полициячилар маҳбусларнинг атрофида йўлига тушдилар.

Фаррух Теҳрондан узоқлашган сари яна-да маъюсланар эди. Яёв юришга одат қилмаган бечора Фаррух энди кун бўйи оёқ яланг йўл босиши зарур эди. Чунки, полициячилар Хотинободда туфлисини ечиб олган эдилар.

Фаррухнинг оёқлари қаварган эди. Бундан ортиқ йўл юра олмасди. Уша куни Домғонга етдилар. Фаррухнинг катта оиладан эканлигини билган офицер бундан ортиқ қийноқни унга раво кўрмасдан, ўз чўнтагиданми, ёхуд маҳбусларнинг харажати учун берилган пулданми, ҳарнечук, Фаррухга латта кавуш олиб берди.

Фаррух қанчалик ўйлаб кўрса ҳам, унга қилаётганлари — бу зулмнинг сабабини билмас эди. Ўз-ўзича «Ахир, менинг гуноҳим нима, одам ўлдирдимми, етимларнинг ҳақини едимми, нима қилдим, ахир? Бундай қийноқларга, бундай зулмларга дучор бўлдим», деб ўйлар эди.

Бироқ, бунинг сабаби, важ-корсонни жуда очиқ-ойдин эди. У атиги бир ердагина хато қилган. Яъни, яшашнинг йўлини тушунмаган эди. Агар у ўғри, мунофиқ,

авом халқни алдайдиган қорин бандаларидан бўлса эди, бундай қийноқларга йўлиқмас эди.

Фаррух қабристонга кетарди. Яна қайтишга умиди йўқ эди. Севгани Маҳиндан умид узган эди. Ҳатто у Иффатга берган ваъдасини ҳам бажара олмаган эди. Улимга ҳукм қилинган Фаррух отасини ва энагасини кўз олдига келтириб, ўз-ўзича: «Бахтсиз бечоралар, менинг тўсатдан йўқолиб қолганимни билиб, қандай аҳволга тушар эканлар-а, шўрлик отам бу жудоликка чидаёлмасдан, доғу ҳасратда ўлиб кетади, албатта», дея эди.

Энг сўнг, Маҳинни ва Шукуфанинг сўнгги сўзини, яъни «Маҳин ҳомиладор» деган сўзини эслади-да:

«Ўғил бўлармикин ёки қизми?»— деди.

XL 606

ОҒОЙИ Ф... УССАЛТАНА ИИҒЛАГАН КҮН

Олти ой ўтди.

...йил, аввалбаҳорнинг салқин бир кечаси, совуқ шабада дов-дарахтларнинг янги чиққан баргларини тебратар эди. Сойлар тошган, пишқириб оқмоқда бўлган сув тошларга урилиб, кўпирар эди. Сув шалдироқ йиғлоқи овози билан кеча тинчлигини бузарди.

Шу орада, гўёки ўша сойнинг овозига чидай олмай, унга жўр бўлмоқчи, ўз овозини унга қўшмоқчи бўлган бошқа бир овоз ҳам эшитилар эди. Яқин орадаги уйлارнинг биридан эшитилиб турган бу йиғлоқи овоз кўпроқ касалмандларнинг инграшига ўхшар эди. Бу овоз тўлғоқ тутаётган ёш жувоннинг ноласи эди.

Дард тутиб, илондай тўлғанаётган жувоннинг ёнида икки хотин бор эди. Бироқ, бу хотинлар шундай оғир аҳволда бўлган бечора жувонга меҳрибонлик, шафқат кўрсатиб, далда бериш ўрнига, аксинча, унга аччиқ сўзлар билан жавоб берар ва ҳақоратли назар билан қараб, уни баттароқ қийнар эдилар. Айниқса, бу хотинларнинг биттаси икки гапнинг бирида дард тутаётган жувоннинг тепасига ўдағайлаб келиб: «Юзинг қора бўлгур, номусимни ерга букдинг-ку! Энди менинг учун бир камини ҳаромзода туғиб беришингмиди?» дер экан, бошқа бир хотин бўлса:

— Ҳозирча бундай гапларнинг ўрни эмас, қўйинг, — деб ундаш жим туришни илтимос қилар эди.

Кўз ёриш дақиқаларини бошидан ўтказаетган жувон бўлса, уларга жавоб бермас, фақат баланд овоз билан йиғлар эди. Унинг ноласи пораланган юрак фарёди янглиғ мунгли ва таъсирли эди.

Икки хотиндан бири иккинчисига айтди:

— Феруза, бу худо олгур доя қаёқда қолди? Нега ҳалигача келмади?

Феруза жавоб берди:

— Қечқурун худди Маҳин хонимнинг тўлғоғи бошланган вақтдаёқ уни келтириш учун извош юборган эдик, ҳали замон келиб қолар, хоним.

Феруза ҳали сўзини тамом ҳам қилмаган эдики, эшик очилиб, қора чодра ёпинган пакана бир хотин кириб келди. Биринчи хотин (Маликтож хоним) уни кўриши билан:

— Айланай Товусхоним, нимага шунча кеч қолдингиз?— дегандан кейин, уни бир четга тортиб, қулоғига шивирлади:

— Туя кўрдингми? Йўқ. Пулни олинг-у, овозингизни чиқарманг. Тағин ҳар қаерларда оғзингиздан гуллаб юрманг,— деди.

Товус номланган доя хотин бундай ишларни бошидан ўтказа бериб пишиб кетган бўлганлиги учун бундай мажлислардан ва бундай сўзлардан бирталайини кўрган ва эшитган бўлгани сабабли бошини қимирлатиб, «хўп» ишорасини қилди-да, деди:

— Вой айланай хонимжон! Биз мижозларимизни хафа қилишни истамаймиз. Биз бу даргоҳда нон еб, туз ичиб келганмиз. Шундаям гап бўладими, хотиржам бўлинг, айланай.

— Ҳар ҳолда эҳтиёт бўлинг, айланай,— деди Маликтож хоним.

Товусбиби Маҳинга яқинлашиб уни текширди. Кейин Маликтож хонимга деди:

— Бир-икки соатдан кейин, худо хоҳласа, кўзи ёриydi.

Икки соат ўтди. Ташқаридаги шамол борган сари қутурар эди. Йилнинг бу фаслида Шимронда маҳаллий қишлоқиларгина яшар эдилар. Бу ерда шаҳар халқидан ҳеч ким кўринмас эди. Бироқ, Маҳин отасининг буйруғи билан олти ойдан бери шу ерда эди.

Маҳин кеча-кундуз йиғларди. У роса тўққиз ойдан буён Фаррухни кўрмаган эди. Онаси ҳафтада икки-уч марта, отаси бўлса ҳар замонда қош-қовоғини солиб, уни кўргани келар эди. Бироқ, Феруза доим шу ерда унга хизмат қилар эди.

Бирдашига, шу қўрқинчли кечада, доя хотин Товус-бибининг баланд овози эшитилиб қолди:

— Худоё шукур, хоним, муборак бўлсин, ўнгайгина қутулди. Ўғилгина экан!

Шу пайтда жуда ҳам аччиғи тутиб кетган Маликтож хоним оёғи куйган товукдай типирчилаб қолган эди. Доя хотиннинг овозини эшитиши билан ичкарига кириб, Маҳинни беҳуш, доя хотинни бўлса, керакли ишлар билан овора ҳолда кўрди.

Маҳин баъзан йиғлар, баъзан чуқур хўрсинар, Фаррухнинг номини такрорлаб ётар эди. Гўёки Маҳин, тангридан худди шу кунгача, яъни кўзи ёригунга қадар умр сўраганга ўхшарди. Чунки, кўзи ёриши биланоқ аҳволи ўзгариб, йўқликқа томон кета бошлади.

Шўрлик Маҳиннинг ориқ ва занф баданида қатра бўлсин қуввати қолмаган эди. У зайфлигига қарамасдан ёнига ётқизилган боласига ўгирилиб қарар, уни оналик муҳаббати билан томоша қилар эди.

Маҳин ҳам уни, онаси айтгандай, ҳаромзода деб билармиди?

Агар отаси Маҳинни Фаррухга тегишига жавоб берса, бу тўй дунёда биринчи ва чинакам тўй бўлмасмиди?

Маҳин ўз боласини севар эди. У бу янги туғилган болада Фаррухнинг, севгили Фаррухнинг, истаган Фаррухнинг руҳини кўрар эди. Маҳин Фаррухни унутмаганди. У Фаррухни қаерда бўлса ҳам ўзининг эри, ўзини бўлса, унинг хотини деб билар эди.

Айтганимиздай, Маҳиннинг аҳволи борган сари ёмонлашмоқда эди. Оғриқнинг зўрлигидан гоҳ кўзларини юмар, гоҳ очар эди. Кўзини очар экан, энг аввал боласига қарарди. Уни ҳар нарсадаң ҳар дарддан зиёда азоблаган нарса онасининг ҳақорати билан унга ва ўғлига қилган муомаласи ва қараши эди. Бечора Маҳин бу ҳақоратларга чидай олмас эди. У бу бола Фаррухнинг боласи, деб ўйлар экан, аҳволи яна ҳам кўпроқ оғирлашар, ўзи эзилар, юракни тирновчи нола чекиб инграр эди, Бироқ, бу фарёдлар бошқа уйда Феруза билан ни-

манидир сўзлашиб ўтирган онасига таъсир қилармиди?

Бирдан эшик очилиб, ғазабланган отасининг ичкарига кирганини кўрди. У Маҳинга яқинлашиб:

— Аҳволинг қалай, яхшимисан?— деб сўради.

Маҳин бир оз уялиб, қизаргани ҳолда ва ўзича, «отам бу ерга нима учун келибди?» деди-да, секингина, бўғиқ товуш билан:

— Дуруст,— деб жавоб берди.

Отаси:

— Жуда яхши, мен бир доктор келтирдим. Ҳозир сени кўради,— деб чиқиб кетди.

Бир оздан кейин доктор билан бирга кирди. Доктор текшира бошлади. Қасалнинг томирини ушлаб, юрагига қулоқ солди. Бир оздан кейин уйдан чиқиб, оғойи Ф... уссалтанага айтди:

— Бу кечаси қизингизни ёлғиз қолдирмаслигингиз керак. Агар иложи бўлса, сиз билан онаси бу кечани унинг ёнида ўтказсангиз яна-да яхши бўлар эди.

Кейинги сўзни эшитган оғойи Ф... уссалтананинг юраги шув этиб кетди. Кўзлари қинидан чиқиб кетгудай бўлиб, доктордан сўради.

— Нима гап? Нима бўлибди, қизим нима бўлади?

Доктор оғойи Ф... уссалтананинг юрагига қаттиқ тегмасин деб, чўчиб-чўчиб деди:

— Ҳеч гап йўқ, бироқ қизингизнинг соатлари эмас, ҳатто дақиқалари ҳам саноглик.

Оғойи Ф... уссалтана ортиқ чидаб туролмай, қичқириб юборди ва хотинини чақирди.

Доктор тўғри айтган эди. Маҳин энг сўнгги нафасини олмоқда эди. Шу шаҳло кўзлар тез орада бир умрга юмилар эди.

Тўққиз ойдан буён ота-онасининг азоби остида яшаб, бирор роҳат кўрмаган Маҳин ўлим олдида эди.

Оғойи Ф... уссалтана уйга кирганида, қизининг ранги яна ҳам оқариб кетган эди. Ота қизининг ўлишини аниқ билди.

Маҳин шу ёшида, ота-оналарининг зулми билан, дунёнинг бутун лаззатларидан кўзини юмиб, ўлимга тайёрланар эди.

Маҳин Фаррухнинг қаерда эканини билмагани каби, боласини ҳам шу тубан муҳитга ташлаб кетмоқда

эди. У отасини кўриши билан бўғиқ ва майин овоз билан айтди:

— Ота, унутмангизки, сиз мени қўлингиздан келганча азобладингиз, хўрладингиз, дунёда энг севган бир кишимдан ажратиб, нафаси менинг учун заҳар бўлган бир одамга бермоқчи бўлдингиз, аммо мен сўнгги нафасимда ҳам сизни ва онамни кечирдим. Ота, мен ўляпман. Энди сиз ҳам менга биттагина ваъда берингиз, бу ёш гўдак билан ҳам менга қилгандай бадмуомалада бўлманг. Уни эркин қўйинг. Ота, мен сизни мол, давлат, мартабапараст бўлиб, ана шу хислатларингиз кўзингизга ҳақиқатни кўриш учун тўсиқ бўлгани учун, онамни эса, жоҳил хотин бўлгани сабабли шу ишларни қилгани учун кечираман. Аммо сиз ҳам шу болага озор бермаслигингизга сўз берингиз. Ота, мабодо бир кун келиб, боламнинг отаси — Фаррухни учратсангиз, уни ҳурмат қилинг, чунки у, сиз ўйлаганча эмас, жуда яхши одам эди. Раҳмдил, инсофли эди. У мени севарди, менинг учун ҳар нарсадан кечган эди...

Маҳиннинг шу сўнгги сўзлари оғойи Ф... уссалтанага жуда қаттиқ таъсир қилди. Фаррух ҳозир қаерда, қандай жабру жафолар тортаётганини ўйлаб кетди.

Шу пайтда Маликтож хоним ҳам уйга кирди. Оғойи Ф... уссалтана хотинига қараб ҳаяжон билан:

— Кел, кел хотин, қизимиздан ажраб қолай деяпмиз, бунга қара, алланималар сўзляпти,— деди.

Маликтож хоним титраб-қақшаб келиб, Маҳиннинг ёнига ўтирди. Лекин ўзини тута олмай, ҳўнг-ҳўнг йиғламоққа бошлади.

Маҳин инграр эди. Кўз-қовоқлари оғирлашиб борарди. У жонининг танидан айрилганини ҳис қилди.

Оғойи Ф... уссалтана билан хотини Маҳинни юпатмоқчи бўлсалар ҳам, йиғи сўзлашга қўймасди.

Оғойи Ф... уссалтана худди шу пайтда Фаррухни шу ерда ҳозир қилиш учун давлатининг ярмини беришга ҳам тайёр эди. Лекин бу бўладиган бир ншми?

Маҳин бирданига ҳаракат қилди ва майин товуш билан:

— Фаррухни ҳурмат қилинг, боласига озор берманг!— деди.

Маҳиннинг энгаклари силкинар, кўзлари ҳаракатсиз бир нуқтага телмириб қолган эди...

У сўнги мартаба яна ўглига қаради.

Бир соатдан кейин бу уйда йиғи кўтарилди. Онаси сочларини юлар, отаси ўз бошига муштлар, Феруза эса уввос тортар эди. Оғойи Ф... уссалтана билан бирга келган Ризоқули ҳам ташқарида пиқ-пиқ йиғлар эди.

Бироқ, бунинг нима фойдаси бор?

Маҳин энди йўқ. Маҳин каравот устида тинчгина, абадий уйқуга кетган эди.

Оғойи Ф... уссалтана билан хотини Маҳиннинг икки ёнида туриб, совиб бораётган қўлларини ўпар эдилар.

Оғойи Ф... уссалтана яккаю ягона қизидан ажраган эди. Докторларнинг сўзига қараганда, ундан энди бола бўлмас эди. Бўлгани билан ҳам Маҳин бўла олармиди?

«Ҳар гулнинг иси бошқа», деб хўп яхши айтганлар.

Маҳин, баҳор гули каби ғунча экан, қора тупроққа кўмилди...

ИККИНЧИ КИТОБ



Рус тилидан
Сотиболди ЙЎЛДОШЕВ таржимаси

ҚҰРҚИНЧЛИ ТУН

Шамсул-имора минорасидаги соат бешга занг урди. Қош қораймоқда. Кўпгина дўконлар аллақачон бекилган. Лолазор хиёбонида одатдагича тўда-тўда одамлар сайр қилиб юришади. Аммо, бугун улар ғамгин кўринадилар. Кўпчиликнинг чеҳрасида ташвиш ва қўрқув аломатларини пайқаш мумкин эди.

Катта тош йўл илк баҳор лойига ботган. Изгириш шамол эсиб, ҳовли ва уй деворларига устма-уст ёпиштириб ташланган ранг-баранг афишаларнинг кўчиб кетган четларини пирпиратиб ўйнайди.

«Асли ва Қарам», «Аршин мол олон»¹ деб ёзилган бу ола-була афишалар беҳафсала, эринчоқ ва ҳамиша мирқуруқ бўлиб юрадиган техронликларни театрларга боришга ундарди.

Ҳамма афишалар орасида: «Янги касб ёхуд Ражаб тоға қандай бачча бўлди», деб ёзилгани айниқса кўзга яққол ташланиб турарди.

Йўловчилардан бири ёнидаги ошнасига:

— Эртага томошага борасанми? Таҳдид Бошқармасининг етим-есирларига кўмаклашмоқ керак-ку, ахир,— деди.

— Нима деяпсан, азизим, эсинг жойиндами ўзи? Томошангга бало борми?— жавоб берди ошнаси.— Туриш-турмушимизнинг ўзи томоша бўлиб ётибди-ку. Ҳе, нима кераги бор? Пул тўлаб томоша кўриш кимга зарур келибди? Хотинча кийинган эркакларнинг қий-шанглаши меъдага тегмаган дейсанми?

¹ Эронда машҳур бўлган пьесаларнинг номлари.

Шун куни, яъни 1339 йил, иккинчи хут, якшанба, Европа календари бўйича эса 1921 йил, йигирманчи февраль қуёш ботаётган чоғда, «Гранд Отель» меҳмонхонаси дарвозаси олдида бир неча киши қизгин суҳбатлашмоқда эди. Улардан бири — новчадан келган, авом халқ назарида ўзини мусулмони комил қилиб кўрсатиш мақсадида бўлса керак, калтагина соқол қўйгани, суҳбатдоши — ниҳоятда барваста одамга:

— Хўш, қани нима дейсиз? Энди пулларни нима қиласиз?— деди.

Барваста одам ички изтиробини яшириш учун бўлса керак, сохта қувноқлик билан жавоб берди:

— Нима қиласиз дейсизми? Оғойи Х... уддавла билан оғойи Х... уссалтана нима қилсалар, мен ҳам худди шундай қиламан-да. Менда ортиқча пул бор бўлса эканки, казакларнинг келишидан кўрқсам. Большевизм дейсизми? Большевизм бўлса бўлаверсин! Олса, уй жиҳозларини ижарага қўйиб, зўр машаққатлар билан орттирган жиндаккина пулимни олади-да, бошқа нима ҳам бор?..

Унинг бу жавобини эшитгач, уларнинг қолган икки суҳбатдошлари қаҳ-қаҳ уриб кулиб юборишди. Булардан бири бошига беўхшов салла ўраган, кеча тун бўйи коньяк ва ароқ ичгани хира кўзларидан яққол сезилиб турган, озарбайжонлик сайд, иккинчиси оқ юзли, қўй кўзли, қўнғироқ соч ёш офицер эди.

Бир йилдан сўнг бир «Бошқарма»нинг бошлиғи бўлиш, амалга мингач, давлат пулини ўмариб, Техроннинг шимоли-ғарб томонидан боғ олиш, извош ҳамда автомобилли бўлиш, мактаб муаллимлари қашшоқликнинг зўридан нажот излаб, мачитдан бошпана ахтарган вақтларида мингларча туман сарфлаб, уй жиҳозлари олиш, ҳар шишаси ўттиз туман турадиган шампань виносидан сипқариш, аскарликка олинган шўрпешона йигитларни калтаклашни ўзига эрмак деб билиш, ҳар жума куни шаҳар ташқарисидаги боғларда бир кечада юзлаб туман сарфлаб айш-ишрат қилиш бу ёш офицернинг етти ухлаб тушига ҳам кирмас эди. Ана шу ёш офицер ғамгинлик билан деди:

— Эй, бизнинг қўлимиздан нима иш ҳам келарди: етти ойдан бери маошдан дарак йўқ, яна етти ойни маош олмай ўтказамиз...

Шу маҳал озарбайжонлик сайд соф туркча талаф-

фузда турк-форс ибораларини аралаштириб қироат билан сўзлай кетди:

— Сиз беҳуда ташвиш тортманг. Мен токи сиз билан эканман, пул топишга ўзим кафил. Ўзим сизга пул бераман. Агар бу ерда большевизм қарор топгундай бўлса, Табризда большевиклар бўлмайди.

Шўрлик саид ўзининг чаласаводлиги туфайли революция даврида барча ижтимоий муносабат ва алоқаларнинг ўзгариб ва бекор бўлиб кетишини, у менга бошпана бўлади деб ўйлаган Табризнинг ўзи большевиклар шаҳри бўлиб қолишини билмасди. Бундан ташқари, бир йилдан сўнг шу қўнғироқ соч офицер воситасида мўътабар кишилардан яхши тавсиянома олиб, Баладияда ишга жойлашишини ва оқибат-натихада бошқармадан бир неча олий маълумотли кишиларнинг ҳайдалиб кетишига сабаб бўлишини олдиндан билган эди дейсизми?

Сайр этувчилар аста-секин уй-уйларига тарқала бошлашди. Лекин бу галги тарқалишлари ҳам одатдагидан тамомила бошқача эди: кишилар ғамгин ва халёлчан эдилар. Биров ўз бойлигини қаерга ва қандай қилиб яширишни ўйласа, бошқа бирови казаклардан эсон-омон қочиб қутулиш йўлини чоғларди.

Секин-аста бутун Техронни сукунат қамраб олди. У вақтларда Техрон кўчалари ёритилмас, дўконлар барвақт ёпиларди. Шу сабабдан шаҳарни дарҳол қоронғилик ва сукунат босарди. Фақат ойгина ёғду сочар, лекин у ҳам бамисоли ошиғини бир оз қийнамоқчи бўлган танноз хоним янглиғ бир лаҳзагина чеҳрасини очиб, қайтадан яшириниб оларди.

* * * *

Дарё шўх ва ёқимли шовилларди. Булутлар тарқаб кетди. Табиат гўё ерга ачингандай унга осмон юзини очди. Ой ярақлаб ёғду соча бошлади. Бу манзара худди ўз қизининг севган йигитига қўл беришини истган меҳрибон отанинг хотамлик қилиб, қиз юзидаги пардани астагина кўтариб, қиз ҳуснини йигитга кўрсатганига ўхшаб кетарди.

Дарё атрофини шовқин-сурон босган эди. Чор тарафдан товушлар эшитиларди: биров дўстини чақирса, биров отини «чў» дерди, яна биров оғзига келгани-

ни қайтармай Техрон ашрофларини сўкарди. Кўприк яқинидаги қийшайган бут турган баландликда казакча кийинган икки нафар йигит тош устида ўтиришарди. Кеча ойдин бўлганидан ўтирганларни осонгина таниш, бир-биридан ажратиш мумкин эди. Буларнинг бири кўркама, кўкиш кўзли йигит эди. Унинг офтобда қорайган ва шамолда дағаллашган ғамгин чеҳраси ташвиш, азобуқубат чеккаидан далолат берарди. Кўзу қошлари қоп-қора, сал қорачадан келган йигитча бўлса, ўртоғига ўхшаб у қадар қораймаган ва унчалик ғамгин ҳам кўринмас эди.

Биринчи йигит осмонга тикилар экан, диққинафасликданми ёки ғазабданми:

— Оҳ, эрта, эрта... тезроқ тун ўтса-ю, тонг отса!— дерди.

Шериги сабрсизланиб:

— «Эрта», «эрта» деявериб жонимга тегдинг, эртага нима қилмоқчисан ўзи, айтсанг-чи ахир!— деб жеркиди ўртоғини.— «Эрта», «эрта»миш. Ҳа, нима бўпти. Бугундан эртанинг нима фарқи бор, бугун Кирождамиз, эртага Техронда бўламиз, вассалом!

Йигит шеригининг бу сўзларига унчалик эътибор қилмасдан жавоб берди:

— Мен сенга ҳамма воқеани Техронга борганимиздан кейин айтиб бераман дедим-ку. Бунча энсамни қотирмасанг, меня бир оз ўз ҳолимга қўй, дўстим.

Қорачадан келган йигит ўртоғини ё бетоб, ёки ақлдан озган ҳисоблаб, уни ортиқча безовта қилмаслик учун бошқа гапирмади. Шеригининг жим қолганидан фойдаланиб, биринчи йигит яна хаёлга чўмди. Унинг дам-бадам қимирлаган лаблари алланималар деб пичирларди, лекин шу қадар секин пичирлардики, сўзларини шериги эшитмас, шунда унинг чиройи очилиб кулиб қўярди, гоҳо яна нималарнидир пичирлаб, ғамнок бўлар, юзида алланечук ташвиш ва ғазаб аломати намён бўларди.

Шу ҳолда бир неча дақиқа ўтди. Сўнг у аста енгини қайириб қўлидаги соатга қаради-да:

— Олтидан чорак ўтибди. Ун беш дақиқалардан кейин йўлга чиқамиз. Мен кетишим керак,— деди.

У ўрнидан турди ва ойдин кеча манзарасига маҳлиё бўлиб, тош устида ўтирган дўстига яхшилик тилаб, жадал жўнаб кетди. У Техронга қарама-қарши жойлаш-

гани Қазвин томон бурилиб, кўн ўтмай Кирож қишлоғига кириб борди.

Бу ерда шовқин-сурон, тўс-тўполон авжига минган эди. Қишлоқнинг катта кўчаси ҳарбий лагерни эслатарди. Ҳамма ерда казаклар юрарди. Казаклардан қўрқиб қути ўчган Кирож аҳолиси, мана энди талон-торож бошланади, деган ташвишда эди. Бироқ, бу ердагилар кутгандек талон-торож бошланмади. Аҳоли ашаддий босқинчи деб ўйлаган казаклар, аксинча, беозор, кишиларга нисбатан ҳушёр ва ҳатто меҳрибон эдилар.

Йигит қишлоқ кўчасининг икки четида тартибсиз ҳолда тўда-тўда бўлиб юрган казаклар орасидан ўтиб (казаклар унга салом беришар ва у ҳам честь бериб борарди), йўлнинг чап томонида кўриниб турган карвонсаройга келди. Карвонсарой ва унинг атрофи шовқин-сурондан холи эди. Дарвоза олдида навбатчи казак турарди. Навбатчи ёнига келган йигит: «Фавқулодда бир иш туфайли командирни кўришим керак»,— демоқчи эди, аммо казак унга огоҳлантириш ишорасини қилиб, қўлини чаккасига қўйди-да:

— Оғойи командир ҳозир ҳеч ким билан кўриша олмайдилар,— деди.

Йигит ичкари киришни қаттиқ талаб этиб туриб олди. Казак яна қўлини чаккасига қўйиб тушунтирди:

— Бу ердан жўнашга атиги ўн дақиқа қолди. Шу сабабли командир бирор кишини ҳам қабул қилолмасликларини айтдилар.

— Биладан,— деди йигит.— Бироқ ишнинг фавқулодда ва айниқса, шу ердаги ишга бевосита алоқадор бўлганлиги учун ҳам командирни кўришим зарур.

Озарбайжонлик бу навбатчи казак саводсиз бўлганлигидан «фавқулодда» ва «бевосита» сўзларининг маъносига тушуниб етмай, соф туркча талаффузда жавоб қилди:

— Хон-ноиб... Мен айбли эмасман... Командирни кўриш мумкин эмас, вассалом.

Йигит командирни, албатта, кўриши кераклигини такрор айтмоқчи бўлиб турган чоғида карвонсарой хоналаридан бирининг эшиги очилди ва ундан юзларини чанг босган офицер кўринди.

— Нима гап? Нима бўлди?— сўради ҳарбийларга хос дағал товуш билан офицер.

Йигит ғоз туриб:

— Ҳамма нарса жойида, оғойи командир, лекин мен муҳим бир иш юзасидан сиз билан гаплашишим зарур,— деди.

Шу кеча, дарҳақиқат, ҳамма нарса муҳим эди. Катта бир ишга жазм қилган кишининг бундай пайтда ҳамма нарса ҳақида ўйлаши, жон куйдириши табиийдир. Бундай вазиятда энг майда кўринган ишлар ҳам, арзимас муваффақиятсизлик ва зиддиятлар ҳам муҳим ҳисобланади. Қандайдир офицер у билан гаплашмоқчи. Демак, бунинг сабаби бор. Эҳтимол, Техронда барча ишдан воқиф бўлишиб, зарур чора-тадбирларни кўраётгандирлар? Бунни билиш, аниқлаб олиш керек.

Шундай мулоҳазалар командирнинг фикридан ўтган бўлса керак. У навбатчига йигитни ичкари қўйишни буюрди. Орадан сал вақт ўтгач, йигит командирнинг хонасида ҳозир бўлди.

Бу кичкинагина хонада мойланмаган стол ва курси бор эди, холос. Столда синиқ шишали тунука ис чироқ тутарди. Хона ичи совуқ. Унинг сарой ҳовлисига чиқадиган эшиги бекитилган бўлса-да, лекин кўтарилган кучли шамолдан эшик бениҳоя ғижирлар, хона ичи нотинч, ваҳимали эди.

Командир ўйчан кўринарди. У аввал хонада бир неча бор у ёқдан-бу ёққа юрди, сўнг йигитга яқин келиб, унинг елкасига қўлини вазмин ташлар экан, сўради:

— Қайси қисмдан бўласан?

— Техрон полкининг бешинчи ротасиданман, оғойи командир,— деб жавоб берди ёш поручик ҳарбийларча гоз туриб.

— Исминг нима?— яна сўради командир.

— Исмин энди... Муҳаммад Ризо Хон.

— Хўп, бўпти. Вақт оз. Нима гап ўзи, тезроқ сўзла.

И б о б

ИНТИҚОМ СОАТИ

Тунги соат ўн бир. Қўрқув, ташвишдан тинкаси қурган кўпчилик техронликлар уйқуга ётганлар. Фақат Техрон бригадасининг солдатларигина ўзларига хос тартибсизлик билан мудофаа тараддудини кўрардилар. Аҳвол кулгили бўлишига қарамай, хавфли эди. Техронга ярим яланғоч ва деярли қуролсиз бир тўда ка-

зақларнинг «ҳужум қилиш» хавфи бор эди. Аммо, танбал, ношуд теҳриликлар учун шунинг ўзи ҳам жуда катта ташвиш эди.

Шу маҳал қимматбаҳо гиламлар тўшалган ва шодир ришмир билан безатилган хонада сочлари деярли оқариб кетган бир чол тунги кийимда ётарди. Унинг устига кўрмон митосидан тикилган нафис кўрна ташланган, боши атлас жилдли момик ёстиқда. Хона тоқчаларидан бирида ёнаётган кичкина чироқнинг хирагина нури қария ётган каравотга тушиб, унинг юзини ёритиб турарди. Бошида деярли соч қолмаган бу қариянинг кўзлари киртайган, юзларини ажин қоплаган: чолнинг қиёфаси тушқун ва қўрқинчли ҳуринарди.

У ухлмас, баъзан худди ҳушини йўқотгандай киртайган кўзларини юмар, сўнг бирдан титраб кетар, қаддини бир оз кўтарар, рўпарасида нимадир тургандек, унга талпинар ва уҳ тортиб, яна ўрнига йиқиларди. Гоҳо кўзлари аланглар, гоҳо ёшга тўларди. У яна кўзларини юмар, қимирламай тинч ётганича хаёлга чўмар эди.

Вақти-вақти билан такрорланаётган унинг бу ҳаракати «бундай ётсам яхши бўлади» деб бир томонга, салдан кейин «бу ёнбошимга босиб ётсам дуруст бўлади» деб безовталаниб, у ёқдан-бу ёққа ағдарилаётган беморни эслатарди. Чол, дарҳақиқат, бемор эди. Аммо, унинг дарди умидсизлик эди.

Чолнинг кўзларидан унинг аллақачонлардан бери тинч уйқудан маҳрум экани ва ҳатто кечалари тинч ухлаш мумкинлигини умуман унутиб қўйганлиги кўриниб турарди.

У аста қўлини узатиб, каравоти ёнида турган шишачани олди, оғзига яқин келтириб очкўзлик билан бир лаҳзада ундаги дорининг қарийб ярмини ичиб қўйди. Бир неча дақиқадан сўнг унинг кўзлари юмилди, уйқу элтгандай бўлди. Бироқ кўп ўтмай, яна тўлгана бошлади. Энди у алаҳсирар эди:

«Хўш, қани, қўзичоғим, келасанми? Кел, қизгинам, кел!..»

Унинг юзларидан ёш томчилари оқа бошлади.

Бу узоқ тунда катта осма соат ҳам аксига секин юраётгандек туюларди, чол тез-тез безовталанарди, Баъзан уйқусида бақриб юборарди:

— Нури дийда қизгинам, муштипар хотиним! Қани келинлар, келинлар, жонларим! Сизлар келган оқшом мен мўйсафид учун энг азиз ва ширин бўлади. Мен бебахт, мункиллаб қолган чолнинг ҳолидан хабар олиб, тортаётган азоб-уқубатлардан қутқаришни истамайсизларми?..

Яна чолнинг юзидаги ажинлар оралаб ёш оқа бошлади.

Ташқарида ҳамон шамол қутурар, дераза ойналари дириллар эди. Уйда бўлса, сукунат ҳукм сураар ва бу сукунат чолнинг қаттиқ оҳ-войидан бузилиб турарди.

Чол тўшакда бирдан ўгирилиб олди. Унга янги, потаниш товуш эшитилди. У толиқиб, эндигина ёстиққа бош қўйган ва бедармон ётган бўлса-да, ноилож ўридан сал кўтарилиб, ташқарига қулоқ сола бошлади:

— Ўзи нима гап, келишяптими? Рости билан келишяптимикиан-а?

У яна алаҳламоқда эди.

«Азиз қизим ҳам... севимли хотиним ҳам келяпти! Келишади деган эдим-ку, билардим келишларини... мана, жуда соз бўлди».

У қўлларини бир-бирига яқинлаштириб, гўё товуш чиқармай чапак чалгандай бўлди.

Дарҳақиқат, тунги сукунатда аллақандай товушлар эшитилаётганини илғаб олиш мумкин эди. Кимдир уйни айлана ўраган ровон эшигини тарақлатиб очиб юборди. Шундан сўнг у эҳтиётлик билан секингина айвонга кирди. У тобора яқинлаша бошлади. Чол ўзига келди, унинг қути ўчди. Қўрққанидан бақириб юборди:

— Ким келяпти? Ҳой, ким ўзи?!

Оёқ товуши тобора яқинлашарди. Бирдан нимадир ағдарилиб тушди — келаётган киши айвондаги стулга қоқилиб, уни ағдариб юборган бўлса керак. Бу тарақлаган товушдан ўтакаси ёрилган чол беҳуш бўлиб йиқилди.

Уй эшиги очилиб, қадди-қомати келишган, казакча кийинган, шапкасини чанг босган йигит кўринди. Унинг сочи ҳам чангга беланган, кўзлари эса қип-қизариб кетганди. Диққат билан разм солган киши унинг чеҳрасида икки ҳис: севинч ва ғазаб ҳисси курашаётганини ва севинчдан ғазабнинг устун чиқаётганини пайқаган бўларди.

Йигит чол ётган жойга яқинлашиб, бўғиқ ва титроқ товуш билан:

— Менинг гапимга қулоқ солишга майлингиз борми, оғо?— деди.

Унинг саволи жавобсиз қолди. Йигит бир оз кутгач, чолнинг тўшаги устига энгашиб, унга тегиб кетишдан жиркангандай, қўлининг учи билан чолни секин қирмиратди:

— Оғо, менинг гапларимга қулоқ солишга майллари борми?

Бу сафар чол бошини чайқади. Унинг ич-ичига ботиб кетган кўзлари очилди-да, уйга кирган кишига қаради.

Шу дақиқада юз берган ҳолатни тасвирлашдан ожизман. Чол бўғиқ товуш билан додлаб юборди. Келган киши ҳам додлаб юборди. Худди шу маҳал олис-олисларда тўпнинг гумбурлаши эшитилди. Кейин яна икки марта гумбурлади. Чолни даҳшат босди. У сапчиб ўрнидан туриб кетди.

— Нима гап ўзи? Қандай воқеа рўй берди? У ёқда нималар бўляпти?

— Ҳеч нарса бўлаётгани йўқ. Фақат халққа хиёнат қилганларнинг жазосини беришмоқчи,— деб жавоб қилди офицер.

Тўплар пайдарпай гумбурларди. Йигит сукут қиларди. Кейин кўзларини катта-катта очиб, ўзига бақрайиб қараб турган чолдан:

— Мени танияпсизми?— деб сўради.

— Ҳа,— деб пичирлади чол.

— Уйингизга нима учун келганимни биласизми?

— Албатта, лекин...

Чол қўрққанидан бошлаган жумласини тугата олмади.

— Хўп, майли,— деди йигит,— ҳозир мен сизни қамоққа олгани келдим. Лекин, яна имоним комилки,— деб илова қилди ғзаби қайнаб,— сизни суд қилтишаётганини кўриш менга насиб бўлажак. Қизингиз қаерда? Гапиринг, қизингизни нима қилдингиз?

«Қизингиз» деган сўз чолнинг юрак-бағрига ўт қалади. Қўрқуви бирдан чуқур қайғу билан алмашинди. Чол хўнграб йиғлаб юборди.

— Қизим, қизгинам? Нега уни эсимга соласан?

Чол бамисоли ярим беҳуш одам сингари:

— Жонгинам қизим, балки ҳозиргина келиб қолар... хотиним ҳам келса, ажаб эмас,— деб саннай бошлаган

Эди, шу заҳоти бирдан ўзига келди.— Йўқ, йўқ. Мен шунчаки бир... Тўғрироғи, шу бугун кечаси ўзим уларнинг ёнига кетсам керак. Энди улар асло келмайдилар... кела олмайдилар.

Йигит чолга томон юрди, лекин у тентираклар, оёқлари юришдан ожиз эди.

Чол кўзларига ёш олиб:

— Ҳа, қизимдан айрилдим,— деди.— Энди қизим йўқ. Аввал қизимдан, кейин хотинимдан жудо бўлдим. Севикли хотиним кетди. Энди улар йўқ. Ҳеч кимим йўқ. Ўзим сўққабошман.

Йигит орқага тисарилиб, деворга суянди. Унинг аъзойи бадани титрарди. Юраги алланечук бўлиб кетди: бирдан мадори қуриб, гавдаси девордан сирғалиб тушди, ерга ўтириб қолди. Чол ҳўнграб йиғлай бошлади.

Шу зайлда бир неча дақиқа ўтди.

Қизни кўриб, уни халос этаман деб қилинган барча орзулар пучга чиқди. У ҳар қандай тушқунликни бартараф қилишга ҳозир эди. Қизни ажал олиб кетган эди. Шу билан кураш ўз мазмунини йўқотганди. Эндиги курашдан не фойда? У қизнинг ҳузурига, уни кўришга, ўч олишга ошиққан эди. Энди бунинг ҳеч қандай маъноси йўқ эди. Ўч олишми? Кимдан ўч олиш? Қайғу-ҳасрат ва умидсизлик букиб ташлаган мана шу аянч махлуқдан ўч олсинми?

Йигит йиғламасди, у қўллари билан бошини қаттиқ қисар, гўё бу билан у тақдирнинг берган бу даҳшатли зарбасига мясидан қандайдир бирор изоҳни ситиб чиқаришга уринаётганга ўхшарди. Унинг кўзларидан ниҳоятда зўр азоб чекаётгани сезилиб турарди.

Кўчадан отларнинг дупири, ўқ товушлари эшитиларди.

Шу пайт кимдир кўча эшикни итаргандай бўлди. Эшик тақиллади. Йигит дарҳол қўлидаги соатига қаради.

— Уҳ... Уларнинг кўчада кутаётганига бир ярим соат бўлибди-ку.

У зўрға ўрнидан туриб, хонадан чиқди-да, ровон ўшигини очди.

— Афв этасиз,— деди у ўзини кутаётган казак формасидаги офицерга,— ўн дақиқа деб сизларни шунча кутдириб қўйдим.

— Ҳа,— деди офицер ва шу заҳотиёқ пастда кута-

ётган икки казакка дарҳол:— Қани, юқорига!— деб буйруқ берди овозини барала қўйиб.

Казаклар зинапоядан югуриб чиқишди.

— Буйруқни ижро этиш мумкинми?— деб сўради офицер йигитдан.

Йигит ғамгинлик билан:

— Бундан не фойда?— деб жавоб берди.

Декин шу ондаёқ унинг чеҳрасида яна ғазаб ва нафрат ифодаси пайдо бўлди:

— Йўқ, нима бўлса ҳам, буйруқни ижро этинг!— деди қатъий равишда.

Ичкари ҳовлида уч хотин бор эди. Казак йигитларнинг оёқ товушлари ва офицерларнинг гап-сўзлари уларни ҳам уйғотиб юборди. Улар «большевиклар Теҳронни олди», деб ваҳимага тушиб, аввалига ўринда тўлғандилар, кейин сапчиб туриб кетдилар. Қуролланган казакларга қарши бу хотинларнинг қўлидан нима иш ҳам келарди. Кулги бўлишдан бошқа иш қилиша олармиди, йўқ акс ҳолда улар ич қўйлақда туриб эшикдан қарашармиди? Аёлларнинг кўзи казак шапкаларига тушди, қўрққанларидан ўзларини тезда ичкари олишди-да, яна жойларига киришиб, кўрпаларига ўралиб ётишди.

Офицерлар казаклар билан биргаликда чол ётган хонага киришди. Чол ўринда гўжанак бўлиб ётарди. Унинг қолган-қутган сочлари ҳам юлинган эди. Чол аввалига уларнинг кириб келганини пайқамай қолди.

Иккинчи офицер каравотга яқин бориб энгашди-да, чолнинг қай аҳволда эканига парво ҳам қилмай, унинг елкасига қўлини қўйиб:

— Муҳтарам оғо! Ғоятда зарур бир иш юзасидан Қазақхонага боришингиз зарур,— деди.

Офицернинг дағал овозини эшитган чол ҳаракатланди, бошини кўтарди. Казакларни кўриши билан тамомила ўзини йўқотиб қўйди.

— Казаклар? Менинг уйимда? Шундай бемаҳалда? Нима учун? Сизлар мендан нима истайсиз?

Офицер кулимсираб:

— Бизни кечиринг, оғо хизмат бурчимиз! Зарур бир иш важдан биз билан бирга юришингиз керак,— деди.

Чол энди гапга оғиз ростлаган эдики, офицер уни оғиз очиргани қўймай:

— Илтимос ва ўтинчларга ҳеч қандай ўрин йўқ. Шу

кёча сиз Казакхонада бўлишингиз шарт, бу ҳақда буйруқ олганмиз,— деди.

Офицер казакларга ишора қилгач, улар қўлтиғига кириб, чолни оёққа турғиздилар. Бирпасда уст-бошини кийдириб, эшик томон етаклашди. Йигит деворга суянган ҳолда мижжа қоқмай чолга қараб турарди. Чол бўлса ҳамон йиғларди. У, балки шу ҳолга тушиб қолгани, казакларнинг шу тарзда уйига бостириб кириб, мажбуран ўриндан турғизишганига хўрлиги келиб йиғлаётгандир. Дарвоқе, бу чол бундан ўзга муомалага лойиқ одам эмас эди-да!

Йигит ҳамон қимирламай турарди. Ташқари чиқиб кетаётган чолнинг кутилмаганда:

— Ўғлингни эҳтиёт қил!— деган овозидан у ўзига келди.

Чол айтган сўзларнинг йигитга қандай таъсир этганини таърифлаш қийин. Бир нафасда бутун ўтмиш унинг кўз ўнгида намоён бўлди. Йигитнинг чеҳрасида гоҳ табассум, гоҳ алам ифодаси пайдо бўларди: ўғил кўрганига қувонганидан жилмайса, Маҳиннинг ўлими, чақалоқнинг етим қолгани дилини тилка-пора қилиб, кўзларидан ёш оқизар эди. Йигит шу зайлда шипга боққанча бир неча дақиқа қимир этмай турди. Ниҳоят у нимагадир жазм қилгандай, бирдан кўчага югурди. Зинапоядан тушиб, кўча эшикка отилди:

— Тўхтанг, тўхтанг! Чолни олиб кетманг, ўғлимни сўраб қолай, ўғлим қаерда?..— деб қичқирди.

Бироқ чол ўтирган извош олислаб кетган эди. Йигит извош деразасидан бошини чиқариб, баланд овоз билан қичқираётган офицернинг:

— Уйга кел, балки тонггача қайтарман,— деганинигина эшитиб қолди.

Извошни қувиб етишнинг иложи йўқ эди.

Шундан сўнг йигит ноилож яна ҳовлига югурди, зинапоядан чиқиб, кучи борича эшикни тақиллата бошлади.

— Менинг ўғлим қаерда? Ўғлимни беринглар!— деб қичқирди. Ортиқча асабийлик ва ҳаяжондан боши айланиб йиқилди.

Йигитнинг шовқинидан ичкари ҳовлидаги хотинлар яна ўринларидан туришди. Бу сафар эшикдан сочлари оқариб кетган бир хотин чиқди.

— Чироқни ёқинглар,— деб буюрди у бошқаларига.

Чироқни ёқиб, тўртовлон қўрқа-писа айвонга чиқишди. Кампир ерда ётган ёш офицерни кўриши биланоқ кимнингдир номини тилга олди.

— Уни тушимда кўрганим бежиз эмас экан,— деб қўйди ўзича. Кампир йигитнинг бошини кўтариб, ўз тиззасига қўяр экан, аёллардан бирига сув ва лой келтиришни буюрди.

Кампирнинг куйиб-пишиб қилаётган меҳрибончилиги туфайли йигит ўзига келди. У ҳам кампирга қараб, уни таниди ва ғамгин товуш билан: — Улибди! — деди.

Жавобдан ожиз қолган кампир йиғлаб юборди.

Йигит ўрнидан турди. Кампир йигитнинг қўлидан етаклаб, хоналардан бирига бошлаб бориб, эшигини очди.

Йигит чала қоронғи бир хонага кирди. Бу хона тамомила жимжит эди. Фақат мириқиб ухлаётган кичкина боланинг бир маромда нафас олиши эшитиларди, холос. Шунча шовқин-суронлар унинг уйқусини бузолмаганди.

— Йўқ, ҳозир мумкин эмас,— деди кампир.— Кечаси қаёққа борасизлар? Болани шамоллатиб қўясиз. Дарвоқе, мен ҳам сиз билан кетишим керак. Онаси вафотидан сўнг мен ҳамма вақт шу чақалоқ билан биргаман. Бундан бошқа менинг овунчоғим йўқ... Тонг отгунча сабр қилинг, сўнг бирга кетаман.

Йигит ғамгин бош чайқади:

— Йўқ. Бу уй менинг бошимга фалокат келтиради. Яхшиси, мен кетайин, эртага қаердалигимни сизга билдираман,— деди йигит ва кейин болага қараб:

— Мен билан кетасанми? — деб сўради.

Бола бошини қимирлатди.

Кампир йигитнинг қарори қатъий эканлигини тушунган бўлса ҳам, лекин уни қайтаришга, эрталабгача шу ерда қолишга ундаб, ёлворди. Аммо, йигит кўнмади. Болани кийинтириб қўлига олганча айвонга чиқди. Бу ерга киришда ечиб қолдирган шинели ерда ётарди. Йигит шинелни олиб елкасига солди, болани шинелга ўраб, физиллаганча боғдан ўтиб, дарвозадан чиқди-да, қоронғиликда кўздан ғойиб бўлди.

УМИД НУРИ

Тонг ёриша бошлади. Тунда бошланган совуқ шамол ҳамон эсарди. Техрон атрофида жимжитлик, шаҳар маркази — Тўпхона ва Машқ майдонлари эса жуда гала-говур эди.

Шу кунинг тонгда Техроннинг барча маҳаллаларида постда турган полициячилар ёнига қўшимча яна биттадан казак юборилди. Полициячилардан қўрқиб талвасага тушган шаҳар аҳолиси деворларга қапишиб ўтиб, полициячилар кўзидан ғойиб бўлишга шошиларди. Мабодо бирор ерда одамлар тўдалашиб қолгудай бўлса, кимингдир:

— Қазаклар шаҳарни олишипти,— деган товуши эшитилиб қоларди.

Марказий кўчаларда одам тирбанд. Худди қурбон ҳайитда бўлганидек, оломон шаҳар марказига қараб оқар эди. Бироқ, бу кун байрам кунидан фарқ қиларди: қурбон ҳайитда одамлар Тўпхона майдонига қарши томон йўл олишса, бугун аксинча, одамлар шаҳарнинг ҳамма дарвозаларидан шу майдонга оқиб келарди.

Яқинда Жавод роса калтаклиниб, майиб қилинган жойда, яъни ватанга муҳаббат қўйган ва эркпарвар барча ёшларга даҳшат солувчи назмия биноси айвонида қоровулда турган бир неча казаклар у ёқдан-бу ёққа юришарди. Дўконлар ёпилган. Кенг ялангликда ашрофлар, тунокасоллар ва сирчи-бўёқчилар билан, савдогарлар эса ҳаммоллар билан аралаш-қуралаш бўлиб турардилар. Кимдир:

— Кеча шахзода З. ни қамоққа олишди,— деди.

— Бизнинг уйимиз олдидан оғойи Ф.. уссалтанани олиб ўтиб кетишди,— деб кимдир унинг гапига қўшимча қилди.

Шу маҳал бирдан Лолазор томондан извош кўринди. Кучер ўрнида икки казак ва улар ўртасида семиз, қорни катта бир амалдор ўтирарди. Извош Машқ майдонига, Казакхонага томон борарди.

Бу ерда бўлаётган воқеаларни ўз кўзи билан кўриб, ғазаб ва асабдан ҳаяжонга тушган паст бўй, оқ юзли бир йигит:

— Оббо... оғойи Т... уддавлани ҳам қўлга олишипти-ку. Отамни қамаб қўйишмаса яхши эди!— деди ташвишда.

Лолазор томондан иккинчи извош чиқиб келди. Ҳалиги йигитча:

— Вой, бу қанақаси? Отамни олиб кетяптилар!— деб қичқириб юборди.

Бу ҳолат тез-тез такрорланиб турарди: бошига узун қулоқ кийган, қорни катта, мўйсафид кишилар ортилган карета ва файтонлар Қазакхона томонга ғизиллаб ўтиб турарди.

Оломон ич-ичидан қувонаётгани аниқ сезиларди. Уларнинг кулишлари қўлга тушганларга ачинишмаётганини кўрсатарди. Аксинча, уларнинг қўлга олиниши, қамалиши ва ҳаттоки ўлдирилиши оломоннинг бирдан-бир орзуси эди.

Оломон орасида карета ва файтонларни кўрганда вужудини титроқ босган, қўрқинчдан ранги бўзариб, майдонни ташлаб, кўздан ғойиб бўлаётган кишилар ҳам бор эди. Булар жоҳил, лекин ашаддий муттаҳамлар ва давлат хазинасини уриб кетувчилар, йирик мулкдорлар қўлида қуроқ бўлиб, уларнинг ёлланган айғоқчилари эди. Улар хўжайинларининг ҳаёти хавф остида қолганини кўриб, ўз тақдирлари қақида бош қотиришар ва бенхтиёр қалтирашарди.

Бу тоифа орасида бозор сиёсатдонлари, текинхўр тамагирлар, атторлар, соатсозлар ва касби кори тикув машиналарини тозалашдан иборат бўлган кишилар, турли тўгаракларнинг сафсатабоз нотиқлари, газетанинг бебурд мухбирлари, ўзи йўқ газетага «шошилишча илова» чиқарадиган ноширлар ва текинга қорин тўйғизишга ўрганиб қолган ҳар хил юлғичлар бор эди.

Аксарият одамларнинг вақти чоғ эди. Ахир, юз йиллар давомида ана шу ашрофлар асоратида азоб чеккан ва ундан халос бўлишга ўзида куч топа олмаган халқ қувонмасинми?!

Ҳар ким севинчини ва бу ярамасларга нисбатан нафратини ўзича изҳор қиларди. Қимдир сабрсизланиб:

— Ҳамма иш равшан, уларнинг шу бугуноқ дорга осилганини кўрамиз,— деди ва у гўё дор сиртмоғига осилиб ётган жасадларни кўраётгандек юқорига қараб чапак чалиб куларди.

Турли тарафдан чиқиб келаётган извошлар Тўпхона орқали ҳамон Машқ майдони томон кетиб борарди.

Кечаси бир неча полициячини ўлдиришипти, деган хабар оғиздан-оғизга ўтиб юрарди. Бу одамлар кайфини сал бузди. Агар казаклар шундай яхши ният билан келаётганларини олдиндан айтганларида, барча аҳолигина эмас, балки ўша полициячиларнинг ўзлари ҳам уларни табриклаб, пешвоз чиққан бўларди, дейишарди одамлар ўлдирилган полициячиларга ачинишиб. Турганлардан бири жаҳл аралаш ғамгинлик билан гапирди:

— Қожория маҳалласидаги шўрлик полициячилар-а! Нега қурбон бўлишди? Ана шу ашрофлар учун жонларини фидо қилишдими? Ашрофларни ҳимоя қиламан деб ҳалок бўлдилар. Ашрофлар уларнинг қадрларига ётармиди, дейсиз?

Бугун дўкон ва устахоналар берк бўлганидан, деярли барча аҳоли шу ерга, шаҳар марказига тўпланган эди. Хатто, оламда бўлаётган ишлардан бутунлай беҳабар, кун бўйи тинмай ишлаб, кечқурун бола-чақасига бир парча нон билан жиндай гўшт олиб боришдан ўзга ташвиши бўлмаган, сиёсатдан мутлақо четда юрадиган кишилар ҳам ҳозир назмий олдида турар эдилар. Улар бу ерда нималар бўлаётганини аниқ пайқаманган ҳолда ҳар бир извошни шовқин-сурон билан кутиб олардилар.

Оломоннинг олдинги қаторида бошларига намат қулоҳ ва эгниларига бурма сардорий кийган бир гуруҳ софдил кишилар, шунингдек, боқишида садоқат ва самимийлик акс этиб турган ёшлар турарди. Ана шу тоифа орасида ёши йигирма бешларга борган бир йигит ҳам турарди. Унинг эгнида кулранг сардорий, бошида пастаккина қора қулоҳ, оёғида қалин чармли туфли бор эди.

Юз-кўзларидан касаллик асорати сезилиб турган бу йигит тўп ва милтиқ ўқларидан илма-тешик бўлиб кетган назмий деворларига боққан сари бошқалардан кўра кўпроқ қувонарди. У хахолаб кулиб юборди.

— Замонанинг зайлини қаранг-а,— деди у,— ма-на бу бинонинг ҳам умри битипти. Энди ундаги бечоралар озод бўлишади.— Унинг ёнида турган бошқа бир қулоҳли киши:

— Алҳамдулилло, энди бу ерга ҳеч ким қамалмайди!— деди.

Шу қўрқинчли уй азобини тортгани аёи бўлиб турган бошқа бир йигит шу сўзларни айтган кишига бирдан қайрилиб қаради-да:

— Ростдан шундай бўлармикан?— деб сўради.

Ҳалиги одам йигитга маҳбусларнинг назмиядан қочиб кетишгани ҳақидаги хушхабарни айтишга энди оғиз ростлаган эдики, аллаким туртиб юборди, у оломоннинг тазйиқи остида чап томонга сурилиб кетди. Шу вақт оломон ўзини четга олиб, жулдур кўйлакли кишини назмияга олиб кетаётган икки полициячига йўл берди.

Полициячилар ўтиб кетгач, оломон яна бирлашди.

Ҳалиги гаплашаётганлар тағин ёнма-ён туриб қолишди.

— Бу бечора кеча қочган эди,— деди кулоҳ кийган иккинчи одам биринчисига,— яна шу кофирларнинг қўлига тушибди!

Шериги унинг гапига жавоб бермади. У ўйга толиб, хотиридан нималарнидир ўтказар ва: «У ҳозир қаерда экан, ўлганми ё тирикми?» дея ўзича гапирарди.

Кун чошгоҳ бўлгач, жуда исиб кетди. Оломон эса, ҳамон тарқалмасди. Нима қилишни билмаган ва бу ерда аслида нималар рўй бераётганини тушунмаган одамлар яна нимадир кутаётгандек, у ёқдан бу ёққа кезиб юришарди.

Ҳукумат амалдорлари шаҳар шунча нотинч бўлишига қарамай, хизматга боришди. Хусусан сердаромад, нссиқ ўринларидан маҳрум бўлиб қолишни истамаган молия идораларининг ходимлари ишга ҳаммадан кўра нлдамроқ жўнадилар.

Бирдан Тўпхона майдонининг Боби Ҳумоюн, яъни «шоҳ дарвозаси» деб аталган хиёбонида офицер бошлиқ бир неча отлиқ казаклар кўринди. Улар, афтидан, тўғри Алоуддавла хиёбонига ўтиб кетмоқ учун майдонга кириб келишарди. Оломон орқага тисланди. Қора кулоҳли бизнинг йигитча казакларга қаради, офицерга тикилди-да, бехос қувончидан қаттиқ қичқириб, югура кетди.

Офицер айнан шу йигит қичқирганини билмаса-да, аммо оломон орасидан кимнингдир югуриб келаётганини кўриб, от жиловини тортди. Офицер етиб келган йигитга диққат билан қаради, уни танигач, қувончидан:

— Жавод!— деб қичқириб юборди.

Офицернинг ушланиб қолганини кўрган казаклар ҳам тўхтадилар. Жаводга ғамгин боққан офицер:

— Мени таний олдингми? Демак, ҳали тамомила ўзгариб кетмаган эканман-да?— деб сўради.

— Жуда ўзгариб кетгансиз, лекин мен таниб олдим,— деб жавоб берди Жавод.

Уларнинг суҳбати ҳамманинг эътиборини ўзига жалб этди. Буни пайқаган офицер Жаводга қанчалик ачинмасин, ночор қолдиришга мажбур эди. Офицер кетишга ҳозирланар экан, Жаводга:

— Мен ҳозирча бир ошнамникида турибман... Қожория кўчасида... фурсатинг бўлса, кечқурун боргин,— деди. Кейин Жавод билан хайр-хўшлашиб, узанги билан отнинг биқинига ниқтаб, казаклари билан Алоуддавла томон жадал жўнади.

Жавод оломон ёнига қайтиб келди. Шундай вазиятда офицер билан сўзлашганини кўрган одамлар энди Жаводга бошқача назар билан қараб, айрим кишилар ҳатто ундан сал-пал ҳайниқа бошладилар.

Жавод Жалолобод хиёбони ортидаги тор кўчада бўлган ўз кулбасига йўл олди.

Оғойи Ф... уссалтанадек баланд мартабали зотнинг қаҳр-газабига учраб, қамоқхона азобини тортган, беаёв калтакланган. Жавод ҳамон аввалгидек хушфеъл, оқкўнгил йигит эди. У Фаррухни шу вақтгача асло унутмаганди. Жавод Фаррухга озгина хизмат қилган бўлса ҳам, лекин у Фаррухни Чаламайдон қаҳвахонасида биринчи бор учратиб танишганидаёқ ундаги самимият ва тўғрилиқни чуқур ҳис этган эди. Фаррух узоқ вақт бедарак кетди, шу фурсат ичида Жавод ўзининг қамоққа олинишини неча бор ўйламасин, ҳеч қачон Фаррухни бу ишда айбли деб билмас эди. У бўлиб ўтган воқеалар сабабини яхши биларди. Сўнгги марта учрашган кундаги Фаррухнинг олижаноблиги, ғайрининсоний қабоҳатга нисбатан нафрати, унинг маҳзун кўз ёшлари Жаводни чуқур ҳаяжонга солган эди; ана шундан буён у Фаррухга самимий содиқ дўст бўлиб қолганди.

Мана, узоқ йиллардан кейин кутилмаганда яна учрашди. Севинчидан кўзларига ёш тўлган Жавод сабрсизлик билан уйига югурди. Йўл-йўлакай ўзича алланималар дер, гоҳ овоз чиқариб ҳам гапириб юборарди.

Жавод ҳозир анча дуруст яшарди, чунки бир му-

ҳим воқеа бева олеси ва унинг болалари ҳақида ташвиш чекишдан уни халос этди. Энди унинг ҳаётга меҳри ортган, кўнглида орзу-истаклар туғилган эди.

IV боб

АЕЛ КЎЗ ЕШЛАРИ УРНИНИ СЕВИНЧ ОЛДИ

Теҳроннинг шимоли ғарб қисмидаги Аббосий хиёбонида, ҳар вақт бўлганидек, сукунат ҳукмрон эди. Бу ерда тўраларнинг кареталари, коляска ва автомобилларининг товушидан бошқа ҳеч қандай сас-садо бўлмайди. Бу ерда «учинчи табақа кишилар» яшамайди, бинобарин, тўс-тўполон, шовқин-сурон ҳам йўқ. Боғ-роғли, ҳовлиси гулзор бу ажойиб даңғиллама иморатларнинг аксариятида, эҳтимолки, ҳақиқатан ҳам ҳаёт гаштидан завқ-шавқ олган бахтиёр кишилар яшарлар; бироқ китобхон билан ҳозир биз кирмоқчи бўлган бу хонадонда на севинч бор эди-ю ва на қувонч.

Чиройли хонада, ланғиллаб ёнаётган чўян печка ёнидаги креслода ёши йигирма бешларда бўлган бир жувон ўтирарди. У мутолаага жуда берилиб кетганидан ён-веригаги нарсаларни тамоман унутиб юборган эди. У шаҳло кўзларини китобдан узмас, бирин-кетин очилаётган саҳифаларни зўр иштиёқ билан ўқир, гоҳо унинг ғамгин чеҳрасида ачиниш аломати пайдо бўларди.

Жувон бошдан-оёқ қора либосда. У қора сочларини европача усулда орқага оддийгина турмаклаган, бошига тўр дуррача ташлаган. Қўлларига узук тақмаган, оёғида эса, қора туфли. Унинг барча кийими оддий, шу билан бирга сипо, олижаноб эди.

Жувон бирдан қўлидаги китобни ташлади-да, зарда бидан деди:

— Бунда ҳам ўлим ҳақида ёзилган. Бирорта дурустроқ китоб топиш мумкин эмас... ҳаммасида ўлим!

У яна дардли, юракни эзиб юборадиган товушда:

— Эй худо, наҳотки заррача бўлса ҳам кўнгилга умид бағишлайдиган бирор китоб тополмасам,— деди.

Жувон китоблар тахланган кўркам шкафчадан яшил муқовали, орқа зиҳига йирик ҳарфлар билан «Генрих VII» деб ёзилган китобни олар экан:

— Балки, бунда ўлим тўғрисида гапирилмас,— деди.

Шўрлик жувон китоб ўқиб тасалли топмоқчи бўлар,

лекин китобларда тасвирланган даҳшатли воқеалар унинг юрагига бешбаттар ваҳима соларди.

Тўрт йил муқаддам бу жувон бир кўришдаёқ севиб қолган, ҳафтада аранг бир марта кўришга муяссар бўладиган йигитидан бирданига айрилиб қолди. Жувон шу кунга қадар ундан на бирор хабар топарди ва на бирор асар.

Ҳа, Иффат севгилисидан жудо бўлганидан бери тўрт йил ўтди!

«Иффат!..— деб хитоб қилади китобхон, ҳайрон бўлиб.— Тўхтаг-чи! Бу ерда автор янглишаётир. Олдин ўқиганимизда, Иффат саводсиз дейилган эди-ку, қаёқдан китобни шариллатиб ўқийдиган бўлиб қолди?»

Бунга изоҳим шуки, бошига тушган машъум воқеалардан сўнг Иффат саводини чиқаришга қаттиқ бел боғлади. Эндиликда у тамомила бошқа жувонга айланганди.

Шу вақт ичида қари отасидан ҳам жудо бўлди. Бу мусибатдан унинг олдинги ғам-ғуссаси сал-пал бўлсин сусайди деб бўлмасди.

Иффат севгиси ва пулига хуштор бўлган кўпгина совчиларини рад этди. У Фаррухдан бошқа ҳеч кимсани хаёлига келтирмасди.

Фаррух билан сўнгги марта учрашганда Иффатнинг чуқур изтиробда бўлгани бизга маълум, бечора қиз қандайдир даҳшат таҳдид солишини ҳис қиларди. Бироқ унинг қўлидан нима ҳам келарди. Фаррух кетиши керак эди, Иффат унинг йўлини тўса олмади. Фаррух кетгач, унинг ҳаяжони янада ошди. Зўр-базўр келган уйқугина уни бир печа соат изтиробдан халос этди. Эрталаб эса Фаррухдан хабар ололмасди. Иффат унинг Шимронга кетганини ва у ерда бир-икки кун қолишини биларди.

Орадан уч кун ўтиб, Фаррухдан ҳеч қандай хат-хабар бўлмагач, Иффатнинг ҳаяжони гоятда кучайиб кетди. У Фаррухни ўз севгилиси қучоғида ўтирибди деб тасаввур қилганида юраги бежо урар, Фаррух бирор фалокатга дучор бўлдимикан деб ўйлаганида эса, юраги қинидан чиқиб кетар даражага етар эди. Иффат учинчи кун Фаррухнинг уйини биладиган, илгари бир бор Маҳиннинг саломатлигидан хабар келтирган оқсоч хотинни юборди. Оқсоч қайтгач, Фаррухнинг отаси ва энагаси ҳам қаттиқ хавотирда эканлар, чунки Фаррух қаерга бориб тушишини уларга дарҳол хабар беражагини ваъ-

да қиглан бўлса ҳам, лекин ҳозиргача бирор дарак йўқ экан, деди.

Бу хабарни эшитгач, шўрлик Иффатнинг ташвиши оғир қайғуга айланди. Унинг шаҳло кўзларига ёш тўлди. У бир кечаю бир кундуз сурункасига йиғлади. Унинг сезгир қалби Фаррухнинг муқаррар фалокатга учраб, азоб чекаётганидан дарак берарди. Фақат йиғидан бўлак чораси йўқ эди. Кўз ёши тўкишдан нима фойда чиқарди, дейсиз?

Иффат Фаррухни ахтариб, Шимронга бориш учун отасидан ижозат олмоқчи бўлди.

Эрталаб воқеани отасига муфассал сўзлаб бергач, ундаи рухсат олди. Эртасига оқсоч хотин ва кекса қароли билан йўлга тушди. Иффат Шимронда оғойи Ф... уссалтананинг боғи яқинидаги бир боғчага жойлашди. Кўз фасли бўлганидан бу кезларда Шимронда ҳеч ким турмаслиги бизга маълум.

Шу заҳотиёқ Иффат оқсоч хотинга бирор баҳона билан оғойи Ф... уссалтана боғига киришни, Фаррухдан бирор хабар топишни буюрди. Оқсоч хотин бир оз ўйлагач, оғойи Ф... уссалтананинг боғига жўнади.

Йўлда у бошидаги қора чодрасини ва чолворини атайин чангга белаб олди. Боғ дарвозасини тақиллатганда, орадан бир неча дақиқа ўтказиб, боғбон чол дарвозадан бошини чиқариб:

— Нима ишингиз бор?— деб сўради.

— Амаки, мен бу ерлик эмасман,— дея шошиб-пишиб гап бошлади оқсоч халлослаган товуш билан.— Шимронга биринчи келишим. Бир хонимнинг оқсочиман. Хоним бугун Шимронга, қариндош беканикига «оши ришта»¹ хўрликка борамиз дедилар. Йўлда отлар роса чарчади, извошимиз Тадриж қишлоғига аранг етиб келди, юқорига яёв қўтарилмоқчи бўлдик. Қуриб кетгур чолвор мени жуда қийнади, тоғ остида бир харсанг устига ўтирдим-да, нафасимни сал ростлаб, хонимга етиб оларман деб ўйладим. Кейин хоним орқасидан увалло югурдим, қани тополсам. Силлам қуриди, бу ерда ҳеч кимни танимайман, жуда ташна бўлиб кетдим...

Боғбон уни ичкарига таклиф қилди.

Улар боғ йўлкасидан бориб, чап-томонга бурилишди. Боғдаги иморатлар кўринди. Оқсоч хотин очиқ

¹ Яхна қилиб тортиладиган угра ош.

деразалар ёнига тўшалган ўринда сочлари паришон, ранги жуда синиққан, деярли ҳаракатланмайдиган кўзлари ич-ичига ботиб кетган бир жувон ётганини кўрди. Унинг бош томонида кекса бир хотин у билан гаплашиб ўтирарди. Иффатнинг оқсочи сездирмасдан уларга яқин борди-да, аҳтиром билан:

— Салом!— деди.

Бемор хотиржамлик билан бошини ўгирди-ю, жилмайиб саломга алик олди. Шунда беморнинг ёнида ўтирган хотин:

— Хўш, бизда нима ишингиз бор?— деб савол берди ошиққан ҳолда.

Иффатнинг оқсочи — Шавкат энди жавоб беришга оғиз ростлаган эди, боғбон унинг учун жавоб қилиб қўя қолди:

— Дарвозани тақиллатишди. Анови оғо келдилармикин деган хаёлда тезда бориб эшикни очдим, қарасам, дарвоза олдида мана шу синглим турган экан. Бекасидан адашиб, ёлғиз қолипти. Болаларимнинг чувирлашини эшитиб, шу ерда одам бордир деган тусмол билан дарвозани қоқипти. Ердан сўраб келибди.

«Анови оғо келдилармикан» деб ўйлаб, чол боққа нотаниш оқсочни киритганини эшитган бемор хонимнинг чехрасидан сал ранжиганлик аломати сезилди. Лекин шу заҳотиёқ яна чиройи очилиб, меҳрибонлик билан жилмайиб:

— Қаёққа кетаётган эдилар?— деб сўради.

Асосий нарсани — бу ерга кимнингдир келишини кутаётганларини пайқаган Шавкат ўзича шундай деди: «Айни муддао. Энди у ёқ-бу ёқдан гаплашиб йигитнинг Шимронда туриш-турмаслиги, агар шу ерда бўлса, буларникига ҳар куни келиб турадими ёки шу кунгача ҳеч келгани йўқми эканини билиб оламан».

— Менинг бекам Аббосий хиёбонида яшайдилар. Узим бўлсам, қазвинликман, Теҳронга биринчи келишим...— деди.

Кейин боғбон чолга айтган гапларини қайтадан такрорлади.

Бемор хоним яна жилмайди:

— Ҳечқиси йўқ, хафа бўлма. Агар бекангни тополмасанг, мен сени шу бугуноқ шаҳарга жўнатиб юбораман,— деди.

Шу вақт бемор ёнидаги хизматкор хотин ўрнидан

туриб, бошқа хонага ўтди. Шавкат чинакамига гапга киришди:

— Хоним, нега бундай бемаврид вақтда боғда яшашсиз? Бунинг устига ёлғиз ҳаммисиз?— деб сўради.

— Тобим йўқ,— деди бечора жувон.— Докторлар шаҳардан ташқарида яшашимни маслаҳат бердилар. Лекин ота-онам тез-тез келиб хабар олиб туришади.

— Маъқул, маъқул,— деди Шавкат,— демак бугун ҳам уларнинг келишини кутаётган экансиз-да?

Беморнинг юзлари сал қизарди.

— Йўқ, бир қариндошимни бир неча кундан буён кутаман,— деди андишали оҳангда тутилиб-тутилиб.— Лекин шу кунгача келгани йўқ.

Шавкат Фаррухнинг бу ерга ҳали келмаганини англади.

Бир неча дақиқадан сўнг хизматкөр хотин биллур чилим кўтариб қайтиб келди. Шавкат чилим чекди.

Тўсатдан дарвоза тақиллаб қолди. Боғбон ирғиб туриб, дарвоза томон югурди. Бемор хоним қувониб, чеҳраси ёришиб кетди. Бироқ боғбон хафа ҳолда ёлғиз қайтиб келди. У Шавкатга яқин келиб секингина:

— Сизни сўраб келишипти,— деди.

Шавкат сохта севинч билан ўнқовсиз миннатдорчилик изҳор этиб, дарвоза томон жўнади.

Кўчада Иффат турарди. У юзидан пардани кўтарган, ранги паға бўлиб кетган эди. У хавотирланиб:

— Хўш, билдингми, шу ерда эканми ё йўқми?— деб сўради.

Шўрлик Иффат! Шу вазиятда «ҳа» дейилса ҳам, «йўқ» дейилса ҳам, барибир дардига дард қўшилади.

Лекин, ҳар ҳолда ижобий жавобга бардош этишнинг марта осон эди, шунинг учун у хушxabар эшитишга ошиқарди.

Афсуски, аини шундай ҳолларда ўта инсофсизлик қилувчи табиат Иффатни бу гал шу нисбий қувончдан ҳам маҳрум этди. Иффат ўзини ортиқ туголмади, бошини боғнинг кесак деворига тираб, ҳўнграб йиғлаб юборди.

Шавкат бекасини ўзлари тўхташган кичкина боғчага минг машаққат билан олиб борди-да, унга тасалли беришга уринди:

— Шунчалик умидсизликка тушишнинг нима ҳожати

бор? Ахир, ҳали ҳеч нарса маълум эмас-ку. Фаррух соғ-саломатдир, кутилмаган бирор воқеа юз берган бўлиши мумкин, холос...

Иффат юм-юм йиғлар экан, Шавкатдан нималар ҳақида гаплашганини, қандай қилиб ҳамма нарсани билиб олганини сўради. Шавкат у ердаги бемор хоним ҳам Фаррухни кутаётганлигини, лекин унинг ҳали келмаганини айтди.

Орадан икки соат ўтганда, Иффат яна ўз ётоғида қаттиқ иситмалаб ётарди. Унинг бошида отаси билан онаси ўтирарди. Иффат уларга Фаррухнинг ғойиб бўлганини сўзлаб берди, улар ҳам қизлари билан бирга қайғуришарди. Ота-она қизларининг аҳволини тушунарди. Улар, Фаррухни яхши, куёвликка муносиб йигит деб билишар, шунинг учун ҳам унга бўлган муҳаббати учун қиздан ўпкалай олмасдилар.

Иффатнинг касали бир неча ҳафтага чўзилди.

Шаҳло кўзлари доим эшикка термилди. У Фаррухни кутди, кейин умидсизликка тушди.

Иффатнинг иситмаси босилиб, заифлик бошланди. У кам гапирар, кўнгли ҳамиша ёлғизликни истарди. У эшиги пўртаҳол кўчати ўстирилган чоғроқ гулхона томонга очиладиган ўз хонасидаги креслода ғамгин хаёлларга берилиб, ҳаракатсиз ўтирарди.

У ҳамма вақт Фаррухнинг энагасини йўқлар, ундан бошқа ҳеч кимни кўришни истамасди. Иккиси узоқ вақт ўтиришар ва бу англашилмас жудолик аламида зор-зор йиғлашарди.

Иффат ўйин-кулги нималигини тамомила унутган эди. Ота-онасининг унга эр қилиш ҳақида гапиришга юраклари бетламасди, чунки шу хусусда қўрқа-писа илтимос қилгудай бўлсалар, Иффатнинг иситмаси қўзирди.

Шу аҳволда ҳам Иффат Маҳиннинг ҳоли не кечаётгани ва у Фаррухдан бирор дарак топдими, йўқми эканини билгиси келарди. Аммо Маҳиннинг ҳали ҳам бетоб ва Шимронда ётганидан бўлак хабар келмасди.

У Фаррухнинг отасидан хабар олдирди, энага биринчи вақтларда Фаррух отаси ҳақида кўрган-билганларини сўзлаб бериб турарди, лекин бу ҳам кўпга бормади: Фаррух тўсатдан ғойиб бўлганидан сўнг кўп ўтмай, унинг отаси ҳаёт билан видолашди.

Бир кун Иффатга Маҳиннинг вафот этгани хабарини келтиришди ва гап орасида:

— Оғойи Ф... уссалтананинг набираси бор,— дейишди.

Иффат бу Фаррухнинг ўғли эканлигини биларди. Энди у янги қайғуга ботди, тазин йиғлай бошлади. Ғалати жувон! Ҳозир у рақибасига аза тутарди.

Сўнг Иффатда Фаррухдан қолган шу жонли ёдгорликни кўриш, шу йўл билан бир оз таскин топиш фикри туғилди. «Буни қандай қилиш керак?»— деб ўз-ўзига савол берди у. Буларнинг оиласи билан оғойи Ф... уссалтана оиласи орасида доимий муносабат, алоқа йўқ эди. Лекин Иффат Фаррухнинг отаси вафот этган кунини Маликтож хоним билан танишганини эслади. Ҳозир Маҳин вафотидан сўнг Иффатнинг уларникига бориб, таъзия билдириши жуда ўришли эди.

Маҳин вафотининг тўртинчи кунини Иффат ёнига Шавкатни олиб, файтонда оғойи Ф... уссалтананинг уйига борди. Бошига зўр мусибат тушган бўлишига қарамай, Маликтож хоним Иффатни яхши қарши олди. Бебахт отанинг аянчли ҳолини кўрган Иффат Маҳин номини иложи борича камроқ тилга олиб, унга тасалли берадиган бир неча сўз айтди.

Иффатнинг ёқимли чеҳраси, ғамхўрлиги, бир боргина учрашган кишига шундай оғир кунда меҳр-шафқат кўрсатиб, унга ҳамдард бўлиб келиши Маликтож хонимга чуқур таъсир этди. Бетиним йиғидан кўзлари қизарган, шу қисқа муддат ичида қадди букчайиб, башарасини ажин босган Маликтож хоним Иффатга ҳозирги замон аёлларига ёт бўлган қадимий тамтароқли форс иборалари билан ўзининг беҳад миннатдорчилигини билдирди.

Бир оз ўтиргач, Иффат Маликтож хонимга энди тақдирга тан беришдан бошқа чора йўқ, ортиқча куйиниб ўзингизни адо қилманг, деган панд-насиҳат сўзларини айтди-да, кетиш учун қўзғалди. Маликтож хоним Иффатдан бундан кейин ҳам келиб туришни унутмаслигини илтимос қилди. Иффат бу илтимосга рози бўлгач, хайрлашдилар.

Шу ҳафтанинг ўзида Маликтож хоним Иффатларникига бориб келди. Бир ҳафта ўтгач, Иффат Маликтож хоним ҳолидан хабар олгани яна келди. Иффат фарзандидан жудо бўлган шўрлик онани овутиш учун турли хил воқеаларни ҳикоя қилиб берди.

Бора-бора булар орасида дўстлик вужудга келди, орадан сал фурсат ўтгач, Иффат билан ўтираркан, Маликтож хоним ўзи Маҳин ҳақида гап очди. У асл воқеани «бир оз бошқачароқ» тарзда, яъни Маҳиннинг эри бўлгани, лекин унинг тўйдан кейин кўп ўтмай, «исёнчилар»га қарши жангда ҳалок бўлгани, айрилиққа бардош беролмаган қизининг вафот этгани ва ундан бир ўғилча ёдгор қолгани ҳақида сўзлаб берди. Асл воқеадан хабардор бўлган Иффат унинг сўзини бўлмай, диққат билан тинглади ва чақалоқни кўриш истагини билдирди.

Маликтож хоним Ферузани чақирди. Феруза чақалоқни олиб келиб, Маликтож хонимнинг тиззасига қўйди.

Шу вақт ёш бўлса-да, эрининг ярамас чиққанлиги сабабли ундан ажралгани, ҳозир отасиникида яшаётгани тўғрисида сўзлаётган Иффат чақалоқни кўргач, ёш аёлларга хос меҳр билан унга талпинди. Маликтож хонимдан чақалоқни олиб, бағрига босди.

Иффатнинг қалби алланечук бўлиб кетди, у Фаррухни ўйлар экан, чақалоқнинг лабларидан тўйиб-тўйиб ўпди.

Ана шундан бери Иффат ва Маликтож хоним иккиси кўпинча бола боқиб ўтиришадиган бўлиб қолишди. Иффат ўз аҳволининг қанча оғир бўлишига қарамай, кўнгли синиқ бебахт Маликтож хонимни юпатишга, унга тасалли беришга уринарди.

Лекин унинг юпатишлари Маҳиндек кўзининг оқу қораси бўлган қизидан ажралиб, юрак бағри ўртанган муштипар онага тасалли бера олармиди?!

Соат сайин, дақиқа сайин Маликтож хонимнинг ғам-ғуссаси орта борди. У тамомила адоий тамом бўлган, юзларини босган ажин ёши қирқдан ўтмаган бу аёлни худди етмишга борган кампир суратига киритган эди.

Маликтож хонимнинг тинка-мадори қуриб бориб, ниҳоят касалга чалинди. У сурункасига иситмалар, тез-тез беҳуш бўлиб, алаҳлаб турарди. Маҳиннинг ўлими оғойи Ф... уссалтанани ҳам чуқур қайғуга солган бўлса-да, лекин у ҳали ҳам депутатликка сайланиш фикридан қайтмаган эди. У зўр бериб ҳаракат қиларди: гоҳ йирик савдогарникига, гоҳ журналист ёки заминдорникига югурарди, гоҳ керакли кишиларни уйига қай-

оғайма шўрваю бедана паловга таклиф этар, қиммат-баҳо шоллар, кийимликлар ваъда қилиб, уларнинг кўнглини овламоқчи бўларди.

У депутатлик ташвиши билан овора бўлиб, хотинининг соғлиғидан хабар олмасди.

Ниҳоят, Маҳини вафотидан тахминан бир йилдан сўнг оғойи Ф... уссалтана сайловлардан муваффақиятли ўтди ва парламент депутати бўлиш тараддудини кўра бошлади. Ҳамма газеталар унинг депутат бўлиб сайлангани ҳақида хабарлар босиб чиқардилар. Газеталардан бири оғойи Ф... уссалтана ҳақида жуда яхшилаб ёзди. Жумладан, газеталардан бири бизнинг «Муносиб ва мардонавор вакилларимиз» деган сарлавҳа остида бош мақола босди, бунда оғойи Ф... уссалтананинг йирик ҳарфлар билан ёзилган номи бир неча бор такрорланди; бошқа барча музофот ва вилоятларнинг аҳолисини ана шундай муносиб кишиларни сайлашга даъват этилди.

Кечқурун оғойи Ф... уссалтананинг ташқаридаги гулзори меҳмонлар билан лиқ тўлди. Газ билан ёнадиган катта осма чироқнинг шуъласи кўзларни қамаштирар, тўрдаги диванда бугунги тантананинг сабабчиси савлат тўкиб ўтирар, меҳмонлар чой, кофе, чилим билан сийланар эдилар. Пешиндан ярим кечагача оғойи Ф... уссалтана уйдан одам аримади, оқ ва қора салла ўраган, кулоҳ кийган, қорни катта, оқ соқоли кўксини қоплаган қариялар чой, кофе ичаркан, руҳонийларга хос иборалар билан депутатни табрик ва муборакбод қилар эдилар. Ғарбий Европа тақлидчилари ҳам келишиб, французчалаб табриклашарди.

Мана шу кунни кечаси оғойи Ф... уссалтана биринчи бор Маҳинни унутди. Лекин соат ўн бирга бориб, палов ейишдан умидини узган ҳаромтомоқ ланганбардорлар ночор хайрлашиб чиқиб кетишганида оғойи Ф... уссалтана ичкари кирди. Шунда у эшиклари гулхона томон очилган хонада аҳволи оғирлашиб, инқиллаб ётган хотинини кўрди-ю, бирдан Маҳинни эслади. У ўзига-ўзи: «Мана шундай кеча маросими деб, шу лаганбардорлар деб, мен Маҳинни нобуд қилдим!»— деди.

Шу вақт у худди сўроққа чақирилган жиноятчидек қалтираётганини сезди, ағдарилиб тушмаслик учун дарҳол хотинининг бош томонида тиз чўкди-да, чуқур хаёлга ботди.

Маликтож хонимнинг аҳволи тобора оғирлаша борди. Иффат ўзининг бетоблигига қарамай, деярли ҳар куни бу ерга келар, хонимнинг ҳолидан хабар оларди. Баъзан Фаррухнинг ўғлини Иффатларникига юборишарди.

Маҳиннинг вафотидан бир ярим йиллар чамаси кейин, куз кунларининг бирида қизининг доғи ҳасратида адо бўлган Маликтож хонимнинг жони узилди.

Ана шу кундан бошлаб оғойи Ф... уссалтана тамомила ўзгарди. Депутатликка бўлган ҳар қандай ҳавас, интилиши қолмади. Унинг бошини аллақандай даҳшатли фикрлар қамраб олди, бу фикрлар унга тинчлик бермай қўйди, айниқса, кечалари уни безовта қиладиган бўлди.

Фақат жажжи набирасини кўргандагина аҳволи руҳияси сал яхшиланар, лекин болага боққан сари яна қизи Маҳинни, унинг ҳасратида адо бўлган хотинини ўйлаб, изтиробга тушар эди.

Оғойи Ф... уссалтана энди «юксак» донраларда ва парламент мажлисларида кўринмасди. У деярли ҳеч ким билан учрашмасди.

Маликтож хонимнинг вафотидан кейин Иффатнинг ғам-ғуссаси янада ортди. Бахтининг очилишига умиди қолмади. Унга кўп кишилар «оғиз солган» бўлса-да, ҳеч қайсисига розилик бермади, чунки Фаррухни сира-сира унутолмасди.

Айни вақтда Фаррух тирикми, тирик бўлса, қаерда, ёки севгилиси каби бевақт ҳалок бўлганми экани ҳақида Иффат бирор аниқроқ маълумот ололмас эди.

Иффатнинг бирдан-бир овунчоғи, вақти чоғлиғи Фаррухнинг ўғли бўлиб қолди. Маҳиннинг энагаси болани Иффат олдига олиб келиб турар, у болани тиззасига ўтқазиб ўпиб, қўнғир сочларини силар экан, Фаррухни эслаб, йиғлар эди.

Одатдагидек, Иффат Фаррухнинг ўғлини кутиб ўтирган вақтда биз китобхон билан унинг уйига кирган эдик. Энага чақалоқни соат тўққизга етказиб келарди, бугун бўлса, кечикди, соат тўққиздан ошди.

Иффат дастлаб бунга унчалик эътибор бермади, аммо ярим соатдан ортиқроқ вақт ўтгач, хавотирланиб, энди телефон қилмоқчи эди, бирдан қувончга тўлган энага уйга шошиб кириб келди.

Иффат ташвишли ҳолда:

— Бола қани?— деб сўради.

Энига жилмайиб:

— Бугун унги яхшироқ жой топилди,— деди бамай-
лихотир.

— Очиқроқ гапирсанг-чи, нега болани олиб келма-
динг?— сўради ҳайрити энада эиёда бўлган Иффат.

— Вугун боли отасини учратиб, у билан кетди,— де-
ди энага.

Иффатга бу гаплар аллақандай тушунилмас ибора-
лардай эшитиларди. Ҳангу манг бўлиб қолган Иффат
энагадан нима воқеа юз берганини айтиб беришни та-
лаб қилди.

Кампир эса қувонч билан:

— Ҳа, бугун тунда унинг отаси келиб, болани олиб
кетди,— деди.

V боб

КИТОБХОНГА АВВАЛДАН ТАНИШ БУЛГАН БАЪЗИ КИШИЛАР

Қазаклар Техронга кирган, гўё улар шаҳарни ишғол
этган кунининг эртасига тўраларча: «Эй, одам башара
зотлар», деб камситилган халқни энди «худонинг марҳа-
мати» ва чет эллик хўжалар шафқати билан ашрофлар
қўлидан силаб-сийпаб бўшатиб юбориш зарур бўлиб
қолган куни, шу жоҳил халқ муқаррар уқубатли қисма-
ти олдида талвасага тушган ашрофларни, уларга қўшиб
охунд ва саидларни ҳам гирибонидан бўғиш мумкинли-
гини ниҳоят тушуниб етган куни, турли хил арзандалар,
муътабар амалдорлар, сиёсатнинг «с» ҳарфини ҳам ту-
шунмайдиган «сиёсий арбоблар» ва бошқа шу тоифа
кишилар бирин-кетин қамоқхонага «тўпланишаётган»
куни Дарвозайи Қазвин маҳалласининг «Идора нози-
ри» чорраҳасидаги кўк эшикли бир оддийгина уйда
қандайдир катта йиғин бўлаётган эди.

Бу ерга «ўрта» табақага мансуб турли одамлар тўп-
ланган эди. Уларнинг кўпчилиги Техроннинг «олифта»
ёшлари вакиллари ва давлат муассасалари хизматчи-
ларига ўхшарди. Лекин бу ерда савдогарлар табақа-
сидан бўлган кишилар, «оқ саллали»лар, эғнидаги кенг
ёқали сардоридан бўйинлари қилтириқдай чиқиб тур-
ган аллақандай шахслар ҳам бор эди. Бу ерга йиғилган
турли қиёфадаги одамларга разм солган киши уларнинг
нима мақсадда тўпланганини аниқлай олмасди.

Бу уйга келәтган одамларнинг кимлигини билмоқчи бўлган киши эшик ёнида туриб қуллуқ қилаётган қора кўз, қўнғир соч ёшгина хизматкор йигитчага эътибор қилмоғи даркор. У кираётганлар билан саломлашар экан:

— Марҳамат, тўғри иккинчи ҳовлига ўтсинлар, кейин чапга қайриладилар, марҳамат,— дерди тавозе билан. Қизиқ, кираётганларнинг баъзилари бу йигитча билан эскидан танишдек, унинг иякларини қитиқлаб ўтишарди.

— Аҳмад, ишларинг қалай, бизникилар тўпланиш-дими?

Аҳмад эса жилмайиб:

— Ҳа, ого, ҳаммалари келишган,— деб жавоб берарди.

Биринчи ҳовлига нисбатан анча кенг бўлган ичкари ҳовлининг чап томонида катта зал бор эди. Қиш кезлари совуқ бўлгани сабабли залнинг ровонлари ёпилганди. Ойнадан хона ичида икки даврага бўлиниб ўтирган одамлар кўринарди. Баъзан у ёки бу даврадан:

— Яна беш қирон, фақат беш қирон!— деган овозлар эшитилиб қоларди.

Баъзан меҳмонлардан бири ортиқча шовқин кўтарарди, шунда уй эгаси бўлмиш кўҳна армия офицери мундиридаги кенг елкали киши ётиғи билан тартибга чақирарди:

— Тақсирларим, ўйиннинг қонун-қондаси бор, ҳаддан ошиш ярамайди. Аввало, шовқин солиш ман этилади, қолаверса, бугунги кун хатарли. Мен сиздек дўстларимни ўзим ва хонадонимга иснод келтириш учун таклиф этганим йўқ,— дерди.

Шунда меҳмонлар орасида аллаким унга хайрихоҳлик билдирди:

— Ҳусайн амаки ҳақли. Ўйинда одоб сақла, шаҳзода!

Давранинг ҳар бирида саккизтадан одам бўлиб, тўпланганлар «мажлиси» энди бошланган эди. Мўътабар улфатлар ҳали чинакамга «жанг» бошлаганларича йўқ. Ҳатто кийим-бошларининг ҳам оҳори тўкилмаган. Бир неча соат ўтгач, кийим-бошлар тамоман бошқа тус олади. Ҳа, айтгандай, бундан бир соат муқаддам бошланган ўйин энди қизиб кетди. Ўйинчилар

чўнтагидан чиққан пуллар столга, ўйинчилар олдидаги кулоҳ ва саллаларга уйивла бошлади.

Давранинг бирида салла ўраган икки киши, яъни калта қора соқолли саид билан соқолларини хинага бўяган охунд¹, айтишларича, омади юришмайдиган қандайдир семиз бир киши, унинг ёнида, афтидан, ўта фирибгарлиги сезилиб турган қотма бир киши, сўнг қўлларига феруза ва олмос кўзли узуклар таққан, Ғарбий Европага тақлид қилувчи олифта йигитча, мўйна қалпоқ кийган, қорачадан келган чўтир бир киши ва ниҳоят оқ саллали бир савдогар ўтирарди.

Оқ салла ўраган бўяма соқол охунд:

— Банк меники! Банкда беш қирон бор! Фақат беш қирон!— деди.

Тиз чўкиб ўтирган одамнинг рўпарасидаги мўйна қалпоқ кийган қорача киши ўлимтикка човут солган кузғунга ўхшаб, қарталар турган қутига интилди.

Шу маҳал даврада ўтирганлардан аллаким оёғининг учи билан охунднинг елкасига аста туртди. Буни пайқаб қолган оғойи шайх қорачадан келган улфатига:

— Ҳазрат, тўйчиқни ўтказсалар бўларди,— деди.

«Ҳазрат» деб аталган мўйна қалпоқ кийган, қорачадан келган киши бўлса:— Нега сен қарта олмаяпсан? Нима бўлаётганини тушунмай қолдим-ку,— деди. Яна охунднинг елкасига туртишди. Шунда охунд ўзини туртган дўстига қайрилиб қаради-да:

— Нега турткилайсан, азизим?— деди,— уяладиган жойимиз йўқ. Биз тўғрисиини айтаверамиз. Ҳазрат, жонгинам, қарталарнинг бирортасини боса олмадинг, пулларни столга қўйиб қўйсанг, аини муддао бўларди. Кел, пулларни қалаштирайлик — тўйчиқни ўтказиб юборамиз.

Н... ушшариа² унвонли ва ўзини энг зўр шарият пешволаридан деб керилган охунд шу сўзларни айтар экан, диндорлар тасбиҳ, муҳр ва Қарбалодан келтирилган бир парча кесак сақланади деб ўйлайдиган ҳамёнини чўнтагидан чиқарди-да, ундан йигирма беш туман олиб, давра ўртасига ташлади.

Шунда шаҳзода:

— Шунақа гапларнинг нима ҳожати бор! Ахир, мен

¹ Охунд — руҳоний.

² ... ушшариа — Эрдн шоҳлиги даврида дин ва шарият арбобларига бериладиган нуфузли унвон. (Ред.)

сенга ишонаман-ку, тавба...— деди ўзича гудирлаб ва чўнтагидан эллик туманли кредит қоғозни чиқариб, охунд ташлаган пуллар устига ирғитди. Утирганларнинг кўзлари ўйнаб кетди, ҳамма қоғоз пулларга тикилиб қолди.

Яна қарта сузила бошлади. Шаҳзода қарта сўради. Охунд чаққонлик билан қарта олиб, шу заҳотиёқ:

— Шаҳзода, балки қартани айирбошлашни истарсан?!— деб сўради.

— Қанчага?— унча ишонқирамай сўради шаҳзода.

— Етти туман!

Шаҳзода кифтини қисиб, шайхни қизиштирди:

— Бўпти, қарта ол,— деди.

Шайх икки дақиқа чамаси қарталарни ғалати қилиб роса чийлагандан кейин, ниҳоят, қарталарни очдилар. Баб-баравар — иккиликдан иккита чиқди. Шаҳзода икки бор қарта олиб, бир олтилик ва бир учликни тўққиз қилиб, шайх олдига ташлади.

Охунднинг кути ўчди.

Имомзодалар чеккан азоб-уқубатлар ҳақида жазавага тушиб, ўқиб топилган тўрт туман пул бой берилган эди!

Ўйин тобора қизий бошлади. Шаҳзода гоҳ ютар, гоҳ ютқизарди. Шомга яқин банк яна шайх қўлига ўтди. Ундан баланд келаётган шериги — шаҳзода қаторасига уч марта ютқизди. Тўртинчи бор шаҳзода ютишга аҳд қилиб ўйнади, лекин яна ютқизди. Шаҳзода бешинчи марта қартага қўл узатди. Лекин бу сафар охунд бировнинг турткисини кутмасдан:

— Шаҳзода, жонгинам, тўй нима бўлади? Тўй?..— деди.

Энди шаҳзоданинг авзойи ўзгарди, қизариб кетди. Қўлини чўнтагига солди-да, гўё худди шу онда пайқаб қолгандай:

— Пул тамом бўлибди. Ҳа, майли, қартани сузавер, пулга одам юбораман,— деди.

Оғойи шайх эса айни дақиқада нақд пул зарур бўлгандек:

— Эй, йўқ, азиз шаҳзодам пул йўқми — қўлингни торт. Энди бошқалар ўйнасин,— деди.

Шаҳзоданинг зардаси қайнаб кетди:

— Сенга нима бўлди, менга ишонмайсанми?— деб сўради у.— Мен қарзни ўз вақтида тўлаб турамай чоғи?

Шу вақт «оқ саллади» киши:

— Йўқ, шаҳзода, бунақа гапни гапирманг, ёлгон гапиряпсиз,— деди.

Шаҳзода яна қизариб кетди. Яна бир қадаҳ ароқ сўраб ичди-да:

— Хўш, менга қарта сузмайсанми?— деб сўради.

Оғойи шайх дарҳол ҳамма пулни чўнтакка уриб:

— Шаҳзода, нега шунчалик қистаб туриб олдинг!— деди-да, кейин илова қилди:— Ундай бўлса, сени ранжитмаслик учун мен банкачиликдан воз кечаман,— деди.

Шунда шаҳзода қарта қутигасини олдиға тортиб олиб:

— Банк меники. Банкда беш туман бор,— деди.

Лекин ҳарифлардан бирор киши ҳам жавоб бермади.

Шунда шаҳзода уй эгасига мурожаат қилди:

— Қани, бу ёққа беш туман чўз.

Уй эгаси ғамгинлик билан бош чайқади:

— Шаҳзода, ўзинг кўринг турибсан, ўйин бошланганидан бери қўлимга қора чақа ҳам тушгани йўқ. Агар ёнимда бўлганда, жоним билан берардим.

Шаҳзода аччиқланиб:

— Майли! Омадим келмади. Узларинг ўйнанглар,— деди-да, ўрнидан турди.

Шаҳзода тарёк манқали турган хонанинг бурчагига борди. У ерда Аҳмад деган дастёр бола билан аллақандай малла соқол киши бор эди, улардан бири тарёк пишитар, иккинчиси уни чекар эди. Малла соқол киши Аҳмадга ҳирс билан боқар, Аҳмад бўлса, Янги маҳаллада яшовчи хонимларга хос нозу карашмалар билан унинг қонини кўпиртирарди. Бу хонага кириш билан «улфатлар»дан бирини ҳузур-ҳаловатдан маҳрум этганига шаҳзоданинг фаҳм-фаросати етмади.

Аҳмаднинг хулқ-атвори уй эгасини диди ва «истеъдодидан» далолат берарди. Нашабангилик, қиморбозлик, баччабозлик каби барча ишларга омилкор бўлган соҳиби хона гўё табиат томонидан атайин Эрон парламенти депутати ролини ўйнаш учун яратилганга ўхшарди.

Малла соқол тарёк чекиб бўлгач, шаҳзода Аҳмадга «менга ҳам тарёк тайёрлаб кел», деб буюрди-да, қарта ўйнаётганларга қараб ёнбошлади.

Шаҳзодага навбат етди, у лабларини чилим найнга

босаркан, очкўзлик билан тарёк дудини ичига юта бошлади. Ҳар тортишда у ўзини гўё ғам-аламидан фориг бўлаётгандек ҳис қилса-да, лекин бу гал тарёк чекишдан аввалгидай ҳузур-ҳаловат топа олмасди.

— Маҳаллаиғизда нозанинлар топиладими?— сўради шаҳзода Аҳмаддан.

Фикри-ёди беш туман ишлаб олиш бўлган Аҳмад, қош қўяман деб, кўз чиқариш қабилида бирор нарса айтиб юбориб, шаҳзоданинг дидини билмай унинг аччиғини чиқармайини деб, шундай жавоб берди:

— Бизнинг маҳалла ҳақида суриштиришнинг ўрни йўқ, оғо, бу ер жаннатнинг худди ўзи. Кўнглингиз қапақасини хоҳласа, шунақаси топилади. Шу кичкинагина маҳаллада қанақа хотинга майлингиз бўлса, шунақаси бор-да. Бунинг сирини билиш учун атайлаб бир куни боққолдан сўрадим. «Бунинг ҳикмати сувда, шу ернинг сувидан ичган хотин-қизларнинг ҳаммаси жуда дилрабо бўлиб кетадилар», дейди.

Шаҳзода Аҳмаднинг сўзларига қулоқ солмаётганлиги яққол сезилиб турарди. Уни Аҳмад таърифлаётган «дилраболар» эмас, балки шу дақиқада сиймоси кўз олдида жйваланаётган бир аёлгина қизиқтирарди.

Эшик очилиб, икки янги меҳмон — Али Ризоҳон билан Али Ашрафхон кириб келишди. Қиморбозлар хурсанд бўлиб кетишди.

Уларнинг атрофида ўтирган «чўталчилар» ҳам руҳланиб кетишди:

— Омадлилар келишди, худога шукур, энди иш юришади,— дейишди.

Ҳамма ўзига қайноқроқ чой буюрди.

— Қандай янгиликлар бор?— деб сўради аллаким.

— Қанақанги янгиликлар бўларди,— деди оға-инилардан бири.— Қамашлар ҳамон давом этапти. Ҳозиргина шаҳзода К.ни қамадилар.

Шу маҳал мириқиб тарёк тортаётган бизнинг ёш шаҳзода «шаҳзода К.» номини эшитиб, чилимни четга сурди:

— Узи нима гап? Отамни қамашдимми?— деб сўради. Лекин қиёфасидан унча ташвишлангани сезилмас, ҳатто сўраётганида ҳам овозидан кўнглидагидек иш бўлганлиги англашилиб турарди. Шаҳзода яна чилимга қўл чўзди.

Уни кўрган оға-инилар баб-баравар:

— Ия, шаҳзодами? Сиз шу ердамисиз!— деб хитоб қилишди.

— Ҳазрати шаҳзода уччига чиққан қартабоз,— деб сўзга аралашди уй эгаси.— Илгарилари бизникда бўлмаганлар, лекин бугун мен бу кишини атайлаб таклиф қилдим.

Али Ашрафхон шаҳзодага қўл чўзар экан:

— Нима ишлар қилиб юрибсан? Демак, уйланмабсан-да, а?— деб, у ҳам манқал ёнида тиз чўкди.

— Аввало менга айт-чи, отамни қамаганлари ростми?

— Бахтга қарши, отангни шахсан танитайман,— деди Али Ашрафхон,— лекин ҳозир Қазвин хиёбонидан ўтган файтонни кўрдим. Унинг кетидан икки отлиқ казак йўртиб борарди. Мен йўловчилардан кимни олиб кетаётганларини сўраганимда, «шаҳзода К.»ни дейишди.

Шаҳзода дурустроқ ишонч ҳосил қилиш учун:

— Қиёфаси қанақа эди?— деб сўради.

— Қорни катта, мўйлови оқ, соқоллари қирилган. Катта кулоҳ ва қора пальто кийган.

Шаҳзода ўзини қаттиқ ташвишлангандай кўрсатиб:

— Айтганинг худди отамнинг белгилари. Энди нима қилдим-а?— деди.

— Нима ҳам қила олардингиз,— деди дарҳол уй эгаси,— казаклар билан жанг қилгани бормайсиз-ку, ахир, кутинг. Сизнинг отангизга ўхшаш зотларни улар ҳеч нарса қилиша олмайди. У киши эртага эрталаб яна уйда бўладилар.

Шаҳзода К.нинг қамоққа олиниши бу ерда ёш шаҳзодага бўлган муносабатда дарҳол сезилди. Қиморхона эгаси ёш шаҳзоданинг энди ота ўрнида мустақил иш кўрадиган бўлиб қолишини таҳмин қилиб, агар тилхат ёзса, унга пул қарз беришга жазм қилди. У шаҳзоданинг ёнига келиб, секингина:

— Шаҳзодажон, лутфан мени афв этасиз... Боя менда пул йўқ эди. Энди ўйин анча қизий бошлади, мен сизга йигирма туман қарз бериб туришим мумкин. Лекин, сиз менга кичкинагина хатча, атиги икки оғиз сўз битилган қоғозча берасиз, марҳамат, шунчаки бир хотира учун-да...

Шаҳзода мамнун бўлди.

— Албатта, албатта,— деди у.

Ёнидаги хонага ўтиб тилхат ёзишга киришди, пул суммасига келганда уй эгасига қаради:

— Неча пул ёзай?

Уй эгаси ночорлигини ифодалаш учун пешонасини тириштирди.

— Қанча олмоқчисиз?

Шаҳзода ўттиз туман ёзди-да, йигирма туманни олиб, қиморбозлар ёнига югурди.

— Мен ҳам, мен ҳам тикаман. Менга қарта беринглар.

У яна ўйинга киришиб кетди. Гоҳ ютқазар, гоҳ ютарди. Уйин давом этарди. Али Ашрафхон гоҳ тарёк чекар, гоҳ қимор ўйнардди. Акаси бўлса, ўйнаб-ўйнаб қарзга ботиб қолганди. Аҳён-аҳёнда у шаҳзода..., уд-давла... ва бошқаларнинг қамалганларини ўйлаб, эти жимирлаб кетарди.

Соат бешга бориб, кўп қиморбозларнинг мадори қуригач, ўйин бузилди. Мадори қуриганлар орасида бизнинг шаҳзода Сиёвуш Мирзо ҳам бор эди.

У яна ғамгин бўлиб, Али Ашрафхон ёнига келди-да, иккаласи янгидан пишитилган тарёкни мириқиб чекишди. Шундан сўнг шаҳзода оға-инилар билан бирга қиморхонадан чиқди.

Бу кеча Али Ризохон ютган эди. Аммо пихини ёрган туллак қиморбоз бўлгани учун ютолганим йўқ, бор буд-шудимни бой бердим деб қасам ичарди. Тажрибали қиморбоз унинг ёлгон гапираётганлигини, аслида эса, бирини ўн қилиб олганини дарҳол пайқарди.

Улар шаҳарнинг турли томонида туришарди. Шунга кўра хайрлашиб, ҳар ким ўз уйига йўл олди. Китобхоннинг ижозати билан биз Сиёвуш ва Али Ризохонни ўз ҳолига қўйиб, Али Ашрафхон қандай ҳодисага дуч келишини томоша қиламиз.

Саҳар. Соат олтилар чамаси, тсварак-атроф ҳали қоронғилик қучоғида, бинобарин, извошларини мусодара қилинишидан хавфсираган киракашлар бемаҳалда кўчага чиқишга қўрқадиган маҳалда файтон топишга умид боғлаш мушкул эди. Али Ашрафхон уйига яёв жўнади.

Ҳали ҳарбий ҳолат эълон қилинмагани учун уни бу кеча ҳеч ким тўхтатмади, у чорак кам бир соатдан кейин уйига етиб борди. Али Ашрафхон тамоман хотир-

жам кўринарди, лекин уйининг ёнгинасида казак турганини кўриб, ҳайрон қолди. У мансабдорларнинг қамоққа олинаётганлигини эшитган эди-ю, лекин улар атрофида гирдикапалак бўладиган сарқитхўрлар ҳам қамалаётганини эшитмаганди. Шунга кўра, у ўзича казак адашиб бу ерда тургандир ёки шаҳар соқчиларидандир деб ўйлаб, хотиржам эшикка яқинлашди. Шунда казак дарҳол олдинга чиқиб:

— Оғо, тезроқ кириб, оғойи поручик сизни анчадан бери кутиб турибдилар,— деди.

Али Ашрафхон:

— Қандай поручик? Менда нима иши бор экан? Ажабо, ҳозир одам қабул қиладиган вақтми?— деб сўради.

Аммо уй эшиги очиқлигини кўриб ва казак қўлидаги милтиқ ўқидан осонликча қутулишга кўзи етмагач, ҳовлига кирди.

Ташқаридаги меҳмонхонада чироқ ёниқ эди. У зудлик билан ўз хонасига бориб эшикни ланг очди-ю, хонада у ёқдан-бу ёққа ўйчан юрган офицерни кўрди. Оёқ товушини эшитган офицер унга ўгирилди.

Али Ашрафхоннинг миясидан бир зумда бамисоли қуюндай тезлик билан мингларча фикрлар ўтди. Қўрқанидан нафаси ичига тушиб кетган Али Ашрафхон аранг:

— Эй, сизмисиз?— деди гўлдираб, титроқ овозда.

Офицер ҳарбийларга хос оҳангда:

— Худди шундай!— деб жавоб берди.

VI боб

СЕВГИ АСИР ЭТМАГАН КИМ БОР?

Ёнидаги эллик туманни, аниқроғи, Муҳаммад Тақи воситасида эрталаб аллофдан қарзга олган пулни ва қиморхона эгаси берган йигирма туманни — жами стмиш туманни ютқазиб қўйган Сиёвуш Мирзо уйига судралиб борарди. У ниҳоятда ғамгин эди.

Айтгандай, энди у камдан-кам хурсанд бўларди. У илгариги бардам, қувноқ Сиёвуш эмасди. Кейинги тўрт йил мобайнида у анча ўзгариб кетди. Лекин, бундан бир йил муқаддам рўй берган воқеа унга айниқса қаттиқ таъсир этди, унинг тушунча ва одатларини ўзгартиб

юборди. Оламдаги барча мавжудотни тиз чуқтиришга қодир бўлган буюк куч Сиёвушни ҳам бўйин эгишга мажбур қилди. Энди у Шаний ва Мухторуддавла хиёбонларидаги «кўнгил очар» уйларнинг ҳозир-нозирларидан эмас, «анандақа» хотинларни ахтариб юрмасди. Ғам-аламдан халос бўлишни йстаган чоғларда тарёк чекар ва гоҳо қарта ўйнарди.

Отаси шаҳзода К.нинг мол-мулкининг кун сайин баракаси учиб борарди. Эндиликда шаҳзода К. ҳатто вилоят ҳокими лавозимини эгаллашдан ҳам умидини узди. Нега десангиз, барча газеталар уни амалдор бўлишга номуносиб бўлган «чирик» эски тартиб тўралари тўдасига мансуб киши деб жар солдилар. Газеталар ҳозир ашрофликка буржуа партиясига хос хийла-найранглар ёхуд медицина практикаси воситаси билан етишган «янгидавр» ашрофларига ҳокимлик лавозимларини олиб беришга ҳаракат қилардилар.

Ёзни оромбахш Шимронда, қишни ўзининг жозибали шаҳар боғида роҳат-фароғатда ўтказишга одатланган шаҳзода учун энди ҳаётини бошқа изга солиш ниҳоятда мушкул экани ўз-ўзидан маълум. Шунинг учун ҳам у тинмай курашди, режалар тузди. Уғлини Маҳинга уйлантириш билан орзусига етмоқчи бўлди, бироқ Маҳин тўсатдан вафот этди, бинобарин, унинг умидлари пучга чиқди. Шундан кейин шаҳзода ён атрофни қанча қидирмасин, Маҳиндек мол-мулкка эга бўлган бирорта муносиб келин топа олмади.

Сиёвушга келганда, Маҳиннинг ўлими аввалбошда унга ҳеч қандай таъсир этмади, у кайф-сафо билан овора бўлиб, Маҳиннинг ўлими ҳақида ўйлашга вақт ҳам топмади.

Лекин, кейинчалик ота-она эс-ҳушингни йиғ, ўзингни дурустроқ тут, «кўрпангга қараб оёқ узат» деб очиқдан-очиқ жаврай бошлашганидан кейингина Сиёвуш Маҳиннинг ўлиmidан нечоғлик «зиён» кўрганига ақли етди. Аммо, у бўш келмади, ота-онасидан «ўз» улушини, ҳатто укаси ва синглисининг ҳақини ҳам қисташга киришди. Лекин, ниҳоят, отасининг аҳволи танг бўлиб қолганини англади.

Энди у ёнида «ортиқча» пул бўлмагани туфайли бошқача ҳаёт кечира бошлади: кечалари соат учда қорача хоним уйига қадам ранжида қилмас, саҳар соат бешда Дарвозайи Давлатдаги шаробфурушни уйғотиб, айтган

баҳосига ичкилик олмас, «Форсиён» магазинида «нозанинлар»га ўн беш туман турадиган «амиркон туфлилар торттиқ қилмас эди. У энди нишхўрд, нобоп хотинлар билан айш-ишрат қилар, кейин бу «хузур-ҳаловат»нинг азобини тортар эди. Эски дўстлари билан ҳам кам учрашадиган бўлиб қолди.

Маҳин вафотидан икки йилча кейин, иттифоқо, Сиёвуш ўзининг икки-учта оғайнилари билан айлангани бозорга чиқди. Бу кун сафар ойининг йигирма саккизи бўлиб, «Наҳл»¹ маросими бўлаётган кун эди. Албатта, уларнинг мақсади эл қатори мотам маросимида қатнашиш эмас, балки оломон орасида кезиб, ёш қизчаларни «овлаш» ёки бирор нозаниннинг тузоғига илиниш эди.

Улар кўчаларни изгиб, Шамсул-имора минораси остида тўхтадилар. Назмиянинг фармонида кўра, хотин-қизлар фақат миноранинг рўбарўсида тўпланишлари мумкин эди. Қора чодра ёпинган хотин-халажлар шу қадар кўп тўпланган эдики, бозордан то Тўпхона майдонига қадар бўлган ерга гўё чойшаб тўшалганга ўхшарди. Маросим кечикди. Узоқ кутавериш толиққан баъзи аёллар ерга ўтириб, топганларини тамадди қила бошладилар. Баъзилар ўзларини тамоман асоратга солиб, фақат шу кўча томошаси, яъни лойга ботиб, бир неча соатлаб қаққайиб туриш ҳамда шилқим йигитлар ва ярамас хотинларнинг бешарм сўзларини эшитишдай арзимас ҳуқуқни берган эркак зотини қарғар эдилар.

Оҳори тўкилмаган ялтироқ атлас ёки эскириб, ранги айниб кетган, аммо илгариги башанглигидан нимадир сақланиб қолган чодра ёпинган маълум тоифадаги бир гуруҳ хотинлар тап тортмай, баланд овозда қалтир жумлалар, одобсиз сўзлар гапиришарди.

Бири ёнида турган аёлнинг тирсагига туртарди:

— Қара, қара... Ҳасанни кўряпсанми?

Иккинчиси зардаси қайнаб дерди:

— Ноиб Фахрийнинг димоғи кўтарилиб кетганини қара-я!

Учинчиси, тартибни кузатиб юрган полициячидан тап тортмай, ўтиб бораётган полиция офицерини овозини барала қўйиб чақирди:

¹ Наҳл — Эронда имом Ҳусайннинг ҳалок бўлиши хотирасига бағишланиб муҳаррам ва сафар ойларида ўтказиладиган мотам маросими.

— Хусайн, ҳой Хусайн! Бугун менинг уйимга келасанми? Айт, келасанми?

Хижолатда қолган офицер қизариб:

— Мени шарманда қилмагин,— деди.

Қанча пичирлашиб гапиришмасин, офицерларга қарши бирор ғарази бўлган, уларни айблашга баҳона ахтарган ишқибозлар қулоқларини динг қилиб, шундай сўзларни эшитиб оларди.

Сиёвуш майдоннинг бериги томонида туриб, кўз узмасдан аёлларга тикиларди. Бирдан у олдинги қатордаги хотинлар орасида ниқобини кўтариб, юзини деярли очиб турган ўн етти-ўн саккиз ёшлардаги бир қизни кўриб қолди.

Аввало у қизга унча эътибор бермади. Фақат ёнидаги ҳамроҳига:

— Қарагин, анча дурустгина қизга ўхшайди-а!— деди.

Лекин, шу заҳотиёқ айтган гапидан ўкинди шекилли, ҳамроҳининг диққатини бошқа бир хотинга — заъфар ранг кўйлак кийган, «суюқоёқ» хотинга жалб этишга уринди.

— Қара, қара, ҳов ана Азиз... Сен Қора... нинг уйдан қаёққа кўчиб ўтганини билмоқчи эдинг, чоғи?

Ҳамроҳи ўша томонга ўгирилиб:

— Ҳа, ҳа, ҳозир унинг қаерда яшашини албатта, билишим керак,— деди.

Сиёвуш бўлса яна аввалги қизга тикила бошлади. Қиз унга бениҳоя гўзал кўринди. Шу топда югуриб бориб, қизнинг қора шаҳло кўзларидан ўпиб олгиси келди. Лекин, бахтга қарши, ундай қилиб бўлмасди, назмининг фармонига биноан эрларнинг ҳатто хотинлар турган жой яқинидан ўтишлари ҳам тақиқланган эди.

Қиз ҳақиқатан ҳам жуда дилрабо эди.

Маъно ёғилиб турган меҳрибон шаҳло кўзлари, носик юпқа лаблари, қайрилма қоп-қора қошлари, алифдай тик бежирим бурни ва қалдирғочнинг қанотидай қора ва жилодор сочлари билан бу мавзун қомат, носик қиз ниҳоятда латофатли эди. Юзи ва қўллари оппоқ, тани буғдойрангроқ бўлиб, у ҳақиқий шарқ гўзали эди.

Маҳлиё бўлиб қолган шаҳзода ундан кўз узолмасди. Қиз эса, одатдагича, дуч келган одамга қарагандек, йингитга атиги бир боқди-ю. қайтиб қарамади. Бу билан

қиз, сен ҳам кўчада учрайдиган ҳамма йигитларнинг бирисан, дегандай бўлди.

Халойиқ жазирама офтобда икки соатдан бери Чаламайдон томондан келадиган «Наҳл» маросимини кутарди. Ниҳоят, соат учларга яқин узоқдан қарнай товуши эшитилиб, бозор томондан маросим кўринди, ашрофлардан олинган отлар оломон олдидан ўйноқлаб ўта бошлади.

Буларнинг халққа нима кераги бор экан, майли, буни халқнинг ўзи биледи, мен бир нарса демайман. Зарури бўлмаса шундай жазирамада куйиб, соатлаб маросим кутишармиди?!

Маросим яқинлашгунча шаҳзода беихтиёр юзини очиб турган қиздан кўз олмади. Маросимнинг тантанавор қисми—«ноғора», яъни тарихчилар таъбирича, Қарбало фожиасида қатнашган туя минган дўмбирачи ва созандалар ёки найза кўтарган араблар тўдаси ўтаётганда қиз кўринмай қолди. Шунда Сиёвушнинг фигони фалакка чиқди.

Кутиш, сабр қилишдан бошқа чора йўқ. Бунинг устига маросим, ўчакишгандек, тез ўта қолмади. Дарвоқе, бунчалик ҳашамат, тантана халқ олдида атайин намоёншкорона ўтказилар ва бунинг эвазига шарият пешволари—«қорни катталар» ва «замона зўравонлари»дан мўмай инъомлар, қимматбаҳо сарполар олардилар. Маросимнинг имиллаши томошабин бўлиб келган оломоннинг зардасинигина қайнатарди, холос.

Сиёвуш тоқатсизланиб депсинар, лекин мутаассиблардан қўрққанидан маросимнинг кечикиши борасида бирор гап айтишга ботинолмасди. Бу қиз «учинчи табақа»га мансуб бўлса керак, деб ўйлади Сиёвуш. У ўзича: «Бу бирор кавушдўз ёки новвойнинг қизидир», деб қўйди. Қизнинг бошига ёпинган чодраси нимдош бўлиб, ранги айниб кетган, хол-хол гулли кўйлаги оддий майинг читдан тикилганди. Оёғидаги туфлисини теҳрон косиб тиккан, кулранг, дағал пайпоғини ҳам маҳаллий ҳунармандлар тўқигани сезилиб турарди.

Шаҳзода қизни кўрган заҳотиёқ уни қўлга туширишим керак, деди ўзича. Қарз-қавола кўтариб бўлса ҳам шу камбағал қиз кўнглини овлаб, ўзиники қилиб олиш осондек туюлди.

Лекин қизиги шундаки, шаҳзоданинг ўзига маъқул тушган хотинни қўлга киритиш учун ҳар қандай қабиҳ

қийлаларни ишга солиш фикрини қилганида сира-сира жиз этмайдиган юраги бу қизни ўйлаганида асов отдай типирчиларди.

Бу қизнинг қаерда туришини ниҳоятда билгиси келди. Лекин, чўқморлар билан қуроолланган полициячилар, мутаассиб оломон олдида қиз билан сўзлашиб бўлмас эди. Оломон кофир ҳисоблар, полициячилар эса маҳкамага олиб кетарди. То отаси бу ишдан хабардор бўлиб, уни бўшатиб олгунча қамоқхонада ётишга мажбур бўларди. Хотин-халаж орасида ўралашиб юрган анови офицерчанинг терговига тушиб қолиш ҳам мумкин.

Эҳтимолки, у қиз билан гаплашаман дейиш бефойдадир, балки қиз унинг саволига жавоб беришни ҳам истамас?!

Шу пайт маросимнинг бошқарувчилари — Машадий Али қандолатчи билан Ҳожи Ҳасан аллоф ўртасида ихтилоф чиқди: «Носирия хиёбонига бурилишда кимнинг байроғи олдинда бориши керак? Чаламайдонникими ёки растабозорникими? Даҳанаки жанг бўлди ва маросим иккига бўлинди. Анчадан буён маросим тугашини, тезроқ уйга бориб тамадди қилишни орзиқиб кутиб турган бир тўда томошабин бирдан саф узилган ердан ўтиб, қарши томонга ёпирилди. Шунда оломон шаҳзодани ҳам қаршидаги аёллар ёнига суриб олиб бориб қўйди.

Шу топда қиз ёнида турган кампирга:

— Шоҳбожи, қайтишда яхшиси кўнқада қайта қолайлик, бу ердан Тақихон кўчасигача олам-жаҳон йўл,— деди.

Шаҳзода кампирнинг жавобини эшитмоқчи бўлиб турганида полициячининг:

— Ого, ого, қани бир ўнг томонга ўтиб олинг-чи!— деган ҳайқириги эшитилди.

Шаҳзода орқага тисланди. Шу маҳал маросимнинг ажраб қолган қисми бозорнинг тими остидан чиқиб, хиёбонга бурила бошлади. Тўда ўтиб бўлганига қадар шаҳзода шу ерда кутиб турди, кейин Шамсул-имора остидаги аввалги жойига хурсанд бўлиб қайтиб келди, чунки қизнинг қаерда туришини билиб олган эди.

Маросим охирлаб қолди, Али тоға Биби Фотиманинг безатилган «ҳажла»си — никоҳ аравасини Шамсул-имора майдони атрофидан бир неча бор айлантирди. Бу билан у кимда-ким кушойиши көр тиласа, «ҳажла» ва унинг чироқларига топиниши керак эканини, шунда

ихлосманд одамларнинг барча орзулари ушалишини эсла-
тиб ўтди. Халойиқ тарқала бошлади.

Сиёвушнинг жўралари кетмоқчи бўлишди. Шунда
Сиёвуш улар билан қайтолмаслигини айтиб хайрлаш-
ди-да, шу заҳотиёқ хотинлар турган томонга югурди.
Бироқ, қиз йўқ эди. Чор атрофга қанча қарамасин,
фойдаси йўқ. Ҳамма ёқда бошига чодра ёпиниб, бетига
чашмбанд тутган аёллар, улар орасидан ўзини қизиқ-
тирган қизни таниб олишнинг иложи йўқ эди. Лекин,
у умидсизланмади. Сабри чидамай, тоқатсизланиб, кў-
чанинг бу бошидан у бошига бориб келди. Эркакларни
ўнг томондан юришга мажбур этган полициячилар унга
халақит берардилар. Қиздан ному нишон йўқ эди. Шаҳ-
зоданинг аччиғи келди, лекин бундан фойда йўқлигини
тушуниб, хафа бўлиб кетди. Қиз билан кампирнинг кўн-
кага тушмоқчи бўлганини эслаб, вагонга югурди. Вагон
лиқ тўла, чиқиш мумкин эмасди. Сиёвуш одамларни
туртиб-суртиб, бир амаллаб вагон зинасига оёқ қўйиб
олди. Чорак соатдан кейин Тақихон кўчасига етиб, ва-
гондан сакраб тушди-да, кўчанинг оғзида кута бош-
лади.

Аёллар тўда-тўда бўлиб, маросимдан қайтишарди.
Шаҳзода: «Улар ҳозир келиб қолиши керак», дерди
ўзича.

Унинг бояғи қизни жуда кўргиси келарди. Шу вақт-
гача унда бундай ҳис-туйғу бўлмаганди, тўсатдан бунча-
лик «ошиқи шайдо бўлиб қолиш»ни эса, хаёлига ҳам
келтирмас эди.

Ўз ҳаётида, яъни хотин-қизларга майл уйғонганидан
буён у кўп хотинларни кўрди, уларнинг орасида гўзал-
лари ҳам кўп эди, лекин ҳеч қачон у бу қизни кўрган-
дагидек ҳаяжонга тушмаганди.

У вақт ўтганини ҳам сезмай, ғайри шуурий равишда
чорраҳада ўткинчиларни кузатиб, икки соатча қаққайиб
турди.

Кўча ҳаракати асли ҳолига тушганига ҳам бир ярим
соатча бўлди. Йўловчилар тайсаллаб қолди. Лекин
шаҳзода умидсизланмади. Тўғрироғи, «ноумид шайтон»
дегандек, ўзини умидлантирарди. Ниҳоят, қоронғи ту-
шиб қолганини пайқади. Кетиш керак. Шунда у чор
атрофга разм солди, тевааракдаги уйларни яхшигина та-
ниб олиб, ғамгинлик билан саланглаб уйига жў-
нади.

Мана шу уч соат давомида шаҳзода тамоман ўзгарди. Бу боя эрталаб сайрга чиққан Сиёвуш Мирзо эмасди.

У бутун йўл давомида бошини қуйи солиб, маъюс ўйга чўмганча борди. Ҳатто, йўлда учраган аёлларнинг қиқир-қиқри ҳам унинг хаёлини бузолмади. Фақат извошчиларнинг «пўшт-пўшт»и ёки юк ортилган соябон араваларнинг тарақ-туруқини эшитганидагина атрофига қараб қўярди. Тим-қоронғида уйига қайтиб келган шаҳзода ҳаяжон ва очликдан толиқиб, ўз хонасига кирди-да, креслога ўтирди, папирос чекиб, хаёлга чўмди.

Унинг бошида ташвишли ва ғалати фикрлар айланарди. Қиз унда ниҳоятда кучли таассурот қолдирган эди. Уша қизнинг шу ерда, ёнимда бўлиши сув, ҳаводай зарур, деб ўйларди. Бу заруратни эҳтиросгина эмас, балки аллақандай бошқа бир сабаб ҳам тақозо этарди. Хўш, бу мақсадга қандай эришиш мумкин? Ахир, қизнинг қаерда туришини ҳам аниқ билмайди-ку. Шундай пайтларда рўй берадиган шубҳа унинг барча ишончини чиппакка чиқарарди. У ўзича: «Эҳтимол, янглиш эшитгандирман. Балки, у Тақихон кўчасида турмас? Қимдан билса бўларкин? Қимдан ёрдам сўраш керак? Отам билан онам бу ишга бош қўшишлари эҳтимолдан узоқ. Муҳаммад Тақи ёрдам бермасмикин?» дерди.

У қўнғироқ тугмачасини босди.

Ёшгина хизматкор югуриб кирди.

— Агар Муҳаммад Тақи шу ерда бўлса, чақириб юбор,— деди Сиёвуш.

Тез орада аввалгидай маккорлик ва ялтоқлик билан таъзим қилиб, Муҳаммад Тақи кириб келди.

— Муҳаммад Тақи,— деди Сиёвуш.— Бугун менинг қалбимда нималар рўй бергани ва ҳозир нималар рўй бераётганини сенга қандай айтиб берсам экан?

Муҳаммад Тақи таажубланди:

— Ҳазратим нима демоқчи бўлганларини англай олмадим... Нима гап ўзи?

Сиёвуш Муҳаммад Тақиға қандай воқеалар содир бўлганини айтиб бергач, қай йўл билан бўлмасин, қизни топиб келишни талаб қилди.

Қитобхонларга маълум бўлган тамаъгир Муҳаммад Тақи бу қизнинг камбағаллигини, шаҳзоданинг эса, аввалгидек сахийлик билан инъом беролмаслигини ҳи-

собга олиб, бу ишга овора бўлиб юрманг, демоқчи бўлиб оғиз ростлади.

— Парво қилманг, ҳазратим,— деди у ярим ачиниб, ярим ҳазил қилиб.— Бугун сизни бўлмағур хаёллар гангитиб қўйибди. Барвақтроқ ётинг, эрталаб тургунингизча ҳаммаси унутилиб кетади...

Шаҳзода дарҳол унинг сўзини бўлди:

— Йўқ, йўқ! Фикру ёдим ўшанда, унинг хаёли менга ором бермаяпти.

Муҳаммад Тақи изтеҳзо аралаш кулди:

— Ҳа, кўрамиз. Мен бир жойни топиб қўйдим, агар эртага ўша жойдан хурсанд бўлиб қайтмай, яна ўша гапни такрорласангиз, у қизнинг чинакам гўзаллигига ишонч ҳосил қиламан.

— Муҳаммад Тақи, энди менга унақа жойлар ҳақида гапирма,— деди шаҳзода ғамгин бўлиб.— Агар эрлай олсанг, ўша қизни топишимга ёрдам бер.

Лекин Муҳаммад Тақи Сиёвушни, қизнинг турар жойини билмагандан кейин, уни топиш мушкул эканига ишонтиргач, умидини пучга чиқарди. Сиёвуш Мирзо гапни давом эттиришни ортиқча билиб, Муҳаммад Тақига жавоб берди.

Қиз тўғрисидаги ўйлар уни оромидан маҳрум қилди. Қизнинг гўзал чеҳраси унинг кўз ўнгидан нари кетмасди. Бирдан унинг кўзлари ёшланди.

Ҳа, ҳатто шаҳзоданинг кўзларига ҳам ёш келди...

VII боб

ЧУЛПОН ЮЛДУЗИ ДОИМ БАЛАНД ҚАСРЛАРГА НАЗАР ТАШЛАЙДИМИ?

Худди шу куни кечқурун Тақихон хиёбонининг катта ҳовлиларидан бирида, яъни тоғ этагида бўлган тор кўчага жойлашган жажжигина иморатнинг озодагина хонасида бир қизча алланима тўқиб ўтирарди. Бу хонанинг барча жиҳози — бир неча янги гиламча, йиғиб қўйилган кўрпа-тўшак, токчада турган бир неча чироқ, коса ва лаганлардангина иборат эди.

Қиз эгнига юпқа қора кўйлак кийган бўлиб, кўйлагининг ниҳоятда юпқалигидан назик, гўзал сийнаси аниқ кўриниб турарди. У бошига қора дуррача ўраганди. Чиройли шахло кўзлари шодлик билан чақнарди.

Бугун «Шаҳиди карбало куни»да ашула айтиш мумкин эмаслигига қарамай, у қадимий, оддий қўшиқни куйлар эди:

Кеча ёмғир севалаб ерларни қилганди нам,
Кўнглимни гул-гул очиб келган эди ёрғинам...

Қиз ниҳоятда бахтиёр кўринарди... Бу ҳол ҳашаматли боғ-роғларда ҳаёт кечириб келган ҳар қанақа ашрофзодани ҳайратга солиши турган гап. Зотан, бундай кулба ва турмуш шароитидан нолимай, яхшироқ нарсаларни орзу қилмай, қандай яшаш мумкинлигига «мўътабар» зотларнинг ақли бовар қилмасди. Бу борада ким ҳақ, ким ноҳақ, гапириб ўтирмаймиз. Ҳар кимнинг табиати ҳар хил.

Қиз ўзининг ҳаётидан, шу уйи ва бисотидан мамнун эди, чунки унинг ёнгинасида, ана шу ҳовлида бошқа бир киши яшарди, унинг яқинлиги, дилдорлиги қиз учун энг гўзал нарсалардан ҳам, энг муҳташам қасрлардан ҳам азизроқ эди. Қиз ҳозиргина кампир онаси билан «Наҳл» маросимидан қайтиб, энди ўша одамни кутарди. Унинг тезда келишига, у билан кўришишга ва суҳбатидан баҳраманд бўлишига қизнинг имони комил. Қиз бахтиёр эди, келажак унга янада марғуброқ кўринарди.

Бу бир неча соатгина бундан олдин Сиёвушнинг диққатини ўзига жалб этгану, ғойиб бўлиши эса уни ғам-гуссага солиб, ҳатто кўзларига ёш келтирган ўша қиз эди.

Бу ҳовлида қиз билан онасидан ташқари яна бошқа бир кампир ҳам ўғли билан бирга яшарди. Йигитнинг Дарвозайи Қазвин хиёбонида тамаки дўкончаси бор эди.

Қизнинг онаси кўпгина кампирларнинг акси ўлароқ, ниҳоятда оқкўнғил, мўмин-мулойим аёл эди. Бахтга қарши, унинг кўзлари анча заифлашиб, нарсаларни зўрға илғарди, хулосан калом, қўлидан кўпда иш келмайдиган бўлиб қолганди. Лекин унинг марҳум эри «Шоҳи шаҳид» саройида бир вақтлар фаррошлик¹ қилиб мў-

¹ Фаррош — луғавий маъноси гилам тўшовчидир. Улар подшоҳ ёки феодалларга яқин бўлганлар. Фаррошлар асли вазифаларидан ташқари жиноятчиларни жазолаш билан шуғулланганлар.

майгина мол-мулк орттириб олганидан хотини билан қизининг ҳаёти озми-кўпми таъминланган эди...

Улар анча қашшоқ эдилар, лекин бир ботмон буғдой ўн-ўн икки қиронга кўтарилган очарчилик йилларида ҳам бир амаллаб кунларини ўтказган эдилар. Ушанда сиймолари Европа газеталари ва рассом Ғазнавий суратларини безаган муътабар зотлар буғдойнинг харвори (300 кг)ни бир юз қирқ тумандан пуллаб, қанчадан-қанча одамларни у дунёга жўнатишган эди.¹

Қиз қўл қовуштириб ўтирмасди: у ўз тиркичилигини ўзи ўтказишга уринар, пайпоқ тўқиб сотиб, кунига икки қирондан ишларди.

Тўрт хоналик бу уй ўзлариники эди. Отаси ҳаётлигида ўзларни туришарди, отаси ўлганидан кейин ортиқча хоналарни ижарага қўядиган бўлишди. Бундан ойига йигирма беш қирон қўшимча даромад қилиб туришди.

Бир йили ижарачилар уч марта алмашинди. Биринчи марта охундга ижара қўйишди, у ҳар кечаси кўчадан бузуқ хотинларни бошлаб келиб, уларни менинг сийғам дерди. Бу она билан қизнинг ҳаёт тарзларига тўғри келмасди, улар яхшиликча (ичларида ўлгудай қарғаб) тақводор руҳонийни одоб билан чиқариб юборишди. Икки кундан кейин бошқа одам келди. Бу табризлик озарбайжон бўлиб, форсчани яхши биларди. У келиши биланоқ:

— Менга хонани ижарага қўйишдан қўрқманг,— деди.— Мени сўққабош деб ўйламанг. «Кичик ҳокими мутлақлик»² давридаёқ уйланганман, қаерга бормай, доим хотиним мен билан бирга юради. Лекин, ҳозир йўллар нотинч, шаҳсеванлар³ талончилик қилиб, то Миёнагача⁴ келишди, шунинг учун ҳам ҳозир ўзим келдим. Хотиним кейинроқ келади, келишиб қўйганмиз. Кеча Шоҳ мачитга бориб, хотинимга келишини сўраб хат ёздирдим.

Шунингдек, сўйил ёки чўқмор билан қуролланиб, халқ орасидан ўз хўжаларига йўл очиб бериш ҳамда югурдаклик қилиш ҳам ана шу фаррошларнинг зиммасига юклатилган. (Ред.)

¹ Эроннинг Қожорлар династиясининг сўнгги ҳукмдори Аҳмадшоҳнинг ғаллафурушлик билан шуғулланганига ишора. (Ред.)

² «Кичик ҳокими мутлақлик» — «Истибдоди сағир» — Муҳаммадалишоҳ мажлисини тарқатиб юборганидан то маршрута тиклангунгача бўлган давр, яъни 1908—1909 йиллар «Истибдоди сағир» деб аталади.

³ Шимолий турк кўчманчи қабилаларидан бири.

⁴ Табриз билан Техрон ўртасидаги шаҳар.

Эски эрон урф-одатлари қон-қонига сингиб кетган қиз билан кампир ростгўй эдилар, шунинг учун бошқаларнинг гапига ҳам ишонардилар. Мана шу қаҳратон қиш кунларида озарбайжонни ва унинг хотинини хафа қилгилари келмай, хонани ижарага қўйишди.

Доимо уйда ўтирувчи қиз озарбайжоннинг қандай меҳмонлар бошлаб келаётганини кўриб, ҳайрон бўлиб қолди. Меҳмонларнинг ҳаммаси ҳали мўйлови сабза урмаган ўн еттилардаги ўсмирлар бўлиб, кулоҳлари остидан жингалак сочлари кўриниб турарди.

Лекин кекса озарбайжон ёш меҳмонлари билан жуда мулойим муомалада бўлиб, ҳеч қандай шовқин-сурон чиқармагани, намози бомдодни ўқиётганидан бошқа вақтда овози эшитилмагани учун она билан қиз унинг бу ишига тоқат қилишиб, хотини келишини кутардилар.

Бир куни кечаси, нима сабабдан, «кичик ҳокими мутлақлик» даврида уйланган озарбайжон билан ёш меҳмони ўртасида жанжал чиқди, хонада шовқин кўтарилди, эндигина чироқни ўчириб, ётмоқчи бўлиб турган қиз озарбайжон бошлаб келган бесоқол меҳмоннинг:

— Сен ўн икки қирон бераман деган эдинг! Шундай экан, ўша ваъда қилган ўн икки қиронни бер!— деганини эшитиб қолди.

— Ҳой, секин, секинроқ гапирсанг-чи!— деди озарбайжон.— Мен «ўн икки қирон» деганим йўқ, бир туман дедим. Уша ерда, рестораннынг олдида.

Меҳмон тўсатдан овозини барала қўйиб бақирди:

— Хомтама бўлма! Бу гал олдинги сафаргидек лақиллата олмайсан! Ҳозир жанжал чиқараман. Қани, ўн икки қиронни чўзиб қўй, эшитяпсанми?

Шундай кейин тарсаки товуши ва меҳмоннинг чинқиргани эшитилди.

Кампир ирғиб ўрнидан турди.

— Нима гап?

Озарбайжоннинг хонасида муштлашиш давом этарди. Меҳмон билан хўжайин ёқа бўғишиб, турк ва форс тилларида бир-бирларини бўралаб сўкишар, шаънларига пештахам сўзлар айтишарди. Уларнинг иккови шу топда нақадар бешарм ва кулгили аҳволда эканлигини китобхон аниқ тасаввур эта олади.

Улар қандай аҳволда эканига қарамай, кампир эшикка яқинлашиб, бақирди:

— Ҳой, нима қилияпсизлар? Нега вақт алламаҳал

бўлганда одамларни тинч ухлагани қўймайсизлар?
Қиз ҳам онасининг ёнига бориб, биргалашиб қичқирди.

Қутуриб кетган озарбайжон меҳмонни қўйиб юбормай, унинг юз-кўзи ва бошига муштлайверди. Меҳмон кучи етганча ўзини ҳамоя қиларди. Кампир билан қизнинг қичқириши тобора зўрайиб борганини кўрган озарбайжон билан меҳмон яна бундан кўра баттарроқ бирор фалокатга дучор бўлмайлик, деб жим бўлишди. Фақат меҳмоннинг:

— Хўп, майли, эртага гаплашамиз!— дегани эшитилди.

— Эртага дейсанми?— деб қичқирди озарбайжон.— Пулимни қайтармагунингча сени бу ердан чиқармайман!

Шунда кампир тоқат қилолмай, кучи борича эшикни тортиб, бақирди:

— Бу нима гап ўзи! Кечаси шовқин-сурон қилиш нимаси! Менга бунақанги ижарачиннинг кераги йўқ. Вой сени қара-ю! Агар подшоҳпараст бўлмаганингда, «кичик ҳокими мутлақлик» даврида уйланмаганингда, сени шу бугун кечасиёқ ҳайдаб чиқарар эдим. Сен бетавфиқ маршрутчилар олдида шарманда бўлмагин, деб эртагача туришингга рухсат бераман. Лекин, эртага кечқурундан бошлаб, қорангни кўрмай. Қизимнинг бунақанги шовқинларга тоқати йўқ. Йўқол, берадиган икки туманинг ғассолга буюрсин.

Кампирнинг чапақай жаҳли чиқиб кетган эди. Лекин у маршрутчиларни ёмон кўрарди, «кичик ҳокими мутлақлик» даврида уйлангани озарбайжоннинг шоҳпараст эканидан далолат берарди, шунинг учун унга ортиқча гапиришни эп кўрмади.

Озарбайжон билан меҳмони сал жушларини бошларига йиғиб, бир бурчакка тиқилиб жим бўлиб қолишди.

Эрталаб барвақт озарбайжон меҳмони билан чиқиб кетди, кечқурун келиб буюмларини олди-да, ижара ҳақини тўлаб, жўнади.

— Бунақа одамлардан эҳтиёт бўл,— дейишди кечаси билан шовқин-суронни эшитган, бўлган воқеаларни кампирдан билган қўшнилари,— улар бир фалокатга йўлиқтиради.

Шундан кейин кампир «кичик ҳокими мутлақлик» даврида уйланган озарбайжонлардан юрак олдириб

қўйиб, жой сўраб келган ҳамма озарбайжонларга рад жавоби бера бошлади. Хоналар бир ойгача бўш ётди.

Ниҳоят, бир ойдан кейин истараси иссиққина бир кампир келди. Ташвишда сўлган қизил юзлари бу аёлнинг бир вақтлар жуда гўзал бўлганидан дарак берарди.

Исми Жалолат бўлмиш қиз ҳалиги кампир келган вақтда ҳовузча лабида ўтириб, чиройли қўлларини ювмоқда эди. У бу аёлни кўрган заҳоти нима учундир унга меҳри товланиб қолди. Жалолат кулиб:

— Келинг, хизмат, аяжон?— деди.

Қизнинг жилмайиб турган чеҳрасига қараб, кампир ҳам жилмайди.

— Иккита хонани ижарага қўярмишсизлар деб эшитдим, шу ростми?— Жалолат унга хоналарни кўрсатди. Уларнинг кампирга ёққани аён бўлиб турарди. Шундан кейин қиз уни ойиси ўтирган хонага таклиф қилди.

— Киринг, ойим билан чилим чекинг.

Уйдан камдан-кам чиқадиган Жалолатнинг онаси меҳмонни кўриб, севинди.

— Утиринг, тасаддиқ, ўтиринг,— деди у табассум билан.

— Уғлим билан иккаламиз Катта Бозорнинг нариги чеккасида турамиз,— деди кампир.— Ҳозир ўғлимнинг Дарвозайи Қазвин хиёбонида дўкончаси бор, ҳар куни барвақт дўконига бориши керак, шунинг учун яқинроқдан жой топсак деган эди. Хоналарингиз яхши экан, агар қиммат бўлмаса, ижарага олардик.

— Нархини келишамиз,— деди Жалолатнинг онаси.— Лекин, аввал, билишим керак, илгариги ижарачиларимизга ўхшаш эмасмисизлар...

Шу пайт Жалолат чилим кўтариб кирди.

— Йўғ-э, ойи, ҳамма бир хилда бўлаверибдими,— деди у гапга аралашиб.

Ун уч боласининг ўн иккисидан айрилган — бири чечакдан, бири босқидан, бири тутқаноқдан, бири ичтерламадан, яна бири ҳовузга тушиб нобуд бўлиб, ёлғиз Жалолат билан қолган кампир уни жуда яхши кўрарди. У шу заҳотиёқ рози бўлди.

— Сен шундай десанг, хўп, майли. Ижара ҳақи икки туман.

Кечкурун кампир бай пули бериб кетди. Эрталаб ҳаммол билан юкларини олиб келди. Шу кундан бошлаб кампир билан ўгли ҳалиги иккала хонада яшай бошлашди.

Ўгли эрталаб ва дам олиш кунларидан бошқа пайтда уйда бўлмасди. У кечкурунлари кунботарга яқин чарчаб, тугунчада нон кўтариб келар, кун ботганидан уч соат кейин хуфтонда ухлаб қоларди.

Кампир билан қизи улардан рози эдилар. Улар ҳам ўзларини худди ўз уйларида яшагандай ҳис қилардилар. Шундай қилиб, уларнинг турмуши тинч, бетаъвиш ўтарди. Лекин бир маромда осойишта яшаш йигитчага насиб бўлмади.

Бир кун эрталаб у, одатдагидек, ишга кетишга отланаётганида беихтиёр бошини кўтарган эди, дарча ойнасидан тикилиб турган қизнинг юзи ва чақнаб турган кўзларини кўрди. Уятчанлик ҳамда тўғрими, нотўғрими — ойнаси ўргатган одоб қоидаси шу заҳотиёқ қиздан кўзини олишга даъват этарди. Лекин, бошқа қандайдир куч бунга йўл қўймади. Нима қилаётганини билмай, оқибати кўнгилсиз бўлишидан қўрқмай, у кўзини тўлдириб қизга боқди. Узоқ тикилиб турди, кўзларидан унга шайдо бўлиб қолгани сезилиб турарди, буни пайқаган қиз ўзини тутолмай кулиб юборди. Шунда у ҳам кулди.

Бир дақиқадан кейин йигит оёғи тортмаса ҳам кўчага чиқди.

Шу кун унинг қўли ишга бормади, устасининг хоотири паришон эканини ёш дастёри ҳам пайқади. Чиндан ҳам шундай эди; Жалолатнинг гўзал чеҳраси ва жозибадор шахло кўзлари унинг кўз-ўнгини гавдаланар эди. У кечкурун, қоронғи тушншини¹ кутмай, дўкончани барвақт ёпиб, шошганича уйга қайтди. Нима қилиш керак? Қизнинг хонасига киришга ҳаққи йўқ, ўз онасидан ҳам уяларди.

Лекин, бахтига, тақиллатганида эшикни ҳар вақтдагидай онаси эмас, Жалолат очди. Қиз табассум қилиб: — Салом! — деди.

Йигитча қип-қизарди. Чакка томирлари бўртиб, юраги бир хил бўлиб кетди. Қизнинг саломига алик олишини ҳам эплай олмай, телбалардек, ўз хонасига юғриб кирди-да, кўзачадаги сувни шимира бошлади.

Унинг ҳаракатидан ҳайрон бўлган, ҳатто бир оз ран-

жиган Жалолат, йигитчанинг эс-хуши увчалик жойида бўлмаса керак, деб ўйлаб, ғамгинлик билан уйга кирди.

Қиз бир боқиши билан йигитча қалбини қандай яралагани, уни қандай дардга мубтало қилганидан ўзи беҳабар эди. У, севги пайдо бўлар экан, юракни безовта қила бошлашини белмасди.

Бундай пайтларда муҳаббат тангриси қизни дадил қучоқлаб, лабларидан бўса олишни даъват этарди. Лекин муҳаббат тангрисига ёқмайдиган шарм-ҳаё ва камтаринлик йигитни ҳовлига чиқишга қўймасди.

Шу оқшомда у ғалати ҳолатда қолди: қайғуришини ҳам билмасди, чунки қайғуга ўрин йўққа ўхшарди, лекин хурсанд бўлишини ҳам билмасди. Ҳар ҳолда рўй берган воқеадан сўнг оромини йўқотиб қўйди. Онаси билан бир нафас суҳбатлашиб, овқатланиб бўлгач, у дарров ўринга ётди.

Йигит оғир кунларга қолди.

Ҳамма ухлаганида, у ўз-ўзига гапирарди:

«Кўрайлик-чи, худо нимани насиб этаркин... Балки, яна назмияга тушиб, таёқ ермиз. Ёки, эҳтимол, энди бошқача бўлар? Балки, шу қизнинг нақш олмадай юзидан бўса олиш насиб бўлар?»

Кўпчилик, йигитча шу кечаси ухламаган бўлса керак, деб ўйлар, ундай эмас. Вақт ярим кечадан оққанидан кейин у қаттиқ уйқуга кетиб, эрталабгача уйғонмагани маълум.

Эрталаб ўрпидан турганида у ҳовлида яна Жалолатни кўрди. Бу сафар у ўзини дадил тутиб:

— Синглим, эшикни беркитиб олинг,— деди,— назмиянинг марҳамати туфайли ўғрилар кўпайиб кетди.

Йигитча ўз назмида жуда дўндириб гапирдим деб ўйлади. Бирдан «синглим» деган сўзни эшитиб, қизнинг кулимсираб қўйганини пайқаб қолди.

— Ҳа, нима бўпти. Уғрилар келса кела қолсин, уймизда олишга арзийдиган ҳеч нарса йўқ. Мени ўғирлаб кетишса, пешонамдан кўраман, чунки зўр келса, боягдака сўзларни эшитмайман-қўяман-да.

Йигитча серрайиб қолди. У нима деб ўйлашини билмасди. Нега қизнинг аччиғи келди? У: «Йўқ, йўқ, агар сизни ўғирлаб кетишса, мени ҳам қўшиб ўғирлашсин», демоқчи бўлди-ю, лекин айтмади, чурқ этмай эшикдан чиқди.

Унинг беҳосдан «синглим» деб айтган сўзидан Жалолат чинакам хафа бўлган эди. Мамлакат қонунига кўра, бегона йигит билан бундай гаплашиш ман этилганини қиз хаёлига ҳам келтирмай, йигитчага ўз норозилигини очиқ айтди.

Бу уйга она-бола келганининг иккинчи кунни ёш йигитни биринчи марта кўриб, Жалолат юраги алланечук бўлаётганини сизди.

Қиз бу қандай ҳис эканини билмасди. У ўзига: «Эҳтимол, бу ажалнинг ваҳимасидир! Азроил ёнимдан учиб ўтдимми?» деди. Худди ана шу кунни «равза» эшитишга борган эди, «равзахон»дан лаҳад, Азроил, кейин яна ўша маҳалдаги бош министрнинг буюк фазилатлари тўғрисида нималарнидир эшитганди. У чиндан ҳам Азроил ёнимдан ўтди, деб ўйлади.

Орадан икки ҳафта чамаси ўтгач, Жалолат йигит ҳар гал келганида ёки кетганида юрагида ғалати бир туйғу пайдо бўлаётганини пайқади. У ажабланиб:

«Нега Азроил мени ўз ҳолимга қўймайди? Одам қиёфасига кириб юргани-юрган»,— деди ўзига.

Азроил билан учрашиш тўғрисидаги фикр унга даҳшат солиши керак эди, лекин унинг йигит билан учрашиши келадиган бўлиб қолди.

Йигитни кўриш қийин эмас эди, у ҳовлида юрганида бемалол қараш мумкин. Лекин, қиз у жилмайиб боқса деб орзу қиларди.

Қиз ўзининг бу орзуси сезилиб қолишидан чўчирди. Лекин, бизга маълумки, йигитча уни тўсатдан кўриб қолганида, ўзини панага тортишни қанчалик ихтиёр қилмасин, барибир, дарча ойнасида кўриниб қолди.

Уша кунни кечқурун қиз қачон эшик тақиллар экан, деб йигитга узоқ кўз тутди...

Биз ўша кунни кечқурун улар ўртасида нима бўлганини, эрталаб қиз йигитнинг муҳаббат илмидан тамоман беҳабар эканини тушунганини биламиз.

Уртада бўлиб ўтган ўша гапдан кейин йигитча ихтиёрини йўқотди, қуёш ботмасдан икки соат олдин дўкончасини ёпиб, Техрон кўчаларида узоқ кезди.

Кечқурун уйга қайтганида, қизга яна рўбарў келишдан қўрқиб, эшикни зўрға тақиллатди. Қиз қаршисида турарди. У яна соддалик қилиб, хижолат бўлишига сал қолди. Ҳар қалай, ўзини босиб, энди унга «синглим» деб мурожаат этмай:

— Салом!— деди.

Жалолат ҳам «салом» деб жавоб берди. У чодра билан юзини бекитар экан:

— Шаҳарда нима янгиликлар бор?— деб сўради.

Уларнинг ҳар иккаласи ҳам бунақанги савол-жавоблар ўзларига қиттак бўлсин лазат бахш этмаслигини яхши англаб эдилар. Лекин, на униси ва на буниси бирор ёқимлироқ ва жиддийроқ масала ҳақида гапиришга юрак қилмасди. Уларнинг билим доиралари қалбларида пайдо бўлган ҳис-туйғуни баён этарлик бир йўлни кўрсатишга ожизлик қиларди. Улар нимани билишарди? «Қирқ тўти» ва «Искандарнома» китобини. Улар Шамсул-имора майдонидаги «жин», «пари» ва «Одил шоҳ» ҳақидагина ҳикоя қилиб, шундай пайтларда зарур бўладиган гапларни сира-сира ўргатмайдиган дарвешнинг эртақларидан ташқари нимани ҳам эшитибдилар дейсиз.

Йигитнинг онаси шу маҳаллада яшовчи, шимолий вилоятлардан бирининг собиқ ҳокими бўлган ва аввалги гуноҳларидан сал-пал фориг бўлиш, охундлар ва мусулмони комилларнинг кафолати билан янгитдан ҳокимлик лавозимига кўтарилиш учун замин ҳозирлаш мақсадида ўқиётган «равза»сига кетган эди. Жалолатнинг онаси эса, ҳовлининг нариги чеккасидаги хонада ўтирган бўлиб, буларнинг гапларини эшита олмасди.

Ез фасли, осмонда ўн кунлик ой ёғду сочиб турарди.

— Ой жуда ҳам чиройли-а, тўғрими?— деди қиз.

Шунда йигитча юрагида дадиллик қаёқдан пайдо бўлиб қолганини ўзи ҳам сезмай:

— Ҳа, ой жуда чиройли, лекин бу ерда ундан ҳам гўзалроқ ой бор,— деб юборди.

Қоронғида қизнинг қизариб кетгани кўринмасди, албатта.

— Бу ерда ундан ҳам гўзалроқ ой бор, дедингизми?— деб такрор сўраганида, қизнинг овози сал титради.

Йигитча дадилланди. Қиз бу гапларни эътирозсиз эшитганини кўрган йигит унинг онасига чақиши ёхуд қувиб юборишларидан чўчимай:

— Албатта, гоят гўзал ва дилрабо,— деб қўшиб қўяди.

Шу пайтда қиз яшириб турган юзининг ярмини оч-

ди. Қиз билан йигит худди эски қадрдонлардай гаплашар эди. Йигит онаси уйда йўқлиги учун ичкарига киришга шошилмасди. Улар ҳовли ўртасида гаплашиб туришарди.

— Ойдан кўра гўзалроқ ким экан?— деб ўсмоқчи-лаб сўради Жалолат.

Йигит жавоб бермади. Ниҳоят, юрак ютиби

— Ойдан гўзалроқми? Сен ўзингсан-ку, ўзгинанг!— деди.

Бу сўзларни эшитган Жалолат Техроннинг одобли, шарм-ҳаёли қизлари сингари йигитни уришиб ташламоқчи бўлди-ю, лекин тили бормади. У юраги гур-гур уриб, ўз хонасига томон йўл олди.

Йигит, яъни бизга таниш бўлган Жавод, шу оқшомда қизнинг ҳуснига мафтун бўлиб, ҳовли ўртасида бир соатча туриб қолди.

У туриб-туриб ўзига:

«Шу қизга уйланишим керак!» деди.

VIII боб

ТАСОДИФИЯ КҮЗ ЕШИ

Уша кундан кейин Жалолат билан Жавод бир-бирларига бўлган майлларини ва қалбларида нималар бўлаётганлигини тушуниб олдилар. Аста-секин қиз тортинмайдиган, уялмайдиган бўлиб қолди. Жавод эса дадиллашди. Жалолат энди ундан юзини яшириб, юрагини ўртамайдиган бўлди.

Улар кўп бахтиёр онларини бирга ўтказишди. Жавод ўртоқларидан узоқлашди. Дўкончасини ёпди дегунча уйга ошиқарди. Кўпинча севгилиси Жалолатга қурби етганча бирор нарса: баъзан мева, пияшлоқ ёки ширинлик олиб келадиган бўлди. У бу нарсаларни аслида онасига келтирган бўлса-да, унга:

— Ҳадисларда агар киши бирор нарса олиб келса-ю, қўшнисига бермаса, гуноҳкори азим бўлади, дейилган,— дерди.

Шундан сўнг у Жалолатга совға-салом бердирарди, ўғлидан бошқа ҳеч кимсаси бўлмаган она эса унга монелик қилмасди.

Жалолатнинг яқинлигидан беҳад шод бўлган Жавод назмиёда, қамоқда ётган оғир кунларини ҳам унутди,

ҳатто бир вақтлар бошдан кечиргани даҳшатларга ишонгиси ҳам келмасди.

Фаррух билан охирги марта учрашган кунидан буён Жаводда айтарли ўзгариш бўлгани йўқ.

Қамоқда узоқ ётиши ва калтақлар Жаводнинг соғлиғига қаттиқ путур етказганидан хабаримиз бор. Даставвал, кўрган кишилар уни ногирон бўлиб қолади деб ўйлаган эди. Лекин, ундай бўлмади.

Фаррух Жавод билан хайрлашиб чиқиб кетаётганида унинг дори-дармон олиши ва ўзи тайинлаган докторга бериши учун тоқчада бир оз пул қолдирди. Бу Фаррухнинг ҳаммаҳалласи ўша таниш доктор эди. Унинг айниқса ичтерламага қарши ишлатадиган дорилари ҳатто Н. элчихонасига ҳам маълум эди.

Иссиқ сувга тушиш, мой дори Жаводнинг баданидаги жароҳатларни бир оз тузатди, полиция берадиган оби ёвғон ўрнига кучли овқат ейишти, айниқса, ёш бўлгани сабабли тез соғайиб кетди. Уч ойдан кейин аввалги ҳолига қайтди. Кўзининг хиралиги ҳам тузалди.

Айни шу пайтга келиб, Фаррух қолдирган ўттиз туманга яқин пул тугади, Жаводнинг оиласи яна муҳтожликда қоладиган бўлди.

Шу дамда Жавод биринчи марта уйдан чиқди. Унда қандайдир ишонч бор эди, шу сабабдан бўлса керак, ҳатто у жилмайиб ҳам қўйди. Лекин кўнгли ташвишда: энди нима қиламан?— деб ўзига савол берарди. Кўпдан буён Фаррухдан дарак йўқ. Мана шу уч ойдан бери бирор марта келиб хабар ҳам олмайди.

«Энди мени хизматкорликка олгиси келмаётгандирда»,— дерди Жавод ўз-ўзига.

Фаррухдан бирор илтимос қилишни ўзига эп кўрмаса-да, Жавод унинг уйига борди.

Мўйсафид чол унга эшик очиб:

— Нима ишингиз бор?— деб сўради ғамгинлик билан.

— Ота, менинг исмим Жавод,— деди у одоб билан.— Оғом мени биладилар. У кишини кўрмоқчи эдим.

Чол ажабланиб сўради:

— Оғонгиз ким?

Жавод ҳам ҳайрон бўлиб:

«Мен бошқа жойга келиб қолдим, шекилли?» деди ўзига-ўзи. Лекин, яна бир марта дарвозага, боғ деворига разм солиб:

— Фаррух оғом-да,— деди.

Шу сўзни эшитгач, чолнинг кўзида ёш пайдо бўлди. У Жаводга Фаррухнинг дом-дараксиз йўқолганини айтди. Афтидан, чол шу топда Жаводни таниди.

— Оғо билан Қумга борган сен эмасмидинг?

— Ҳа, мен эдим. Ажабо, нега оғодан ҳеч қандай хабарингиз йўқ?

Чолнинг кўзлари жиққа ёшга тўлди, чол кўз ёшини тия олмай:

— Шундай... Уч ойдан бери ундан ҳеч қандай хабар эшитмадик,— деди.

— Бу қандоқ бўлди?— ҳамон тушунолмайд сўради Жавод.

Чол уни ичкарига таклиф қилди ва Фаррухнинг энгагини чақирди.

Улар Жаводга Фаррухнинг бехос ғойиб бўлганини, унинг кекса отаси ғам-аламдан вафот этганини айтиб беришди.

Жавод қариялар билан бир соатча Фаррух ҳақида сўзлашиб, ҳасратлашиб ўтирди, сўнг уйига кетмоқчи бўлиб ўрнидан туриб, улар билан энди хайрлашаман деганда, тўсатдан дарвоза қаттиқ тақиллаб қолди.

Бобоҳайдар дарвоза томон ўқдай учиб борди.

Аҳмадалихон кирди. Фаррухнинг содиқ дўсти ғамгин эди.

— Бугун ҳам хабар йўқми?— деб сўради у чолдан.

— Йўқ.

— Мен алоқ-чалоқ тушлар кўриб чиқаяпман,— деди Аҳмадалихон.— Утган кечаси ҳам уни тушимда кўрдим. Аҳволи оғир эмиш, мендан ёрдам сўрармиш. Мен унга ёрдам бергани яқинлашсам, у бирдан: «Эр-тага кўришамиз», дермиш.

Фаррухнинг энгагаси хўрсиниб:

— Эҳтимол, келиб қолар, бизни азоб-уқубатдан қутқарар?— деди.

— Ким билади,— деди Аҳмадалихон.

У «эртага кўришармиз» деб ўрнидан турди-да, эшик томон юрди.

— Ҳожи оғо нима қиляпти? Ҳали ҳам ҳар куни кел-яптими?— деб сўради Аҳмадалихон.

— Эй, оғо,— деди чол,— бу Ҳожи оғонинг касридан тинчимизни йўқотдик. Эрталаб, бомдодни ўқимасданоқ етиб келади. Ундан: «Нима керак?» деб сўрасанг, «Қилган байямиздан ташвишланяпман. Шубҳага тушиб қолдим. Ножўя ишга ўхшайди; борди-ю, бирданига ҳовлига ўт тушиб кетса, нима бўлади? Пулни қайтаринг, йўқса тегишимни олай, кўнглим тинчисин», дейди. Мен унга ҳар гал: «Ҳожи оғо, бизни ўз ҳолимизга қўйинг, пулни талаб қиладиган муддатингиз келгани йўқ-ку»,— дейман. Бунга қулоқ солгиси келмайди, тушгача шу ерда қимир этмай ўтиради.

— Қўяверинг!— деди Аҳмадалихон,— Арабистоннинг жазирама офтобида юриб, Ҳожининг мияси айниб қолган бўлса керак. Эндиги сафар эшикни тақиллатса, жавоб берманг.

У бошини чайқаб, секингина:

— Хизматкоримга ёрдам берман деб, Фаррух уйини шундай хавф-хатар остида қолдирди!— деди.

Бу сўз ўзига тааллуқли эканини пайқаган Жавод қаттиқ хўрсинди.

Шу пайтгача унга эътибор бермай турган Аҳмадалихон уни таниди.

— Хўш, ҳозир сен нима иш қиляпсан? Тузалиб кетдингми?

— Худога шукур,— деди Жавод.— Кўз ва оёқларимнинг оғриғи қолди.

— Ишляпсанми ёки бекормисан?

— Бекорман,— деди Жавод бошини қуйи солиб.

Аҳмадалихон Жаводнинг жавоби ва кўринишидан унинг қаттиқ қийналганини пайқади. Бир оз ўйлаб тургач, у Почта Бошқармасига хизматкорлар кераклигини эслади.

— Саводинг борми?

Жавод йўқ дегандай бош чайқади.

— Саводинг бўлганида, сенга тузукроқ иш ҳам топиларди,— деди Аҳмадалихон.— Ҳозир сени Почта Бошқармасига ишга жойлаб қўйишим мумкин. Эртага ишга чиқсанг бўлади.

Жавод Аҳмадалихонга миннатдорчилик билдириб, уйига югурди. У шодликдан кулар, Фаррухни эслаб, йиғлаб юборай дерди. У онаси, опасига энди муҳтожликдан қутулишини айтиб хурсанд қилиш, Фаррухнинг ғойиб бўлганини сўзлаб беришга ошиқарди.

— Шундай ёш йигит-а! Одам жуда ачинади унга!— дейишди онаси билан опаси хафа бўлиб.

Иш хусусига келганда онаси барча давлат маҳкамаларини хуш кўрмас, қўрқар, уларни кофирлар идораси деб биларди. Лекин, шунга қарамай, ўглининг бошқа иложи йўқлигидан ишлашига розилик билдирди ва ўзи ҳам яхши гап топиб қўйганини айтди.

Йигит нима гап эканини билишга ошиқди. Шу пайтда уйдан опаси чиқди. Она қизига қараб олгач, деди:

— Отангнинг ошнаси Машадий Муҳаммад Ҳасан листафуруш бугун опанга совчи қилиб, синглисини юборипти. Мен унга тўғриси, опангнинг ҳеч вақоси йўқ эканини айтдим. У бўлса: «Бизга бировнинг нарсаси керак эмас. Акамга яхши, андишали, вазмин, маъқулгина хотин бўлса, бас», деди. Мен опангдан сўраган эдим, у рози бўлди. Уч кундан кейин уларни никоҳлаб қўямиз.

Жаводга ҳар томондан хушxabар кела бошлади, фақат Фарруҳдангина ҳеч қандай дарак йўқ эди.

Шу куни кечқурун бечораҳол оила хурсанд овқатланишди. Эрталаб эса, Жавод Почта Бошқармасига жўнади.

Аҳмадалихон келганидан сўнг Жаводни расмий равишда почта хизматига қабул қилиб, унга бу ерда қиладиган ишларини тушунтириб беришди.

Уч кундан кейин опасининг никоҳи бўлди. Опа иккала боласи билан эриникига кетди. Эрининг ҳам олдинги хотинидан иккита боласи бор эди. Болалар ҳаммаси энди ота-онали бўлиб қолишди.

Жавод астойдил яхши ишлай бошлади. Унинг ғайрати, ишга ўз вақтида келиб, вазифасини яхши адо этгани учун шу йили бир тумандан икки марта ойлигини оширишди. Она-бола тинч, бахтли кун кечири бошлашди. Лекин Жаводга бу иш унча маъқул эмасди, у доим бошқа бир дурустроқ иш топишни ўйларди.

У ойлигидан тежаб, бир йилда қирқ туманга яқин пул жамғарди. Йилнинг охирида Аҳмадалихон юқори мансабга ўтиб, шимолдаги шаҳарлардан бирида хизмат қилгани кетди. Ишидан кўнгли тўлмаган, бундан кўра юқорироққа кўтарилишига кўзи етмаган Жавод ишдан бўшади. Йиққан қирқ туман маблағи билан тамаки дўкон очмоқчи, папирос ясаб сотмоқчи бўлди. Аввал у бозорнинг бир четидан кичкина дўконча олди. Кейин

танишларидан бири Дарвозайи Қазвин маҳалласига ўт, у ерда харидор кўп бўлади, деб маслаҳат берди.

У Дарвозайи Қазвин маҳалласига кўчиб келди. Биз шу ерга яқин жойда унинг Жалолатга мафтуи бўлганидан хабардормиз.

Улар сир тутган севги-муҳаббат қиссаси тез орада оналарига ҳам маълум бўлди.

Илгарилари кўпинча Жалолат онаси билан гаплашиб, унинг ёнида ўтирарди. Энди кун ботмасдан то кечки овқат пайтигача ҳовлида Жавод билан гаплашиб қоладиган бўлди.

Ойиси чақирса:

— Вой, тавба-эй, нега ҳадеб бақираверасиз! Боряпман дедим-ку, боряпман!— деб қўярди.

Хонага кирганидан кейин:

— Оҳ, ойижон, шаҳарда қандай ажойиб ишлар бўлаётганини билсангиз эди. Жавод оғомнинг гапларини эшитдингизми?

Қизнинг дарров кела қолмаганини онаси унутардида, ўзича: «Фаранглар кампирларни ёшартирадиган дори топмаганмикан, бир-икки шишасини сотиб олиб, ёшариб қолардим», деб ўйларди.

— Нима гап ёкан?— деб сўрарди она қизидан.

Бир сафар Жалолат норози тарзда, аччиғланиб жавоб берди:

— Ойижон, Жавод оғом айтишича, ҳукумат бошлиғи қизлар «Марварид тўп» тагидан эмаклаб ўтмасин, дебди. Яна битта янгилик,— деб қўшимча қилди у,— буршевиклар Раштга келяпти.

— Буршевик деганинг ким?— сўради ойиси.

— Билмадим, айтишларича... э, йўқ, айтгани тилим бормайди...— деди Жалолат.

Онаси қизиқиб қистай бошлади:

— Уялмасдан айтавер, нима гап ўзи?

Қизи қип-қизариб жавоб берди:

— Буршевиклар ҳамма нарса ўртада, ҳатто хотинлар ҳам ўртада бўлсин дейишармиш.

Онаси сапчиб ўрнидан туриб кетди:

— Қизгинам, бу нима деганинг ўзи? Демак, замона охир бўлипти-да? Шу бугундан бошлаб, тирноғингни олганингда уни эшикка ташла, шунда Дажжолнинг эшағи кўм-кўк кўкариб кетиб, жуда бўлмаганда, биз дўзахга тушишдан халос бўламиз.

Кўпинча бундай гаплар она-болани шу қадар эсан-иратиб қўярдики, улар ҳатто гапни нимадан бошлаганини, нима ҳақда гаплашаётганини ҳам унутиб юборишарди.

Жаводнинг ойиси ҳам, ўғлим Жалолатнинг жинглак сочларига банд бўлиб қолганга ўхшайди, деб гумонсирарди. Жалолатни гўзал ва муносиб келин бўлади деб ўғлига халал бермасди.

Бу уйда бошқа оила яшамагани учун ошиқ-маъшуқларнинг қўрқа-писа қиладиган суҳбатларига ҳеч жим халақит бермас эди. Лекин, икки соатгина ҳовлида қилинадиган суҳбат уларга кифоя қилмасди, албатта. Энг чатоғи шунда эдики, ҳаво совиб, ҳовлида узоқ туршнинг иложи бўлмай қолди.

Уларнинг ўртасида деярли ҳеч нима рўй берган бўлмаса-да, лекин шу кунлар давомида ўпишишмаганига ишониш қийин.

Жаводнинг фикри-зикри Жалолатнинг онасидан уни ўзига сўратиш эди. Лекин у тирикчиликини ва ўз аҳволини ўйлаганида, хотин олишга қурби етмаслигини эсларди. Унинг тўй бошлаш учун қилинадиган дастлабки харажатларга ҳам пули йўқ эди. Ҳар қанча ҳисобламасин, барибир энг кам деганда ўттиз туман керак эди. Бундай чиқим унинг «маблагига» катта зиён етказарди. У охири тўй тўғрисида ўйламай қўйди. Жалолатга қанча мафтун бўлса, ташвиши ҳам шунча ортарди.

Жалолат бўлса, унинг уйланишига нима монелик қилаётганини сира тушуниб етмас, ойиси билан гаплашмаётганига ичида аччиғи қистарди. «Нега у бундай қилипти?»— дерди у ўзига-ўзи.

Бора-бора Жалолат Жавод мени яхши кўрмайди, севаман деб пайғамбар ва авлиёлар номига ичган қасами ҳам бошқа қасамлар каби бебурд, деб ўйлай бошлади.

Шундай бўлса ҳам у ўзини бахтнёр сезарди.

Сафар ойининг йнгирма саккизинчи куни кечқурун Жалолат «Наҳл» маросимидан қайтиб келгач, пайпоқ тўқиб, қўшиқ айтиб ўтирганини гапириб ўтган эдик.

Шу куни Жалолатни бир неча марта ваҳима босди. Унинг кўзлари одамлар тўпланган ўша жойда чақнаб турган суқ кўзга бир неча бор тушди. Шу пайтда унинг юраги ўйнаб кетди.

Нега бундай бўлганини ўзи тушунолмади. Лекин бу одамнинг унинг бошига мушкул ишлар солишини сезарди.

Маросим тугагач, Жалолат ойисига вагонда қайтажакларини эслатган эди. Аксига, ойиси ҳамёнини уйда қолдирибди, иккаловлари Жалолобод хибонидан пиёда кетишди. Шунга кўра, шаҳзода уларни қайта кўролмади.

Йўлда Жалолат ойисига воқеани айтиб берди ҳамда нега юрагига ваҳима тушганини соддалик билан сўради. Лекин соддаликда қизидан қолишмайдиган онаси бунинг сабабини айтиб беролмади. У, маросим пайтида мияннга шубҳали фикрлар келгандир деди ва:

— Агар кекса онам дўзах ўтида куймасин десанг, бундай шубҳаларни хаёлингга келтирма,— деб қўшиб қўйди.

Уйга қайтгач, ойиси самовар қўйди, чой ичиб, ҳордигини чиқармоқчи бўлди. Йигирма стакан чой ичди. Жалолат бўлса, бошқа хонада ўтириб, маросимни томоша қилгани кетган Жаводни кутарди. Ниҳоят, эшик тақиллади. Жалолат эшикни очгани югурди ва шу ондаёқ ўзини Жаводнинг кучоғида кўрди. Бугун, «Шаҳидлар куни» ўпишиш гуноҳ бўлишига қарамай, Жавод уни одатдагидан қаттиқроқ ўпди. Буни ўпич деб ҳам бўлмасди, чунки ўпич бир лаҳзалик бўлади, бу жуда узоқ давом этди.

Буни нима деб аташни билмайман. Эҳтимол, вақти келиб, бундай узоқ ўпишишларга ҳам махсус исм топишар.

Бир неча дақиқадан сўнг улар Жалолатнинг хонасида гаплашиб ўтирардилар. Жавод унга маросимда нималарни кўрганини гапирарди.

— Бу йил жуда ғалати бўляпти, ҳамманинг фикри «мотам куни» да.

Жалолат унинг юзига қараб табассум қилди-да, бирдан:

— Кўрқяпман, кўрқяпман...— деди.

Жавод нима тўғрисида гап бораётганини англамай сўради:

— Нима бўлди? Сенга кимнинг кўзи тегди?

Унинг гапи қизнинг қулоғига кирмади.

— Жуда кўнглим ғаш, жуда кўнглим ғаш. Унинг кўзларидан кўрқаман,— деди у такрор.

Шаҳзодани ўйлаганида бечора қизнинг юрагини ваҳима босарди.

Ниҳоят, бир оз тинчлангач, Жаводга бўлган воқеани айтиб берди.

Жавод кулиб юборди:

— Шунга қўрқингми? Ҳали жуда ёшсан-да! Афсуски, эркак эмассан, бўлмаса сени «зўрхона»га¹ бошлаб борардим, одамларнинг кўзи қанақа бўлишини аңа ўша ерда кўрардинг.

Жалолат тинчланди.

Жавод гапида давом этди:

— Ўша жойда туравермасдан, бошқа ёққа ўтсанлар ҳам бўларди.

— Мен ўтмоқчи эдим, лекин жуда одам тирбанд эди...

Жавод турли сўзлар билан Жалолатни юпатди, у шаҳзоданинг ўқрайган кўзларини хаёлидан чиқарди. Жавод кўнгли очилиб, қизнинг юзидан яна бир ўпди. Севги шунча кучни қайдан оларкин? Бутун ташвишларга қарамай, Жалолат билан Жавод аввалгидек яна ўпишишди.

Шу оқшом уларнинг ўртасида ўтган янги гап шу бўлдики: Жалолат Жаводнинг кўксига бошини қўйиб:

— Агар мени севсангиз, нега ойимга тўйдан гап очмайсиз?— деб сўради,— рози бўлмайдилар деб қўрқасизми? Рози бўладилар, албатта, хўп дейдилар.

Жавод қизариб кетди. Тўй, Жалолатга ўйланиш! Ахир, унинг оламдаги бирдан-бир орзуси шу-ку. Лекин бечоранинг тўй қилишга пули йўқ, буни Жалолатга айтишга истиҳола қиларди.

Муҳит унга камбағаллик айб деб ўргатган, унинг назарида, тўйга пулим йўқ дейиш номус эди. У ҳам бошқалар каби, пулдорлар авлиқлар қаторига ўтади, уларнинг қўли ҳамма ерга етади, деб ўйларди.

— Кўрамиз,— деди Жавод ташвишланиб.

У қизни ҳайратда қолдириб ўрнидан турди-да, хонасига кириб кетди.

Жалолат ҳеч нарсага тушунолмаي узоқ ўтирди. Унинг хаёлида минглаб содда фикрлар айланарди. Ниҳоят, у ўзига: «У мен билан ярамас хотинлардек муно-

¹ Зўрхона — Эрондаги қадимий спорт ўйлари. У ерда эркаклар бадантарбия қилишади, кураш тушишади, тош кўгарилшди.

сабатда бўлмоқчи. Мен унақалардан эмасман. У мен шу вақтгача алдаб келгани етар», деди.

Унинг қалбида ғазаб билан хафалик ва қайғу-ҳасрат кураш олиб борарди. Лекин, аёл киши бўлганидан қайғу-ҳасрат ғолиб келиб, бирдан йиғлаб юборди-да, то ярим кечагача кўз ёшини тия олмади.

Жавод хонасига югуриб кирди. Изтиробини онасига сездирмаслик учун зўр-базўр бир бурда нонни еди-да, дарҳол ўринга ётди. Лекин, уйқуси келмади. Жалолатнинг висолига етиш йўлидаги тўсиқни бартараф қилиш чорасини тополмай, у ҳам йиғлаб юборди.

IX БОБ

ПУЛ ОШИҚЛАРНИ ЯНА БИР-БИРИДАН ЖУДО ҚИЛАДИ

Ёз тугади. Шамол қўзғалиб, Техрон кўчаларини чанг-тўзон қоплади.

Лекин, бу гал техронликлар чангга эътибор беришмасди, газеталарда ҳам шаҳар бошқармасига қарши ёзилган ҳеч нарса йўқ эди.

Ҳозир чанг ва ифлослик ташвишини чекишга техронликларнинг вақтлари етишмасди. Бу Техрон аҳолиси катта ташвишда қолган бир пайт бўлиб, ўзини бахтиёр ва мамнун ҳис этувчи айрим кишилардан бошқа ҳамма ваҳимада эди. Бу Эроннинг шимолида қўзғалган кучлар марказий ҳукуматни таҳлика остида қолдирган кунлар эди.

Газеталарда баҳс ва ғийбатлар тўхтади. Ҳамма газеталар қўзғолол туфайли рўй берган хавф-хатар тўғрисида жар солар ҳамда ҳукуматдан қўшин юборишни талаб қилар эди.

Бундан уч ой олдин «шартнома»¹нинг фойдасини

¹ Бу ерда гап, 1919 йили «ашрофлар», яъни Восиқуддавла бошчилигидаги катта ер эгалари ва оқсуяклар ҳукуматининг Англия билан тузган шартномаси устида бораётир. Бу шартномага биноан Эрон эллик миллион фунт-стерлинг қарз оладиган, унинг ҳарбий кучлари ва молияси инглиз инструкторларининг назорати остига ўтадиган бўлган эди, амалда Англиянинг Эрон устидан протекторати ўрнатилди. Бу шартнома мамлакат аҳолисининг ғазабини қўзғатди, уни тузганларни халқ «ватанфурушлар» деб атади, бу шартнома кейинроқ юз берган воқеалар ва Эрон билан Совет Россияси ўртасидаги муносабатлар яхшилланиши натижасида бузилди. Расмий жиҳатдан уни «Учинчи ҳут ҳукумати» бекор қилди.

кўкларга кўтариб мақтаган газеталар, эндиликда ўша пайтдаги сиёсий арбобларни фoш этиб, «Қашшоқлар ҳуқуқи» каби сарлавҳалар остида мақолалар ёзиб, ўзини «қўзғолончилар» деб атаётган исёнчиларга эътибор беришга чақирарди.

Техронликлар нимадан бунчалик кўрқишди? Бойлар мол-дунёсидан ажралиб қолишдан, баъзи бир лақма кишилар эса, хотин-қизлар ўртада бўлармиш деган фикрдан даҳшатга тушди. Улар ўзини ҳимоясиз ҳис этар, ғалаён кўтарганларга ўлим тилаб, ҳар куни тиловат қилишарди, чунки ҳукумат тайинли чора кўрмади, озодлик ҳаракати раҳбарларини қамаш ҳамда техронликларни бир оз хотиржам қилиш учун расмий газетада, аскарлар ёрдамга келаётгани ҳақида «ҳарбий министрликнинг ахбороти»ни босиб чиқаришдан нарига ўтмас эди.

Газетафурушлар «Қўзғолончиларнинг Мозандаронга келиши!» деб қичқириб юрган ана шундай кунларнинг бирида эски танишимиз Сиёвуш Мирзо уйдан чиқиб, Носирия хиёбонидан бозор томон аста йўл олди.

Шаҳзода жуда хафа эди. Шу вақт ичида у озиб, кўзлари ич-ичига ботиб кетган, ранги сўлгин, ўзи ҳорғин кўринарди. Уни кўрган киши касал бўлса керак, деб ўйларди. У қора ҳассасига таяниб, битта-битта қадам ташларди.

Ярим соатча кўчада тентиб юрган Сиёвуш Мирзо Кўк бозорга бориб қолди, у ердан ғайришуурий равишда парранда растасига бурилди.

У аллақандай атторнинг дўконига етганида, Жабеҳона хиёбони яқинидан шовқин-сурон эшитилди.

Сиёвуш Мирзо нима гап бўлаётганини билишга қизиқиб, ўша ерга борди. Хиёбонда бир неча эркак ва аёл тўпланиб турарди.

Сиёвуш аллақандай бир аёлнинг орқасида туриб қолди. Воқеани билишга қизиққан кишилар ҳалеб ўртага қараб интилганидан у ўзини тутолмай, олдида турган аёлни қисиб қўйди. Аёл орқасига ўгирилди-да:

— Оғо, бегона аёлга бунчалик ўзингизни ташламанг,— деди жаҳл билан.

Шу пайт Сиёвуш аёлнинг юзини кўрди. У қичқириб юборди, аста бир четга чиқди-да бозор устунига суянди.

Сиёвуш Жалолатни биринчи бор кўриб, ошиқи шай-

до бўлгани ва бу ишда Муҳаммад Тақининг ёрдам беролмаслигини англаб йиғлаганига ўн ой бўлганди.

Ўша куннинг эртасига эрталаб Тақихон кўчасига яна бориб, узоқ вақт санқиб, ҳар бир эшикка, аттор ёки боққол олдида турган ҳар бир аёлга кўз югуртирганди. Лекин, унинг барча саъй-ҳаракати бекор кетган эди.

У умидсизланмади, қизни тинимсиз излади. Бунга жуда кўп вақти кетса ҳам ҳеч натижа чиқмади. Бу сифар у ўз ҳирсини-қондирганидан кейин кўчага қувила-диган суюқоёқ аёллар рўйхатиغا яна бир хотинни тир-кай олмади.

Шундай бўлса ҳам у кўп вақтгача умидсизланмай, излашни давом эттирди. Орадан талай вақт ўтгач, ури-ниши зое кетаётганини кўриб, у янглишганга ўхшайман, қиз бу маҳаллада турмаса керак, ўша куни улар бу ёққа бирор қариндошиникига келгандирлар, деб ўйлади.

Ниҳоят, у умидини тамоман узди.

Шундан бошлаб шаҳзоданинг ҳаёт тарзи ўзгарди. Қиз унинг юрагидан чуқур жой олди, у, қиз ёққан бу олов унинг висолига етганимдан кейингина ўчиши мум-кин, деб ўйларди. Лекин, уни топиб бўлмасди.

Одатда, бирор аёлни севган киши уни ахтариб то-пишдан умидини тамоман узса, эсидан чиқаради, дейи-шади. Лекин, биз бошқача фикрдамиз, бизнинг фикри-мизни шаҳзода билан бўлган воқеа тасдиқлайди.

Шаҳзода жуда қийин аҳволга тушиб қолди. У уйқу-сизлик касалига мубтало бўлди, сал бўлса-да, севгили-сини эсдан чиқариш учун ичкилик ичишга мажбур бў-ларди. Оддийгина кўйлак кийган ўша қизнинг сиймоси сира унинг кўз ўнгидан нари кетмасди.

Шу воқеадан кейин Сиёвуш бир неча марта Муҳам-мад Тақи билан бирга «маълум уйларга» кўнгил очга-ни борди. Лекин, бу жойлар унга аввалгидек завқ бер-мас эди.

Муҳаммад Тақи ҳам оғосининг бутунлай ўзгарган-лигини англади. Кекса шаҳзода камбағаллашиб, Сиё-вушнинг эса ҳаётдан кўнгли совиганини кўриб, Муҳам-мад Тақи бу ердан кетиш пайига тушди.

Ҳиссиётга ҳеч қандай эътибор бермайдиган «булар-нинг ҳаммаси бекорчи нарсалар, пул олдида ҳамма тиз чўқади», деб ўйлаган Сиёвуш Мирзо энди худди ана шу ҳиссиёт азобини чекарди.

У муҳаббат дардига мубтало бўлган эди. Висолга етишга умиди бўлмаган ошиқлардан кўра ҳам унинг аҳволи оғирроқ эди, чунки улар севгилсининг турар жойини билади. Бунинг севгилиси қасрда? Сиёвуш орзу ва хаёлга ошиқ бўлган эди.

Сиёвуш, уни қандай топсам экан, деб кечаю кундуз ўйларди. Лекин, аёллар чодра ёпиниб юрадиган бу шаҳарда уни топиб бўлармиди?

Шаҳзода хафалигини тарқатиш учун қиморга берилди. У кечаларни ошналари билан қиморхоналарда ўтказар ва улар қандай маслаҳат беришса, ўшани қилиб кўрарди. Муҳаббат, узлуксиз ўйлашлар, Жалолатни топиш йўлидаги умидсизлик натижасида овсарнамо бўлиб қолган йигит ким нима деса ўша ишни қиларди. «Вертушка» ўйнаб кўрди, кейин «Шмэн дефэр»га ўтди. Бу ўйинда аввал омади юришиб, бир неча марта қирқэллик тумандан ютди ҳам, ниҳоят, омади кетиб, бор пулини ютқазиб қўйди. Шундай пайтларда у бир четда тарёк чекиб ўтирарди.

У доимо ғамгин юрарди. Фаррухнинг хатини ўқиб, мазах қилиб кулгани учун табиат ундан қасос олаётганга ўхшарди.

Бугун Носирия хиёбонидан ўтиб, бозорга кетаётганида ҳам у ғамгин бўлиб, у ерда Жалолатни кўриб қолишни хаёлига ҳам келтирмаган эди.

Биринчи дақиқа у янглишаётган бўлсам керак, бу аёл мен кўрган қизга жуда ўхшаб кетар экан, деб ўйлади.

Лекин ўзига гапираётганида аёлни титроқ босганини кўриб, ўша эканлигига ишонди.

Чиндан ҳам Жалолат титраб кетди. У Сиёвушни кўриб, даҳшатга тушди. Жалолат ўша кунни қандайдир дори сотиб олмоқчи эди. У ойисидан рухсат сўраб, Сабза майдонга борганди. Бу ерда бир маҳалда кўз қарашни юрагига ваҳима солган ўша йигит учраб қолишини хаёлига келтирибди дейсизми?

Унинг бу йигитни кўришига тоқати йўқ эди. Қиз, Сиёвушнинг кўзи тушган заҳоти, унинг бир қараш билан қаноатланиб қолмаяжagini, шу тоифадаги йигитлар каби таъқиб этажagini пайқади.

Қиз бу йигитдан халос бўлиш, энг муҳими, унга уйини кўрсатмаслик учун нима қилиш кераклиги ҳақида ўйлай бошлади.

Йигитнинг бамайлихотир устунга суяниб турганини

кўрган Жалолат вақти ганиматда қочиб кетмоқчи бўлган эди, сотувчилардан бири қўққисдан!

— Синглим, қаёққа кетяпсан, доринг қолди-ку!— деб қичқирди.

Мияси гангиб турган Сиёвуш бу гапни эшитгач, бошини кўтариб, Жалолатга қаради. Шу маҳал қиз сотувчига авом халққа хос тилда: «Умрингиз узоқ бўлсин», деб миннатдорчилик билдириб, йўлга тушди. Сиёвуш унинг кетидан юрди.

Жалолобод хиёбонига бурилиб, уйига тезроқ етиб олиш учун Жалолат енгил, илдам юриб, Гулбандак бозорига кирди.

Лекин шу маҳал кимнингдир:

— Хоним, бунча тез юрмасангиз? Нозик оёқларингиз оғриб қолмасин деб қўрқаман!— деганини эшитди.

Жалолат бундай сўзларни умрида биринчи марта эшитар эди.

У уйдан камдан-кам чиқар, чиқса ҳам ойнисидан ажралмас, фақат шу бугун ойниснинг тоби қочиб тургани учун ёлғиз ўзи келишга мажбур бўлган эди.

Содда қиз унга нима деб жавоб беришни билмас, полиция ёки ўтқинчиларни ёрдамга чақириш мумкин эканини ҳам хаёлига келтирмасди.

Қўрққанидан қадамини жадаллаштириб, уйига кетаверди.

Лекин у бир неча қадам юрмасданоқ кимдир яна:

— Ғалати экансиз-а, хоним!— деди. — Узингизга ачинмасангиз, мен шўрликка раҳмингиз келсин. Кетиб қолманг, менга жабр қилманг, сизни ўн ойдан бери кўрмаганим ҳам кифоя қилар.

Шунда аччиги келган Жалолат ҳамма эркакларни «амакижон» деб атайдиган оддий қизлар каби зарда билан деди:

— Амакижон, гапларингизга тушунмаяпман. Мени ўз тинчимга қўйинг, уйда ойм кутиб ўтирибди.

Сиёвушнинг усталик билан қизга тегишишидан унинг бундай ишларга суяги йўқлиги сезилиб турарди. Уни ҳатто аёлларга тегишадиган йигитларнинг юзтасидан беш туману икки қирондан жарима олмасан полиция отимни бошқа қўйиб, ўқиган номозим ҳамда тутган рўзам худонинг наздида мустажоб бўлмасин деган қасами билан ҳаммага танилган Гулбандак маҳалласининг полициячиси ҳам пайқамай қолди.

Бора-бора қиз ваҳимага тушди, вужудини титроқ босди. У нотаниш йигитдан қутулишга қанчалик уринса ҳам, йигит соядек эргашиб келаверди. Жалолат Низом-Вазир чорраҳасида кўнкага чиқмоқчи бўлди. У бозордан жадал ўтиб, энди йўлга тушган вагонга чопиб чиқиб олди-да, аёллар бўлмасига кириб ўтирди. Лекин, Сиёвуш Мирзо ҳам шу заҳоти вагонга сакраб чиқди.

Аёллар бўлмасида, одатдагидек, турли-туман хотинлар бор эди. Бир хил шарм-ҳаёли аёллар Жалолатга ўхшаб, чодрага ўралиб, бошини эгиб ўтирарди. Лекин, энди ҳеч ким бизга зор эмас деб ўйловчи кампирлар юзларини яширмай, Мулла Ҳайдар охунд «равза»ни таъсирли ўқиши, шайх Жаъфар оғонинг нотиқлиги, кечаги «газет»ларда мунинстрлар бошлиғининг буйруғига биноан аёллар келгиндилар назаридан ўзларини сақлаш учун чагчура¹га ўралиб-чирмалиб юришлари кераклиги ҳақида ёзишгани тўғрисида шанғиллаб гаплашиб ўтиришарди.

— Бу жуда маъқул гап, агар ана шу беш-ўнта тақводорлар ҳам ўлиб кетса, ҳолимизга вой. Дўзахда бўлса, ҳамма яланғоч юради!— деди бир хотин.

Аксинча, ҳасрат-надомат ва йўғи-сиғи билан яшашимиз керак деб ҳисобловчи бошқа художўй кампирлар эса, «равза» ва «равзахонлик»ка муккадан кетган одамларни мақташарди. Вагонда папирос чекиб ўтирган икки-учта «таниқли» аёллар ҳам бор эди. Улар тўхтовсиз кулишиб, таниш-билишлари ҳақида гаплашардилар.

— Ақдас, сен ҳали ҳам Шерозийнинг уйидамисан?— деб сўради бир аёл иккинчисидан. — Анови гўзал офицер Бакирхон ҳали ҳам сендан кўнгил узгани йўқми?

— Ҳа, шундай бўлиши сенга ёқмайдимми?— деди иккинчиси. — Бакирхон менга сенсиз бир кун ҳам туролмайман, деб қасам ичган. Мен унинг гапига ишонман.

Иккинчи хотин кулиб юборди.

— У кеча бизниқига келиб, Эстерхоним билан папирос чекишганини айтсам нима дейсан?

— Агар шундай бўлса, эркак зотини севмаслик керак экан-да?— деди буниси аччиғидан қизариб.

Шу пайтда вагонга «оби худойи» ташиб юрган киши кириб, текинга муз солинган сув улаша бошлади.

¹ Чагчура — бир хил чодра.— (Ред.)

Иккала кампир билан «қувноқ» аёллар бир стакандан сув ичишди.

Вагон Шамсул-иморадаги биринчи бекатга келганида, чиптачи аёллар бўлими эшигига келиб:

— Опажонлар, кимнинг эркак ҳамроҳи бор эди?— деб сўради.

Бу ерда ўтирган аёлларнинг бирортасининг ҳам эркаклар бўлимида ҳамроҳи йўқ экан. Аёллар индамай бир-бировларига қараб қўйишди.

Чиптачи такрор сўради:

— Опажонлар, нима гап ўзи? Эшитмаянсизларми? Кимнинг эркак ҳамроҳи бор эди?

Яна жавоб бўлмади.

Чиптачи аччиғланиб, эркаклар бўлимига қайтди.

— У ерда ҳеч ким билетни олмаяпти,— деди у Жалолатга билет олган Сиёвуш Мирзога.

Сиёвуш ноқулай аҳволдан қутулиш учун:

— Эй йўғ-э?— деди.— У кўк ҳошияли чодра ёпинган.

Чиптачи яна аёллар бўлимига қайтди, уларнинг орасида Жалолатдан бошқа кўк ҳошияли чодра ёпингани йўқ эди, у Жалолатга бармоғи билан ишора қилиб, унга билетни узатди.

— Синглим, гаранг эмасмисан? Ма, билетингни ол.

Жалолат дудуқланиб, қизариб-бўзариб жавоб берди:

— Мен ҳеч кимни танимайман. Ўзим билет оламан.

Бахтига, чодрасига ўралиб олган эди, хижолат торганини бошқа аёллар пайқашмади.

Мияси турли хаёллар билан банд бўлган аёллар қизга унча эътибор беришмади.

Чиптачи: «Менга бу ташвиш кам эди», деб тўнғиллаб, яна Сиёвушнинг олдига қайтиб борди-да, қиз билетни олмаганини айтди.

Вагон ўзининг антиқа тезлигида юриб, роса эллик дақиқадан сўнг Тақихон кўчасига етиб борди.

Одамлар туша бошлади. Қиз йигитни чалғитиб, тушиб кетмоқчи эди, яна бўлмади. У аёллар бўлимининг эшиги олдида қизни кутар, агар у тушмаса, яна вагонга чиқиб олишни мўлжаллаб шайланиб турарди.

Жалолат ночор вагондан тушди.

У деворга қисилиб уйи томон илдам йўл олди. Сиёвуш унга эргашди.

— Худога шукур, энди турар жойингни билиб олдим,— деди у.— Барибир сени қўлга тушираман. Агар

сен менинг кимлигимни, сенга бўлган умид-орзуларимни билганингда, менга бунчалик жабр қилмас эдинг. Мен бошқа йигитлардан эмасман, ниятим ҳам соф.

Шаҳзода бу сафар рост гапирди, чунки у бу қизга бошқа аёллар каби муносабатда бўла олмаслигини сезиб турарди.

Жалолат то уйига етгунча лом-лим деб оғиз очмади. Ниҳоят, етиб бориб, эшикни қаттиқ-қаттиқ тақиллата бошлади. Бахтга қарши, Жаводнинг онаси йўқ эди. Жалолатнинг бетоб онаси ўрнидан туриб, ивирсилаб келиб эшикни очгунча орадан уч-тўрт дақиқа вақт ўтди.

Қиз қўрққанидан юраги ёрилгудай бўларди. Шаҳзода эса унинг атрофида гирдикапалак бўлиб, ғалати ва келишмаган қилиқлар қиларди.

— Сени жонимдан ҳам яхши кўраман, сен меники бўласан, сен, албатта, меники бўлишинг керак,— дерди у.

Эшик сал очилиши билан қиз югуриб ичкарига кирди-ю, ўзини онасининг қучоғига отди.

— Ойижон... қўрқиб кетяпман... қандай балоларга гирифтор бўлганимни билсангиз эди...

Шундан кейин у эшикнинг орқасида «Шаҳиди Қарбало кунӣ» учраган «ўтган йилги» йигит турганини, унинг Сабза майдондан эргашиб; бутун йўл бўйи ҳар хил бўлмағур гапларни сўзлаб келганини дудуқлана-дудуқлана гапириб берди.

Онаси эшикни очди. Девор ёнида нима қилишини билмай қотиб турган шаҳзодани кўриб, койий кетди:

— Бу нимаси, а? Шаҳар бедарвоза-ю, энди бегона қизларнинг орқасидан шилқимлик қилиб, эргашиб юра-верамиз деб ўйлаяпсанми? Йўқ, иним, ҳамма бизга хизмат қилади деб хомтама бўлмай қўя қол. Иккинчи марта келсанг, оёғингни уриб синдираман. Қизимга шундай гапларни айтишга қандай тилинг борди? Узи ҳеч кимда виждон ҳам, ор-номус ҳам қолмади. Шоҳи шаҳид даврида мана шундай нарсалар бўлармиди? Эрим шоҳнинг фарроши ким эканини сенга кўрсатиб кўярди.

Жанжал бошланишини сезиб, Сиёвуш Мирзо секингина тор-кўчадан чиқиб кетди.

Орадан бир оз ўтгач, Жавод келди. Бўлиб ўтган воқеани эшитиб, ҳали ҳам юраги увушиб ўтирган Жалолатга шундай деди:

— Ҳечқиси йўқ. Техронда бунақа қўланса кишилар

жуда кўп. Одам ўзига эҳтиёт бўлиши керак. Қолгани эътибор беришга арзимайдиган нарса.

Ийғи билан тугаган ана шу оқшомдан кейин Жавод билан Жалолат анча вақтгача бир-бирларидан аччиғланиб юришди. Лекин ошиқ-маъшуқларга одат бўлганидек, улар тезда иноқлашиб кетишди ва тўкилган ёшлар учун бир-бирини бўсалар билан мукофотлашди.

Уша куни Жавод унга ҳозир уйлана олмаслигини, лскин келаси йил баҳорда тўй қилиши мумкинлигини айтди.

Қиз унинг гапларига тушунди ва кейин бу ҳақда сира оғиз очмади. У энди келаси йил баҳоригача қолган кунларни санаш билан машғул бўлди. У Сиёвушнинг кўзларини ҳам унутиб юборди.

Лекин, ҳозир, ўн ойдан кейин тўсатдан яна ўша кўзлар намоён бўлди.

— Йўқ, йўқ, жонгинам,— деди қиз Жаводга,— мен алдаётганим йўқ. Агар унинг менга ўқрайиб тикилган кўзларини кўрганингда эди, ўзинг ҳам қўрқиб кетган бўлардинг. Унинг кўзларида оловли ўқ ёйлар чиқиб, юрагимга қадалаётгандай бўлди. О, қанчалик қўрққанимни билсанг эди! Ҳозир ҳам юрагим ўйнаб кетяпти. У бошимизга катта фалокат келтиради. Йўқ, энди мен, жуда зарур бўлганда чорраҳагача бормасам, сира-сира уйдан чиқмайман...

Жавод қизнинг қўрқувини босиш учун кечқурун алламаҳалгача ҳар хил воқеалар ҳақида гапириб уни овутиб ўтирди.

Жавод эрталаб кўчага чиқиб, уйқусизликдан кўзлари ич-ичига тушиб кетган «олифта» йигитни кўрди. Йигит эшик олдида у ёқдан-бу ёққа юриб турарди.

Бу йигитнинг уларнинг эшигига қараб турганини кўриб, Жавод унинг ўз рақиби эканини англади.

Лекин Жавод ўзини билмаганга солди ва гўё унга эътибор бермаётгандек дўконига кетди.

Бу йигит шаҳзода эди. У кечаси хуфтондан кейин уйига кетди. Бугун бўлса, эрта тонгданоқ ҳатто наҳорлик қилмасдан яна шу ерда изғиб юрарди. У Жалолатни кўриш дардида эди.

У кечаси билан ухламай чиқди. Кечаси хуфтондан кейин извошда уйига қайтиб, Муҳаммад Тақини чақирди.

Муҳаммад Тақи бепарволик билан:

— Менга хизматлари борми?— деб сўради.

— Муҳаммад Тақи, мен жуда ҳам бахтиёрман,— деб хитоб қилди Сиёвуш,— уни топдим!

Муҳаммад Тақи ҳам ўзини бахтиёр қилиб кўрсатиш учун сохта илжайиб:

— Топдингизми? Жуда соз! Хўш, хоҳишингизни бажо келтирдими?— деб сўради.

Шаҳзода кулимсираб қўйди.

— Оҳҳо, сен жуда сабрсиз экансан-ку! Ахир, Теҳронда хотинларни шунчалик тез кўндириб бўладими? Бугун мен уни кўчада тасодифан кўриб қолдим, холос.

Муҳаммад Тақи қизнинг кимлигини, у билан оғо қандай алоқа қилмоқчи эканини, бу ишда қандай қийинчиликлар борлигини суриштирди. Сиёвуш бўлган воқеаларни батафсил сўзлаб берди.

Муҳаммад Тақи қотиб-қотиб кулди.

— Войбў, маъшуқангиз жуда ҳам содда экан-ку!

Ниҳоят сўради:

— Хўп, яхши. Эндиги мақсадингиз нима?

Хоҳиши башарасидан яққол кўриниб турган шаҳзода деди:

— Соддами, йўқми, барибир. Мен унинг висолига етишишим керак ёки энди ҳам менга ёрдам беришни истамайсанми?

Муҳаммад Тақи бир оз ўйлаб тургач:

— Олдин у ҳақда маълумот тўплаш керак,— деди.

* * *

Сиёвуш Тақиҳон кўчаси ёнидаги тор кўчага ўн беш кун қатнади. Кейин шартга қатнамай қўйди. Ниҳоят, у энди содда қиз Жалолат билан унинг ошиғи Жаводни ўз ҳолига қўйганга ўхшарди.

— Кўрдингми? — дерди Жавод. — Айтганим тўғри чиқдими? Шундай бўлишини олдиндан билган эдим. Жанжаллашганимда, ўзимиз уятга қолардик. Судга берганимизда ҳам фойдаси бўлмасди, ахир у фокол'ку, ҳамма судларни ҳам ҳозир фоколлар эгаялаб олишган, улар уни ёқлашарди, албатта.

Жавод ҳақ эканига Жалолат ҳам тан берди. Лекин, у ўзининг нима учун батамом хотиржам бўлолмаётгани,

¹ Европача кийинадиган одам.

шаҳзода ҳақидаги фикрлар доим ваҳимага солаётганини англай олмас эди.

Жалолат Сиёвуш билан учрашганидан икки ой ўтгач, уларнинг уйига бир кампир кириб келди. Кампир кулимсираб, Жалолатнинг онасини кўрмоқчи эканини айтди. Қиз кампирни онасининг хонасига бошлаб кирди.

Кампир кириб саломлашгач, гап бошлади: /

— Сизнинг иккита ортиқча хонангиз борлигини билман. Уларда ҳозир яхши кишилар турганини, улардан жуда хурсанд эканлигингизни ҳам билман. Бироқ, бизнинг шу маҳаллага, албатта, кўчиб ўтишимиз зарур бўлиб қолди. Бошқалардан ортиқроқ ҳақ тўлашга ҳам розимиз. Шу ҳақда сиз билан маслаҳатлашмоқчи бўлиб келувдим. Жалолатнинг онаси унинг сўзини бўлиб: «Агар сиз шу ҳақда гапирмоқчи бўлсангиз, бефойда, мен уларни алмаштирмоқчи эмасман», демоқчи бўлди.

Лекин кампир унга навбат бермади.

— Биласизми... ўғлим бир инглизнинг уйида хизмат қилади. У инъомлардан ташқари, ойига йигирма туман олади — ўша қуриб кеткур инглиз Америка мактаби ёнида яшайди. Ўғлим эрталаб барвақт ишда бўлиши керак. Шунинг учун биз Араб маҳалласидан, албатта, мана шу ерга кўчиб ўтишимиз зарур бўлиб қолди. Икки ойдан бери уй қидираман-у, ҳеч тополмайман. Икки хонали уйга ўн тумандан тўлашга рози бўлсак ҳам, барибир топилмаяпти.

«Ўн туман» сўзини эшитиб, уй эгасининг кўзлари ўйнаб кетди:

— Ўн туман. Иккита хона учун-а?

— Нега энди бермайлик, — деди кампир, — ўғлим агар хизматига кечикса, инглиз бошқа кишини ишга олишидан қўрқяпти. Эллик тумандан айрилгандан кўра, ўн туман берган яхши-да. — Кейин қўшиб қўйди: — Сизларнинг олдингизга келганим шу важдан эди. Узларингизга ҳам, бошқаларга ҳам хайрли иш қилмайсизларми, яна..

Жалолатнинг онаси «ўн туман» деган ёқимли гапни эшитиб: «Ҳа, мумкин», демоқчи эди-ю, лекин шу пайт Жалолат билан Жавод ўртасидаги муносабат эсига тушиб қолди. Шунинг учун:

— Бугун сизга ҳеч нарса деёлмайман, агар малол келмаса, эртага яна келиб хабар олинг-чи, шунда аниқ бир жавобини айтаман, — деди.

Кампир ноилож ўрнидан турди.

— Майли, бошқа гапга ўрин ҳам йўқ, ўғлим яна бир кеча ухламаса ухламас.

Кейин хайрлашиб чиқиб кетди.

Онаси Жалолатни чақирди. Жалолат аввало Жаводдан сира ҳам айрилмайман, деб туриб олди. Лекин, онаси уларнинг баҳоргача, беш ой туришини, бунинг учун эллик туман тўлашларини ва бу пулларнинг тўй учун сарфланажagini айтгандан кейин, Жалолат рози бўлди.

Жавод кечқурун келди ва у Жалолат билан гаплашиб тургандаёқ, икки она келишиб олишди.

— Биласизми, эгачи, — деди Жалолатнинг онаси, — сиз билан биз кексайиб қолдик. Бундан буёқ иккаламизнинг ҳам тезроқ болаларимизнинг тўйини кўринадан бўлак орзумиз йўқ. Ахир, улар бир-бирини яхши кўришади-ку, лекин пулимиз кам. Шу нарса ишнинг белига тепаяпти.

Жалолатнинг онаси Жаводнинг онасини шундай ишонтириб қўйдик, у кўчишга дарров рози бўлди.

Бўлган воқеани ўз навбатида Жалолат ҳам Жаводга гапириб берди. Бу тўйимизни тезлаштиради деб, эслатиб ҳам қўйди. Жавод ҳам бутун фикри-зикри фақат шу ҳақда бўлгани учун дарров кўнди ва эртадан бошлаб жой излашга киришажagini, иложи борича тезроқ кўчиб кетажagini айтди.

Эртасига эрталаб яна кечаги кампир келди. Жалолатнинг онаси унга аввалги ижарачилар бошқа жой топмагунча кўчиб келмаслигини писанда қилиб, розилик берди.

Уч кундан кейин Жавод Жалолобод хиёбоңидан иккита хона топди ва онаси билан ўша ерга кўчиб ўтишди. Бир кундан кейин эса, Жалолатларникига кампир билан унинг анча кексайиб қолган ўғли кўчиб келди.

Х 6 0 6

ЯНА БИР МАЖЛИС

Техронликлар, тўғрироғи, бутун Техрон ҳали ҳам кўрқинч ва ваҳимада яшарди.

Кечқурун соат олтилар чамаси. Қиш, яъни ҳут ойи бўлгани учун қош қорая бошлади. Техронликлар, яъни

шу кунларда бошига ташвиш тушмаганлар — «улуғ» отаси ёки «машҳур» акаси, ёхуд «муҳтарам» эри авахтага қамалмаганлар мажлислар биноси олдига тўпланишиб, вақтичоғлик қилишарди.

Бу кун — мажлис очилган куннинг йиллик байрами бўлганлиги ва яқинда чиққан эълонга кўра, казакларнинг фақат хонларнигина жазолашни кўзда тутганликларидан хабардор бўлган теҳронликлар мамнун эдилар.

Фақат бадном бозор сиёсатчисидан олинган «бир энлик хати» ёрдамида эришган лавозимларидан ажраб қолишдан қўрқаётган баъзи бир амалдорларгина унча хурсанд эмасдилар.

Бу мажлис биноси ашрофларнинг халқ қони ва пешона тери ҳисобига сотиб олинган автомобиллар ва извошлари билан қуршалмаган ва полициячилар халқ оммасига ҳужум қилмаган биринчи кеча эди.

Музыка садолари янграрди. Атрофда оломоннинг ғовури. Кексалар ҳам, ёшлар ҳам ҳеч тортинмай гаплашар, кулишар эдилар. Кўпчилик қўлидаги кичик варақаларни ўқиб-ўқиб қўярди. Бу «дастхат» ёки бошқача қилиб айтганда, ҳукумат чекка вилоятларга телеграф билан хабар қилган манифест эди. Унда бош министрликка, яъни ҳукумат бошлиғи қилиб «салтана», «давлат» унвони бўлмаган ёш бир йигит тайинлангани ҳақида гапириларди.

Ёшларнинг қувончи ичига сиғмасди.

Илгариги ҳукмдорларнинг қобилиятсиз ва яроқсизлиги таъкидланган бу манифест халққа ёрқин келажак ваъда қиларди. Манифестда, тараққиёт йўлига киришга қатъий аҳд қилган давлат бошлиғининг бундан буён ўз фароғати, ўз бойлигини ошириш ҳақида ўйлайдиган кишиларни бош министрликка тайинланмаслиги лозим эканини писанда қилгани ҳам кўрсатилган эди.

Эроннинг бахтсиз халқ оммаси энди бизга бахт ва тараққиёт йўли очилди, энди Эрон цивилизация йўлидан шахдам қадам ташлаб боради, деб ўйларди.

Чиндан ҳам тақдир эрон халқи ҳақиқий ҳаёт нима эканининг маъносига етиб, ўзини доимо йиғи-еиғи ва мана шу ифлос шароитда яшаш учун яратилган деб ҳисоблашдан халос бўлишини истармиди?

Гарчи янги тайинланган бош министр ҳақида ҳар хил гаплар юрган бўлишига қарамай, илгариги ҳукм-

дорларнинг яна ҳукумат тепасига келишига рози бўлиш ақлга сиғмайдиган бир нарса бўлиб кўрингани сабабли ҳамма мамнунга ўхшар эди.

Мана шу томошабин оломон ичида, четроқда, Мажлис майдонининг ўнг томони бўйлаб кетган дарахтлар ёнида бир-бирига ўхшамаган икки киши оҳиста гаплашиб турарди. Уларнинг бири фокол эди. У қора пальтода, бўйнига гунафшаранг галстук тақиб, бошига япасқи қалпоқ кийиб олган. Қорачадан келган юзини икки энлик қилиб қўйилган соқол безаб турарди. Иккинчиси охунд эди. У наридан-бери ўралган катта саллали, эғнида кул ранг лаббода¹, оёғида сариқ туфли, кийимининг этаклари тагидан кўриниб турган «табаррук» тўпигини зўрға бекитиб турган қизил жун пайпоқ. Оғойи шайх тинмай тасбеҳ ўғирар, унинг суҳбатдоши эса, оғзининг четига қистириб олган папиросини тўхтовсиз бурқситарди.

Қора пальтоли киши фақат шайхга эшитиларли қилиб жуда секин гапирарди:

— Ҳа! Ишларимиз чатоқ! Мени N.га суд раиси қилиб тайинлаш ҳақидаги буйруққа қўл қўйишга министри кўндирдим дедингизми? Энди бўлса, барча уришларимиз чиппакка чиқди. Саиднинг шу ерга келиб қолганини айтмайсизми, тавба! Энди, албатта, бошқа министр тайинланади, яна бошқатдан ҳаракат қилишга, яна замин ҳозирлашга тўғри келади.

— Ёмон бўлди, — деди шайх жаҳл билан. — Афтидан, бу йил оиламининг шаҳар ташқарисидаги боққа кўчиб боршини худо хоҳламаганга ўхшайди. Бу воқеалардан кейин, вилоятга боролмаслигимиз аниқ, бинобарин, битишган нарсаларни менга юбора олмайсиз. Энди боғда дам олиш ҳақидаги орзулардан қўл силташга тўғри келади.

— Э, бунчалик ноумид бўлманг. Эҳтимол, янги министр ҳам бирор нарса қилиши мумкиндир. Лекин, тўғриси айтганда, бутунлай ишониб ҳам бўлмайди. Мен бунга умид қилаётганим йўқ. Энди иккаламиз бошқа йўللар ахтариб кўришимиз керак.

— Сизнинг нималар деяётганингизга тушунолмаёпман, — деди оғойи-шайх. — Яна қандай йўллار бўлиши

¹ Ҳунармандлар, савдогар ва руҳонийларнинг қадимий уст кийими.

мумкин? Мана шундай хавfli вақтда-я. Ҳозир назмияда жосусларнинг бир неча марта кўпайгани ҳақидаги гапларни эшитмадингизми? Иккаламиз нима қилишимиз мумкин? Сиёсатга аралашгани учун одамларни тўдалаб ушлаб кетишаётганини кўрмаяпсизми?

— Айтгандай, — шайх тўсатдан сўраб қолди, — укангизни қутқариш учун бирор чора кўрдингизми?

Пальтоли киши ҳайрон бўлиб хитоб қилди:

— Укамни? Унга бирор нарса бўлибдими? Бундан уч кун бурун кечгача бирга эдик-ку.

Оғойи шайх ғамгин кулимсиради:

— Мана, кўрдингизми, сизнинг умуман ҳеч нарсадан хабарингиз йўқлиги кўришиб турибди. Укангизнинг қамалганига икки кун бўлди-ю, сиз унга бирор нарса бўлдим, деб сўраб ўтирибсиз.

Шайхнинг суҳбатдоши, ўқувчимиз эҳтимол пайқанган бўлса керак, Али Ризохоннинг ўзгинаси эди.

— Ҳеч нарсадан хабарим йўқ... — деди у. — Укам икки кундан бери қамоқда ётибдими? Бу ҳолда мени судга раис қилишлари эмас, қамоқхонага тиқиб қўйишлари ҳеч гап эмас экан-да!

— Сиз нима деб ўйлаган эдингиз? Мумкин бўлмаган нарса йўқ. Улар сиздан кўрқишмайди, умуман олганда, укангиздан сизнинг ортиқлик жойингиз ҳам йўқ!

Али Ризохоннинг дўстлари шу кунларда жуда юрак олдириб қўйган бўлсалар ҳам, лекин унинг ўзи негадир бепарво эди. Ҳозир ҳам у оғойи шайхга босинқи товуш билан:

— Мана шуларнинг ҳаммасига қарамай, биз, боя айтганимдек, фурсатни қўлдан бой бермаслигимиз керак. Ҳаракат қилиб, вақти ғаниматдан фойдаланиб қолишимиз лозим, — деди.

Шайх яна эътироз билдирди:

— Сиз нима деб ўйлаяпсиз ўзи? Ҳатто, бир жойга йиғилиш ҳам тақиқланган бир пайтда-я! Нима, кечаги буйруқни ўқиганингиз йўқми? Унда ҳар қандай улфатчилик ва йиғинлар тақиқланади дейилган.

— Ҳаммасини ўқидим, ҳаммасини биламан, — деди Али Ризохон, — яна бунинг оқибати нима бўлишидан ҳам хабардорман. Лекин кўриб турибманки, кўплар — айниқса, дўстларимиз — бу аҳволдан норози, шунинг учун мен ишлашга жазм қилдим. Мен қандайдир ёш

ҳукмдорнинг Эрондаги барча ҳаёт тарзини поймол қилиб юборишга йўл қўя олмайман. — Кейин овозини янада пасайтириб деди:— Сизга, худога шукур, тушунтириб ўтиришнинг ҳожати йўқ. Биласиз-ку, муътабар кишиларсиз, ашрофларсиз давлат ишини бошқариб бўлмайди. Ворислик ҳам, тажриба ҳам,— ҳаммаси маҳв бўлади. Ахир, у одамлар давлат кемасини тутиб турувчи лангарлар-ку, мамлакатнинг ҳақиқий хўжайинлари ҳам ўшалар. Биз қандай йўл билан бўлмасин, уларни озод қилиш чорасини топишимиз керак. Уларнинг ўлими билан олти минг йиллик тарихга эга бўлган ватанимизнинг ҳалок бўлишига йўл қўйиб бўлмайди!

Али Ризохоннинг сўзлари шайхни даҳшатга, ҳаяжонга солди. У қалтирар эди.

— Йўқ, йўқ! Кўриб турибман, ақлдан озибсиз,— деди у. — Йўқ, мен сиз билан бирга бўлолмайман.

Али Ризохон шайхнинг енгидан ушлаб, ўзига тортди:

— Эй, қўрқоқлик қилмасангиз-чи!

Бу вақтда одамлар тарқала бошлади. Ҳамма уй-уйига шошилар эди. Чунки, ҳарбий ҳолат ҳақидаги буйруққа биноан, кўчада фақат соат саккизгача юриш мумкин эди.

Шайх Али Ризохоннинг қўлидан тутди:

— Менга қаранг, — деди у, — агар яна бирор нарса демоқчи бўлсангиз, каминанинг уйига ташриф буюринг ёки сизнинг муборак уйингиздан бошлана топишга рухсат этинг, бу ерда сиз билан ортиқ бир оғиз ҳам гаплаша олмайман.

Али Ризохон рози бўлди. Улар майдон четида турган извошлар томон йўл олишди ва бир извошни ёллаб Дарвозайи Қазвин томон жўнашди. Ярим соатдан кейин манзилга етиб боришди.

Али Ризохон хизматкорга ичкилик, тўғрироги, патнусда ароқли графинни келтиришни буюрди. Улар ордан хиёл вақт ўтгач, бир-бирларининг соғлиги учун бир неча қадаҳни бўшатишди.

— Баё. Гуноҳни ошириш ярамайди. Мен ҳозир оғзимни чайқаб, номоз ўқиб олишим керак,— деди шайх.

Али Ризохон шайхни гуноҳга тойилишдан тўхтатишга қанчалик уринмаепн, агар гуноҳкор бўлишни хоҳламасангиз бутунлай ичмаслик керак, ҳолбуки ичкилик соғлигингиз учун зарар, модомики, ичган экансиз, энди оғиз чайқаш билан гуноҳдан фориғ бўлиш мумкин

эмас деб қанчалик тушунтирмасин, ҳамма ҳаракати бекор кетди. Шайх унинг гапларини деярли эшитмас эди. Чунки, у ақл доирасининг торлиги сабабли Али Ризохон нималар деяётганини англашга қодир эмасди.

Хуллас, ярим соатлардан кейин, улар юзма-юз ўтириб олиб, жиддий суҳбатга тушиб кетишди.

Илгарилари гапириш ўрнига айюҳаннос тортадиган, ўзининг «вассалом»лари билан ҳамма ёқни ларзага келтирадиган оғойи шайх уч кун ичида шундай мулоҳим тортиб қолдики, бунга тасвирлаш ҳам мушкул. Улар ўтирган хона ҳар томондан шунга ўхшаш бўш хоналар билан қуршалган ҳамда Али Ризохоннинг ҳовлиси жуда кеиғ бўлиб, уларнинг гапини биров эшитиши мумкин эмасди, шунга қарамай, шайх шу қадар шивирлаб гапирар эдики, баъзан Али Ризохон ҳеч нарса эшитмай, қаттиқроқ гапиришини сўрарди.

Али Ризохон шундай деди:

— Мен муҳтарам аъёнларимиз узоқ вақт қамоқхонада ўтиришмайди деб ўйлайман. Саид уларни ўзи хоҳлаганича жазолай олмаса керак. У ўзининг мавқеи пасайиб кетиши ва улар борида қўлидан ҳеч иш келмаслигидан хавфсираб, уларни қамаб қўйган. Суд раиси бўлиб тайинланишим фақат орзудангина иборат бўлиб қолган ҳозирги пайтда бу вазиятдан бошқача фойдаланмоқчиман. Ўзимни муовин министр лавозимига, сизни Олий Суд раислиги лавозимига тайин эттиришга ҳаракат қиламан.

Бирдан оғойи шайхнинг пастки жағи титраб кетди. Али Ризохоннинг сўзлари шундай ёқимли эдики, унинг оғзидан сўлакайи оқа бошлади. У ютиниб:

— Ростданми? Олий Суд раислигига? Шундай бўлиши мумкинми? Мен ранс бўламанми?— деб хитоб қилди.

— Нега мумкин бўлмасин? Министр муовини ёки Олий Суд раиси курсисиде ўтирганлардан қаеримиз кам? Жаҳду жадал ҳаракат қилинса, ҳамма нарсага эришиш мумкин. Бунга эришиш йўллари ҳам ўйлаб қўйганман. Ёки сиз буларни қуруқ сўзлар, деб ўйлапсизми?

Шайх жавоб берди:

— Эй, сиз нималар деяпсиз ўзингиз? Сизга бекорчи гапларни гапиряпсиз дейишга кимнинг ҳадди сиғади? Тўғриси айтсам, сизнинг истеъдодингизга етарли

Баҳо бермай, шу пайтгача терговчиликда қолдириб келишаётгани одамга жуда алам қилади!

Шайхни жуда қотириб жиловлаб олганидан мамнун бўлган Али Ризохон сўзида давом этди:

— Бунинг аҳамияти йўқ. Одамлар кўп вақтгача ўз камчиликларини бартараф қила олмайдилар. Ҳечқиси йўқ, вақти келиб, тушуниб оларлар! Лекин, афсуски, мен тамоман ишга яроқсиз бўлиб қолганимдагина тушунадилар.

У бир хўрсиниб қўйиб гапида давом этди:

— Хўп, майли, энди мен тузган режа ҳақида нима дейсиз?

— Менимча, уни муҳокама қилиб ўтиришнинг ҳам ҳожати йўқ,— деб жавоб берди шайх.— Сиз ҳеч бир ишни ўйламасдан қилмайсиз. Сиз кўзлаган мақсадлар, шубҳасиз, жуда тўғри ва уни амалга ошириш савоб.

Олий Суд раиси бўлиш фикри шундай лаззатли эдики, шайх Муҳаммад Ҳусайн тамоман ўзини йўқотиб қўйди ва ҳатто, мартабаси йўл қўймаслигини ҳам унутиб, ўрнидан ирғиб туриб, Эроннинг ғарбий қисмидаги ўз вилояти рақсини Али Ризохонга кўрсатмоқчи бўлди.

Али Ризохон мийиғида кўлиб, уни жойига ўтқазди:

— Бас, бас! Худо хоҳласа, Олий Судга раис бўлганингиздан кейин, базми жамшид қилиб, ана ўшанда рақс этиб ҳам берасиз. Ҳозирча муҳимроқ иш бор.

Шу маҳал шайх учун Олий Суд раиси бўлишдан бошқа муҳим нарса йўқ эди. Бинобарин, бўлак ҳеч гап қулоғига ёқмасди, лекин шундай бўлишига қарамай, ўтиришга мажбур бўлди.

— Сиз ҳали ҳеч нарсадан хабардор бўлмай туриб, менинг фикримни ёқлаган бўлсангиз-да, сизни тузган режамдан тўлароқ воқиф қилсам дуруст бўлар, деб ўйлайман. Менинг фикрим шундай: Олий Суд раиси бедарак йўқолган, бу ишда сизнинг хизматингиз ҳам оз бўлмади. Эсингиздами, сиз унга виждонсизлигингни фош қиламан; деб дўқ урган эдингиз, ҳозирги кунда сизнинг бекор юришингиз бўлмайди, маҳбусларни озод этишга ҳаракат қилиш керак. Бу эзгу ишни рўёбга чиқариш учун эса, тегишли тадбирлар кўрмоқ лозим. Майдачуйда тадбирлар иш бермайди. Ҳамма одамларимизни бош министрга қарши оёқлантирсак ва ўз одамларимизни халқнинг ҳақиқий вакиллари деб кўрсатсак, бои-

ги эзгу ишни амалга оширишда бизнинг бирдан-бир ёрдамимиз бўлади. Мана шу яхши натижа беради!

Оғойи шайх ҳушёр тортди.

— Бундоқ тушунтириб гапиринг,— деди у. — Мен ҳеч нарсага тушунмаяпман.

— Жуда оддий гап,— деди Али Ризохон,— ҳамма таниш-билишларимизни ҳозирги ҳукуматга қарши қўтара олсак, марра бизники.

— Афв этасиз. Шу кеч қулоғимга шайтон жойлашиб олиб, миямга ҳам таъсир қилганга ўхшайди. Буни нимани назарда тутиб гапираётганингизни англамаяпман,— деди оғойи шайх.

Али Ризохоннинг аччиғи чиқди:

— Биласизми, ого, бундай вақтда ҳамма нарсани очиқ гапириб бўлмайди. Мен айтяпманки, агар мен бозорчи ошналарим билан гаплашсам, улар ўз навбатида ҳунармандларни бизни қўллаб-қувватлашга кўндиришса, сиз бўлсангиз, бир варақ қоғозни тўлдириб, унга шарият пешволарининг қўлини қўйдирсангиз, ишни яна ҳам жонлантириб юбориш учун ёрдам сўраб, олий мактаб талабаларига ҳам мурожаат қиламиз— бундай дақиқаларда яхши чора шу! Хуллас, одамларнинг миясини шу қадар гангитиб юборамизки, натижада бош министрнинг ҳам ўтакаси ёрилиб кетади. Натижада маҳбусларнинг озод қилинишига эришамиз ва уларга бу ишларни биз қилдик деймиз. Шунда мен муовин министру сиз Олий Суд раиси бўласиз!

Оғойи шайх яна бир ютишиб олди.

— Унда нимани кутиб ўтирибсиз?— деб хитоб қилди у.

Али Ризохон кулиб юборди:

— Ҳўш, ишнинг маъносига энди тушундингизми? Ҳўп, қани, энди ёрдам берасизми, йўқми?

— Эй сўраб ўтиришнинг ҳожати борми? Ёрдам беримай бўладими? Шундай савобли эзгу ишга ёрдам беришдан бош тортиш Язид ибн Муовия ҳамда Шумри Лаинга¹ ёрдам беришнинг айна ўзи бўлади-ку! Эртагаёқ ишга киришаман.

Али Ризохон мамнуният билан шайхнинг қўлини сиқди.

— Мен нима бўлса ҳам эртагаёқ ўзимнинг бозор-

¹ Имом Ҳусайннинг қотиллари. Шиа мазҳабидагилар уларни ҳамиша лаънатлайдилар.

чиларим, жангари демократлар ва муътадиллар партияси аъзолари билан учрашиб, уларнинг вакилларини уч кундан кейин шу ерга таклиф этаман.

Ўз навбатида, оғойи шайх эртагаёқ, оёгига туфлисини илар-илмас, оқ ва қора саллаларнинг имзосини тўплашга киришишга ваъда берди. У ўз-ўзига: «Шундай алғов-далғов қилайки, бешикдаги болаларни қалтироқ босиб, уларнинг умри ҳам бир неча йилга қисқарсин», дерди.

Вақт алламаҳал бўлиб қолгани учун шайх шу ерда ётиб қолишга мажбур бўлди. Бир соатлардан кейин овқат келтирилди. Улар устига товуқ гўшти ва янчилган ёнғоқ мағзидан тайёрланган қайла солинган паловини иштаҳа билан ейишди. Али Ризохон европача, яъни вилка билан, шайх эса охундларга хос усулда, яъни қўл билан еди-да, кейин ўринга кириб, келажакда қилинадиган ишлар ҳақида хаёл сура-сура ухлаб қолишди.

* * *

Ишлар оҳиста давом этарди. Ҳукумат муассасалари ишламасди. Газеталар, биттасини ҳисобга олмаганда, ҳаяжонланмас эди, чунки ҳар томондан умид шабадаси чиқмай қўйган эди. Бйроқ кишилар ташвишланмас, ҳаяжонланмас эди, чунки ҳар томондан умид шабадаси эсиб турарди.

Ашрофлар турмада ётишарди. Битта-яримта норизодлар бўлса ҳам, лекин уларнинг овози эшитилмасди.

Шунга қарамай, яна ҳукумат ҳақида қандайдир миш-мишлар юрарди. Қимдир одамларга вазият қалқиб турибди, хавф тугиляпти, деб ўқдирарди.

«Кудето»¹ кунидан бир ҳафта ўтди. Совуқ кеча эди. Бўралаб ёмғир аралаш қор ёғар, кўчаларда юриб бўлмасди. Тўпхона майдони бамисоли кўл бўлиб ётарди.

Шундай вақтларда эринчоқ эронлик учун сандалда ўтиришдан ҳам ҳузурлироқ нарса бўлиши мумкинми?

Худди шундай кечада бир неча киши иссиқ сандални ташлаб, Али Ризохоннинг уйи томон йўл олди.

Булар бир-бирига ўхшамайдиган турли тонфадаги одамлар эди: туфли, оқ чалвор ва калта пайпоқ кий-

¹ Давлат тўнтариши. (Ред.)

ган охунд, узун лаббода ва оппоқ пахтадай салла ўраган савдогар, катта мўйна қалпоқ кийган савдогар, кичкина кўкиш салла ўраган сайд, илғорлардан сапалган кулранг кўзойнакли, қора скортук, учи тўмтоқ шапка кийган адлия министрлиги амалдори, ним илғорлардан ҳисобланган, эғнига «арабча» ёқали сардорий, сариқ туфли кийган галстуксиз амалдор, солқа мўйловли, бошига мўйна телпак кийган, чўнтагига тўпшонча солиб олган, асабий тусли студент.

Огойи шайх ўз-ўзи билан гаплашиб борарди: «Мана, одам келажакни сақлаб қолиш учун қандай-қандай ташвишларни бошидан кечирмайди-я! Агар келажакни сақлаб қолиш зарур бўлмаса, шундай совуқда кўчага чиқармидим? Имомзода Яҳё маҳалласидан Дарвозайн Қазвин хиёбонига бориш ҳазил гапми?» Бир хўрсиниб олиб, кейин яна қўшимча қилди: «Нима бўлса ҳам, худон таоло, ўзингга минг қатла шукур! Агар ҳар хил тараққиётчиларга ўхшаб, буни ёмон ният билан қилганимда, бу дунёим ҳам, у дунёим ҳам куйиб кетарди. Энди, худо хоҳласа, муътабар зотларни, айниқса азиз биродарларимни халос этганим учун худо мени у дунёда ярлақайди».

Собиқ бош министрдан олинган пуллар ҳисобига извошда юрадиган оппоқ пахтадай салла ўраган «бозорчи» эса, киракаш арава суянчиғига ўзини ташлаб, ўтмишини эслаб борарди. «Йўқ,— дерди у,— ҳамма нарса партиёга боғлиқ. Дунё мавжуд экан, партиёлар, айниқса, демократлар партиёси яшаши керак. Бундай қараганда, мен шу туфайли одам қаторига қўшилдим. Извошда юраман, министрларни алмаштираман, бош министрга қарши чиқмоқчиман. Энди бас, эски ишга қайтиш йўқ: соат тузатиб, парракчаларни ўрнатаман деб кўздан айрилишга кимнинг тоби бор». У қошини кериб деди: «Бир ҳафтадан кейин маълум бўлади: ё кабинет қулайди, ёки менинг ақлли бошим танидан жудо бўлади. Ҳамма улуг ислоҳчиларнинг тақдири шундай бўлган».

Катта мўйна қалпоқ кийган савдогарнинг ҳамени извошда юришга имкон бермасди. У кўнкада тасбеҳини ўгириб, хўрсиниб ва ўз-ўзича: «Ло илоҳа иллолоҳу...» ни ўқиб борарди.

Баъзан у шундай дерди: «Эй бори худоё худовандо, бу осий бандангни буюк маҳрамадингдан бенасиб қил-

ма. Бу ишларга ақли қасирим дарҳол ета олмагани ва дастлабки вақтларда давлатмандларнинг қамалганига қувонганим ва кулганим учун мени кечир. Энди асло ундай қилмайман. Кеча ҳазрати оғо минбарда туриб астагина: «Агар кимда-ким қамалганлар устидан кулса, гуноҳкори азим бўлади. Шундай қилган одамлар кофир ҳисобланади», дедилар.

Равзахоннинг уйдирма гаплари бу бечорага шундай таъсир қилган эдики, у ўзини ҳақиқатан ҳам салкам кофир ҳисоблаш даражасига етган ва ҳадеганда «астағфирулло, ўзинг сақла, худо!» деб такрорларди.

У бундан бу ёқ бозорнинг «улуғ кишилари!» сўзига сўзсиз қулоқ солишга ва «Челвори»га¹ имзо тўплаш ишида жонбозлик кўрсатишга ваъда берган эди.

Кулранг кўзойнакли «илғор» извошда кетар экан, вазиятни ўз-ўзича муҳокама қилиб борарди. Аслини олганда, у янги ҳукуматнинг программасини маъқуллар эди. Фақат ватанга бўлган муҳаббатигина уни бу йўлни танлашга ва чирик ашрофларнинг қамоқхонада чириб кетишларига йўл қўймасликка мажбур қилар эди.

У ҳақиқатан ватанини яхши кўрарди. Лекин, хизматни астойдил адо этиш ва сукут қилиш билан мансабга кўтарила олмагани уни йўлдан сал оздириб қўйган эди. Мўлжаллаган мансабига эришиш йўлида у ҳар қандай ишдан қайтмасди. У давлат кабинети ташкил топганда уни табриклайдиган ва ағдарилгандан кейин қаттиқ қайғурадиган одамлардан эди!

Абога ўралиб олий мактаб талабаси халлослаб борарди.

У шундай халлослар эдики, ҳатто кечки совуқни ҳам сезмасди. Шу пайтда биров ундан: «Қаерга шунчалик югуриб кетяпсиз? Нима бўлди?» деб сўраб қолса борми, у жаҳл билан: «Ахир, сен олий мактаб талабаларининг дунёда қандай роль ўйнашини билмайсанми? Тарихни ўқимас экансан-да. Эсингни йиғиб ол, ватанимиз хавф остида. Улуғ зотларни авахтага ташлашяптику, сен бўлсанг, анграйиб турибсан!»— деган бўларди.

У бечора шу қадар гўл эдики, Европадаги студентлар сиёсат билан шуғулланаётган бўлса, улар буни

¹ Бу ўринда минглаб бозор аҳлининг имзолари билан тўла маго парчаларига битилган сиёсий арзнома кўзда тутилади.

бутунлай бошқача йўл билан қилаётганини, студентларнинг охундлар, бозорчилар ва савдогарлар қўлида қурол бўлмаслигига ақли етмас эди.

Уйи шу яқин орада бўлган «ярим илғор» амалдор эса, деворлар тагидан эҳтиётлик билан ўтиб, шошилмай, ўзича шивирлаб борарди:

«Мен бу ҳамма гапларни биламан! Уларнинг ниятлари ҳам менга аён. Борибоқ масалани кўндаланг қўяман: «Олдин, оғолар, менга тегадиганини айтинглар. Тақдир тоғангиз ўзини лақиллатишларига йўл қўймайди. Савэ вилояти ҳокимлигини берасизларми, йўқми? Хўп, десанглар, қолиб, қўлимдан келганча ёрдам бераман, йўқ десаңглар, унда сандалда ўтириб, «Минг бир кеча»ни ўқиганим минг марта яхши».

Партиянинг мўътабар аъзолари ана шундай фикрлар билан кун ботиш олдида Али Ризохоннинг уйига йигилишди.

Али Ризохон ишни бошлашдан олдин муҳокама қилинадиган масалаларнинг жуда муҳим эканини ва эҳтимол, мажлиснинг чўзилиб кетишини, лекин бу уларни ташвишлантормаслиги кераклигини, чунки улар шу ерда ётиб қолишлари мумкинлигини, яна овқатланиш учун нон ва пишлоқ ҳам топилишини эълон қилди.

— Бемалол ва қулайроқ бўлсин учун,— деди у,— меҳмонхонага ўрин солиб қўйишни тайинладим.

Бу таклиф бир овоздан қабул қилинди.

Али Ризохон айтган «нон ва пишлоқ»нинг аслида ёғлиқ палов ва унинг устига солинадиган қайладан иборат бўлишини ҳамма яхши биларди.

Чорак соатлардан кейин мажлис бошланди. Раис қўнғироқчани чалди.

Али Ризохон мажлисни бошлашдан олдин ўзи таклиф қилган резолюция лойиҳасини эълон қилди. «Мамлакатнинг аҳволи,— дейилганди унда, — кундан-кунга чигаллашиб кетяпти. Қамоққа олинганларнинг ҳар бири ўз вилоятларида катта эътиборга эга бўлган кишилар ва ҳозир ана шу вилоятларнинг аҳолиси Техронга юриш қилиш учун аскар тўплаётгани ҳақида хабарлар бор. Қон тўкилиш хавфи туғилмоқда. Бу бизнинг эътиқодимизга асло тўғри келмайди...»

— Иккинчи томондан,— деб қўшиб қўйди Али Ризохон,— мен мансуб бўлган юксак маҳкама адолат кошонаси — Адлия министрлиги бу ҳақда расман огоҳ-

лантирилган, гүе бу нуфузли маҳкамани истибдод маҳкамасига айлантирмоқчи эканлар...

Али Ризохон берган ахборот мажлис аҳлига шундай қаттиқ таъсир қилдики, баъзи илғорлар, ҳатто уни қарсак билан кутиб олдилар. Охундларнинг қарсак чалиши мумкин бўлмагани учун улар «салавот, салавот» деб қўйишди. Катта мўйна қалпоқли бозорчи ҳам «салавот» деди. Оппоқ пахтадай салла ўраган бозорчи эса, бир-икки бор чапак чалиб деди:

— Агар ноўрин ҳаракат қилиб қўйсам, мени кечирिशларингизни сўрайман. Биз оталаримиз мерос қилиб ўргатган нарсадан бошқасини билмаймиз-да. Оғоларнинг чапак чалишлари ва оғойи Н... ашшарининг «салавот» дейишлари ҳаммаси маъқул, ростини айтганда, бизлар ҳам сизлардан камроқ мамнун эмасмиз.

Мажлис ярим кечагача чўзилди.

Ниҳоят, соат бешда Али Ризохон таклиф этган резолюция қабул қилинди, қамоқдагилар ҳақида дуо ўқилиб, мажлис тугагач, мажлис аҳли овқатга ўтирди.

XXI боб

БИР ТУН ХОТИРАСИ

Биз Фаррухни, боласини шинелига ўраб, қоронғилик қўйнига кириб, кўздан ғойиб бўлган пайтда йўқотиб қўйган эди.

Ўша вақтда Техронда Фаррухнинг уйи йўқ эди. Уни дўстларидан бири, Фаррух ўз саргузаштини айтиб беришга ваъда қилган ва Ф... уссалтанани қамоққа олиш учун юборилган дўсти уйига таклиф қилди.

Фаррух йўлда тўда-тўда учраб турган казаклардан ҳайиқмай, дўстининг уйи томон бамайлихотир қорарди.

— Муҳим топшириқ билан шаҳарнинг нариги томонига ўтишим керак— дерди у казакларга.

Уни ўз одамларидан деб билган казаклар кўп тўхтатишмасди. Чорак кам бир соат деганда у дўсти яшайдиган кўчага етиб борди, унинг уйини топиб, эшикни тақиллатди.

Еш хизматкор ҳеч ваҳимага тушмай эшик олдига келди-да:

— Ким?— деб сўради.

— Мени уйнинг эгаси юборди, эшикни очинг,— деди Фаррух.

— Бирор белги айта оласизми?

— Бундан уч кун бурун у ўзининг келганидан сизларни хабардор қилиш учун Қазвиндан кўк пакет юборган. Шунингдек, у бундан икки соат олдин уйига келиб, тошширқини бажариш учун яна қайтиб кетди,— деб жавоб берди Фаррух.

Буни эшитиб хизматкор эшикни очди-ю, аммо дарҳол яна бекитди.

— Қўрқма. Ахир, бу офицернинг уйи-ку, ҳеч гап бўлмайди.

— Узимдан қўрқаётганим йўқ, уйдагиларга бирор нарса бўлиб қолмасин деяпман, холос,— деб жавоб берди хизматкор.

Хизматкор Фаррухни кичикроқ, лекин шинам хонага олиб кирди. Хонадаги печкада олов ловиллаб ёниб турарди. Хизматкор чироқни ёқиб сўради:

— Қандай овқат буюрасиз?

— Овқат керак эмас,— деди Фаррух. — Менга ухлагани жой кўрсатсангиз бўлгани.

Хизматкор шу заҳотиёқ бошқа бир хонанинг эшигини очди. Унда икки ўрин тайёр бўлиб, улардан бири Фаррух учун, бошқаси уй эгасиники эди. Фаррух хизматкорга раҳмат айтиб, ичкари кирди-да, эндигина уй-гонган, лекин йиғламай, тинч турган болани ўринга ётқизди.

Фаррух боланинг юзига боқиб, унинг жуда ҳам опасига ўхшаш эканини кўрди. Бир вақтнинг ўзида унинг хаёлида бир олам аччиқ ва ширин хотира жонланди. У беихтиёр бошини қуйи солди.

У ҳали ҳам Маҳиннинг оламдан ўтганига ишонгани келмасди. Ҳозир у болага қанча кўп тикилса, юрак уриши шунчалик тезлашарди.

Шу кеча Фаррух учун жуда оғир бўлди. У тўрт йил мобайнида Маҳин билан учрашиш, унинг қалбга қувонч бахш этадиган ёқимли овозини эшитиш, уни қучоқлаб юзидан, қўлларидан, оёқларидан ўпиш, ўз юзида унинг алангали нафасини ҳис қилиш даққалари ҳақида орзу қилар эди. У шунда бутун борлигини унутиб:

«Сен яна мен билан биргасан. Маҳин, шунинг ўзи бас, менга бошқа ҳеч нарса керакмас. Сен менинг жонимсан. Сени севдим, севаман, мангу севаман...» демоқ орзусида эди.

У нимани эшитди! Фаррух хаёлида мени ҳамон ку-
тастибди деб ўйлагани — Маҳин заҳарли ҳаёт билан
видолашганига анча йил бўлган эди. Энди у Маҳинни
бутунлай, бутунлай кўрмайди.

Бу фикр билан сира келиша олмасди, бунга ақли ҳам
бовар қилмасди. Ғоятда даҳшатли, чидаб бўлмайдиган,
киши ишонмайдиган бу бемаъниликка жавоб топишга
урингандек, у ўз бошига қайта-қайта муштлади.

Кейин, бир оз ўзига келгач, у бу воқеанинг ҳақиқа-
тан ҳам содир бўлгани, энди уни қайтариб бўлмаслиги-
ни, энди уни асло кўра олмаслигини англаб, бир дар-
дига минг дард қўшилди. Унинг кўзларидан шашқатор
ёш оқарди. Бола хотиржам, тинчгина ухлаб ётарди.
Фаррух бўлса, унинг ёнида йиғлаб ўтирарди. Орадан
бир неча соат ўтди. Унинг кўз ёшлари тўкилган сари
фикри равшанлашиб борарди. Аста-секин бутун воқеани
эсига туширди. Мана, унинг кўз олдида Эвин, ўша тун,
ўшанда оғойи Ф... уссалтананинг келгани ва қучоғидан
Маҳинни тортиб олгани, Жаводни қамашгани, ҳамма-
си, ҳаммаси ёнида.

Бу хотираларда ҳеч қандай янгилик йўқ эди. Тўрт
йил давомида бу воқеалар унинг кўз ўнгидан бирор
зум бўлсин нари кетмаганди. Бироқ фарқи ҳам бор эди:
илгари у Муҳин тирик деб ўйларди. У маҳалларда фик-
рининг маълум чеки бор эди. Энди-чи? Энди фикри-
нинг интиҳоси йўқ эди...

Соат стрелкаси илгарилаб борар, лекин Фаррух бо-
ласининг бошида унинг майин қўнғир сочини ўйнаб,
йиғлаб ўтирарди.

Бир вақтлари у ўч олиш ҳақида, шундай қайғусига
сабабчи бўлганлардан аёвсиз ўч олиш ҳақида ўйлаган
эди. Энди у ўч олишнинг кераксиз бир нарса эканлиги-
ни пайқади. Ўч олишнинг нима ҳожати бор?

Ахир, у Маҳиндан бутунлай айрилди-ку. Энди бош-
қаларни бахтсиз қилишдан фойда борми? Агар энди
бутун дунёга ўт қўйиб юборганида ҳам, бундан на тин-
чийди ва на ҳаловат топади. Чунки, у йўқотган кимса
ҳамма нарсадан ҳам қимматли эди.

Шундай бўлса ҳам у ўз-ўзига: бу кишиларни ўз ҳо-
лига ташлаб қўймайман, дерди. Фикри чувалашиб кет-
ган, у нима қилишни — ўч олишни ҳам ёки ўзи ҳақида
ўйлашни, ўз ҳаётини яхшилашга ҳаракат қилишни ҳам
билмасди.

Мана шу йиллар мобайнида Фаррух жуда қаттиқ азобланди. Лекин, Маҳинни кўриш орзусида яшагани сабабли бу азоблар уни мағлуб эта олмаган эди. Энди бўлса, содир бўлган воқеаларни ўйлар экан, у бошидан ўтган ҳамма нарсаларнинг ўз таъсирини энди кўрсатаётганини сезмоқда эди. Чиндан-да, Фаррух ўзгариб кетган эди. Пешонасини ажинлар босган, бир неча ёш улгайиб қолганга ўхшарди. У куч-қуввати барбод бўлгани, гўё ўн йилда ҳам киши шунчалик куч-қувватдан қолмаслигини сезиб турарди.

Муҳаббат зўр қудратга эга. У шу қадар зўр қудратга эгаки, ҳатто уни тасвир этишга қалам ожизлик қилади.

Фаррух болани оҳиста ўпиб шундай деди:

— Ҳозир мен сени иссиқ, юмшоққина ўрнингдан юлқиб олиб, бу ерга келтирдим. Бир вақтлари севгим туфайли ойингни ҳам онасининг кучоғидан худди шундай қилиб юлқиб олган эдим. У ишимнинг оқибати ёмон бўлганди. Лекин, сени олиб келганим ўшандай оқибатларга сабаб бўлмайди, чунки бу ишни ёш Фаррух эмас, сенинг кекса отанг, йигирма беш ёшида кексайиб қолган отанг қилди. У ҳар маҳал сенга гамхўрлик қилади.

Қожория ва узоқдаги бошқа маҳаллалардан ўқтин-ўқтин отишма овозлари келиб турарди.

Фаррух бўлса, буни эшитиб ўзича гапирарди: «Ҳа, ҳамма нарсани поймол қиладиган бекорчи хўжалар шу бугун кечаси, шу тунда қамоққа олинади. Энди улардан бирортаси ҳам самимий муҳаббатдан бўлак гуноҳи бўлмаган бечораларни азоблай олмайди... Ҳа, одамни фақат севгани учун бахтсиз қилиш инсофданми!»

Шу дақиқада у ўрnidан ирғиб туриб, шаҳарнинг баъзи жойларида қурол ишлатишга мажбур бўлаётган казакларга ёрдам бериш учун отилгиси келди.

Бироқ, боласининг устига энгашиб пичирлади:

— Сени қандай қилиб ташлаб кетаман? Мендан сени ҳам тортиб олсалар-чи, сендан умрбод айрилиб қолсам-а?

Фаррух титраб кетди. «Наҳотки, улар шундай бағритош, шундай шафқатсиз бўлишса, наҳотки онасидан ягона ёдгорлик бўлиб қолган ўғлимни тортиб олиб, мени ҳалок қилишга журъат этишса?»

Гўё биров боласини тортиб олиш учун хонага кириб келаётгандек, у тўппончасини чиқарди:

— Майли, келишаверсин. Унга қўл тегизган одамнинг минг жонидан бир жонини қўймайман.

Шу пайтда хонага мабодо бирон одам кириб қолганда борми, Фаррухнинг унга ташланиши, эҳтимол, ярадор қилиши ёки ўлдириб қўйиши ҳам мумкин эди. Унинг кўзларидан ўт чақнарди.

Фаррух чорак соатча ана шундай ҳолатда ўтирди. Кейин ҳаяжонларининг бефойда эканини англаб, тинчланди.

Отишмалар ҳам тўхтади. Техронни яна сукунат қамраб олди.

Соат олтилар чамаси. Тонг ёриша бошлади. Фаррух бўлса, ҳали ҳам боласининг бошида, унга термулиб ўтирарди. Хонага тушиб турган тонгнинг ғира-шира ёруғида Фаррухнинг ранги қум-қув ўчиб, кўз ёшларидан хиралашиб қолган кўзларининг киртайиб қолгани сезилиб турарди. У бирор дақиқа ҳам кўз юммади, эҳтимол, у туннинг қандай ўтганини ва тонг отганини ҳам пайқамаган эди. Унинг учун ёруғ кун ўзининг қимматини йўқотган, унинг учун ҳамма нарса барбод урилган эди. У ҳеч нарса ҳақида ўйламас, ёруғ жаҳон эса, унга қоп-қоронғи зулмат бўлиб кўринарди.

Орадан яна анча вақт ўтди. Қимдир эшикни оҳиста тақиллатди.

— Ким у?— деб сўради Фаррух.

Келган одам кечаги хизматкор экан. У Фаррухдан нонуштага майли қандай эканини сўради.

— Соат неча бўлди?— деб сўради Фаррух.

— Ўн яримга яқинлашиб қолди,— деди хизматкор.— Безовта қилганим учун кечиринг, оғони ҳар кун эрталаб уйғотишга одатланиб қолганман. Ҳозир ҳам, эҳтимол, сиз бирор ёққа борадиган ишингиз бордир, деб ўйлаган эдим.

— Ҳақиқатан ишим бор,— деди Фаррух оҳиста.

Кейин хизматкор эшитмасин учун жуда секин қўшиб қўйди:

— Ҳа, лекин болани нима қилай? Бирдан уни олиб кетиб қолишса-я?— Фаррухнинг кўзлари уйқусизликдан қизариб кетган, кўриниши ҳам ҳорғин эди. У наридан-бери юзини ювиб, хизматкорни чақирди-да, деди:

— Бола ҳозирча шу ерда қолади. Агар лозим бўлиб қолса, уни у-бу ҳилиб оутиб тургин, йиғламасин, мен иложи борича тезроқ қайтишга ҳаракат қиламан.

Хизматкор Фаррухнинг кўзида, агар бирор нарса унинг айтганича бўлмаса, бутун шаҳарни остун-устун қилиб юборишга тайёр эканини пайқаб, ҳамма айтганини сўзсиз бажаришга ваъда берди.

Фаррух боланинг юзидан ўпиб, кўчага чиқди-да, хизмат билан овора бўлиб, тун бўйи ухламаган дўстини кўргани Қазакхонага югурди.

— Қамоққа олинган бдамни нима қилдиларингиз?— деб сўради Фаррух дўстидан.

— Ҳеч нима қилганимиз йўқ. Маҳсус юборилган офицерга топширдим. У ҳозир катта залда. Ухлаб ётибдими ёки уйғоқ ўтирибдими, билмайман.

— Энди сиз дам олинг. Уйга кетаверинг. Сувориларга бошчилик қилишни мен ўз зиммамга оламан. Лекин сиздан битта илтимос бор эди... — деди Фаррух.

— Қўлимдан келган ҳамма нарсани қиламан.

— Биласизми, менинг болам бор эди,— деди Фаррух,— ҳозир у сизнинг уйингизда...

Кейин бошқа оҳангда илова қилди:

— Борганингиздан кейин ундан хабар олинг, дўстим. У менинг бирдан-бир овунчоғим... Онасидан ёдгорлик... Тўғрисини айтсам, фақат ўша болани яхши парвариш қилиш учунгина яшашга мажбурман. Акс ҳолда аллақачон онаси кетидан лаҳадга жўнаган бўлардим.

Фаррухнинг хизматдоши унинг тарихини билмаса ҳам, бунга муҳаббат аралашгани ва шу кеча дўстининг ўз севгилисини топиш умиди тамоман барбод бўлганини англаб, ниҳоятда зўр меҳрибонлик билан деди:

— Хотиржам бўл! Уйга қайтганингда, ўғлингни сопа-соғ, вақти чоғ кўрасан.

Фаррух суюниб кетиб, дўстини ўпди, кейин казак жиловидан тутиб турган отга сакраб минди-да, олтига казакни бошлаб, Жалолобод хиёбонига чиқди.

Бизга маълумки, у пешинга яқин шаҳарнинг жануб томонидан қайтар экан, Жаводни учратиб қолган ва уни кечқурун дўстининг уйига таклиф қилган эди.

У ғамгин ва паришон ҳолда шаҳарнинг шимолий маҳаллалари томон борарди. Унинг фикри-зикри ўғли билан бўлгани учун бошқа ҳеч нарса ҳақида ўйламасди. Маҳиндан айрилгандан кейин, унинг ҳеч суянчиги қолмаганди, шунинг учун ҳам бирдан-бир истаги Маҳиндан ёдгорлик бўлган ўғлини тарбиялаш эди.

Фаррух ҳадеб соатига қарарди.

«Икки соатдан кейин уни кўраман,— деб ўйларди у.— Йўқ, уни мендан тортиб олишолмайди».

Унинг юзида ғазаб ўрнида ташвиш ва изтироб акс этарди. У боланинг келажаги учун жавобгар экани ва энди ҳар қандай хавф-хатарга ўзини ура бермаслиги кераклигини бутун вужуди билан ҳис қиларди. Маҳиннинг ўлимини ва шу фожиага сабаб бўлганларни ўйлаганда эса, ғазаби қайнаб кетиб, уларни жазолашга аҳд қиларди. Лекин, айтилиши вақтда, болаини ўйлаб яна бошини қуйи соларди. Маҳиннинг ўлими унинг фикрини бутунлай чалкаштириб юборган, уни қиладиган ишларини ҳам унутишга мажбур этган эди...

Тўрт йил мобайнида у илгариги душманларини ҳам, дўстларини ҳам кўз олдига келтириб юрди. У Техронга қайтган заҳоти уларни қидириб топишга аҳд қилиб қўйган эди. Фаррух Иффатни ҳам эслаб-эслаб қўяр ва унга берган ваъдасини бажара олмагани учун қийналиб юрарди, у ўшанда Али Ашрафхонни қидириб топиб, Иффатнинг тортган азоблари учун ундан ўч олмоқчи, ўша пайтда Али Ашрофхонга нима деб дўқ урган бўлса, (у Фаррухни мазақ қилган эди) ҳаммасини амалга оширмоқчи, бекордан-бекорга киши номусини поймол этиш мумкин эмаслигини англатиб, кўзини мошдай очиб қўймоқчи эди.

Фаррух Сиёвуш Мирзога мазақ қилиш қандай бўлишини кўрсатиб қўйишга аҳд қилган эди. Бироқ Маҳиннинг ўлими ҳақидаги хабар унинг бутун фикрларини айқаш-уйқаш қилиб юборди.

Соат бирларга яқин Фаррух казаклар билан Юсуфобод дарвозасига етиб борди. Энди шаҳар ташқарисига чиқиб, атрофни кўздан кечириш керак эди. Чунки, унинг зиммасига ҳеч қандай тартибсизликка йўл қўймаслик вазифаси юклатилган эди.

Бу ерларда ҳамма ёқ осойишта, халқнинг ё бирор иш қилишга юраги бетларди, ёки казакларнинг ҳаракати уларнинг истакларига мос эди. Хуллас, бирор ерда на норозилик бор эди-ю ва на ғалаён нишонаси.

Аббосий хиёбонига яқинлашганда Фаррух ўз-ўзига: «Кириб Иффатни кўриб чиқсам-чи, у тирикмикин? У ҳам ўлган бўлса-я: ҳамма мени ташлаб кетяпти...» деди. Кейин у отини Аббосий хиёбонига бурди. Казаклар унинг кетидан эргашдилар.

Дарвоза олдида илгаригидек озода кийинган хизматкор йўқ эди. Уйнинг ўзи ҳам қандайдир бефайз кўринарди. Уй қаровсиз қолгани ва биров келиб хабар олмай қўйгани сезилиб турарди.

Фаррух казакларнинг бирига отдан тушиб, эшикни тақиллатишни буюрди.

Орадан бир неча дақиқа ўтди. Ниҳоят, эшик очилиб, мункайган хизматкор чол кўринди. Офицерни ва казакларни кўриб, унинг ранги оқариб кетди.

— Нима керак?— деб сўради у тутила-тутила.

Унинг қўрқиб кетганини кўрган Фаррух:

— Қўрқманг, биз ҳеч кимни қамамоқчи эмасмиз, фақат сиздан баъзи нарсаларни сўрамоқчимиз, холос,— деди.

Чол ютиниб дарҳол жавоб берди:

— Агар бировни қамамоқчи бўлганингизда ҳам уйда мен билан Жаъфарқулидан бўлак эркак киши йўқ.

Фаррух чолнинг жавобидан норози бўлиб деди:

— Гапга тушунасизми, ўзи? Ҳеч кимни қамамоқчи эмасмиз, дедим-ку. Мен фақат оғойи Р... уддавла ҳалли ҳам шу ерда яшайдими, шуни билмоқчиман?

— Жойлари жаннатда бўлсин у кишининг, тирикликларида шу ерда яшардилар.

Фаррух ўзича: «Демак, у ҳам отамдан кейин вафот этган экан-да», деб ўйлади, кейин:

— Ҳозир бу ерда ким туради?— деб сўради.

— Ким турарди! Умрлари узоқ бўлсин, хоним билан қизлари туришади.

Фаррух отдан сакраб тушди. У казакларга Юсуф-обод хижбони муюлишида кутиб туришни буюрди, казаклар жўнаб кетишди.

— Сиз мени кўрган бўлсангиз керак-а, бир эслаб боқинг-чи,— деди Фаррух чолга.— Мен сизни танидим.

Чол унинг юзига тикилиб туриб, тўсатдан қичқириб юборди:

— Оғо, ҳа, бу сизсиз-ку, сиз!

Кейин кучи борица уйга қараб югуриб кетди.

— Хоним,— деб бақирди у,— суюнчи беринг, суюнчи! Сиз кутаётган оғо келди! Келди!

Ҳайрон қолган Фаррух унинг кетидан эргашди. Бирдан у эшик тирқишидан қора кийимли аёлни кўриб қолди. У Иффат эди. Севинганидан аёл шундай бўшашиб кетдики, сал бўлмаса ағдарилиб туша ёзди.

«Энди учрашганимда, бундан ҳам айрилиб қолай дедим-а!»— деб ўйлади Фаррух ва югуриб бориб, Иффатни кўтариб олди.

ХИ БОБ

ИККИ ЖАФОКАШ

Маҳиннинг энагаси Иффатга: «Болани отаси олиб кетди»,— деганда у, энага ҳазиллашяпти деб ўйлади, кейинроқ кексалик натижасида сал ақлдан озган бўлса керак, деган қарорга келди. Лекин энага имом Исмоил қабрини ўртага солиб, Фаррухни ўз кўзи билан кўргани ҳақида онт ичганидан кейин, Иффат югуриб бориб, унинг қўлини қаттиқ сиқди.

— Ростданми? Узингиз кўрдингизми? Ўз кўзингиз билан-а?

Кампирнинг аччиғи чиқди:

— Хоним, бу нима қилганингиз: суюнчи бериш ўрнига қариган чоғимда қўлимни синдирмоқчимисиз? Нега алдар эканман? Кўрдимми, кўрдим, бошқа гапга ўрин йўқ. У мен билан гаплашди, кейин ўғлини олиб кетди.

— Агар ҳамма гап шу айтганингиздай бўлса,— деди Иффат,— мендан кагта суюнчи оласиз.

Кампир Фаррухнинг келгани, шовқин солиб ҳаммани уйғотиб юборгани, ўғлини талаб қилгани, ўзи уни қандай танигани ва боласини қандай олиб кетгани, оғойи Ф... уссалтаннинг қамоққа олингани — ҳаммасини батафсил гапириб берди. Иффат кампирдан унинг қаерда туришини сўраб, деди:

— Мен ҳозирнинг ўзида унинг олдига боришим керак, ҳозирнинг ўзида!

— Афсуски, билмайман. У шу бугун эрталаб уйини айтишга ваъда берган эди. Шунинг учун ҳам мен шу пайтгача бу ерга келолмадим, кутиб ўтирган эдим. Қарасам, келавермайдиган, ташвишланиб, сизнинг олдингизга маслаҳат сўрагани келдим: мабодо оғомизни қамоқдан бўшатиб юборишса, у киши бола қани, деб сўраса, нима деб жавоб берсамиким?

Иффатнинг миясига ғалати фикр келди: «Кампир умуман Фаррухни кўрмаган бўлса-чи, бунинг ҳаммаси болани ўғирлаб, кейин оғойи Ф... уссалтанадан бола

эвазига ҳақ талаб қилиб, шу орқали бойимоқчи бўлган шоввозларнинг иши эмасмикин?»

Лекин, кампир Фаррухнинг Маҳин ўлимини эшитиб, қандай аҳволга тушгани ҳақида гапиришга тушди:

— Сиз Фаррухнинг ўзини кўрганингизга имонингиз комилми?

Энага қаттиқ тутақиб кетди:

— Ие, нима деяпсиз ўзингиз, кексайиб гаранг, овсар бўлиб қолибманми? Фаррух менинг кўз олдимда ўсган-а: акамнинг хотини унинг энагаси эди. Қандай қилиб мен уни танимас эканман?

— Агар ундай бўлса, дарров уйингизга боринг. У сизга бирор кишидан адресини бериб юборади, телефон орқали менга айтасиз.

Кампир уйига кетди.

У қайтиб келганда, Ҳусайнқули дарвоза олдида туриб олиб, оғойи Ф... уссалтанани қамаганларни лаънатламоқда эди.

— Уларга маршрута камлик қилувди! Мана, энди қандай ишлар билан шуғулланишяпти!

— Ҳеч ким келмадими?— деб сўради кампир.

— Энди ким ҳам келарди? Бизни хўжайинсиз қолдириб, оғони олиб кетишди. Шошмай тур, бошларимиздан ҳам айрилмасак ҳали!

Кампир ҳеч кимнинг келмаганини билиб, сўради:

— Ҳақиқатан ҳам, нима қиламиз-а... оғонинг қамалишини?

— Нима қиламиз?— хитоб қилди Ҳусайнқули. — Бу маршрутчилар дастидан ҳатто шоҳнинг ўзи ҳам мамлакатдан қочиб кетди-ку, бизнинг қўлимиздан нима иш келарди? Ҳеч нарса қилолмаймиз. Кутиб турайлик-чи, эҳтимол, худойи таоло уларнинг кўнглига раҳм солиб, мендек чолни азоблашмас.

Энага ичкари ҳовлига кириб, Фаррухни ёки унинг одамини кута бошлади.

Шу маҳалда Иффат уйда нима қилишини билмай, хонадан хонага ўтиб юрарди. Унинг оғойи Ф... уссалтанани уйига қилган телефонига Фаррухдан ҳали ҳеч қандай дарак йўқ, деб жавоб беришарди.

У гоҳо энага янглишган, бу, албатта, оғойи Ф... уссалтананинг бойлигига кўз олайтирган бирор жиноятчининг найранги, деб қатъий қарорга келар, гоҳо эса, яна умидвор бўлиб, ўзига: у янглишиши мумкин эмас, дерди.

Чошгоҳ бўлди, ундан ҳам ўтди. Иффат деярли ҳар дақиқада энагага телефон қиларди. Лекин, у ёқдан бирдек ҳеч қандай хабар йўқ, ҳеч ким келмади, деб жавоб беришарди. Ниҳоят, Иффат тақдирга тан бериб, нима бўлишини кута бошлади. Бу воқеадан хабардор бўлган онаси ҳам унинг ёнида ўтирар эди.

— У казак формасида экан,— дерди онаси,— демак, бугун иши жуда кўпайиб кетган ва шунинг учун шу пайтгача келолмаётган бўлиши мумкин.

Иффат ҳеч қандай жавоб бермасди.

Соат иккиларда Иффат тоқат қила олмай, яна телефон трубкасини қўлига олган эдики, тўсатдан ҳовлидан кекса хизматкорнинг: «суюнчи, суюнчи!» деган овози эшитилди.

У трубкани ташлаб, эшикка югурди ва казак мундири кийган, чанг-тўзонга беланган, кўзлари алам ва кўп ёш тўкканидан ич-ичига тушиб кетган Фаррухни кўрди.

Бир неча сониядан кейин Фаррух Иффатни кўтариб, ичкарига олиб кирди-да, диванга ётқизди. Яна бир неча дақиқадан кейин Иффат кўзини очиб, ёнида ўтирган Фаррухга тикилиб қолди.

Шу пайт хонага қувончи ичига сиғмаган онаси югуриб кирди.

— Келдингизми! Демак, энди қизим шўрлик халос бўлибди!

Фаррух бу гапнинг маъносига тушунмай, Иффатнинг онасига одоб билан салом берди.

Фаррухнинг ҳайрон бўлаётганини кўриб, хоним унинг бедарак йўқолганидан сўнг Иффатнинг қандай азоблангани, дардга чалиниб қолгани ва докторларнинг у фақат кутаётган одамини кўргандан кейингина тузалади, деганларини гапириб берди.

Фаррух бошини қуйи солиб, ўйлаиб қолди:

«Демак, ҳамма мушкул аҳволда, ҳамма азоб-уқубатда экан-да».

Хоним шу дақиқаларда ўзининг бу ерда ўтириши ортиқча эканлигини пайқаб, Фаррух учун бирор овқат тайёрлаш баҳонаси билан чиқиб кетди.

Иффат аста Фаррухнинг қўлидан ушлади.

— Хайрият, мени ташлаб бу дунёдан кетмабсан, мени мангу азобга солмабсан! Раҳмат.

Иффатнинг қўли иссиқ бўлиб, титрар эди. Фаррух буни сезиб, Иффатнинг илгари ўзига боғланиб юрганини эслаб, ўз-ўзидан сўради: «Наҳотки, у мени шу даражада севса?»

Иффатнинг очиқ, мулойим қарашлари, унинг бахт ва эркалик жилоланиб турган юзлари Фаррухга жуда ғалати таъсир қилмоқда эди. Шу дақиқада у Маҳиннинг мотами билан тўлиб-тошган, унинг юрагида бошқа бирор киши учун ўрин йўқ бўлса ҳам, у Иффатнинг жуда қаттиқ азоб тортганини, ҳозир унинг илиқ эркалатишларга муҳтож эканини сезиб турарди. У яна Иффатнинг қўлини олиб, силаб туриб деди:

— Сен мени шундай бўлишини хоҳлаган деб ўйларсан, балки?

— Йўқ, мен бу ҳақда ўйлаганим йўқ,— деб жавоб берди Иффат. — Мен сенга ўхшаганларнинг бахтли бўлиши мумкин эмаслигини билардим. Мен ўша кунлари сени катта фалокат кутаётганини сезган эдим. Эсингдами, сенинг Шимронга боришинга қаршилиқ қилган эдим? Лекин, сен бунга бошқача маъно берасан деб қўрқиб, оёқ тираб туриб олмагандим. Мен ҳаммасини билар эдим.

Фаррухнинг кўзлари ғазабдан чақнаб кетди:

— Билардим дейсанми?— сўради у Иффатнинг қўлини қаттиқ қисиб.— Менга мана шундай азоблар тайёрлашаётганини билганмидинг? Маҳинимни ҳалокат ёқасига судраётганларидан хабардормидинг? Била туриб бу ҳақда менга ҳеч нарса айтмадингми? Сен улар билан тил бириктирганмидинг?

— Жинни бўлдингми?— деб қичқирди Иффат.— Мен сенга, фақат сезган эдим, дедим. Менга қара, кўзларимга қара, Фаррух! Фаррух! Мен билан бундай гаплашма. Маҳинга қанча қайғурдим, қанча йиғладим. Сен бўлсанг, менинг тўғримда шундай хаёлларга боряпсан. О, йўқ! Йўқ!

У ортиқ гапира олмади. Кўзларидан тирқираб ёш қуйилди. Унинг овозида бутун руҳи типирчиларди. Бу овоз, бу ёшлар юракни шундай эзар эдики, Фаррухнинг аҳволи руҳияси дарров ўзгарди. У Иффатни ўзига тортиб, бошини кўкрагига босди.

— Йўқ, йўқ, кечир мени, — деди у, — кечир!

Иффат унга гўзал юзини ўгириб, кўзларига узоқ термулди.

— Йўқ, сенинг ҳеч гуноҳинг йўқ, мен сенинг ғамингга ғам қўшмаслигим керак.

Уларнинг иккаласи ҳам бир хилда бахтсиз эдилар. Иккаласи ҳам жуда кўп азоб тортган, иккаласи ҳам тақдирларини лаънатлашар эди. Чунки, уларнинг иккаласи ҳам тақдирнинг истеҳзоли газабига дучор бўлишган эди. Уларнинг иккаласи ҳам шодликнинг нима эканини унутиб, фақат азобнигина билар ва барабар курашиб, ҳамма нарсага қатъийлик билан бардош берардилар. Шунинг учун ҳам уларнинг ҳар бири шеригидаги азоб ва ғам юкининг жуда бўлмаса озроғини олиб ташлашни истар эди.

Ярим соатча вақт ўтди. Бир оз тинчлангач, Иффат шундай деди:

— Сен шу йиллар мобайнида нималарни бошингдан кечирдинг, айтиб бер.

— Нималарни бўларди? Сон-саноқсиз қайғули воқеалар. Айтиб ўтиришнинг ҳам ҳожати йўқ. Фақат ғамингга ғам қўшилади, холос,— деб жавоб берди Фаррух.

— Йўқ, йўқ, мен ҳаммасини, энг майда икир-чикригача билишни хоҳлайман. Сени қайтадан учратган бир пайтимда, сен мени яна ҳаётга қайтарган ва жон бахш этган бир пайтда менга ҳаммасини гапириб беришинг керак!

— Биласанми, бошимдан кечирганларимни жуда кўплар эшитишни хоҳлайди. Уларнинг ҳар бирига ўзим тўғримда алоҳида-алоҳида гапириб бера олмайман. Шунинг учун бирор кун уларнинг ҳаммаси бир жойга тўпланишса, мен ҳаммасини батафсил ҳикоя қилиб бераман!

Иффат бу таклифни маъқуллади.

— Хўш, Али Ашрафхон масаласи нима бўлди?— деб сўради Фаррух.

Иффат ғамгин жилмайиб деди:

— Шу пайтда топган гапингни қара-я. Мен у ҳақда эшитишни ҳам хоҳламайман. Бугунги кун ҳаётимнинг энг бахтли кунларидан бири, бугун мен сени кўрдим. Бошқалар нима бўлса, менга барибир.

— Мен бўлсам, ҳали ваъдамни унутганим йўқ. Ҳозир, қўлимдан бирор нш келадиган пайтда, мен уни ва муттаҳам акасини жазолайман!

Иффат унга қаради. Фаррухга унинг кўзларидан

қандайдир учқунлар чиқиб юрагига санчилаётгандек бўлиб кетди. Шу дақиқада Фаррухни жуда ғалати ҳолат қамраб олган эди. Унда чуқур ички кураш давом этарди. У ҳали Маҳинни севарди. Лекин, у Маҳин бундан тўрт йил муқаддам кўзларини абадий юмганини ўйлаб, Иффатнинг ўзига қандай муҳаббат билан боқишини кўрар экан, бошқа бир фикр унинг миясида яшиндек пайдо бўлди.

У бу фикрни ўзидан ҳайдар эди. У ўз-ўзига: «Маҳиндан кейин яна бошқани севиш қандай бўларкин?»— дерди.

Фаррух Иффатнинг севишини биларди. Лекин, бунчалик севишидан беҳабар эди! Шу тўрт йил ичида доим уни кутиш, фақат у ҳақда ўйлаш, унга мотам тутиш. Ахир Иффат шу тўрт йил ичида ҳаётдан воз кечиб яшаган-ку. Унинг ҳаёти ўлим билан ҳаётнинг ўртасидаги бир нарсага ўхшарди. У хурсандчиликни ҳам, ҳузур-ҳаловатни ҳам билмаган ва мана шу тўрт йил давомида ўз ҳаётига мотам тутган соқов дарвешдек яшаган.

Уй хизматкорлари унга ачинишиб:

— Бечора хоним, нега мунча азоб чекади-я? Унга нима бўлдикин?— дейишарди.

Иффат учун ҳаётдаги ҳамма нарса фарқсиз эди. У яхши ёки ёмон овқатнинг, яхши ёки ёмон ҳавонинг нима эканлигини билмас, кимнинг яхши, кимнинг ёмон эканлигининг ҳам фарқига бормас эди. У доим дерди:

— Усиз менга ҳамма нарса барибир. Агар унга бирор нарса ёққанда, унда менга ҳам ёққан бўларди. Ҳозир, у мен билан бирга эмас экан, менга ҳеч нарса керак эмас...

Унинг севгиси ана шундай эди.

Фаррух билан учрашув бахти унинг сарғайиб кетган юзига аста-секин ранг киритди. Мана шу қисқа дақиқаларнинг ўзи гўё узоқ йиллар қайғусини енгиш ва ўтган йилларнинг ғамгин изларини унинг юзидан сидириб ташлаш учун шошилаётгандек туюларди. Фаррух буни кўриб, унинг ҳиссиётларини сеза бошлади. Лекин, у мана шу дақиқада унга ҳам шундай ҳиссиёт билан жавоб бериш ва унга бахт ҳадя қилиши мумкинмиди?

Иффат уни бениҳоя изтироб ва ташвиш билан тикилар эди. Унинг кўзлари шунча узоқ азоб тортиш ва соғинишлар эвазига ундан «ҳа» деган жавоб сўзларини

кутмоқда эди. Бироқ, Фаррух бу сўзларни айта олармиди?

Шу пайт Фаррухнинг ёдига казаклар тушди.

— Бир соатдан бери улар мени муюлишда кутиб туришибди,— деди у соатига қараб.

Иффат ҳаяжонланиб деди:

— Нима? Қаёққа борасан? Қанақа казаклар? Яна қаёққадир қочмоқчимисан? У вафот этган бўлса, мен сенга маҳкам ёпишиб оламан. Сени қўйиб юбормайман!

Сўнг титраб, қўшиб қўйди:

— Утмишим мендан шуни тақозо қилади!

Фаррух уни ўзига тортди, бошини бағрига босиб, деди:

— Йўқ, ҳозир илгариги вақт эмас. Энди мени ҳеч ким ушлаб ололмайди, мен қайтиб келаман. Лекин, ҳозир боришим керак. Биласан-ку, мен ҳозир хизматдан, ўз бурчимни адо этишим зарур. Соат тўртгача соқчиллик қиламан, тўртда эса, бир дўстимникига боришим керак. Мен ўша ерда тураман, ўғлим ҳам ўша ерда. Эртага эрталаб яна келаман.

— Эртага эрталаб!— бир ирғиб тушди Иффат.— Йўқ, бу жуда узоқ. Мен бунга чидай олмайман. Нега ўша дўстиникига жойлашдинг ўзи? Сен шу ерда яшашинг керак. Икки соатдан кейин ўғлигини олиб, шу ерга кел. Отам раҳматликнинг вафотидан сўнг бўш хоналаримиз жуда ҳам кўп. Ташқаридаги ҳамма хоналар жиҳозланган...

Фаррух бу таклифни рад этмоқчи эди, лекин таклиф самимий бўлгани учун икки-уч соатдан кейин келаман, деб ваъда беришга мажбур бўлди.

Иффат бахтиёр эди.

— Сен шу ерда турасан! Уғлинг билан шу ерда яшайсан! Уғлинг мени жуда яхши кўради. Мени кичик ойи деб атайди. Мен ҳам уни жуда яхши кўраман.

Фаррух юраги жуда қаттиқ ураётганини сезди: энди у Иффатга бутунлай бошқача кўз билан боқмоқда эди.

Шу пайт Иффатнинг онаси қайтиб келди.

— Онажон,— деди Иффат,— мен Фаррухга бизларникига кўчиб келишини ва ҳозирча ташқари ҳовлида яшаб туришини таклиф этдим. Бола ҳам у билан туради.

Фаррухнинг келиши Иффатни азоб-уқубатдан халос этганини кўрган онанинг бирдан-бир истаги фақат қизининг кўнглини топиш эди. У хурсанд бўлиб деди:

— Албатта, албатта. Бизнинг уйимиз — сизнинг уйингиз. Сиз менинг ўғлимдек бўлиб қолдингиз. Хоналарни дарров тайёрлаб қўямиз.

Фаррух уларга минатдорчилик билдириб, хайрлашди. Иффат уни эшиккача кузатиб қўйди. Фаррух кўчага чиқиб кетгандан кейин Иффат ўзига ўзи деди:

— У мени, албатта, севажак! Қўлимдан ушлаганда, қўли титраб кетди.

Ҳақиқатан ҳам шундай эди. У билан хайрлашар экан, Фаррух титраб кетди ва Иффат бутун қалби билан унинг севажагини сизди.

У узоқ йўқ бўлиб кетганидан ташвишланиб, кетма-кет папирос чека бошлаган ҳамроҳларини топиб, Фаррух отига қамчи босди-да:

— Олга!— деб команда берди.

У энгашиб, ўйланиб борарди. Энди нима қилсин? Маҳиндан мангуга айрилди, у ҳақда ўйлаган сари дардига дард қўшилади. Яна бу ерда бошқа бир кимса ҳам бор. У эса Фаррухни деб шунча азоб тортган. Ўзи туфайли бировнинг изтироб чекишига, азобланишига ҳеч қачон чидай олмайдиган Фаррух Иффатнинг уни севишини, мана шу севги туфайли азобланаётганини кўриб турибди.

У ўз ўйлари билан бўлиб, соқчилик муддати тамом бўлганини ҳам сезмай қолди. Қазакхонага қайтиб, у казакларга дам олишга рухсат берди-да, ўзи офицер дўстининг уйи томон от чоптириб кетди.

Ҳовлига кириб, опток ўйнаётган ўғлини кўрди ва уни даст кўтариб, юзларидан ўпди. Кейин деди:

— Мен ҳозир бу ердан кетишим керак. Эски дўстларим мени жуда ёлвориб уйларига таклиф қилишди, боришга ваъда бердим. Хуллас, энди сизларни хижолат қилиб юрмайман. Кейин, уй масаласини тез орада ҳал қилиб, у ёққа кўчиб ўтаман.

Дўсти уни олиб қолмоқчи эди. Лекин Фаррух кўнмади.

— Сиз доим менга жуда меҳрибон эдингиз, ҳозир ҳам шундай илтифот қиляпсиз... Мен кетмоқчи ҳам эмасдим, лекин илож қанча. Эҳтимол, шунда болага яхши бўлар, у ерда бунга қарайдиган одам бор. Сизнинг кечқурун ўша ерга боришингизни илтимос қиламан, у ерда ваъдамни бажараман — ўз ҳақимда гапириб бераман.

Офицер ортиқча қистамади: у Фаррухнинг ўзида ҳам у ерга бориш иштиёқини кўриб турарди.

— Ишонаманки, меникида ўзингизни яхши ҳис қилгандирсиз, хафа бўлмагандирсиз?— деб сўради у.

Фаррух, унинг қилган яхшилигини сира ҳам унутмаслигини айтиб, кечқурун боринг, деган таклифини яна такрорлади.

— Саргузаштимни билиб оласиз, кейин сиз билан бирга бир одамни гутишимиз керак, сиз уни танийсиз...

Офицер боришга ваъда бериб, унинг янги адресини олди. Фаррух болани қўлига олиб, ўпди-да:

— Мен билан ойга борасанми?— деб сўради.

Бола бу сўзларни эшитиб, суюниб кетди:

— Бораман! Мен бугун уни кўрганим йўқ. У ҳар куни менга конфет беради.

Фаррух болани етаклаб, дарвоза томон йўналди.

Киракашлар извошлари мусодара бўлишидан қўриқиб, шу кунларда ташқарига чиқишмасди. Шунинг учун Фаррух яна от минишга мажбур бўлди. Олдига болани ўтқазиб олди-да, отни болага қўрқмайдиган даражада чоптириб кетди.

Иффат Фаррух кетгандан бери уни ичкари уйнинг эшиги олдида кутар эди. Уларни кўриб, хурсандчилигидан қичқириб юборди ва пешайвон зинапоясидан югуриб тушиб, биров кўриб қолади-ку, деб ўйлаб ҳам ўтирмай, Фаррухнинг қўлидан болани олди-да, унинг юз-кўзларидан чўлп-чўлп ўпиб, сўрай бошлади:

— Нега бугун келмадинг? Нега мени шунча ташвишга қўйдинг?

Бола унга тушунтирмақчи бўлди-ю, лекин ўзини йўқотиб, нима дейишини билмай қолди. У фақат:

— Мен отамга сизнинг ҳар куни конфет беришингизни айтдим,— дея олди, холос.

Фаррух билан Иффатнинг юзига табассум югурди. Кейин боланинг қўлидан етаклаб, уйга олиб киришди.

XIII боб

ТАШҚИ ҚИЕФА ҚИШИНИ АЛДАЙДИ

Дарвозайи Қазвиндаги уйда хилма-хил мижозлар тўпланишиб, қимор авжига минган маҳалда Иффатнинг уйида ҳам меҳмонлар йиғилишди. Бу меҳмонлар ора-